

陳
衍編輯

近

代

詩

鈔

下

商務印書館發行

陳衍編輯

近代詩鈔
下

商務印書館發行

中華民國十二年十一月初版
中華民國二十四年五月國難後第一版

(SS302-2)

近代詩鈔三冊

每部定價大洋叁元
外埠酌加運費匯費

編輯者 陳 衍

發行兼印刷者 商務印書館
上海河南路

發行所 商務印書館
上海及各埠

版 翻 印 必 有 權 所 究

江雲龍

雲龍字潛之安徽合肥人光緒庚寅進士官編修改江蘇知府有師二明齋詩

書江忠烈公祠壁

先生死節日是我誕生時賊焰到鄉里兒緡困羨葵三湘起健者百戰定危碁可惜世清泰先生不得知

粵寇陷郡城四出焚殺時余生於梁園東北鄉保業村踉蹌走避族父老惡兒啼聲洪足以致賊凡三棄而母三拾之最後置荆棘中母祝曰啼則死否則生賊去往祝已熟睡矣

久雨見月有喜簡魯幼峯張覲臣

秋末隨仲兄赴安慶中途阻雨

索居苦久雨懷抱鬱難開好友連朝阻嫦娥一笑來快傾樽酒賞自作主人陪可惜無佳客臨風望竹梅

余與幼峯覲臣聯歲寒三友梅為幼峯竹為覲臣松為余也

流潦縱橫馬不前茅堂下榻亦欣然要知大被同眠樂正在淒風冷雨天

周仲銘次子行通年十二能書腕力強過得明朝添一歲十三人寫十三行

崢嶸頭角見周郎十二能書腕力強過得明朝添一歲十三人寫十三行

倭患日深吳彥復刑部保初屬題小象書此寄情

鐵甲研水海將塵旄頭掩日天爲昏厝火臥薪人未起鞭驕馬嬉青春磊落吳生將家子誓向馬上殺
賊死一再請纓遭唾棄慷慨悲歌走燕市裂我舊戰袍憤擲昆吾刀千金製裘千金買妾此舉何其豪駿
馬如龍車如水誰信家中貧如洗側身東望淚盈眦與來不顧他人訾君不見信陵君日飲醇酒事婦人
樂死不敢辜君恩又不見越大夫破吳身退歸五湖扁舟一葉載名姝竭來蹀躞長安道高樓切天輝雲
藻今朝鴛鴦瓦上結霜華明日鴛鴦塚上生秋草君言愁我欲愁胡不輕身御氣學莊周鵬背不知幾萬
里跨之愛作逍遙遊藐姑射山神人居綽約處子冰雪膚神馬尻輪追及之周歷天地一須臾何必攢眉
苦眼看人世娶妻陰麗華仕宦執金吾紛紛朝暮隨榮枯

爲陳澹然作山水大軸

澹然愛我畫兼詩客中造請勞不辭紙長垂几窳筆墨懸壁爲君渲染之遠山忽來七百里低樹恰著八
九枝一船嘔啞盪春水隨君歸去知何時

渡巢湖書內子阮恭人所作梅花便面

眼前指認小山孤湖中有孤山和靖風流古所無抱得梅花高骨格人間何地不西湖

再疊前韻答遺園老人

光緒甲午秋日本并朝鮮易其民風政教其國中君子有避至中土覓桃源者乙未秋少鼎出

都遇諸海上歸述之遺園作詩傷之因次其韻

或爲猿鶴或蟲沙鳥墮空巢大喪家文物上儀淪糞壤武功險隘失褒斜有人臥采山頭蕨何處幽尋洞
口花難得東坡諳苦味春盤喜見蓼生芽

江甯晤顧石公

壯有歸山興惜無歸山福百計驅我來又插塵中足先生道力堅高臥龍潭曲朝絮龍潭雲暮飲龍潭淥
粗了向平願不挂老耑辱門前五株柳披溱東風綠生平志陶潛羞入先生屋

門前五柳鄭蘇齋題聯云
門有五柳樹書成一家言

肯堂歸自淮上以余曾贖其行出詩見示並爲耦耕吟申沮溺之意各答一首

無貧無富世大同降及衰世有無通千金不受一金受翰林昔野今官窮

昔官京師吳倉石贈句云千金不受一金受無怪人呼野翰林

老聃治生費用嗇細如曲穴嘶寒蟲莊生放言頗快意鯤鵬運海天倍風嗟子飢驅走淮海歸來但見甌
塵封興來請學樊遲稼大哉夫子不如農

巢父許由稱大賢鬻堯售舜逃深淵何如長沮溺偶避世獨與窮途一老相周旋富春老漁殊可憐學
巢學許又誤焉不臣天子友天子客星自待真欺天嗟子贈我耦耕篇一吟再吟心凄然陸沈大地將成
海沮溺歸耕何處田

送王寅臣往濟南兼寄哭其兄伯唐

哭死何堪更送君依依早斷故人魂生前作合兼師友客裏相憐亦弟昆隻雁南飛過日黯雙棺東下莽

河渾伯唐死國之明年與其配段恭人已看亮節齊天柱英六與天柱山相望斷港枯槎枉自存

內子以東坡生日生余以東坡死日生戲成短章

生死一東坡形影我與爾不信修髯人化作娟娟子問之戒和尚東坡前生為戒和尚理必衷一是是男還是女是生還是死世有學道人請下一轉語

附內子和作

東坡真人游戲聊爾爾安見女兒身而非奇男子莫問戒和尚我聞佛如是非男亦非女非生亦非死以無所用心發大自在語

同夢湘肯堂走狼山訪去秋哭亡友王伯唐處因刻石記其事

竹杖芒鞋出郭門愁雲四塞天為昏勞勞一世皆虛影寂寂空山有斷魂愧在生前稱死友憶從夢裏見

真人伯唐死後入夢兩次海枯石爛知何日萬古難銷墨淚痕

夜讀楚辭遠遊招魂諸篇感亡友伯唐疊前韻

故人好奇服伯唐生前喜着方山子冠長劍離裝高逝壓塵溷別開世界涼何所無芳草蕪穢難為香哀哉濁醉人

永戀不死鄉焉能忍終古怨此壽命長先驅叱風伯四海聊相羊天地愁圮側魂兮爾安翔獨悲後死者冥夢墜渺茫折枝精瓊麤齋爾飢魂糧更掃朱塵筵白玉為君牀魂兮歸未得竟夕起徬徨出門叫九關

盛夏天雨霜

權期已滿，昕夕盼代者不來，上書乞退，肯堂夢湘各用東坡韻，挽留適余讀陶集，再疊前韻，感淵明簪纓胄，趨改田家裝，不作西山餓，焉知北窗涼，述酒拓奇懷，采菊得古香，興來動高致，幻彼桃源鄉，不知世晉魏，悠哉天地長，嗟我農家子，分牧南山羊，倦鳥觸四隅，習習籠中翔，歛噓身後名，游烟墜微茫，安能百年內，枵此五斗糧，幼譽憎龍尾，同縣，龔心容，周龍光及余有三龍之稱，余其尾也。空穴遼東牀，重感故人意，私心獨徬徨，春華悽已萎，疇堪實秋霜。

曾習經

習經字剛甫，號蟄菴，廣東揭陽人，光緒庚寅進士，官度支部右丞。

石遺室詩話剛甫五言古工，爲選體近體詩，則出入唐宋。

壬子八九月間所讀書題詞十五首

黃竹三章悔可追，周家仁厚有流遺。君王寡樂吾真信，不待歸途哭盛姬。我徂黃竹三章，眷念民瘼，其詞甚哀，又繼以自數其過，此周家

仁厚開基之效也。穆王此節便應獲沒，祇宮雖有徐偃，其不足以搖天下明矣。然於此見當日遨遊實鮮樂趣，非止居樂甚寡也。穆天子傳

雅怨兼深見性情，交親不薄涕縱橫。君王故有髮生歎，未覺中和始可經。予建沈學敦於性情，鍾記室謂情兼雅怨是也。昔王弼州讀

帝承明廬，便回環往復百數十遍，不可休。予於初秋涼氣發，一篇亦然。每至子其寧，爾心交親義不薄，蓋不知涕之何從也。曹子建集

漫道凡夫聖可齊不經意處耐攀躋後人率爾談康樂且向前賢學製題

康樂詩記室贊許允矣至其製題正復妙絕今古倘張天如所

謂出處語默無一近人者耶柳州五言刻意陶謝兼學康樂製題如湘口館瀟湘二水所會登蒲州石磯望江口潭島深迴斜對香零山等題皆極用意惜此旨自柳州至今無聞焉爾 謝康樂集

康樂玄言餘晉法宣城麗句啓唐風馬駒踏殺倘成讖後代終輸臨濟雄

玄暉風華明豔實開唐格當時鍾記室即稱至為後進士子所

嗟蓋至其名字秀句有唐一代沾溉不絕不止太白再四稱服已也大謝則終唐世只柳州一人問津他無聞焉譬之禪宗不幾讓臨濟獨盛耶 謝宣城集

不安唐古氣堂堂五言直逼華子岡後人未識儀曹旨只與時賢較短長

柳州五言大有不安唐古之意胡應麟只舉南礪一篇以為六

朝妙詣不知其諸篇固酷摹大謝也 柳河東集

梁陳藻麗入唐初四子雍容語甚都沈宋王岑誇格韻若論絢素此權輿

初唐四子承六代藻麗之製陳杜沈宋繼起乃漸工體格至王

孟岑高加以神韻而已惟輪之功四子不可沒矣 初唐四子

陳杜精思沈宋才有唐詩格此胚胎問年三百饒於律坐見諸賢揖讓來

胡元瑞以為有唐一代律有餘古不足歸咎於文皇帝京篇不

知當耳既以詩賦為制科則拘限聲病專攻體格勢所必至矣四家者實唐詩格調之祖少陵必簡孫乃集一代大成楊誠齋所謂三世之後莫之與京也 陳杜沈宋集

沈憂涉世言幽約狷介為文氣苦辛若信杯樽足藏酒酣歌猶是太平人

唐文憲澀極於樊宗師開其先者次山也然次山究為雅正其

所編篋中集如沈千運孟雲卿等六七人咸與次山同聲氣蓋於唐古中自為一格非盧玉川馬河南比也皇甫持正心儀次山而以其碎為可憐不知次山固自成爲一種狷介文字也 元次山集

慚皇官職偶同公寥落千年悵望中但得晚來修白業不妨文字馬牛風

予官右丞日何翺高以詩戲之曰此真詩人官職也自魏文質

無底何敢比輟川特以夙敦禪悅於公良有同情萬一他時有會處則某甲雖不識一字要須還他堂堂地做箇人 王右丞集

兼工衆體盛唐時屈指王岑有定辭強與較量聊舉似玉階仙仗早朝詩

盛唐衆體皆工數右丞嘉州早朝詩岑尤特絕元瑞欲推右丞

余未許也
峇嘉州集

少年卓犖頗經奇老去爲文多素詞我愛齊梁遺製在凝香畫戟郡齋詩
蘇州少作多豪縱餘清澗似張曲江晚學陶世稱章柳其不及

柳州者少一嗜耳然郡齋燕集一篇
固與儀曹南礪爭俊也 章蘇州集

水北水南起隱君玉川破屋老攻文孔經自信衣裳在惜哉盧傳今無存
許彥周言春秋盧傳僕家有之今亡矣辭簡而遠得聖人意爲

多是盧傳宋時猶存今真不可見矣孔經在衣裳玉川自信之語述其終身困窮
於道當有所得退之數干時宰猶嫌躁進無怪其不敢親涯浚矣 玉川子集

平生選本不挂眼偶愛茲編亦大奇親與線裝完一册迹來閒却已多時
予向不受選本詩文頃偶於地攤上買昌黎詩鈔一册親與裝

線不覺失笑
昌黎詩鈔

次山有文碎可惋東野佳處時一遭颺下甜瓜栽苦瓠楚風當日亦心勞
竟陵公安爲世所斥然明自隆萬以降摹擬剽竊流弊萬端楚

風一倡途變爲詭俊纖巧文章與世運升降蓋至是而明業亦衰
焉至其小品文字間亦冷雋可觀又不容概沒矣 譚友夏集

花朝江亭讌集

疲蹇倦皇路游遨欣近郊所思緩鬱紆得閒輕脫逃茲晨始妍暖條風遞林梢曠朗兀崇基棲沖祕神皋
遠矚春稍稍側聽鳴交交招邀飲文字約略窺夷巢履迹歲既深顛毛時屢搔浮沈憫慮新遷斥嗟物勞
適道貴無違委心信所遭悵望斜川遊流連步兵庖諒無自調情且進盃中醪

初夏崇效寺讌集牡丹未開

丁香亭亭玉雪色梨花才似過寒食四月春陰未牡丹遙帷悵臥兼愁疾高柳黃塵百萬家却於蕭寺問

年華老懷正覺春遲好明日來煎穀雨茶

夜聽小僮吹簫

簫聲臨夜過堂坳絲竹年來興欠豪說似衛公吾亦肯月中吹笛薛陽陶

題汪吏部半山課耕圖

投老田園弟與兄眼前歸計近春生題詩明日君應答我得家書共此情

清明日同社約訪萬柳堂遺址予到遲社散僧方掩樓扉獨自登樓凝望蒼然晚暮矣

舊栽楊柳半成薪慚愧尋枝摘葉人異代同時俱悵望良辰佳約阻逡巡固知萬事歡難並却恐孤遊迹
易陳獨立小樓無可語偶從暝色得清新

法源寺丁香花下

車馬尋常去殷麟春光報答果何曾千年戰伐空陳迹滿眼芳菲似中興忙裏偷閑甯惜醉花閒著語故
相矜沈沈萬念旋生滅媿爾東廊掃地僧

雪晴江亭社集

匝月重陰正鬱陶稍晴妍日麗神皋偶陪杖屨經中澤試拓軒窗聽伯勞春色返人應倍好鬢絲流恨只
空搔文章末技今無用報答風光歲一遭

南河泊

春遊戀近郊勝處未可置荷泊遊亦舊歲輒一二至襟袖發真想心賞屢幽異有如溫陳編意外工文字
軒車隘通衢此或沮沕棄豈知埃塈外一泓足清泚荷芰晚未茁茗荈新堪試水鄉吾生長愛水固其理
淵淳無近姿迴轉有餘思雖非川上嘆似是濠濮詣解帶差爲適濯纓良可泊懷哉劉凝之棄官清潁尾
穀庵先生招遊淨業寺

臨流臺殿影參差碧瓦朱欄自一時已倦春遊花正發未和哀樂鬢先絲烹魚漑釜能生憶去軫抽琴欲
致辭舊是承平觴詠地百年寥落到今茲

趙香宋同年約法源寺看丁香

遊心難再羈迫此青陽暮投鞍事初地把臂獲良晤沈沈大雄殿丁香覆兩廡峭蒨資文字香潤及巾屨
連簷竟晡靄久坐宛清曙固知佛日長稍覺天倪露平生趙御史補闕匡王度暫斂風靈手正要玉雪句
入世有生老隨緣無迎拒長年眇歡惊及春理芳緒餘花今未歇陳迹昔已屢初非兩眸計似深一宿悟
達生幸能託淨義略可樹春芳固外物且任騰騰去

天寧寺牡丹

流芳迅不停杪春猶紆餘盈盈牡丹叢初日秦羅敷好色始國風意行不趨起障扇章臺街走馬城西隅
入門眼先明紅笑語則無誰謂驚豔篇小說等虞初生物日趨功愛好理詎殊想見造化身以此恐凡夫
年年看花游未肯自作疏共同車馬塵誰真達者徒斜陽經塔院烈風與之俱高標兀崢嶸聖像森模糊

半日溫柔中乃復肝膽麤

送楊昀谷道長

昔賢每惜中年別此地曾聞大隱居扣篋待商揚子字經時遲枉阮公書固應不寐宵頻起却悔相過近較疏寥落故人今可數秋風庭樹意何如

上巳同人集天寧寺晚飲石遺寓齋

好遊共城郭觴詠連上巳豈伊排日歡固云暫得美主人陳后山閉門參太始春風入戶牖明月耀桃李慨然撫流節拂拭事巾履既遊還命酌澄觀究今視草堂迹未掃邇來三百祀年年惜餘春日日取寸筵政爾事言句終然趣轍軌淨業妙雙遣澈悟惟一唯逐世謝勇功端居貴明恥庶屏元規汗來歌滄浪水

牋紙

河北膠東寫玉臺絨璫常是手親開難將暮雨瀟瀟意寄與朝雲葉葉裁二月桃花輕著色經年龍腦暗生煤中庭薰草饒佳潤只是當時却費才

自題蕉桐涼月畫扇

蕉桐經雨色逾淨雲月通宵氣已秋欹枕乍聞初鴈過拂簾低見一螢流

偶述

九十慈親免杖扶六旬兄弟一燈俱夜間小婢教和藥予家向自製藥予人日起諸孫與上書後院雨餘抽竹箭南

塘水滿放鳧雛較量前哲經千品慚媿新名署特夫

田居雜詩

摒擋浮名辦一邱得坻無意更乘流天教小試鋤犁手欲看黃淤十里秋
蛙聲閣閣水平畦秔稻初秧綠未齊雨後斜陽紅較好小船搖曳過河西
夜起微茫月墜霄青蘆風動葉蕭蕭平生久慣江湖味却又關心早晚潮
天生粉本奪徐熙百草千花日弄姿第一撩人秋色現潮痕半沒水紅枝
牆陰過雨艾蒿光隙地曾無車馬妨老大勤農甯惜力自鋤瓦礫種黃桑
新鑿方塘號鏡渠晚栽楊柳尙疏疏一詩與結明年約半種菱荷半種魚
並舍荒蕪足數塵黃昏飯罷每流連此間添箇書堂好分貯湖樓種樹編
夾岸穉楊水繞村浣花今有灑西原春前儻更逢蕭八乞覓桃栽五百根
故書百本肯相隨長夏村莊日倍遲溫罷公羊纔餅熟家風還是秀才時
白髮填詞吳祭酒他鄉耕稼顧圭年吾生頑薄誠知趣回首風塵一愴然

遣僮楊漕種樹

每逢春到便栽花準備堯夫小小車未許旁人知此意相逢只喫趙州茶

和芝庵春陰韻

又見輕黃上柳條，海棠紅映舊經巢。
年來稍覺風情減，坐對濃春作解嘲。

田居春感

漸緩愁年入渺漫，村居二月正嚴寒。
未應開口逢人喝，且試將心與汝安。
遲日野陰殘，照在新湖春漲斷。
冰寬荷鋤已是餘，生事報答東風只肺肝。

盆松

結根寸土勢扶疏，謾謾高風入座隅。
乞與仲圭臨尺幅，石橋南畔第三株。

題陳后山妾薄命後

瓣香不忍更他師，壓卷今傳薄命辭。
一死實難天地窄，世間方笑後山癡。

麓老既乞罷客過之方，灌畦菊語客曰：我頃頓問始有園居之樂，惟每傍晚澆花望平西之日，覺

甚異也。予聞其語而悲之。

投老歸來幸未遲，菊叢猶贖兩三枝。
可憐看到平西日，不是尋常顧飯時。

自題荷葉水亭畫扇

老退耽書愛日長，披披荷葉晚風涼。
廿年不見蓮韜館，每到臨流憶故鄉。

端午泛舟湖河數里

楊花燕子爭輕俊，五月村莊似晚春。
過雨斷雲時做暝，綠源盡日不逢人。
勞生有暇天應直，佳節無聊酒

覺醇搖兀小舟忘近遠拔蒲歸路月痕新

題耆壽民見山樓圖

紫陽晚歲求超悟臨濟宗風只活埋莫但亂書堆裏坐年來蹤迹半田居

送汪子賢還休甯

桑田滄海人間世白嶽黃山歸去來謾謾澗松原絕垢青青陵麥古含哀久經喪亂添霜鬢暫卷蒼茫入
酒盃離別尋常無可恨但勤書札手親開

感興

梧葉霜黃蓼穗紅秋光都在蕩搖中枯蟬閱世餘殘嘒歸燕將雛傍露叢長夜醉鄉愁失日楞伽心海故
飄風凡夫未有安禪法對此茫茫百感同

袁珏生所藏潘蓮巢焦山圖

滿眼江山涕淚成廿年浮玉舊題名故山好在今難訊奈此江流日夜聲

送溫毅夫還山

尋常惜別到今非反袂翻無涕可揮下國未聞楫實美故山誰信藥苗肥鴻毛生死聽時論燕羽差池賦
大歸去與遺民談野史一亭宛在雪初飛

二月十一日大風雨

入夜風怒號雨雪倏兼至晨興啓半戶浩浩勢未已河流驟生波簷雀俱斂翅春鉏正入手今日適無事
坐讀淵明詩閒寫隱居字臨舊館 壇碑我牛緩齧草亦似有閒意一盃聊引滿不覺及三四村醪雖云薄餉我
一美睡

夜晴有月

飄風驟雨遂終日星月娟娟夜復晴出戶偶然成履迹隔河隱約有歌聲注湯煮餅供宵餓兀坐挑燈似
故情真妄世間誰與辨明朝叱犢看深耕

任公歸國話舊感喟有作

更生強聒曾何補楚老相逢泣已遲大陸龍蛇先有識納隍蕉鹿世成癡及關李叟聞長嘆歸國梁鴻賸
五噫最念望門投止日眼中豪俊已生髭

鄭錫光

字友其號澹菴福建閩縣人光緒庚寅進士官翰林院編修

石遺室詩話澹菴以宿學入詞林未幾卽儵然引去精內典喜與浮屠氏游與鼓山苦行僧古
月極相契嗜飲少作詩然寄余數作皆工穩耐人尋味歸道山後始得其遺稿數十首則純乎

七言絕句說偈如寒山子者今未錄

里居聞石遺內調甚喜得張岳州詩知殊不欲行竊廣其意並示岳州

前賢五十始爲詩五十爲官事大奇詩好已居吾輩上官遲彌耐世人思低徊江漢行將老旋轉乾坤或此時官職詩名元不礙一麾張楚是吾師

和石遺寄懷之作

不薄稽生七不堪相從情味最深醇忤時幸許言無罪諸俗應憐老未諳尺札趫然天外至夙因當向佛前參平生婚宦銷磨處根觸無端未忍談

次石公韻懷珍午並寄石公

清貧太守似湖州贏得剛場百不憂劇郡梗書寧厚祿窮鄉株守恍詩囚傳聞漢上常聯句乘興山陰欲買舟一事想君開口笑經師新辟賈長頭

黃紹第

紹第字叔頌號縵庵光緒庚寅進士官湖北候補道有縵庵遺稿

汪鷗客爲余繪圖八幀略紀里居宦迹因各題絕句一首

彝陵山水過江奇仙鯉清泉訪故祠留得元明遺墨在聯牀淒絕鶴鶴詩姜孝子祠
客兒詩句右軍書靈秀長留晉宋餘如此江山真負負故鄉更有舊田廬永嘉山水

瓊園有山茶花數株廿年前手種也自官鄂中與花別久今年花盛開感賦二絕

烏衣省識舊巢痕惆悵當年拙政園莫笑蘭成蕭瑟甚狂花滿屋自關門

題金蓮村望江樓

海上蛟鼉汗漫游一椽突兀避橫流萬家雲氣淒清甚怕上元龍百尺樓

陳懋鼎

懋鼎字徵宇閩縣人光緒庚寅進士官外交部參議

齊齊哈爾遇林葵雲

卜奎去閩嶠鳥飛猶半年鄉人來者誰將母我爲先忽驚見林子雪中足趫然借問自何方桂管西南邊
携婦涉關塞不顧寒無氈婦爲女中師身列幕下賢破荒出宏抱但憑願力墜上農載耒耜榛莽皆良田
歲晚冰蕤我志士當勉旃

葵雲爲談大將林興珠事

鄉人爲我言數典乃足熹距今二百年已有林侯事林侯木吠堯解甲實後至五百藤牌兵斥邊求自試
收回雅克薩飲江無虜騎降人敢矜功非種分開置林宗竟興臺雅城亦淪棄豈知大帽軍會奪老羌氣
老羌運殆衰健鷺忽垂翅大敵在何許海鬼善擊刺竊取吾南塘三練不恃器哀哉樓船役閩將叢詬累
誰當洒鄉恥要必振先墜壞裳尙能軍墮指寧知避倘從屯田來吾願爲職志

自昂昂溪至齊齊哈爾道中

黃塵滾滾淡斜曛亂轍枯槎淺不分天影四低平野盡一行黑點是牛羣
一帶寒林路外斜荒風起處絕柄鴉平原小作坡陀勢障得前村十數家

毋我忘篇

剝啄復剝啄郵卒到門垂巨橐金湯了烏射日明空外共識郵搗聲

郵卒叩門聲響異于常人名曰郵搗

老翁聞聲不遽起

鄰窗女兒獨刺耳女兒十九乍斂髮性愛海郎同生活窗中手種毋我忘

毋我忘花名藍花草本

描作花箋寄天末

茶罷常調辟亞奴也琴目送壁上海船圖海船載客美洲去絃遲歌澀心鬱紆太平洋水能移情合衆國女

工奪夫謂言郵郵附書至去日誓詞動天地自從身到東半球五度來郵無一字毋我忘毋我忘藍瓣瓊
碎翠莖長一花一葉難相當微風裊裊搖孤芳胡爲錢刀逐異鄉疆環約指堅且光吁嗟歸來乎海郎

京師陷後過法源寺

國破何心厭顛沛憂甚暫思脫鉗鈇出愁豺虎滿道邊走覓鐘魚息方外香花安隱伴龍鳥院宇清涼出

蟬蛻金光佛面俛看人似詔法力通三界豈知擁護託因緣終賴俗緇能狡獪僧與日本僧善寺歸日本兵保護閱人方丈禮貌疎無主南冠天地隘平生所善寒山子何處雲浮避傷害庭前音苦來烏鳥天外風悲入松檜無情惟有老經幢飽見興亡了不怪極知我身非我有願借禪床安四大

隆宗門外直廡作

瑣瑣蕃椒聊纍纍熟羊棗蓼花雜瓠葉被階自媚好草木樂無知胡傷我懷抱北庭軍書急寇行疾于掃不聞安王城豈復顧豐鎬妖星躔紫微荆榛蕩周道非無君子人旦夕不自保委蛇王相國承詔色枯槁出門復入門但見日衰老側聞中興主開物邁軒昊庶幾邀天靈危命期再造落日禁樹紅矯首心如擣
倫敦贈陶七彪部郎在寬

上蔡中郎渺典型百年爭寶鄧懷寧腕閒點畫忘秦漢肯入時賢墨妙亭一記冬官購未遲輸攻墨守盛斯時憑君演取東來法百國工師聽指麾
胡國紛來劍佩鳴望洋徒使淺人驚風雲變滅歸何有棐几蕭然古性情
拂衣偶作瀛洲客報國惟存儒效篇相館卽今皆廢庫平津禮士獨能賢

到京兼旬夜坐感懷寄穎生丈

瘦騾千里願休假蹠躩長亭怨再駕何人得似郁離君每度相逢神愈暇淞江空作去年綠雲英天死靈芸嫁臨歧十日幸見須過浦一舟寧有價停杯不覺意念深撫鏡共憂毛髮化花柳無邊波浪急佇望弗

及禪手謝宣南士，揆開何闊。卷東老屋君所舍，別來事事如去時。惟有藤陰長，過架風光笑。客來不早道，路逢人氣先。下信知疾走多少年，且溯墜歡入靜夜。平生意行無留迹，夢裏梨渦奈嬌。姁詩爲供狀，君證之。犯徒以上罪，不赦。省取今年羣玉坊，櫻麥堆盤作立夏。

次韻釋情憂旱

儒冠莫爲時所憐，出膏不潤惟自煎。譬諸草木入金冶，鼓鑪立使飛灰烟。蒼生政復關許事，斗室強欲知農田。長言憂旱擬雲漢，一孔豈謂能通天。蒼蒼施仁會有擇，因材培覆無私偏。荒功棄智任年歲，萬井坐廢高曾前。病畦抱甕死苦晚，將以機事私少年。啓儒腐官兼游手，今我况已叢三愆。閉門槁餓猶伏罰，孽由釀致非株連。跳身幾輩去謀利，頗用富厚爲世賢。願驅廿人事溝澮，并化海物成糜饘。明星爛然照下土，復君詩句傷宵眠。宣尼平生學禹稷，矢志何曾名一錢。

寄張岳州四十韻 丙午

張郡久兄事，乃今始吾丈。因悲歲月征，坐見髻鬣長。滄桑得契闊，出入勞夢想。我爲孤飛蓬，君作一鳴仗。騰聲信無遠，擇名能自饗。正羨作計工，遑問移官枉。南風吹征塵，我來君則往。穉情先我至，失君方悒悒。巴陵五月秋，洞庭納萬象。詩情見軒豁，意界足寬廣。何物執金吾，猥欲換清賞。所嗟旁郡水，流亡賴轉饒。定解求牧芻，豈謂守木強。郡齋直宴暇，朋好數疇曩。應念取經徒，松枝已東嚮。小知慚大知，果腹適莽蒼。曠觀了不異，還歸奈用罔。兔葵燕麥閒，春物傷飄蕩。携家且過里，生子喜在襁。廿年假一息，暫得食吾壤。

思當厚親知陳義慨以慷長老默不言意似責頑獷獨有吾穉情照人玉山朗憐我足生繭應我聲如響
津亭疲馬嘶相將俱北上去鄉故遲遲入京殊惘惘吾親望我來手爲開書幌斧斨雖破缺生事堪俯仰
庭柳漸婆娑高翠凌清沆此亦君所憇憶否舊軒楹人生類多求輾轉挂世網蓋頭把茅足充氣四海放
可居惟專城行意猶運掌誰能逐夸夫官職作題榜穉情昨貺君憂旱雲漢傲旱固不太甚一雨卽蕭爽
吾憂彌無涯相率歸何黨便緣穉情詩蝦蟹觸疥痒湖海闕寄聲漂搖自引吭臨風四百字持與驗修養
喜聞詔赦戊戌黨獄有懷張菊生

嗒然灰木閱瀛環朝報傳來一破顏南部黨人聞已解東家去婦計當還春風永巷恩終重落日修門願
未屏楚楚銀袍在城闕更誰初祖念開山

將去英倫書居停女葛悌册子

七尺昂藏獨立難飄然挾策復東還願卿勿倚年華盛及取春風問指環

秋

已分微躬死惡氛豈知留命過秋分侯王邱坂千車走文武臺城一炬焚比屋左言真若性
食相矜左言
若充街高鼻動成羣收京不用懷諸將早識今非古所云

英兒生

過家育子仗天靈向若咳名證客星人事行如雲變幻巢痕省取霧青冥三洲水土強吾種兩月風濤鍊

汝形便道與官充水手肯將耘籽累添丁

乙卯冬日送高蔭午出都寄似穎丈乞和

平生郁離意深厚介君子我曾恐後論交人境二十秋白頭如新常八九神君一見識溫粹三已無慍真
耐久可令賓主專江西暫喜因緣結海右我身木雁藏妙用出入無能作輕重臨事惟知坐嘯了投分直
欲歲寒共門前古泉澄不清堂下新樹種不成外臺舊德那忍述明湖秋風空復情一場拙計足牽累不
爾曷貴求友生復來襪被從我館世變喧喧心寤寤未嫌底裏傾更盡只惜期程去休緩豈其娶妻必齊
姜百歲猶樂思桐鄉江州路遠家却近燕市景短情方長憑君寄聲郁離子風味相似難相忘

劉光第

光第字斐村四川富順人光緒□□進士官某部郎加四品卿銜參與新政有介白堂詩集
石遺室詩話斐村筆力雅健思路迴不猶人讀雜詩中文鳳見季世一首不啻自道龍麟脯醢
真有詩識突然被禍視杜伯堅尤慘也

峽江巨石奇惡賦詩紀之

至竟游人不可遮多情怪石列如麻丹黃粉碧青千狀龍虎龜蛇鳥一家鮮甕落穿嬉鬼國箭船飛過簸

雷車輸他泛到天河去拾取支機伴客槎

至家

一別縉塵樂意真風潮雨雪轉悲辛時危易淚偏經險家近能歡况接春隔樹鄉音山鳥識歸船人意落
花親入門夜奉慈幃話猶恐兒勞促退頻

福田寺

寺僧春澄精醫
化去十數年矣

樓閣劫灰重春深萬綠濃客來尋大藥僧去有蒼松壁雨長垂畫溪雲不掩鐘石橋漁唱遠相送過西峯

讀易洞

在富順西湖之壩
宋李見讀易處

易學古在蜀賣香邛夔間何人占烟月復此注藏山石壁天心滿湖樓客語閒我來借孤榻清夢藕花灣

寶鵝山訪曾處士

長松不斷春古徑少逢人中有青霞客今成白髮身鈍吟天自老熟醉道非貧相送無言處殘陽在水濱

天河

自處高明地誰知顯晦緣幾人拋好夜一水補情天今古此顏色星辰託渺緜月涼能久坐何事障孤煙

瀘州忠山訪來青園過江山行泛龍馬潭遊古沖虛宮四首

一鳥坐樹言已過春之半游興濃於雲好風吹不斷言訪來青園幽軒勝臺觀開門看大江白日中流亂
荒塚散牛羊好山盈几案人立綠陰寒鶯啼落紅散中有一花承邱壑胸次爛爲我作墨蓮放筆得適得

不虞錦繡谷復覩陂塘畔春暄與夏涼虛實各成玩籃筍下忠山幽意非汗漫

春思如藕絲將斷忽復連看花興已引尋幽賞方延夕照沙上斂江樓天際懸雲陰壓暝樹人語亂春船
中流駭軒簸風起浪拍肩下有豬婆龍彼豈擇愚賢去年陟方山暴雨傾崖顛笠屐走木末幾墮如飛鳶
乃知天老意習厄游人緣無險氣弗奇得試而倍堅氣奇心自正道豈殊天淵

登山行數里天影乍如墨與夫絕飛塵力疾赴暝色頗喜僕役懷亦入良辰逼望見冲虛宮塵慮倏而息
蓬萊在東海何以翦羽翼野航坐詩人山容笑相識竹風意欣欣松徑陰密密鐘鳴潭愈空客歌花自默
手眼同讀碑好句催雲黑前盪刻卓海帆
五言詩一石奚奴發狂懼披榛忘午食始知心迹閒雅俗均有得

長螺泛清涎曲蚌浮半殼片秀吐波心白雲隨漲落羣山若渴龍一一俯頭角想見眞仙人神淵施控捉
煙波有靈氣風籟餘仙樂古亭一振嘯蒼翠落松栢憶昔下夔門淫預玩青駸兩孤鎖彭鄱三山鎮海嶽
不圖流歸停共得鑿止學天巧秘奇尤地幽謝追琢溪風吹我還無乃忌吟卓

夢正之

君從何處至彷彿得平生把臂相悲喜回頭失送迎半窗殘月在四壁亂蟲鳴起坐緝遺藁淒淒竹露清

山居

山居繡畫俯平臯小住清安亦足豪花氣浸人浮蕙沼天風吹夢瀉松濤連筒一水分巖細卷幔羣峰入
戶高梧葉滿階秋色裏碧雲涼月讀離騷

玉液泉

希夷大筆入雲根，風骨高奇氣遠吞。
地接鳳臺棲楚客，水穿龍窟出荆門。
石閒萬世雷霆鬪，樹底雙橋日月昏。
別派一泓清照我塵容，亦喜在山尊。

峩眉山頂見月

新月峩眉埽碧天，峩眉山影鬪嬋娟。
山藏蜀國逃封禪，月逐滄洲照謫仙。
遊客自生千古思，老僧留待一輪圓。
未知畢世當來幾，今夜杉西坐看年。

峩眉最高頂

在錫瓦殿後

白龍池上走輕雷，萬瓦如霜日照開。
詩客入天爭秀骨，神僧埋地結真胎。
三秦鳥道衣邊接，六詔蠻雲杖底來。
南北風煙通一氣，雪山西望是瑤臺。

夜燈

陰火灑然海上生，名山懷寶肯藏精。
二更出地金銀氣，萬丈騰空木葉聲。
久抱塵心傷黯澹，遲來世界住光明。
如何無盡漫天燄，不照窮簷照化城。

白蓮

野風香遠忽吹回，一片明湖淨少苔。
殘月自和煙際墮，此花方稱水中開。
碧波瑟瑟情無限，玉佩珊珊望不來。
姑射神人貌，天末乾坤可愛是清才。

光緒十七年十月二十二日盜發明兵部侍郎總督張公同敵之墓獲焉治如例廣西巡撫以聞奉旨下三法司議議如之墓在臨桂縣城外十里北坐南向骨殖猶全由縣官斂而重葺之於是刑部廣西司主事劉光第閱題稿愴然慨之而賦詩焉

暴雷虺虺風騷騷督師之頭三躍高血身挺立肉倔強掉落豪帥手中刀督師太岳之孫子與瞿留守同日死留守還歸拂水巖督師就葬唐家里當時若無楊藝哭忠臣肉飽烏鳶矣里中生員唐兆祺世傳祭田祭督師自從乾隆賜諡後赴墓拜埽年年期日二十五月十一不知死日是生日昌平雲氣鬱橋山荆渚愁波連漆室何來地下摸金郎鬼氣所射綠眼芒手揮金椎唱青麥莫家兄弟不可當萬骸飲血傷陳魄忍動文武忠義骨此骨南撐半壁天前身北射中原月漢寢唐陵皆發掘玉魚金椀終銷缺青犢赤麋徒哽咽快哉三賊盡成禽寶鐸依然殉靈窟憶昔瞿公隔屋囚四十餘日詩相酬形骸久已外天地留此大明土一邱虞山憑弔忠宣墓陶公種梅賦詩句欲乞吾師買桂花補栽忠烈墳前樹

時張安圃師署理按察使

羅浮山中聽客彈琴

一峰中作一晴陰四百峰前客鼓琴聽去雨風隨變化坐來天海得高深松篁隔水分仙韻猿鳥空山定道心曲罷暮煙巖壑滿樵歌踏葉出西林

厚村還蜀作詩四首送之

北風三日吹倒人，冰土慘裂乾無塵。羣雀蟄簷老鴉伏，何當途遠平生親。路人寒縮弗忍顧，况我與子同
一身。豈無衣裘覆爾體，亦有羊酪借禽珍。中原風雪幾千里，曰歸遘此搖落辰。恆山沙堅血馬足，黃河冰
合舸龍鱗秦關蜀道更險苦，使我別夢隨歸輪。可憐欲別未別時，強作慰語含悲辛。水仙初苞膽瓶凍，梅
花雖笑慘不春。常時每詡丈夫志，對汝今爲兒女仁。

別時弟作家園圖，動我鄉愁涕如屑。池中鯉魚長尺半，竹閒好鳥調新舌。霜清龍目爛垂珠，月冷梅枝曲
蟠鐵。對花遙憶種花人，往往空樽過佳節。嬌兒七歲長都中，吐語已如嚼冰雪。泚筆題詩滿其上，亦說思
鄉情。內熱落句直仿離騷，經作書還擬龍門闕。當筵驚起老兄弟，一笑別腸幾拗折。京洛風塵縉客衣，榜
山松檟青墳碣。何時攜兒歸拜塚，且與園花說離別。

孤鴻分飛寡鵠翔，我有一妹稱未亡。頗聞撫子在嬰幼，乳點淚痕淒斷腸。自生女子名桂仙，想見丫角簪
花長。生平未覩夢不得，安得抱之置膝旁。今年三十妹初過，早梅十月含冰霜。一妹以十月生，今年甫三十，守志已數年矣。杯

盤燈火亦無分空，寄壽簡稱寧康妹。顏豐皙身頗健，不如弟貌瘦。以黃弟歸，豈免問及我髮凋齒豁心空。
強一官奪守袁彥章，四旬稱翁學歐陽。會當罷去返鄉井，免與骨肉遙相望。

上界仙人足歡喜，萬頃瑤池開玉葉。手提日月擲坤圖，虎齒磨天嚼珠髓。青鳥黃鳥啄蒼昊，光倒八極垂
九尾。不惜海山吹作塵，談談旁窺攢萬鬼。鞭撻神龍笞紫鳳，溟嶽傾簸翻雲水。星宮羽從酣瓊漿，神仙飽
食愁不死。猛犬狺狺吠閭闔，欲射天狼乏長矢。剖心喫血請羣命，那信濁河清淚泚。茫茫塵世向誰言，吾

弟聰明差得擬山中去掃舊茆廬待吾歸纂游仙紀

送唐融川大令宗海之任來賓

清端昔論羅城書赤腳坐臥幾不與水湯山劍更烟瘴
猺獍狼弗予憎薦章遂有合州行澤州相國史
筆矜堅剛澹泊豈無自動忍直比龍場丞後來左侯督陝甘大書茲書以厲能乃知從僕環泣時無異講
學相凜兢吾鄉唐子令來賓喜無同年勸繳憑羅城咫尺芳規在清官有譜知相承老桑怕奪柳州席掀
髯一笑豈所朋况子活人有奇術餘事亦並荆關稱我帆南溟上羅浮陽朔山水到未曾政閒試寫象州
山寄將無惜墨一棱

送雲坳出守梧州

帝二十三載丁酉二月春寒雪猶厚垂楊無葉杏無花似怕離筵照杯酒吾家雲老古遺直十年簪筆今
懷綬共欣粵嶠得循吏卻恨京華失良友伯起金來揮臂謝阮公錢入掉頭走利風百竅中人身國脈一
絲懸鬼手幹旋天地雖無力排擊風霜猶有口頗聞周子道期期頻見史公呼否否豈無狐鼠畫侵人往
往遇之遭刺剖海風吹晴插南斗牂江水暖生珠母漫言勾漏產丹砂氣足神完知此叟邇來疆域苦分
截日南一綫思縈紐黑煙番舶走雷霆青嶂獠人驚洞牖良二千石古所重但結民情固封守久識銅駝
會荆棘且令頰尾閒篋醫鬱林試訪文山文羅池莫讓柳州柳

楊深秀

深秀字漪春山西聞喜人口口進士官監察御史參與新政加四品卿銜有雪虛聲堂詩鈔

石遺室詩話坊間印本有戊戌六君子遺詩諸家中似以漪春爲最漪春根柢盤深筆力盪決而發音又皆詩人之詩集三卷分童心小草白雲司臺并垣臯比集

赴省試過韓侯嶺謁廟時甫念史記

寄食既不終南昌一亭長推食仍不終泗上一亭長食人死事縱自期無那二人各有妻亭長妻存漂母死傷哉國士困牝雞

湯陰夜過未能瞻禮岳祠用店壁韻書意

直抵黃龍奏凱歌金牌不受奈君何太行無限英雄骨化石猶然望渡河
五國城中望眼枯罪臣歸骨竟西湖他年把臂于忠肅羨爾功成始受誅

又見金陀撰粹編忠臣子孝更孫賢頗聞近有湯陰岳殺馬不馱秦礮泉

相傳秦大士公車至湯陰不謁岳王廟驛夫問曰君秦氏乎余

岳姓余馬不能送君矣秦呵斥之乃自殺其馬於路秦不得已別賃車而行

雪夜寄劉選之猗氏

朔風吹雪花如掌酒醒蕭齋中夜朗倚窗八尺青琅玕謾謾向人發瑤響擁衾起揜敵貂裘長嘯寒甚卻
登樓西望山川都一色故人何處心悠悠記得前年跨駿馬出門大笑游天下三春桃李盛長安楊柳風
流胡爲者洗耳聽鸚作鍼砭自攜斗酒佐雙柑素心數輩話人物爲說令狐劉孝廉孝廉文名雷灌耳目
中落落無餘子本充駿骨到金臺翻共狗屠飲燕市著屐即時訪斯人幽居畢竟遠囂塵萬花叢裏與聖
寺跣坐蘿藤無主賓有時君來直入座據案呼伴今日餓冷淘麵成鮮醬香看君甘於駝峰炙又或治游
過銅街鞭絲帽影羣誹諧斗然正色規我錯橄欖有味藥無乖未幾秋空書咄咄辭君飲馬長城窟聞君
襆被卽西歸依然高臥南齋月而今我亦返故關同在河汾百里間把棹欲尋戴安道閉門想類袁君山
高才定有聚星句逸興能無菟園賦期君映雪類孫康熟讀舊書求無誤如能過我定何難禪房文酒追
古歡不然努力崇明德無事區區勸加餐

齊罇詩爲尋管香給諫作

雝上后土祠漢皇獲鼎所金氣頽秋空漏爛作伏虎陰崖闕環寶陽侯盛齋怒高浪掀天來射岸叢萬弩
石罇闌然裂縫出古鏞虞伊誰窟室懸乃有歌鐘拊黃門鐘鼎家昆季並嗜古脫貫徑歸通夕手摩撫
綠繡剝薜斑墨華垂麻楮舉例先辨體析疑自畫肚微靄帶繁星平疇擢拒黍涎跡盤蝸交鬪形瘦蛟舞
旁行忽斜上中巒左右鼓齊字秀三禾銘文圍九乳齊景族鑄鐘鴻烈典堪數鐘大鏞乃小高陵注周語
獨怪此齊鐘何繇薶晉土葵邱會所懸崔氏賂所取我聞晉義熙霍山得鐘五篆古識者希箝口盡齟齬

嗟我河東郡法物茲焉聚卽欲考古文何用尋响屨况乎古之樂懸鐘必成堵此罇既來歸應爲嘯匹侶
鼎有蓋底銘劍分雌雄股神物不獨見試更覓故處齊人有韶樂所鑄備律呂上以考籀文下以佐杜舉
太平既有徵逸經何難補

再爲管香給諫題齊罇拓本

齊罇齊罇乃出葵邱黃河所蓄之絕壑給事家居茂陵獲鼎處并得其高與其鐸爲搗罇上文綠澀墨光

錯首云五月吉丁亥中云齊師饗叔作罇字乃家秋涓孝廉所辨識出者釋作鮑字其精覈在諸家上人徵世本遺字補說文略銘辭百

七十又二盤庚大誥同灑疆前詩引管中興書比之義熙得鐘在太霍今再送數難聊試發一矐昔者章
曜鄒康成罇鐘大小若相爭我云二者各自有大小物之冤雪人訟平獨怪王肅陳統輩強謂婦人尙柔
不用罇鐘聲如使女器同不邇邾姪燕姑孰爲銘况此大鐘用享祀胡然三著姜女名又怪杜預解春秋
乃云齊桓會地在陳留果使茲役非管地安得惶遽赴會之晉侯况自班固漢志來鄒上久矣名葵邱今
者齊罇又出此益信西河攘翟有方舟數事皆足證經義瓌寶真欲勝天球無怪好事潘司寇千金購存
攀古廋我聞北魏張恩發湯冢鐘磬盡向河中擲同出尻雁一片土茲遭拂拭彼沈溺又聞唐時宋沈精
於音塔鈴車鐸盡能識廣平文孫知律呂倘見此者更不釋噫嘻賤子敢一言此器千金良不易古今出
地第二鐘自宣和來難再得何不懸置汾陰后土祠永與焦山周鼎張南北

儀徵太傅掌院日特爲國史勅儒林我朝經學超前古一一臚列無湮沈有時致書何東洲謂補經籍賴吉金更端乃及張舟齋碩舟碩儒折服深阮文達與何子貞書謂張碩舟乃碩儒也碩舟觥觥晉男子箸述等身儼然死自後

吾鄉蓋多儒有兩魁儒近百里曲沃聞人曰衛一注經點史奮巨筆明眉秀目飲十斛醯鷄來前皆奴叱

呂香美人蔚吾宗身如植鰭聲如鐘精覈水地潛邱比博識金石亭林同少年束髮走代北宏州一志何

處得磨笄之山桑乾源千年文獻皆增色

君前年撰直隸西寧縣志

前冬忽遇上計車出門大笑走京國文章雖復解

憎命斯人詎論通與塞五月不雨盛京塵胡牀坐嘯若無人我時解衣槃礴羸風期暗與君子親讀君篆

籀味君詩卽此便當作吾師况爲善長糾不逮兼與尙功補未知經史紛綸寄玉塵每聞一義爲起舞郎

署無由窺中秘似此便欲勝稽古就令季野自無言預決子雲有必傳更憶傳人號六福

衛莊游白鏤一印曰六福傳人

索居遠隔絳山煙噫哉聚散恆如此西去飛鴻東流水我今又欲出塞游奉手才踰兩月耳何常秋老木

蘭歸一騎款段隨君西執經問字規廿載爲鬪蒙翳發天倪

贈家秋涓學博大兄八首錄四

蹄涔縈道周瀧瀧發繁響溟漲包洪纖無聲自泱溱怪彼片長徒逢人便技癢盡罄乃中藏量之得孟盎

不辭北海笑仍詡西山爽惟君有若無胸次巨川廣與人故無爭依然重名享寄言名子者渾淇學王昶

倚劍望燕臺此中忽鬱塞駿骨何時無昭王不易得我昔乘一馬方瞳揜圓幣金絡玉連錢千里直瞬息

官路野花紫長城邊月黑自愛汗血姿不作驕嘶色頗欲持贈人無人有馬癖乃至彊梧年

丁卯冬也遂入綠

林賊以此舉似君君亦應嚙啗吾儕老樞下誰肯走南北

南園有一樹理堅而心亦實雖充筐筥身奈多荆棘北園有一樹天天粲花紅旣以薦嘉果又以蔭清風
主人將移植何者宜庭中謂棗實惡本謂桃乃佳叢匪主人擯汝實汝自求擯誰遣草木姿而外具芒刃
我好面折人人益不相信君但微感人受者自無慍嗚乎我師君久久當有進

青陽二三月微服游平康女兒皆春態三五自相將前者盤龍髻後者墮馬妝朱櫻發豔曲玉筍弄清商
娟娟秋水外有女蛾眉長上無金鈿釵下無羅衣裳坐使深閨秀不如大道倡此語不忍道道之令君傷

和許韵堂同年秋懷元韵二首

一往深情喚奈何非關薤露與陽阿馨香遠路誰能致哀感中年頃已多不忿浮名消福盡更堪沈痼帶
秋過日來新得排愁法自唱曹公對酒歌

露坐淒清對月明空堂容易又三更短檠張夜雙魚訊長笛橫秋一雁聲屠販亦侯慚術誤釣游有侶覺
官輕雄飛雌伏尋常事戒向人間號善鳴

鞠歌行四首

醉酒金臺下淚落心慘傷易求惟昌國難得乃昭王霸圖一例滔滔水東望棘城西樓桑古人已矣傷春
目歲歲薊邱春草長意者燕市今猶有狗屠願從痛飲擊劍去不願三十尙爲儒

吾昔年十二號爲千里駒常思籀足青雲上豈有下民敢侮子大來漸漸更事久忽復嗒然喪其耦劍敵

一人書記姓所箸只堪覆瓿如此頭顱欲何爲祇應閉戶學雌守嗚乎當時神駿姿豈意今成牛馬走
曳裾富人堂金多欲相役結客少年場酒酣動遭叱至竟悠悠誰可親惜極歸家自休息秋樹根頭日醉
哦眉宇高寒照空碧二八文婢氣如蘭笑倚吟聲吹玉笛多謝二豪莫相輕如此高韵不易得
久宦減兄產遠游廢父書僕本農家子何必懷此都拔刀斫柱誓歸去求食不爭鵝與鷺身後名與身外
事蹀躞十年被爾誤陸沈金馬門不異蝨處禪念此世間無窮已中夜漣瀾不能言

哭衛莊游學博

曲沃衛莊游與余投分十年所作囊室經譯余一一親見屬草稿時獨時人道其狂詭余所未
親歲丁丑湘鄉宮保延主金石志局家秋湄學博兄既婉辭余竟未至君之狂名乃愈噪於茲
時矣一官慮虜塊然遂死故人酸楚知復何言

積雨空階五月寒思君生世倍汎瀾獎成後輩翻招謗瞪視中丞屢見寬磊塊填胸增病易文章糊口矯
廉難涼宵獨檢當時札字字分明不忍看

鵬集鳥鳴覺不祥少微眞已失光芒賣文金到多仍盡使酒名成醒亦狂舊羨青氈歎福薄新亡碧玉竟
神傷君姬人張氏
以產難新亡戢棺何日能歸去麥飯香花冷署涼

題馮習三廣文詩集令息佩芸夫人婉琳屬題也四首婉琳適亡友洪洞董芸
愈舍人文燦今孀居

寒山秋水各成家又見枯梅盡著花集中七葉人人俱有集方知大樹富奇葩

代北詞人盛道光魯川詩筆獨堂堂官階雖遜才名並馬磨甯輸許子將

六十論詩工別裁老來技癢語無乖集中有論詩絕句六十首留將玉尺傳誰子合有衡量天下孩上官昭容生瀾月母問曰爾非衡量

天下孩應曰是

磨笄石畔女郎祠閨秀而今又在茲浪說山陰曠然子王季重思任女端淑號曠然子幾聞傳得乃翁詩

武養齋借得宋搨婁壽碑雙鉤見示因題四首

題額元儒作易名東都處士善蜚聲文中貞曜紛紜起作俑誰知在憲平額題元儒先生此漢碑以處士而有私謚之始文範先生猶在

其後蒸漢人或作意

三世顏嚴蔑以加春秋家學薄浮誇征南未出劉歆死貧士應歸賣餅家

彷彿鷗波小印存此本末有趙子昂印斯人詎解隱衡門碑中有樓遲衡門語倘能微學元儒節何愧天潢安僖孫

祠堂徧畫忠賢像武梁祠堂畫像石室全雕祥瑞圖武氏石室祥瑞圖持此雙鉤填廓筆何妨盡搨武家書

做元遺山論詩絕句五十首專論山右詩人

鎮東忠義欲匡時一表魂飛司馬師記得嘉詩酬杜摯哀鳴鳳鳥繫人思丑邱儉儉答杜摯詩曰鳳鳥翔京邑哀鳴有所思嘉詩亦原

詩中語也

蟲魚注罷薄雕蟲不道游仙語倍工經術湛深詩雋上千秋只見郭河東郭璞

磊落英多數子荆無妨惡劇學驢鳴若論零雨被秋草百鳥喧時鶴一聲楚孫

蘭亭墨妙筆尤工，互古無人與角雄。誰識永和修禊日，先詩後序有興公。

禊

百升明月劇英雄，健將能詩有乃公。敕勒牛羊千古調，南朝競病恐難同。

金耐律

女郎袂靚太紛紜，豔到齊梁詩可焚。絕代高情柳文暢，亭皋木葉下秋雲。

柳惲

魏收工賦傲溫邢，只有中書賦豁情。不意恃才驚蛺蝶，能令對酒憶公榮。

裴伯茂收論敘之詩曰臨風想

玄度對酒思公榮

裴佗文季六男兒，詛答徐陵有讓之。爲誦五郎公讌作，誰云不及乃兄詩。

裴讓之

雁後花前名士題，吟成昔昔恨長齋。微辭自是瞋魚藻，佳句空云妬燕泥。

薛道衡

唐初將相盡門牆，有弟偏思隱醉鄉。餘事作詩猶矯矯，東皋集合冠三唐。

王績

閒雲潭影詠滕王，綺麗獨先盧駱楊。水府效靈消受得，一帆風送到南昌。

王勃

鸚鵡須令振翼雙，宗臣一語定家邦。賦詩摩厲鄭丹刃，何事今猶刻石淙。

秋仁傑

錦袍應詔幾人工，少保詩篇獨古風。一首陝郊留異日，尙能傾倒浣花翁。

薛稷

翠華春幸到昆明，一代才歸女子衡。至竟夜珠明月語，精神十倍沈雲卿。

宋之問

魂如厲鬼髯如神，聞笛高吟虜馬屯。萬古睢陽城下路，陣雲邊月不成春。

張巡

詩中有畫調無絃，學佛真宜住輞川。解識維摩祖師語，漁洋殊得指頭禪。

王維

幾篇宮怨韻脩脩，不讓青蓮獨自超。今日太行嵐翠滿，茆亭花影憶龍標。

王昌齡

藍田游侶秀才名綠野詩懷聖相清畢竟翬鄉多作者又聞觴詠峴山亭裴迪 裴度 又裴均 有峴山觴詠集

春風不度玉門關雋絕三唐誰可攀千古豔稱紅袖拂爭如絕句唱雙鬢王之

元凱從來作美談多才不備號多男誰知秀氣河汾聚兩見王家珠樹三王之勃兄弟及王之洸兄弟

潏潏河流入斷山山河兩戒此迴環朗吟鶴鶴樓頭句逸氣飄飄天地間當暢

誰妄言之誰妄聽故將韋柳兩相形漁洋不識唐靈運真賞終輸野史亭柳宗元 案元道山詩自注云柳柳州唐之謝靈運

鄙論從來出腐儒頗嫌白傅負姑蘇懷民憶妓衡多寡曾見香山樂府無白居易

生紙紅描金鳳凰太平萬歲頌吾皇宮詞百首誰堪比合與仲初稱二王王涯

鵲喜蟲吟格律高邊情更賦寄征袍回刀剪破澄江色佳句真將掩法曹裴源 楊巨

早聞一箭取聊城老去逢人說項生古有齒牙譽孔顛憐才同此發丹誠溫庭筠 李商隱

輕薄嗤人太踟躕金荃浮豔玉谿桃千年論定功臣在顧秀野同程午橋李商隱

耿漳秋風動禾黍盧綸大雪滿弓刀兩君同出河中產筆挾洪河萬丈濤盧綸

墜笏朝堂僞儀吟成廿四品尤奇王官谷裏唐遺老總結唐家一代詩司空圖

可憐元載負賢妻大似歐陽與介溪何物胡椒八百石遂忘掃路兩相攜元載妻太原王韞秀詩曰路掃飢寒迹又曰攜手入西秦

約指銀鉤彈落雁搔頭寶髻詠佳人漫因綺語輕溫潞著手能成天下春文彥博 司馬光 首句用潞公詩次句用溫公詞

禿節蘇卿五字工堅貞司馬頗相同遺詩弁冕南冠首不愧忠清涑水風司馬朴 案朴字文季夏縣人 文正猶子使金被留不降教授

以終元好問中州集錄
南冠五人以朴爲首

皓首丹心倔強名豐公氣壯本神清杏花吹盡東風緊何減梅花賦廣平

雷淵

邱濬猶容桑悅妄雷淵卻忌李汾能館中猶有李欽叔屈宋衙官總不勝

雷淵李

南山翁後得雲卿京叔歸潛老更成獨孕恆山千古秀史裁詩品一家清

劉攜孫從

太原常與合河劉數歲齊名麻九疇五字詩成天籟發神童何意萃并州

常添詩四歲詩云我有一卷經不用筆寫成展開無一字畫夜

放光明劉滋六歲詩云驚花新物態日月老天公

繫舟山上探薇餐野史亭中削竹看三百年無此作矣閒閒公外解人難

元好

郝氏文章接祖孫裕之師友互淵源科名何似詩名重試問陵川七狀元

郝天經

范揭虞楊何足論豪如太白麗如溫中州萬古英雄氣又產才人薩雁門

薩部

立誠仍不廢修辭盡識文清百世師誰見河東三鳳集竹溪虎谷白巖詩

薛瑄又王瓊王雲鳳

巢雲文谷並清新四海論交謝茂秦愧殺登壇王李輩名成不認眇山人

裴邦奇

真山奇古壽髦工綽有太原王霸風父子齊雄四家選霜紅知己在丹楓

傅山及子眉

漁洋聲望盛康熙進御常同午壁詩聖祖知深頻下詔積詞累句幾能窺

陳廷敬

金鵝館集本無瑕苦被河間謂柳葩品隲終推秋谷切蓮洋詩格如蓮花

吳雯紀文達譏蓮洋以柳葩爲柳葩見義山詩批

玉崑崙碎爲檀超韻比阿龍舊句調多少長安苦苦吟客平陽蔣五擅詩瓢

錫仁

汾水綿山二妙存何劉佳句動隨園風流更有張風子細雨騎驢度劍門

何道生 劉錫五 又張道溫 改官四川羅聘爲繪張風子騎

圖驢

天南萬里失勞臣閨裏能宣撫字仁傳得午橋詩一脈女公子與少夫人

裴宗錫卒雲南巡撫任所女與 媳各有詩袁簡齋亟稱之採入

話詩

四山人後一容齋衣鉢流傳竟有涯豔雪樓中師友盛松溪荔浦總清佳
經生詩調每鈎鞞老學工吟得石州死擬青蠅爲弔客一人知己射鷹樓

介休西山人及茹倫常 城張晉李毅延君齋及子 張穆 閩林氏箸射鷹樓 詩話錄石州先生詩甚夥

俞明震

明震字恪士號觚菴浙江山陰人官至甘肅提學使入民國爲肅政史謝病歸有觚菴集

石遺室詩話余初識恪士於京師恪士留詩一冊於觚菴處使余評定余未之見也惟聞其詩清而未厚度隴後所作則工力甚深蘇堪所謂得杜味者君吟甚苦自言成一詩或至終夕不寐甚且病眩故數年來所作不多

庚戌正月十四日游半山寺次伯嚴韻

昨歲古城隅喧闐逐馬迹茲游復何有敗葦如折戟山僧閱世變惘惘肅行客興來泉悅耳事往塵澆壁

偶然會心處豈必夙所歷笑語得春先餘寒覺晝寂遠望牛首山小於坐旁石六代興亡圖一一羅几席
薄晴有新意春氣相與白不有江山助風光亦虛擲感念半山老大名毀所積是非逐世改來者又誰惜
明日約探梅回視今復昔

曉起小園探梅次夏午彝韻

破曉一禽鳴陰陰樹如浴朝霞猶未升但覺天微綠孤花誰與春幽人夢遙屬煙外一枝寒臙脂點初旭
隔斷板橋塵自補秦淮錄

送馬惕吾赴贛州

垂老將安歸光陰赴頑梗稍通當世務往往自矛盾難與時人言逢君一吐鯁往者讀明詔燦然具綱領
中原萬鈞弩挽之而射影蒙馬以虎皮一閱終自窘翻羨十年前民勞俗尙整此意至可傷及身容有幸
風氣所趨重道德司繩準苟適得其反聖哲甘泯泯送君步城隅惜此須臾景須臾亦何惜來日殊未省
且作暫時人淚盡惟一哂

春寒登樓寫意

雨暗池冰合春寒鳥背高閉門無世法來日在醅醪待暝諸天寂因風獨樹號萬家愁入夜孤影下亭皋
陳善餘徵君撰西石城風俗志復繪橫山草堂圖徵題橫山卽西石城先生隱居地感賦十六韻
歸之

先生愛鄉土日飲橫山綠橫山有草堂先生此耕讀初民知有羣風化基親睦樂生送死情節之成禮俗
聖者導所趨豈曰新耳目至味在人倫持此馴百族子學富九州約之一邱足躊躇進化理瑣屑有實錄
此義今無聞蒼茫畫林谷遙知手一編溫溫對樵牧着意義皇前寧爲世所轄嗟余志四方動與時抵觸
六合新制作謂可幾一蹴還念居游人冥然自歌哭子非耽隱者類情反真樸從知避世人甘心友麋鹿
哭宋燕生

泯泯莫如歸死樂眼中人事日喧豗深談直到滄桑盡閱世寧知孔墨哀孤處論交真悱惻千秋相望在
塵埃床頭剩有嘔心稿地老天荒着此才

游理安寺

行盡九溪曲獲此煙中岫下臨十八澗土石吐奇秀到寺不知門風枝接飛溜喬楠千萬株勁與竹同瘦
巢鳥無高心陰陰失昏晝微覺世可悲仰窺天如竇松顛閣已欹法雨泉可嗽松顛閣法雨泉均寺中名蹟古意在微
茫名山謝雕鏤憑高納萬態海上襟袖返照失中峰羣山有遷就吾衰意何擇幽極神轉替了知出世
難清景付馳驟

游煙霞洞贈學信長老

槽角掛錢江掉頭見西湖意識遠始明近山轉模糊入洞探雨窟結屋通雲衢老僧不說佛清與山同臞
了知衆生性料理食與居精神到鹽鼓土木神工俱移坐得山情留客鋤春蔬我佛至悲苦度世願已虛

師能解世法但取近者娛耳中萬松聲味之成笙竽他山自晴雨吾歸尋敝廬

游山歸泛舟出裏湖待月

山游腰脚疲踈臥如春蠶漾舟出裏湖霽色明澄潭羣峰促使暝若戒游人貪一樹尙殘照雨過南山南
湖光不能紫細浪吹成藍濛濛覺遠喧渺渺窮幽探月出天水分始知風露酣各有愁暮心詩味從可參
清景何處求湖燕飛兩三一失不可摹此意吾寧慚

庚戌十一月出都口占

塵外陰沈覺有霜天東初月照昏黃十年錯料成今日一醉拚教進急觴高樹亂鴉呼晚霽西山殘雪剩
微光風旛自動心無着留待滄桑話短長

宿新安縣示子言

我從洛陽來坦途無百里峩峩見城闕崑陵列屏几車馬亂流渡隱隱如浮蜩莫弔古戰場中原事未已
風起遠天黃落日淡如水况爲行路人茫茫誰遣此須臾日西匿回光射成紫幻影逐明生饑鳥投暗止
此是古今情悠悠吾與子

過醴泉喜晤宋芝棟侍御卽贈

黨論漸寬公亦老相逢百感到平生河山已分成孤注孔墨何嘗有定評元祐聲名終聖世西京文獻在
荒城尋碑莫上昭陵望

公近拓唐昭陵碑三十餘種

翻憶明良涕泗橫

過邠州

茫茫古豳土直接隴西路我來值蠶月戒行不待曙晨光與麥齊晶瑩綴寒露微月在棗林不見栽桑處
王化首明農但取衣食足智識與世新生活有程度奈何三千年穴居惟瑾戶日出不逢人高原莽盤互
始知地上人得水乃生聚涇流日淺縮千尺俯塵霧人事漸東趨天心厭西顧不見古雍州八水已非故
滄海變桑田吾何憂旦暮足韻有誤

曉發邠州

日日征鞍傍柳行柳綿吹盡不聞鶯馬頭微月如雲淡麥上朝曦與露平陶穴尙存中古制望春忽起少
年情疲驢轉磨駝鈴急喚醒勞人是此聲

隴頭

尋常人事紛如髮况復時艱百態新高柳兩行心萬轉隴頭黃霧不成春

行土峽中抵會寧行館次子言原韻

與子長安來一月已過半朝發青家驛畏途愁日晏懸車下絕壁濁流倏瀾漫飛鳥到來深頽雲匿不散
槎枒生地穴破碎撐霄漢仰望白日乾俯穿泥沒馱車從澗底行心與懸巖亂出險眼漸明停鞭指行館
酒注肝肺熱深談復達旦新機萬弩發勢若水澎湃方與自風氣朝報成斷爛欲通江海情孰與置郵傳

忽憶去年游湖亭淪茗椀

去歲與子言游西湖

今夕復何夕風沙滿庭院

閩鄉宿黃河隄岸

柳陰見黃河日暮愁客心極目但塵沙不知春已深麥隴疊成梯層層如割簪其顛平如掌山態不可尋
方舟壓奔溜榜歌雜秦音遭時苦躑躅十年江海濱沈憂鬪靡麗厭作東南人此行入蒼莽翻覺眼底新
崗陵鬱雄厚風物含蕭森河聲去不息來日愁因循對此真茫茫吾衰復何任一鳥意超忽萬里天陰沈
心境各殊態勞者徒酸辛

步黃河隄岸

擾擾悲生事昏昏入晚晴微風生柳態孤雁帶河聲家遠人垂老山荒石有情漸知天意改翻覺客途平

月夜登蘭州城樓望黃河隔岸諸山

月中望黃河滿目金破碎沙堤不受月因水得明晦城影落山腰鴈聲出雲背三更天宇高七月殘暑退
樹動風無聲坐久得秋態心知寒訊早預作雪山對暫與解煩憂清露入肝肺忽聞伊涼歌河聲助慷慨
河流去不回明月年年在斟酌古今情幾人臨絕塞

渡黃河西岸行萬山中

積土如穹廬疊石如夏屋落日如車輪奔馳入荒谷風含萬里聲草無一寸綠人言開闢時地水相抵觸
至今水裂痕縱橫貫山腹山腹俯千尋其下窈而曲當年海底形一一森在目崑崙西來脈矯若龍蛇伏
積氣盡東趨尾閭成大陸神功不到處留此鴻荒局八月雪花飛高峯削寒玉盤天入泱莽度地有盈縮

欲窮變化根心遠境轉促翻羨北窗人臥游一邱足

辛亥八月二十七日度烏稍嶺

寒風八月烏稍嶺積雪千年古浪河從此南鴻斷消息今愁爭似古愁多

平番道中

塞上西風吐土黃疏林辜負好秋光山如病馬吞殘雪人似寒鴉戀夕陽生計何嘗關飽暖沈憂祇合待
滄桑天荒地老吾能說多恐旁人笑酒狂

宿涼州

雲與雪山連不知山向背殘日在寒沙婉變得月態羣羊去如水遠色倏明昧此景夙未歷垂老臨絕塞
地遠古愁多草枯殘壘在天山一線脈盤旋走關內流泉滿馳道千里有灌溉巍然古重鎮四郊如擁戴
風吹大月來南山忽沈晦莽莽天無根靜與長城對

大雪登烏稍嶺

古浪河西流莊浪河東注兩水各西東中立此天柱昨夜雪嵯峨長城萬峰聚眩光鳥雀靜構相龍虎踞
巘岬露空隙是水湍行處東水奔黃河西水穿沙去山阻玉重重神工施斧鋸不見馬牙山呼風作哮怒

鹹水河

入谷復出谷我行鹹水河白日寒悄悄病樹猶婆婆生存競枝葉人老當如何高原無定形縹緲如濤波

洪荒一片土風日能消磨遙峯匿光影薄暮愁山阿時艱付悠終行役懷坎軻感適然止慮遠傷心多
君聽牧羊兒高唱伊涼歌

歲晚乞病解官書示子言

初魄無光覺夜寒繞城冰雪路漫漫十年涕淚今何補一病倉皇死未安擾擾世隨人意改冥冥天在霧
中看支離與子尋詩夢覺後園林已歲殘

辛亥除夕感賦時乞病留居蘭州城

冥鴻躑躅凍雲前莽莽高城夜可憐客至聽談新歷日病閒聊補舊詩篇看人只合成孤醉守歲何因得
早眠惆悵難忘玉谿語可能留命待桑田

壬子元旦

燭燼千家曉悲歡又一時人迎新歲日春入未花枝論世含醒醉編年有信疑生存聊復爾庭鵲冷相窺
念念皆成劫生生各有因一年更始日雙鬢暫時人猿鶴哀同調滄桑幻早春風輪彈指轉何處覓酸辛

述哀

預料事常爾此意至悽切况復身及之生死吾安擇自吾成童時民勞得小息書生困帖括懷若抱殘缺
人知王室尊那計生事拙默窺朝野情不醉常兀兀人以官爲家遂以官立國鄙夫競濡沫賢者或矯飾
泥取古昔名新理任汨沒我與世同化所學豈殊轍深悲來日難匹夫與有責側聞憲法立迅疾萬弩發

親貴集大柄四海各休戚所持進化理忽與初念別躑躅將安歸放情山水窟江南厭靡麗度隴苦蕭瑟
風氣遞旋轉人心有南北奈何勢所激一發不兩月心知人世改愁到海水渴兵氣鬱不開關河信四塞
去官如脫囚心死身則適改歲天氣佳濁酒容一呷晴風入寒沙泉動冰滑滑占天有生意望春猶恍惚
誰與解煩憂如石不可撥

得壽臣三弟書

烽火連天白髮生開函收汝淚縱橫枉談陳迹埋經史剩有餘年到弟兄歸計忽興閭墓想驚魂如聽亂
離聲傳家世業從今盡留待桑田學耨耕
長鑣託命吾何有夜雨聯床老更難姑妄聽之容笑傲萬無可說祝平安一生憂患知誰健十月音書隔
歲看縱使餘年好相見人間贏得是辛酸

紀夢

出門冰嵯峨欲游興屢輟胸中千萬山偃蹇不自得一夢墮蒼莽山山弄春色結想每形役虛空有禪悅
覺來天氣佳初日在牆缺風遠市聲微窗虛塵影直濛濛換朝氣擾擾觸陳迹生事如轉輪靜者窺其隙
枕痕疊憂患睡意能超忽還覓夢中山翛然映空碧

將至秦州避亂次子言留別蘭州諸友

國身通本春秋旨海內從教索解人絕塞散存專制禮一廡今作幸生民少年慷慨猶摩劍亂後光陰看

轉輪夢醒莫愁身世改雪中一鳥已鳴春

自一條山出長城寄懷趙芝山都督

東風吹沙春無色白日荒荒草痕黑驅車不向中原行
巍然大地無空闊天低野曠不見路沙上行人愁
日昃一駝回首向長城絕似湖陰孤鷺立兩年放失江南春
翻從絕漠望鄉國故人曠別知我貧語我重
來意淒切乾坤已更新涕淚閱世難循舊車轍我行萬里
蟻旋磨君擁巖疆龍起墊散兵無術絕輪輓窮
邊例爲人棄置時艱不作來日計改絃往往窮儒術人
間何世我別君君自憂危我蕭瑟塵昏躍馬一碗
泉聊取甘芳解煩渴

泛黃河自寧夏達包頭鎮舟行雜詠

多少滄桑事艱難有此行窮邊飛鳥盡殘月大河橫
出塞人情遠還家白髮生明知覆巢下流涕說歸耕
日落長城窟悲風起賀蘭草肥知馬健地僻引渠寬
石色天西盡人心亂後看無爲怨回紇生事日千端

賀蘭山產石過此均沙漠甘肅用董福祥捐款三十萬開寧夏渠民利賴之去冬回隊至寧夏會匪已棄城遁回隊入城肆淫掠殺良民二千七百餘人今尙十室九空生計無論矣

古塞名王府森森萬木青地形連朔漠國論弛藩屏
世絕天親賤兵荒互市停淒涼逐客令十口已零仃

蒙古阿拉善王居賀蘭山陰擅森林之利王與端庶人至戚庶人滅死依王生活近以國變王途逐庶人奔寧夏蒙地產鹽甘肅以庫帑租王鹽池去冬以兵亂暫停

衝沙兩岸風舟疾欲浮空草色不成綠柳條纒吐紅
意中有春日身外卽鴻濛磴口雞魚賤傳聞西道通

近代詩鈔

俞明震

一二五一

西風不成雨吹入小單于棄地常千里神功有後圖水低斜岸出天遠片雲無碧眼誰家子新開百道渠
三套河有法國教堂庚子被燬索價三萬金蒙古阿拉善王乞貸於甘肅不應遂以地償之則渠工四達教民過七千戶矣

草間黃帽影兩兩出番僧不問人間世長燃佛界燈羈縻天所棄易俗帝何能廖廓無興廢從茲泥愛憎
舟行盡千里僅見喇嗎數人騎馬馳逐草間而已

扁舟出鹼澇日薄晝冥冥岸蝕沙能語雲開風有形極邊無戍鼓何地戴王靈留得千秋影狼居兩點青
鹼澇數十里皆沙阜一白無際掘沙二三尺即得鹼遙見狼居胥山兩峯對峙舟人呼爲兩狼山

舟環烏喇特面面飽看山雜樹自生滅河流時往還氍毹寒暑共國界有無間墾牧強權在邊民盡出關
河流曲折繞烏喇特山行山即烏喇特府地分三旗以三公爵領之曰中公東公西公受盟長節制貽穀墾牧盡收烏喇特一帶荒地

聞說陰山近橫流入地行悲懸青塚影風有黑河聲市遠尋車轍塵昏壓土城萬方同永夜孤燭自分明
烏喇特山連大青山即古陰山河流近山不似沙漠之淫濫矣 距包頭鎮七十里烏喇山對岸一土阜土人呼爲昭君墳然青墳在歸化城南二十里不在包頭 包頭鎮土城甚大商務漸盛

家似離巢燕身如出塞雲窺天終自幸垂老厭多聞河盡東南轉山從朔漠分紀行聊復爾大地本無垠
自包頭鎮至溯河口即古君子津河轉東南流入山西境

亂後返金陵故居

畏兵如避仇十室九不返滿城無故人索居况歲晚庭樹日以稀牆陰上苔蘚心知景物非冷處偏著眼
花愁來日難葉抱冬心卷晴雨殊未分荒荒一燈遠

十日閉門居洒掃有常課詩味貯別腸不受時論澹世或有唐虞餘年事耕作荒穢久不治亂葉驚風過
軒窗亦云斂惜哉藩籬破

壬子除夕

到海愁無地親知共一塵真看成獨夜初覺有今年至樂喧童稚餘哀祀祖先醉醒同一擲來日總淒然
癸丑元旦簡李梅庵道士

哭劉姬

舊歷仍新歲黃冠自腐儒天寧惜矛盾世或有唐虞賈字應開市游春莫問途酒腸無熱處和淚飲屠蘇
已訣忍再見反恨死難速止我勿登樓呻吟抵床褥那知樓下人腸斷不可續惟餘百悔心迸作一聲哭
避疫衛生言寧堪待骨肉人病爾服勞爾病空仰屋持此例平時感歎到傭僕補過生無期天乎何慘酷
詩成付稚女是我酸辛錄認父哭母聲開函時一讀滄桑萬事改吾衰景尤促回身視家人早死庸非福
淚盡忽失笑待我湘山麓

重至金陵故居弔劉姬

罷絮光陰萍滿地春風吹鬢白成絲明知生累翻悲死難遣中年况近衰花竹每思初種日江山重見獨
來時人間萬事成追悔地老天荒却怨誰

園居雜詩

入門百不適合眼常晝眠忽驚簷雀語恍如曉行天去年脫命處黃河浩無邊婦孺暫相保惴惴親狼煙
誰知傷心事轉在生還年塔前衆草靡一樹獨兀然樹葉覆我身樹根入黃泉黃泉我不見根葉常牽連
爲報泉下人吾衰不如前

晴日慣損花一雨泥中委託命本不長春光能有幾發發花下犬見客垂兩耳三年汝猶活喪亂殊未已
我作病鶴看呼入竹林裏竹林風露寒不似臥花底

皇天不悔過積非遂成理亂世多偉人聖言召羣毀廓然去藩籬未睹宮室美一閔傾國維再裂到人紀
不知近何爲倏又大波起樹底聞扣門動色走鄰里深人舍一悲智士持兩是有如凶歲農顛倒晴陰裏
嗟余憂患餘脫屣到妻子忘身未忘世那便了生死

夜雨待蕭稚泉不至

逢君三月暮不似往年春况聽荒城雨同爲永夜人安危燈共影喧寂樹成鄰坐久晨光動還看百態新
早泛清溪

清溪繞欄行看山如屋裏春風吹不晴晨光在煙水未覺輕槳移隱隱雙橋駛綠草高上城下有女牆圮
野航舊畫船蕭瑟柳陰底柳陰茶竈香三五聚鄰里漸忘獨行悲差有生還喜歸來未停午花木淨如洗
鳥語傳兩家山光爭一几送客還閉門高眠日日起

偶成

再來仍隔世一笑是還家
窗有三年紙春無十日花
野藤低掛笱暗水暖藏蛙
料理閒中事安居願已奢
石徑春泥滿花籬暗草侵
亂餘悲世晚人老閉門深
客以新醅至天教霽月臨
離離牆外影栽竹漸成陰

游半山亭

偶然占一壑事過如秋烟
如何此亭名千載惟公專
後人情古意添築屋數椽
上結雲作頂下借石爲闌
渡葉寧知數藏山無礙寬
一朝構兵火瓦落如奔泉
淒淒霧中眼誤作臺城看
此邦多喪亂好春無百年
幽草勝花時此恨公能傳
公詩綠陰幽草勝花時
我身如獨樹不死常兀然
不見綠陰底破網蛛絲牽
潔身遠蚯蚓那復計孤懸

焦山松寥閣夜坐

月黑樹蒙茸驚鴉入窗裏
團團一山霧江勢來不已
檻外燈忽明舳艫走千里
我亦東西人往來送江水
滔滔有今日惜此中流砥
掛眼山無多到海吾衰矣
僧寮繩床平濤聲在席底
傾耳來睡情平心得坐理
始知倚樓時妄念雜悲喜
羅徑非不深真隱人有幾

同伯嚴後湖觀荷

城頭紫烟低城背蒼蕭瑟
江山不滿眼萬荷補其隙
初花弄光影顛倒一湖葉
繁聲疑雨來微涼散空闊
小艇不容篙趺坐波平膝
欹岸出荒洲稍見兵火迹
當年岸幘處廓空積潦入
倒影兩禿翁風亭坐超忽
清香滿殘照綠意上烏鬪
遺世渺愁子見汝亭亭日
溟渤非不寬萬事在眉睫

暑夜同子大伯嚴泛舟三潭

厭亂託消暑適可聊自娛况有素心人同就湖上廬今夜天氣佳雨收片雲無相攜泛明鏡艇子輕於鳧
滿載萬斛涼衝烟出菰蒲亂星倒山影浸入碧玉壺三潭風露香縹緲化人居佛燈影荷蓋橋語驚行魚
奇石鬼皴面高柳螿懸珠翼翼三角亭一暝收全湖山行多歧路愛此波平鋪窅然入深黑遺世真吾徒

游靈隱寺

靈鷲下層霄翼覆東西峯仙山此堂奧鎮以飛閣雄我來喪亂餘三年一孤筇松柏見威儀雙澗迴天風
森然千佛場馳道青濛濛高蟬無停響靜窅窺玲瓏諸天在咫尺喧寂皆靈踪冷泉出亭根照我再來容
汲深性不滅清極聖可逢生平尤悔心不爲寺樓鐘一鳥馱禪去下方雲正封

湖莊曉起

臥聞菰蒲聲疎樯覺風入滅燭延曙光荷邊有微月溼螢飛漸稀陰一湖白老夫常早起顛倒忘歷日
但覺春風時看看到暑末此時東方高水禽先聒聒清露不盈頭世事如亂髮暫避眼前人終愁秋後熱
安得濃淡山盡變滄溟色

湖莊示子大伯嚴

分得西湖一角涼曲房低檻待秋光生慙亂世能容我靜覺高荷已退香人意淡如山欲暝歸期愁與月
相妨放歌同是無家客水枕風船老此鄉

歲暮園居雜感

漸喜知聞斷閉門各一天還家仍獨客亂世有餘年畦菜經霜碧江魚入市鮮老夫惟果腹無酒亦陶然
稍見通鑑貨殘年米價平月圓知漢臘巷哭有驕兵帥府徵歌舞遺黎算死生出門流水斷愁絕一冬晴
寒日如煙淡遙峯與雁平微吟萬象待早起一身輕對局搜殘劫攤書擁百城不親無益事辜負有涯生
小閣留賓處寒山不改青悠悠萬人海落落兩晨星遯世全哀樂忘身自典型蕭蕭一亭竹留爾不曾聽

李梅庵陳仁
先留居數日

讀散原鬼趣詩

夜讀散原詩矮屋環冬青敝亂託鬼語叱咤來精靈我無寂滅想閱世終冥冥萬古一濁黷黠者先逃刑
合眼夢唐虞糟粕遺六經齊民豈有術魍魅能潛形竹梢寒月來燈影如孤螢窮巷與世隔人鬼無畦町
微吟坐達旦一鳥窺簷聽

園竹

培土竹樹根日脚下牆屋鄰翁荷鋤來寒天吾汝粥城中幾名園亂後遭踐蹴人心無瓦全草木含親睦
今日晴不風煙洗數竿綠交影上危亭輕陰脫拘束豈伊耐歲寒心虛了無觸坐送蕭蕭聲百憂寧可贖

園柏

種柏青溪旁古色上牆屋十年憂患人樹此嶒嶸骨鬱鬱歲俱深童童立可獨今年一冬清河乾凍龜縮

惴惴愁四鄰荒園日氣濁全命凜冰霜居安對雍肅從茲剪荆棘一寒閉門足但恐早象成明年無此福
寄李梅菴道士

滄桑一道士短屋坐蕭爽得食有童心黃冠仍大顛有時得名蹟阿弟同欣賞醉學李濤顛洒墨大如掌
人間果何世破筆入蒼莽昨聞阿弟病日日趁車往車往復車來的的關痛癢觀君蓄弟心觸我救時想
出世莫出家酸辛告吾黨吁嗟解人難念君徒快快

寄陳仁先

瀟洒陳孟公有俗無不棄手寫咏菊詩閉門自成世將花入性情不觸色香味千曲無盡思蕭寥在腹胃
昨夢坐茅菴君持菊譜至上黏乾葉花枝有題記笑指枯目僧謂是花中意覺來渾不解清景倏已逝
明月滿竹林獨照無夢地蕭寥復蕭寥高天動寒吹

甲寅除夕時久病初起

萬方多難日今夕倍淒然家祭存殘臘人心有舊年養疴貪睡早移燭得春先幼女分梨栗吾衰祝汝賢
難向庸醫說深杯掩病容有家甘自放憂國竟何從樂憶兒時味詩尋亂後蹤告存應自笑重數隔年鐘
病起夜坐

微聞花氣夜沈沈入世何人覺病深殘月漸移成曙色寒風忽起結層陰悲歡自造原無事醒醉相望各
有心還向紙窗尋我相一燈明滅去來今

早起

穩臥繩牀身世平，蘧蘧睡味比茶清。
夢長夢短了無迹，窗暗窗明過一生。
攬鏡莫愁來日事，聞歌不似少年聲。
晴光偶動春游興，江路微茫雨又成。

雨後湖上

水鳥無聲風滿亭，起看微月在南屏。
雲山款我秋前雨，露葉如沾曙後螢。
思逐遠鐘同脈脈，身輕殘夢但冥冥。
養心漸喜知茶味，預汲寒泉入夜瓶。

中秋日約同人飯於法相寺

涼雨霏霏釀桂天，寺樓衣薄欲裝綿。
客真淡泊渾忘敬，僧解周旋卽是禪。
儘有寒山期晚歲，更無明月記今年。
餘生甲子山中曆，看到秋花始惘然。

中秋約同人飯於法相寺和仁先

湖居不見中秋月，偏向僧樓坐雨深。
避世漸諳蔬筍味，入山終負水雲心。
人生適意每不足，眼底有詩何處尋。
還我一庵聽說鬼澗松巖桂，各蕭森。

丙辰重九仁先招遊龍井寺登高

老覺人間萬事非，偶逢登眺倍依依。
難披榛莽凌千仞，喜傍湖山共落暉。
世改性隨龍不滅，天空雲與雁同飛。
年年此會成今古，短髮蕭疏我自歸。

登高一首和仁先

病起逢君作重九絕頂拄杖相追尋秋光爲我洗林莽天界自高無古今笑聽野老說朝市坐待山氣分
晴陰攜壺賭酒少年事俯視落照同幽深

吳子脩丈約游西溪

西溪九月水清絕流入法華浸山骨掠波艇子輕於瓢滿載秋光款游客老僧解事列藏軸覓徧題名感
陳迹卷中同是滄桑人後死重來倍悽惻主人避世重鄉賢指點當時隱居宅木主親題月上名荒庵香
火餘芳潔百年人事忽翻新野荷花現女兒身溪中草花蔓延俗名革命草亦名野水荷花辛亥後始有之影堂遺挂等閒事廟貌湖
山大有入

游西溪歸泛舟湖中晚景奇絕和散原作

西溪暝煙送歸客艇子落湖風獵獵蘆花淡白夕陽紫要從雁背分顏色頽雲掠霞沒山脚一角秋光幻
金碧欲暝不暝天從容疑雨疑晴我蕭瑟憶看君山元氣中滄波一逝各成翁請將今日西湖影寫入生
平雲夢胸

丁巳重九日登烟霞洞讀仁先六截句感賦卽贈

歸雲如箭山如馬直壓錢江出跨下昏昏朝暮亂雨晴洞口黃花無一把去年龍井看落日秋色招人薦
尊罍一年容易君南歸心自沈冥氣瀟灑入山以後無甲子我與秋山共清暇傷高回面參古佛孤雲不

動鐘磬啞君知此意得真象無主秋光任揮寫蒲團題記六重陽君詩破壁攀天一端攀天留待重來者

次韻和散原游桐廬至七里瀧釣臺紀事詩三首

獨昵近湖山幾失烟江景孤篷與鷺爭漸入桐廬境銜江接紅樹斜斜復整整雲光淡相染天然成古錦

山水無定形奇變出心影未成浮海願彌覺天機永暮傍桐君山旅夜抱虛警相逢莫問名夜有警兵詰姓名出

世先止飲烟波有戒心身世同懸癭不見披裘人漁火明孤枕時桐廬戒嚴

晴江啼畫眉烟嶼如浮杯有山不真隱游釣皆凡材鬱鬱旋螺門一水爭縈迴風日不到處古祠傍山隈

釣臺東西峙不受羣峯排前年舊鷗鷺相見如驚猜亂世無隱地焉知我重來筇邊落日盡淡淡煙光開

依稀痛哭記留與今人哀苟乏超世見江山無好懷臥石滅殘字斑駁千年苔絲風重九鼎天意甯徘徊

卻病始登山三度謂祠屋風日老蒹葭欲往迷前躅從容理歸棹水流山簇簇暮色蒼然來人天渺一粟

漏釜燃溼薪烟篷坐瞑目散翁酒腸空三子但捫腹謂石欽仁先絮先浪游有饑飽一笑境難續袖中亭林詩絮先

擲亭林詩集應向西台讀杖策追光武亭林句羣雄亦粥粥莫道客星孤終古桐江綠

王景

景初名懷芬字蘭生侯官人光緒辛卯舉人有秋影庵遺詩

石遺室詩話同治季年陳芸敏葉損軒方持祧唐宗宋之說蘭生乃務爲幽峭一路手鈔錢籀石厲樊榭萬柘坡金冬心祝芷塘黎二樵諸家詩旣而自嫌少江山助從蜀學使者校文徧歷蜀中山水得詩數百首斷句如一鳥乍從深竹出孤花欲倩短牆扶問路心懸入峽水寄書目斷過江船山勢銳於牛礪角江流鬱似馬羈槽山泉氣壯來羣馬野樹根孤立半人五言如竹暗漸低月池光還受人窗明伴書月衣帶過江雲皆佳

雨夜

好春明日是花朝雅集分題不寂寥詩社重來曾有約酒徒何處更堪邀白衣烏帽山塘路竹粉松毛野寺橋恣我清閒輸我健往年那不雨瀟瀟

春曉

朝來雨氣斂階除日色熹微上綺疏試拂新巢招社燕預收清水養盆魚當餐喜啖初抽筍宿墨間臨破體書一客都無籬押下暫時何事可愁予

示肖虞

光燄爭誇萬丈強幾人得路向康莊山窮水僻行蹤少便是詩家好道場

錦江遺懷六絕句錄四

塔影微瀾九眼橋合江亭外雨瀟瀟鳴蟬隔樹如相訊江上詩人太寂寥

竹外連村八九居，瓜棚豆格暎森疎。
移家安得借兒女，織錦閒時學捕魚。
曉霧霏林月墮汀，櫓枝搖夢夢初醒。
一行飛鷺白於雪，點破數峰江上青。
春鉏照水疎疎白，御麥搖風細細黃。
賺我酒魂乍無定，半江帘影送斜陽。

初至嘉州聞絡緯

凌雲江上獨沈吟，絡緯聲中夜向深。
筍柱誰家風黯黯，機絲隔巷雨愔愔。
不堪長物搜殘篋，何處寒衣搗暮碓。
討句不成尋夢淺，孤燈知我此時心。

萬景樓

九峰三水各悠悠，遠近蒼黃眼底收。
人比白雲難小住，天教積雨慰斯游。
當階草色晚將變，壓樹蟬聲秋更逾。
未敢樓前久延佇，鄉心鶴企易生愁。

嘉陽行船曲四首

妾居近在明月旁，郎從鬱姑山上望。
問郎積寶能幾許，逢人道妾工縫裳。
三江江水滙平羌，暮暮朝朝打槳忙。
郎在船頭妾船尾，一帆隔斷船中央。
何須三水開明鏡，嬾與三峩鬪遠妝。
日日烏牛山下去，爲郎網得墨魚香。
莫說風波思故鄉，二千里外是瞿唐。
離堆今夜好明月，伴妾江頭拜竹郎。

次白升亭八月十五夜坐雨韻

對酒不能醉淒然萬里游相依聊數子未便似中秋雨戀燭邊話詩分病裏愁老蟾如有意更莫照閩州

鎖江亭晚望懷叔伊

鐵鎖何年置江亭望宛然孤城雙鳥下獨客亂山前夕氣浮瀟水晴光放漏天素心天未感無語立蒼煙

得芸敏都門書兩月矣無使郵不得作答

珍重京華尺一書征鴻渺渺報章虛茂林只恐秋方病中散惟應懶未除自分交情同輩外無因客况半年餘敲門落葉深秋雨例到蕭閒恐不如

留別家仙洲農部

一舸西風下白波天涯迴望意如何長安索米原非易蜀道題詩莫厭多冷淡交情秋後見荒寒歲事鬢邊過他年良晤文章在實理從君證茗柯

既束裝矣實孚侍御苦留意不可却卽賦送曦初並訂相見之期

布帆買就君先往極目蠻江滾滾來夔國尋詩杜甫宅荆門張樂馬融臺休因風雪銷餘興便見江山仗大才明歲扁舟下黃鶴一杯遲我菊花開

十一月十四夜有懷叔伊

羣睡忽已寂孤月積如水壁燈淡無明累累燄將委披衣起庭戶微諷松風起松枝影踈地奇字變籀史慨然念伯玉家居樂妻子打頭數間屋雜樹翳軒几讀書愛夜靜不覺僵凍指年來嗜酒懷我別黨有幾

傾盆紅如丹香潑梅樹底大醉應念我饑涎落萬里

梅子關

萬仞摩天梅子關關前七十二溪環路人爲指巴亭縣數片殘雲無定間

登武陵山同希村

武陵孤峭似太華真形時時蟠心胸雪中經行復茲道躋討詎患高龍窺初從黃草轉幽際人聲鳥嘒空
諸峰磴苔拳踖屐伶俜天門一路盤曲通蜿蜒數里得坦適篁松夾逕撞笙鐘白雲指顧團團天不知已
在姮娥宮隱空蔽日青桂叢泉紳十丈橫長虹登顛相與試法乳甘冽一洗腰脚恫羽人峩峩纒奇氣噓
雲吹霧來朝宗或如珮環弄好女或如珪璧陳上公剛健婀娜態度別後先羽衛俱春容虎頭平生筆不
到雕鏤神妙窮天公其餘俯仰紛錯綜譬如凡馬羞追風茲山千年隸蠻荒鍊魄豈無真人蹤石牀丹竈
杳不見前林空見夕陽紅催歸我不愁匆匆今宵山下抱寒眠還能飛夢凌山中

去下巖寺里許山中有一人家幽絕

野老真成世外尊背山臨水起孤村菜花深處通幽徑柳葉陰中閉口門浣女雨餘春白石耕牛日暮繁
孤根可憐奔走江湖客躡足潛過不敢言

高向瀛

向瀛字穎生福建□□人光緒□□舉人官浙江候補知府

春日雜題錄二

黃農不可作虞夏忽已沒首陽仁義人老死食薇蕨後生悲所遇望古嗟咄咄寫懷託聲詩編集刪年月
淚來如湧泉痛極幾刺骨願化辛有魂不見祭野髮鐵函健心史留待百年發鐵質有銷沉鐵心無枯竭
雜花綴衆綠生意紛吾齋港灣春水長隔岸桑正佳吳越昔屯戍此地雄椎埋承平漸文化無德亦易懷
微祿充吏隱官舍如牛蝸門前通太湖導江更達淮日間何公事討魚檢詩牌吏民爭指笑疎脫忘形骸
但願民智進愚賤富貴儕再願民俗醇婦子耕鑿偕容我記廳壁哦松日嘲諧今年蠶信好猶恐風雨乖
新絲且先賣買米又量柴

視媿室病

三高爭說白眉良濱海春風一榻涼瘦骨猶能天下任老懷不減少年狂索詩豈欲如生祭顧影終當作
國殤性命付醫家付弟祇愁活國更無方

送石遺丈入都

文集詩囊共北征山寒木落海天清
經行時覺兵戈氣感逝深合骨肉情
故里宗風闋十字上庠矜式魯
諸生懸知一榻尋滄趣爲道黃門雪鬢成

棗下吟

棗下高歌纂纂完餘生杯酒話辛酸
城中飛鳥師廝卒屋底啼鳥走達官
已見立碑功德大幸無愛鼎誓
盟寒輸金函首尋常事獻納空爭一字難

天台山雜詩

雙澗迴瀾尙昔時國清塔下夕陽遲
寺名若應興朝識忍淚登高讀御碑
滿山雲霧種僧家到處茅庵日試茶
竟似梵川賢太守清泉活火作生涯
石梁咫尺隔仙蹤煩想靈溪欲濯胸
絕好人天初定後飛流百道數聲鐘

壬戌三月既望拜螺洲文誠公墓下卽送毀庵太傅還京

門館肅遺像景行平生思慶基
延冪仍先三日公乃孫生太傅命名曰仍賢上冢剛及期
沈陰得開霽春江舟倭遲溪橋綠

草徑綠水湖田滋月池繚周垣入門
臨豐碑霜松森就列想見兩觀儀深
書大司寇東家義在茲聞人滿天下
寧能容清時宰木九十年一誠終主
知繩武今誰屬曾孫鶴髮姿出山一
紀強玉座需扶持捧勅歸江鄉焚黃
盛典垂易名曠代恩酌酒含淒悲故
老羨矍鑠謂真吾皇師婦孺望鬚眉
如接天顏怡登山時沿途聞

見如世運雖尙否人心無可疑輿櫬行有日
誓墓跪有辭一身家國重在天式憑之孤憤鬱
草莽豈獨懷

舊私廕廕北園路白日方西馳

吳學廉

學廉字潤泉安徽廬江人光緒辛卯舉人官江蘇道有賞寂堂詩稿

丙午九日北極閣登高

龍虎山城擁壯圖金陵從古帝王都江流東去英雄盡秋色西來風景殊九日登臨宜曠快百年往復足
嘻吁關河自有無窮事獨恨乾坤一腐儒

戊申大汛駐高郵督廳汛官弁守護河工堤壩舟中苦熱二首錄一

運河納淮泗迂遠入江流西岸連數湖東岸覆數州大汛衆水滙奇險集高郵治河使君職行部在扁舟
水誌日報增凡廳官汛弁於大汛時皆日有橫流真足憂三壩最當衝車邇南關新壩三壩最爲險要千夫宜急求余到
三壩培土皆卑而近水乃嚴責廳汛明一紙官書催舉錫如星稠三日工遂訖障川差可伴成災豈天意
且大集人役加培子埵限三日成功如堤潰決則秋稼皆被淹沒故以保壩爲先

游高郵露筋祠

小閣高林人寂寂虛堂香霧晝沈沈靈旗不動蟬聲歇三十六湖煙水深

次韻鄭蘇戡九日滬上徐園登高

流轉年光付燕鴻，茱萸會裏一衰翁。
出塵自有人間世，吹帽聊當海上風。
蒲柳飄零秋已老，關河迢遞事無窮。
高樓未負登臨晚，留得斜陽萬頃紅。

殘臘六十初度客青島作

向老逢辰自可哀，客中餞臘望春回。
衰遲餘日供文字，憂患終年付酒杯。
行樂未妨兒輩覺，對眠難得弟昆來。
博泉怡泉兩弟及尹樹兩兒皆由滬口內到此移情海上鄰，張李張發樓李季舉皆居島上日相過從縱浪乾坤笑口開。

次韻李悔庵春感

向道人間重晚晴，空餘霜鬢尙論兵。
近擬以管見探輯古今兵略百年更見多憂患，四海誰堪共死生。
殺馬固應從此逝，藏刀慵作不平鳴。
寒儒草木甘同腐，未要潛夫與論榮。
潛夫論有論榮篇

乙卯四月自滬抵金陵下關入城初返鑑園

暮年蕭瑟客江關，松菊猶存爲暫還。
鍾阜英靈應識我，草堂依舊對青山。
黃塵歌吹厭喧囂，來聽空城寂寞潮。
剩水殘山舊時月，人間真有可憐宵。

陳散原見過園樓賦詩撫景興懷有哀憤之感詠歎之餘依韻奉和

黃浦望蔣山，小別音塵闕閒身。
趁勞軸戀此殘秋月，登堂話清晝。
再過便陳跡，門庭久蕭寂，自鍛摩天翻。
詩賦動江關，哀時作詞客。
晚晴復過我，光風溫几席。
雨後溪漲平，柳外煙巒列。
松菊荒猶存，靜立待霜雪。

芙蓉獨爛熳冷豔含皎潔池臺半草莽劣可娛水石高詠成商聲秋氣爲淒咽浮世實危脆勞生訖何獲
麟楨競兒戲千鈞一毫髮燃犀照水府洞見蛟鯢窟橫流浸滔天坐覺宇宙窄君才富文史守道自怡悅
有筆誅奸諛一字嚴斧鉞比與言有物悲憤淚成血廢此相哀詩肝膽不楚越

聞潘若海猝病歿於香港以詩哭之

勃鬱移山志沈冥蹈海行乖逢逐客令甘徇黨人名司馬資王邠河汾重董程空餘寢門涕風義感平生

西湖雜詠

秋澄萬景明雨驟一湖暝扁舟入空濛玩此跳珠迸諸峯雲外亂雙塔煙中定寶傲雷峯二塔清鐘尋岸來似與
蒲葦競雨過水風涼一洗心眼淨天公憫煩鬱使盡煙波興

鄭孝禮

孝禮字稚辛福建閩縣人光緒辛卯舉人

福州西湖開化寺題壁

斷雲一往了無痕躑躅湖堦晝易昏山榭葉黃詞客面水蒨花瘦女兒魂上方聽法依清唄他日尋詩拂
壞垣誰爲留行行不得癡禽虧汝太溫存甲午十月

會聞共命是頻伽啼落陀羅一樹花七字題詩猶澆壁廿年歸客已無家遠峰掃黛眉如語舊事成塵眼
欲遮祇有湖波流不盡照人青鬢點霜華
壬子九月

自海門放舟至大溪

晝永難消川路長村村風物熟梅黃野田吠蛤更番響草岸流螢徑寸光想勝頻翻清苑集
趙師秀有雁山諸詩最佳

臥遊先試大溪航
小舟僅容兩三人坐臥好山見說秋來好
浙中有春遊天台秋遊雁宕之語不待秋來興最強

大荆道中

蒼雨山溪盡態妍不疑圓照亦耕煙也如得意名家作只許題觀不賣錢
不待飛湍與浣塵烟雲縹緲換昏晨豈知昨日勞勞者已是襄陽畫裏人

宿靈峯

路轉巖腰已十盤下輿聊憩弄潺湲苦吟鷺嶺難尋句酷想龍湫到此山許掾得仙由濟勝謝公爲賊號
能頑洞門盡日雲還往輸與道人一味閒

淨名寺

入山披髮事何年猶勝杜曲謀桑田謝康樂來此落屐諾詎那去誰安禪絕空危梁噴飛雨翳徑亂竹鳴
暗泉水雲盡處不可說欲乞一聲清磬圓
辛亥後山僧遭斥殆盡空山古剎鐘梵闐然落屐亭名

天柱峯

奇峰若穹碑卓立靈巖下初無一字賞三宿不能舍稍悟造物賢安用事擗捲屏霞絢天外傾聽靈湫瀉
危磴獨行行畏虎未敢惹小龍湫在屏霞嶂後

大龍湫

玉龍十萬勢睢盱振策人來躡碧虛河出崑崙差可擬雲歸太華定何如空山自喜成幽閉濁世無心與
祓除小立須臾還去去倩誰汗漫說匡廬

早發靈巖

入山凡五日仲夏哉生明晝窮雲霧跡夕對雨泉鳴凌晨起樓際仰見天宇晶諸峯迎曉旭衆鳥皆變聲
風篁乍迴盪巖壑流竽笙孤松盤絕頂考自前代榮天柱峯前有松若蓋見明人紀載茯苓如可劘絕粒求身輕如何趣
夙駕不恤山靈驚儻瞻余馬首定指崗尖行百岡尖爲雁山最高處雁湖又何許天外空含情

弢庵太傅招游小雄山宿聽水第二齋越日至觀獵村探觀飛瀑而返時壬戌二月也

先生始壯躋臺閣中歲放歸專一壑過江石鼓覓幽棲異縣何時又窮索杉篁蔽嶺日出遲錦灘灘前捫
斷碑當流赤足踏澗石彷彿如讀昌黎詩蒼崖相去弱十里兩道玉龍蹴空起五更魂夢不知寒三日風
泉猶在耳江山此日坐誰憐謝傳風懷白傅年送君螺洛情何極缺月娟娟見下弦

六月二日出齊化門偕嬋君微女

趁涼侵曉出林垌相伴風鬟到水亭說與清於收畫藁白芙蕖立墨蜻蜓

金鼇橋上看揚塵海子蓮開歲歲新曾是父兄提我地我今提挈又何人

吳用威

用威字董卿浙江仁和人官福建鹽運使有兼葭里館詩

青溪春泛遇伯嚴笠儕於別舫時伯嚴將歸省慕笠儕亦暫還彭澤賦此送之

青溪二月桃始華似與人面爭朝霞嬉春兒女惜春景日日對花愁日斜淮陽汲黯但工臥聽鼓不用晨趨衙酒人三五挈吟榼推篷意與江湖遐歡場何少別何易舊時儔侶今天涯風燈過眼石火急難得小聚如搏沙花枝盈盈照深盞身雖應官心出家歌聲誰復辨秦楚解醒正要箏琵琶陳歐二子况同調急駕小艇逾冰車亦知萬事不挂眼且辦行樂餘何嗟似聞二子欲歸去而我繫縛甘匏瓜緘詩附子訊匡俗山中靈藥應抽芽

飄颻

飄颻神思在雲霄短酌孤斟不自聊狼藉春偏歸緩緩滯淫天亦厭瀟瀟暫晴山勢爭飛動積晦江聲轉寂寥靜斂心光窺兩戒一鏡如夢萬魔驕

新柳

亭亭孤影漸天斜，老傍江潭縮歲華。
慣解低迷媚烟月，可能披拂耐風沙。
玉關舊怨征人笛，樂府新詞滿店花。
朱雀橋南烏巷北，不堪重憶謝娘家。

過竺橋見杏花

忽漫行春過竺橋，
緋紅簇簇出林梢。
卻緣冷寂逢孤賞，
忍爲繁華憶六朝。
醉靨乍中金谷酒，
嬌波初上石城潮。
海雲萬里愁兵氣，
一領芳妍意已銷。

秦淮舟中與拔可談詩感逝傷來悄然有作

江海交親見性真，
鬢絲爭與物華新。
論詩進退渾無據，
感舊蒼茫獨有神。
一雨暫教塵夢洗，
百憂偏向舞筵陳。
輸君早領滄洲趣，
挂壁龍蛇起怒鱗。

清涼山訪掃葉樓還過薛廬

高樓瞰城陰，
泥忒幽討綠林意。
紆迴背壑氣深宵，
初登步屨蹇再躡眸。
忽瞭明明見江湖，
煙雨助窈窕。
臨潭呼蟠龍，
倚檻數飛鳥。
緬彼巖棲人，
風流迹如掃。
後來全椒翁，
誅茅置亭沼。
山林誠誤人，
一臥遂終老。
丹青委塵蠹，
珠玉散萍藻。
升沈一邱耳，
萬事等鴻爪。
他年問名字，
謬誤亦頗好。
茲游吾偶然，
憂來忽盈抱。
坐領雲水情，
抽身苦難早。

歲暮言歸車中遇伯嚴吏部一尊送寒共載至鎮江而別

金川門外雪泥乾，
車上相逢罄一餐。
君是閒人忙勝我，
歸鞭游屐各衝寒。

春寒二首

坐覺微冰蹙硯池，妬花心事玉梅知。
凌風卻月香千樹，禁受春寒只一枝。
草綠裙腰花滿闌，永豐西角有春寒。
雨搓煙嫋千條柳，畫取愁痕作樣看。

早春苦風雨感時遣悶二首

春風如醉復如狂，擘柳吹花欲度牆。
籠袖坐看雲物變，當杯微惜酒波涼。
愁聽暮雨吳娘曲，枉斷蘇州刺史腸。
一月輕寒數番信，恆河鬢影有新霜。
絲雨淒迷苦弄春，卻寒簾外有輕塵。
迴黃轉綠花無主，軟醉低眠柳向人。
逐婦鳩忙元自拙，遷枝鶯巧若爲鄰。
吟鞵冰透苔衣損，望斷斜陽獨愴神。

九日與客飲東湖酒樓

側帽看山此一時，黃花羞與故人期。
笙歌漸憶承平日，菡萏猶開最晚枝。
捉臥甕人聊作達，敢題糕字便能奇。
干戈定後瘡痍見，淒絕東湖柳萬絲。

重過舊糧儲署愴然有作

猶是朱藤蔭碧池，孤兒卅載鬢成絲。
憂天欲墜身寧壓，隔世相看夢豈知。
豔落芙蓉迷舊影，劫回桃李換新枝。
窺牆山色青如昨，剩倚危闌一解眉。

次昀谷招伯嚴遊大梅寺詩韻卽以奉贈兼訂後約

老去心情只愛山春還濃黛壓眉彎魂招雪虐風饕後興寄青林白塔間世味客如泉自澹禪扉雲與佛同關緘詩好訂尋秋約不負餘生是此閒

次答昫谷

臥看耕煙畫裏山近得石谷畫幀繚青縈碧半林彎心知問舍無高計徑欲移家住此間棋局長安聊復爾茶煙禪榻最相關能專一壑須奇福暫領松風卽是閒

題維庵遺畫

義州謝世文石銅梁死孝禹尊俎虛閒几研荒一樣西山弔新塚歸來慮外月蒼涼謂匄公也

再題維翁畫與曹東敷

雲林畫裏居難卜摩詰詩中臥可游此事自關胸有物癡兒侈說筆成邱

大雪前一日行抵河東次韻葆之都門贈行之作

一邱三徑已蹉跎辟地看天且放歌事往乍如吹雪散路難猶喜見山多百年來日同旋磨千里驅車竟渡河賴有故人勤好我小詩微尙獨相阿

海棠有殘意

一春無雨不成陰負此纏綿愛物心睡臉嬌紅纔幾日慵粧褪粉便如今籠燈扶影千回賞垂老言情一往深誰識美人遲暮意鬢絲禪榻獨沈吟

伯嚴往歲清明時必還里省墓計與邂逅南昌又一年矣遠別逢春緘詩寄憶

禁煙節近閨春長上家人歸舊草堂萬樹杉松無魏晉一年桃李又滄桑西山翠想盈裾暖北極雲看罨
夢涼知否休休亭下客因君詩興落江鄉

白丁香花下作

瑣細玲瓏照鬢華晶簾糝雪玉搏沙陔陔二月無芳草點綴春風有此花

江海謠

劍南詩老著語工萬里作客原非窮放翁句中條雷首在庭戶大江東走垂天虹官閑足可事文史時復得

句聲摩空胡爲惜悵夢江海雨笠煙簑呼釣篷江南三月花吹香春意柳絲相與長吳姬壓酒正奇絕越
女解謳還斷腸人生不醉直癡漢坐任白日來堂堂黃塵烏帽那能抗清鏡素絲行自傷桑田是海陵是
谷賭墅爛柯爭一局儘教霖雨爲蒼生何似春江變醜淥北人自北南自南湖光佳處留茆菴西行回轍
昔笑孔東來望氣今非聃歸飛有翼不得逞夢轉此味猶餘甘會須一櫂就魚麥租橋課桑吾自諳

王司農做大癡陡壑密林圖

西來山勢鬱千盤盡作關種與范寬攜得江南風景在密林陡壑當真看

據憤

到此真無憤可據一蒲團地是秦餘蜂窺花安心猶競鳥趁陰濃意小舒灑酒澆書消日盡煎茶燒葉聽

風初青山不與人間事默立斜陽獨起予

紀事

搏土作人原戲耳偶然加膝偶沉淵盧生莊叟不同夢猿鶴沙蟲俱可憐叩馬六軍成此局墮驢一笑是何年甘陵南北風流監皂帽遼陽獨汝賢

留別中條疊前韻

如此河山爲汝留築亭早擬署休休歸裝喜挾千重翠晚計催盟卅六鷗繞夢煙霞終不負忘機鵲鳥莫相尤來時風景依稀記霜磴凌寒月滿裘

讀宋人詩六首

烏塘春水柘岡花投老鍾山可憶家捐得相公拗性去倘迴光景到桑麻
梅翁堅瘦醉翁腴坡谷前頭故自殊好語一生能有幾亂雲春水夢西湖
陵陽老守竹三昧緩帶看雲寫性靈早識烏臺有詩案栽花纔了種浮萍
絕俗清新豈浪誇微憐詩筆太槎牙斷雲爭誦垂虹句我愛三時看好花
長愛吾鄉林處士解吟埋照酒醪中沈冥自是承平福何處青山著病翁
詩人要瘦言真謔怪底閉門長忍饑聞道學仙須換骨可容親見五銖衣

憶昨行再題石谷蘆花釣船畫冊

憶昨驅車度虞坂解裝便夢江南船題詩寄與一丸月往往宵枕尋秋煙山城兀兀坐閱歲萬態一瞥如
驚鷺新霜著鬢塵面澆臥楫生苦冰腹堅正思炊雪就蝦菜那知隨牒趨幽燕平生欲試釣竿手不落江
海寧非天東坡百事常隨緣晚頗欲買陽羨田向來作計一鹵莽將老尙乞廚料錢澠歷歷引歸轂兵
甲森森鳴急絃風鷗不下霜雁警卽辨短艇能高眠卻念烏目山中人寄與獨在滄江邊葦間濠上去已
遠得追漫浪嗟猶賢波濤湧洞此何世一葉正似風中旋舊時月色不可傳越二百年知幾遷披圖愁煞
江南客秋到蘆花還自妍

借劍承定之鶴亭看花極樂寺定之擬寫圖紀游賦此促之

一春懷抱付支頤出郭尋春春豈知此世久應無極樂殘僧猶與護花枝相看不厭初成賞問訊能來更
有誰舉似畫禪休惜墨御河煙柳綠千絲

同葆之鶴亭過龍樹院適抱冰堂新構落成

郊南富煙水野鳧閑過人延緣葦間路著此風波民照鬢颯秋雪寂寥非我春龍移歎響絕羣飛鷺視新
堂堂抱冰叟魂魄能相親世易文藻空殘僧話滄塵茶烟忽破碎簾隙秋逡巡一笠寄霞賞夕陽工寫真
用門存韻贈拔可

斷夢難尋宣武門閒身端合住江村雷音似覺諸天靜風義猶能萬口喧稍喜林逋有遺稿卻思王粲一
銷魂與君更說西來意記取華嚴半偈存

姚鵬圖

鵬圖字柳屏江蘇太倉人光緒辛卯舉人山東知縣

從牧翁故居得紅豆乞汪君伯琛爲之圖

夫容村前溪水香綠波照我秋衣裳清晨撥掉二三里惟見遠樹含煙蒼中有兩株挺而秀

相當膚似白榆零曉露葉如丹桂舒秋芳往者牧翁闢金屋斂而弁者深深藏

曾見河東幅巾小影

童童寶樹大盈

抱重重瓔珞雜明璫故家喬木喜無恙絳雲久歎風流亡老農聞言長太息靈根已逐飛龍翔

前明舊本久爲風摧

旁支側生綿歲月輪囷今又凌風霜嗟予生年強七十三見結子不盈筐一珠爲君解衣贈重之不異隨

夜光乍驚火齊來絕域又疑舍利酬空王玉粒祇餘嬰母啄丹砂未許麻姑量重重擁抄飽秀色詩人天

與療愁糧我黨汪子好詩畫不減當年程孟陽折枝許我寫真相奚須火樹爭輝煌媵以好句紛琳琅絨

以猩紅古錦囊願祝牟尼生八百抵林慰我相思長

西樓二首

一角西樓最上方華鬘天女耀容光重開錦谷誇春好不卷珠簾怨日長十里迷香黏蝶粉五更曉露裊

蜂黃莫嫌花事都零落尙有徐妃半面粧

舊日樓臺風景非重新妝閣對斜暉雲中青鳥頻頻喚陌上香車緩緩歸儘有情人思破鏡誰知阿母慣牽衣玉人一去無消息惆悵尋春事事違

庚子秋暮南歸濟南留別

秋風一夕動歸裝枉說尊鱸憶故鄉異論何年定堅白中原有血戰元黃西京泣狄人垂淚南國啼烏夜有霜寄語諸君憑努力我生哀怨信難量

吳士鑑

士鑑字綱齋浙江錢塘人光緒壬辰榜眼官翰林院侍講

次韻題石遺所居小秀野草堂

居鄰秀野慣停驂相約精廬訪竺曇結夏槐風舞龍樹尋秋蘆雪滿鳧潭眼中廚顧高京雒別後珠厓感海南苦爲潛孽補遺憾論功計厲合同龕

竹汀先生著元詩紀事未有流傳且銳意成書刊於江南近又重輯多至數十卷可與唐宋詩紀事鼎峙矣

叔伊以游積水潭高廟詩見示敬步元韻

詩盟觴政遺年涯蕭散裙裾日易斜漉葛醉飛金叵落駢枝妙綴玉交加蘭成感入江關柳元裝經翻世界花寶刹城西前代盛訪碑懷蠟久停車

三六橋朔漠訪碑圖

北徼貞石似星鳳諸老夢想和林碑李

文誠師

袁忠節

王文敏

盛

意國祭酒

恣搜討曾從未座參然疑幹羅布拓

苦未審

俄人用洋布拓之送至譯署

薑齋初至施氈椎

志文貞始用紙拓流傳甚少

吾友可園

晚持節眩靄處月鋒車馳萬安宮圮

獨憑弔窩朵故址無留遺兩盟之閒訪巨碣摩挲卒讀忘胼胝手打百本餉朋輩築亭蔽翼勤護持碑陰

深泐突厥字旁行左右蟠蛟螭雙溪醉隱惜未見得君表襍珍瓊瑰

碑陰及左右側均突厥文從未經人道及君始椎拓之

我思李

唐全盛日北庭金滿開藩柅鼠尼昆木來稽顙都摩支闕觀朝儀下馬捧兔學舞蹈丹鳳樓下揚稜威骨

咄次子實人傑光復舊物恢層基兄爲可汗身作佐默啜虐政親芟夷棄仇獨能用噉谷殊方載赫無愧

辭呂向齋詔致賻贈戰圖畫象森崇祠御書特遣高手刻六人姓氏知爲誰

特以高手六人往刻此碑見新唐書

察書市石

越沙磧千載屹立光北陲特勤音轉卽台吉古今譯語無柴儻耶律北人可徵信史文作勒原誤歧方今

北盟正雲擾雄圖妄覬成吉思金奔巴瓶詎足信覺迷益使從者迷展圖噴息拓遐想安得再遇開元時

許貞幹

貞幹字豫生福建侯官人光緒壬辰進士官浙江按察使有淮陰吟草

石遺室詩話豫生能爲駢體文步武常州派詩不事苦吟和平如其爲人

重至莫愁湖

又訪莫愁湖上祠樓臺如畫照漣漪柳絲曾綰卅年別荷蓋重傾五月時一片水光中婦鏡六朝山色美人眉絕憐虎踞龍蟠地名字千秋屬女兒

何藻翔

藻翔字翹高廣東順德人光緒壬辰進士官外務部郎中

偶成寄瘦庵公輔

晨興鬢緒亂如麻雨後攜鉏學種瓜壞壁巧緣輸蝨蠹荒池狂吠笑蝦蟆故人無補羞高蹈成飮何時問
煮砂只恨舊巢蒿艾穢歸來秋燕已無家

書所見

曉過濯龍槐柳東兩潘二陸記相逢人知秋去春來燕天有朝南暮北風漫以鷓鴣爭腐鼠任教鳧乙認
歸鴻望塵縱向車前拜解璽甯須舊侍中

讀史有感

青史無從覆舊基歸周白馬盡微箕百年養士有今日九廟勤民又一時陶阮亦曾汗偽命羲炎以後此

朝儀人民城郭都無恙繞樹飢烏愴舊枝

明朝

明朝饑飽誰能念一姓興亡未足悲名字已登桑海錄衣冠可是漢官儀
生逢堯舜今何世論到荆凡費我思昨夢光音天上到金輪珠網總迷離

客退偶詠

廿四朝無國不亡隨人悲喜各登場緋袍尙愧孫供奉青史應憐王鐵槍
獵隊隨宜參佛果江鷗間與話滄桑年來我似吠堯犬咄咄書空未是狂

醉後偶成

春來雜興寄田園不廢茅檐負日暄昭諫詠松原有託泉明述酒欲無言
何妨鄭五作宰相未信朱三有子孫偶與山僧潭柘話雪中銀杏至今存

屠寄

寄字敬山江蘇武進人光緒壬辰進士官知縣有結一宦詩

無端

家在長洲茂苑中無端錦瑟怨梧宮
畫船載酒不歸去花落五湖秋水紅

曉渡揚子江

早潮未上東方日風定春江水一碧
夢中柔櫓三兩聲推篷已在江之北
故園三月花正酣鬧春冠蓋屯
游驂鷓鴣啼遍渡頭樹問予何事離江南

夏日劉內翰庠招陪汪大守堯辰攜酒方直牧駿謨寓齋

過雨看修竹秋光六月生
杖藜山下興尊酒客中情
野鳥窺簾去新蟬挾樹鳴
習池風味好何意在彭城
雨霽陪劉內翰庠山齋晚眺

訪劉內翰雲龍山中

山齋日岑寂古木自生烟
一雨有秋意數聲聞暮蟬
流雲披幔入飛瀑激沙漩
多暇陪中壘羣經借共傳
清晨罷梳洗忽憶山中客
出郭墮道紆雲深講經宅
入門聞鳥語開洞見鹿跡
飛閣生松風姓軒籠虛碧
讀書此何時落葉秋山積

雨後登眺近郭山亭

微雨澗園林山光淡城郭客懷寄亭皋
散步躡秋籜雜花分戶暎好鳥當窗落
虛烟飛靄野水流漠漠
韞真隘洞林偃臥得邱壑嘉賞愜幽期
斜暉未淹薄

獨雁

關塞涼風起蕭條獨雁過中原饑饉後何處稻梁多顧景思儔匹低飛畏網羅蘆花秋萬里好去宿煙波

清溪曲

妾家住清溪楊柳溪東西溪頭有明月夜夜聞烏啼喚郎采蓮去相約清溪水花底一尺天晚香吹夢起
燒郎油壁車耕妾繡羅襦歡愛忘白日共食清溪魚

宮詞二首

龍池舊日寬如海宣使新開注玉泉午夜鳳城然炬啟相公進入宛渠船
偷隨阿監入深宮與別宮人總不同太母上頭傳賜坐不教侍立繡屏風

雜詩五首之一

降漢盛公卿鬱鬱登天衢致身本經術應務良不疏春秋可折獄三百當諫書如何中道衰漸用章句儒
章句亦不足篆刻徒區區河間工數錢乃更開鴻都居官且食雁不恤城上烏

李希聖

希聖字亦元湖南湘鄉人光緒壬辰進士官刑部主事有雁影齋詩存

石遺室詩話亦元通籍後始學爲詩有作必七律以玉溪生自許嘗寫其得意之作若干首寄

示余錄西苑湘君二律謂可以肩隨薩天錫云

西苑

芙蓉別殿鎖瀛臺落葉鳴蟬盡日哀寶帳尙留瓊鳥藥金缸空照玉階苔神仙已遣青鸞去瀚海仍聞白雁來莫問禁垣芳草地篋中秋扇已成灰

湘君

青楓江上古今情錦瑟微聞嗚咽聲遼海鶴歸應有恨鼎湖龍去總無名珠簾隔雨香猶在銅螿經秋夢已成天寶舊人零落盡隴鸚辛苦說華清

張 謇

謇字季直號鬻翁江蘇通州人光緒甲午狀元官翰林院修撰有張季子詩錄六卷

石遺室詩話季直詩超超元箸而時喜作詰屈語故是才人能事

消夏有懷同學

遠山青向夕移榻近煙林澹月入花影涼風來夜琴故人不可見芳草幾回深無限瀟湘意因之結珮吟

夜坐

蕭然百不能危坐欲無憑望入秋空杳懷隨夜氣激聽風階走葉愛月幔藏鏡聞彼毗盧藏南宗有上乘
登城東樓有感

黃葉尊前落青山水外呈危樓來遠意暮雨報秋聲談笑真無賴江湖尚有兵寥寥滄海上聊自慰承平
池上

憚暑思微涼幽懷忽向莫池影帶流煙草光泫零露月高雙樹轉風橫一螢遇雖復喧羣蛙子我亦何惡
從孫觀察公奉差淮安紀行十六首錄五

孟城城外水連雲卅里湖隄傍露筋愁絕花蟲如鴨大

諺云高郵蠶子如鴨大

如何鴨鵝賤于蠶

湖田處處鴨闌遮一片菱花間藕花養得鴨肥菱藕足一年生計抵桑麻
王劉名學照邦閩誰似潛邱老著書便欲近從潘魯孔同時已復恨相如
一城煙雨足蒲荷臺榭臨流結構多最愛蒹葭秋水館晚風月上聽漁歌
何因漢獻誤山陽枚里同看蔓草荒祇是感人淒斷處南昌亭在釣臺旁

奉呈慶軍統領廬江吳提督

隱然江表繫長城復見中興漢廣平暗咤但聞威百戰鬚眉未覺異諸生縱橫羽檄春移帳卓犖圖書夜
啟楹盡使風雲求猛士眼中袞袞是英彭

螻蟻百越柱標銅珍費何時入漢宮會長萬人看賜邸大夫五利慶和戎西羌應復思充國南土誰能繼
杜翁惆悵留犁撓酒日邊兒方弄柘枝弓

三年牛馬向西遙萬里蜻蜓島外潮帝子從無隨日出匈奴敢復倚天驕須防蹀躞常因瘴豈有柺蒲盡
得梟橫海樓船今不遠靈旗指顧畫招搖

通州別叔兄

却聽更鼓見朝晴風雨終宵有淚聲一語遣愁惟暫別三春扶病獨長征文章已識能憂患貧賤誰云有
弟兄海上桑麻應自好荷鋤何日與歸耕

詰明風雨詩以自解

黑風鞭雨駕陽侯飛鞚誰能祇合休造化小兒欺病客乾坤逆旅付扁舟空篋有曲公無度投筆何人我
欲愁未便新詩千物妬魚龍跋扈看中流

寄懷彥升用東坡陳州別文郎逸民韻

春波一片碧油油日夕江干照遠愁坐視羣山迎舊客空令短楫汰中流酒錢憐女窮三百豪氣誰能隘
九州北望長懷齊仲父未經薰沐亦纒囚

酬泰興朱曼君

盤也弱而才十倍於丕疆自其少日時開口詠鳳皇能爲六朝文亦復資初唐故鄉寂文雅得子真非常

時時弄狡狴斐尾五色章却持一寸兵而與矛戟常角勝非吾事吾意實所臧花冶常不食太璞無浮光期與慎厥德貧賤未可傷

題丹徒趙嘉生瑞禾臨程松圓山水遺卷

江山忽然落几席起而從之杳難卽蒼厓赤岸生風煙遠水殘陽盪秋色躊躇卻顧是耶非但見空濛含水墨昨者船來京口東寒潮如雪掀孤篷滄洲有景寫不得當時恨無營丘翁趙生吳興之苗裔六法精研出孤詣世上于今重戰功坐令主爵窮遭際江湖浪迹年復年賣畫幾何償酒錢宮聲一去不復返可憐縑素隨雲煙吁嗟萬物本無主一卷取足供流傳卷中奕奕生氣王趙生爾豈歸天上欲喚精靈歸去來江山如此曾無恙

絮

江水連溝水楊枝復柳枝何心成散雪無力倚游絲白日驚飄忽青春易別離酒邊金縷曲珍惜少年時

少年贈南海徐生

少年海外劇相逢璫勒珊瑚鞭意氣雄不信文開生仲祖俱聞鄒忌慕徐公微詞賦色憐膚上顧影隣花寶鏡中却憶初明論七貴幾回悵道邊翁

爲黃仲弢編修紹箕題龍女圖

浪費眞皇一丈文諸天雷雨事紛紛人間何限癡龍睡未覺雲中別有君

尺簡音書渺洞庭不曾珍髭怨芳馨金堂玉室羣仙事自欝天龍睇八溟

嘲吳彥復

才能摹印偏工懶日日高春尙愛眠祇恐他年韓約素人間無限印文傳

題松鶴圖

養鶴應增二頃田種松繞屋長風煙縱教此事都難得畫裏婆娑也自賢

奉題江寧顧氏忠貞錄從石公之請也

王師失律遼東日吾友從征幕北時軍府文書臣以告儒門忠孝帝知之九原白日昭昭在一劫沈灰泯
泯遺猿鶴沙蟲紛滿眼更無人覺可勝悲

太夷置酒吳園修禊

陰晴無定亦良辰寂寞相娛祓禊人野漲乍渾甯許盥林花未盡不妨春當杯儘聽前朝事賣藥由來海
上民滿把芳蘭勞北望招魂續魄自今頻

禮卿約同小山石公太夷雨中看牡丹用石公韻

重陰漠漠亂城鴉積水塘邊舊史家雨自作泥寧失路天能養葉當扶花呼燈近壁開書幃沽酒分錢數
畫叉儘有閒人消令節不愁敗興到天涯

石公招集龍潭錢春和伯虞第一首韻

人間直把奉償酒吾輩何因醉問天近水遠山看老大落花飛絮故芳研詩成欄角聽鶯坐客散城陰任馬旋但苦茲遊未能數等閒樂事要誰傳

吳園看芍藥茶糜次所語示太夷二首

取次園林只看花茶蔞芍藥一春除主人早向神京去我亦花時不在家
垞中最念方橋好非關非船與夏宜七尺釣竿三尺簾夕陽裁去月來時
海東尚有棲賢地薄宦終應子不堪安得剡溪錢百萬更招沈四與丁三

東臺謁外祖父母塋志哀

曉出北關橋萬冢荒壘疊微雨勢初止野風寒正吹敢與問遠近約略四里差回溝抱塋角金氏塋在茲
塋凡十有三圓列險半規我外王父母居中獨崔巍陳牲體再拜口默心致辭孫年八九齡聞母在室時
外王父先卒門戶王母支道光中歲後五歲三苦飢亦有舅七人各有婦嬰婉棘棘不相保角張自營爲
王母慟失明與母窮相依母以十指血易稻供娘糜自屑豆蔬覈雜以微鹽蠶王母偶啜嘗撫母淚交頤
謂兒十分苦兒苦蒼天知自母歸府君歲月有遺貽豈得甚甘好故亦窘錢貲自王母之卒母心蓄沈悲
望孫早樹立挈孫塋前來嗚呼母不待孫亦實不才悠悠十六年始得瞻天墀又以府君恤復爾三年遲
今日一尊奠母也寧見之母既不獲見九鼎皆塵錙飄飄紙錢燼爛爛宮錦衣紛紛路旁人榮榮人間兒

題太夷濠堂用原詩首句惜哉此江山爲韵

東風蕩殘春白日笑羈客亦有宵眇心胡爲聊浪迹惠施與蒙莊由來視莫逆招呼鍾山雲出入長安陌
悠悠二十年壯盛未容惜

杖策昔從軍東登箕子臺君從蠡木下弄摩日珠回當時一張口氣尙凌八垓風輪倏旦暮親見揚塵埃
蓬萊已陵陸滄溟何有哉

沈沈久雨雲混混下江水水去不復回雲開故有俟坐憐浩蕩中萬億流離子虛望將焉酬空悲亦可恥
天地有端倪俯仰究終始及時且甯靜丈夫要如此

進不苟懷祿退亦非迷邦看君百僚底磊砢無等雙一堂據濠上不厭隣家哢雞犬瞰其落日月臨其窗
高枕睨萬里白鳥橫煙江

云有汲汲志盡日常閉關遂謂嶄嶄人開門容荆菅羣諷埋孤笑時復相往還臨流弄清泚憂來替以歡
君其理漁具我亦投朝冠明年富春渚一路尋黃山

與太夷故
有此約

留別仲弢

拂衣去國亦堪哀辛苦男兒草莽來直分儒冠稱溝壑何知人海戰風雷嶽嶠似我歸猶得祿養憐君氣
益摧閩縣已亡丁沈散更誰相煦脫嫌猜

呈松禪老人

樓臺無地相公歸借住三峯接翠微濟勝客輸腰脚健憂時僧識髻毛非尙湖魚鳥堪尋侶大澤龍蛇未

息機正可齋心觀物變蒲團飽喫北山薇

奉送新寧督部入朝

戊己堂堂兩奏傳

戊戌八月二十日公奏有伏乞皇太后皇上慈孝相孚以慰天下臣民尊親共戴之忱語已亥十二月公奏有以君臣之禮來以進退之義止語海內傳誦

助名況

自中興年主恩新賜黃銀美時論終歸赤烏賢豈有夔皋容老退應無牛李到公前
錄車江上來還日堯日輝輝定滿天

贈陳伯嚴吏部三立

西江健者陳公子流輩論才未或先人海無端千劫過京塵相惜十年前崎嶇吳楚頻移舍唐突燕雲正控弦長歎新亭都寂莫強開淚眼對山川

病起

園林頻厭雨軒檻又東風病起看新綠春微愛落紅偶歸家似客憶舊稚成翁祇有山妻解矜勞惜瘁同
己酉元夜坐華竹平安館舊影室悼懷徐夫人

汜休養病輒無閒拚得閒時病已孱倉卒行窩成小屋淒涼大藥渺神山花中路改悲遺躅月下魂歸識
舊顏愁對一年能幾夕不堪霜日鬢斑斑

蘇堪以詩扇獎怡兒因書其背

鄭君余老友結交卅年強其詩妙天下鏗若聽鸞皇有子四五人燦燦成雁行令各習一藝勿爲詩所傷

詩好漫無用不好徒啾吟今見吾兒作歡喜騰篇章無乃譽人子與其直意妨世亂要材用材必棟與梁
區區琢宋桷得失皆尋常君意甚深遠兒輩安能詳譬之事博奕聊以酬嬉荒一笑語兒子老夫詩滿囊
花竹平安館臨行感賦

十日平安館春鶯苦向啼圓壇花欲黯小樹葉方齊來月窗多隙生苔砌有泥祇傷人去後萬事付淒迷
夜壘寧皈燕朝簾放螿蜂蛛餘三角網鶴替五更鐘往事成今日孤懷欲萬重眼前徵物理一枕自惺忪
好義憐兒直思間厭客頻閉門談古事留燭惜餘春霄漢無窮矚江湖欲倦身幾時能息轍明日又風塵
平安館寄衣至滬

孤樓燈火夜蕭蕭千里書來道路遙知我無窮相感意一回好語一魂銷
孤樓獨坐夜寒天檢點冬裘付使傳若把心腸較寒暖心腸煖過百重棉

同人集書院爲旬會石公示所作詩依韻答之呈諸君兼懷前院長武岡鄧彌之輔繪

延祖丹陽會溫公洛下英際時皆浩蕩有黨各聲名未覺江山變相憐意氣生酒徒今正少不醉若爲情
雅復成歡笑隨時得靜使住仍詩老席歸託釣人船春去清觴裏山來短檻前料能成勝事有暇卽周旋
出都酬沈子培

被放歸時子培方病臨發之晨東詩一章蓋中夜而作者車中往復悽動心脾寧惟離別之傷
抑亦風義之感因酬之二詩

六載經三別連權得幾朝有時借近局相過必中宵孤憤融朱穆虛懷禮鄭僑由來隔衢巷尙覺路迢迢
祇我成樽櫟虛君卜茹茅高深文字寄堅苦雪霜交斯世當相惜旁人或見嘲秋來寥闊意斗北向珠巢

子培所居之街

題安吳包倦翁論書箴後用東坡醉墨堂韻索子培蘇龕和之

古今評書究筆法如入市閭常不休安吳晚出獨精絕抉摘露神鬼愁其言洞豁豁障障以方度禮彼
何謬校量南北別宗派大都得力山東遊軒劉壻輕翁方網訂蘇董妙解時足開煩憂於石辨墨論尤羈
但史非士誰當羞自翁去後四十載來者相踵如成邱撥鐙聞之李大理聯琇暮年悔者何道州紹基間
從濂亭武昌張裕釗叩要領平腕轉筆資推求雄強洞達始平寔遠効寧可旦夕收沈侯於此信非袒鄭君所
得今已優相期努力造通會無嫌墨瀋烏菌稠

初秋偶興寄蘇堪

秋至忽如客遠歸差自賢得侍老親疾重翫閑居篇支牀就榮廕薤草清垓埏檀因辟惡蕪茗以益思煎
佳日輒有會新涼時一延薦新得明齊分餽招華顛桑紺夙醅釀稻碧初餽饋錯兼紫文蛤膾佐黃頭鯉
本非極飲饌不取甚濃鮮諧談落識緯既醉猶初筵有時督園圃任意從林泉與桐釋縛蔓爲芟刪叢蓮
辨榆郎姑種展竹西南鞭花幽桂樹短林晶柿寔圓卻病備杞鞠含芬愛橙蘇來鶯語已熟葶雀巢所使
狀隨草木叩經略禽魚詮廣之通異域證之寔前箋或讀道書罷或諷仙詩焉所規扶海垓甯滅桃源天

得地且種樹買隣安有錢懷哉鄭夫子京國方迤邐嘗訂元白約共追皮陸緣此事竟何日懸勲企歸田
晏歲當乞假過江常有船倘來菰蘆中歡喜聊周旋

錄甲申以前詩八十餘首寄石公附柬三首

昔我嘗爲益山客今年盡讀益山詩湖山到眼秋仍好冰雪看君世未知
滄海東頭鄭舍人歸時時復壯君貧祇今誰是談詩侶拾橡山中正苦辛
工詩何與窮愁事藉遣窮愁亦未賢我已安排扶海垞不妨早晚寄吟箋

薛廬喜晤石公敬懷桑根先生

邂逅曾無約羈栖尙此才文章池館託風日酒尊開便使登三筴都應感八哀永令堂下路落葉浩成堆
奉呈常熟尙書四首

東坡初出門獨嚮歐陽子昌黎掖後進拳拳在張李古人慎所緣身名託終始攀躋猶及公州郡忝鄉里
十年遼海軍苦辛狎泥滓公與幕府賤問訊輒書尾知公大雅人等間不足擬憂患能知幾恂慄斯有斐
少小盛氣志頗亦羞羣狙家世服農畝不眩車輪朱上粟二人訓下規千載圖江河絕東寫日月駸西徂
中間氣振蕩萬物飛蓬俱常恐願力薄墮此禮義軀悠悠迫中歲四顧增踟躕踟躕思古人遙遙唐與虞
寸志不可遂萬事皆塵埃猶是中國民帝京時一來昔歲荷推舉冥冥如天開公今再薦士隔絕中路霾
由來得喪際出入材不材公心照四海涕泗生枯荻不遇故細事纏綿惻中懷丈夫尙施報所報安恃哉

昏昏九衢塵有官未云樂騰騰萬人海機利進鋒鏑獨念平生交肺腑皆煦燠驅車出國門連朝輒心惡
况與夫子親眷睽重邱嶽八年四回別此別非疇若才鈍語易枝戚均慮無壻江鄉有間田先歸料鉏耰
被放將歸意園祭酒貽書謂僕與君交大似余廷心之於戴九靈時人擬之秦不華之於煮石山
農者妄也謬何足當斯語重悲盛愜奉詩呈別

有蝨無堅堂有蟻無完胃堂傾與衆罹胃腐獨身崇寢傾寢腐時相忍用深諱一蟻一世界一蝨一智慧
奈何胃與堂如聞結遙愴

范武但祈死正則能哀歌其言至傷心荒忽搜天魔分止摧一身報君理則那高皇有成命肺腑凝山河
性命有事在憔悴將如何

大構非一材大樂非一器材器無小大欲儲辨真偽千金買跛驢良馬將不至寸轡控飛龍應者皆下駟
君子貴知言與人見真意

長河有伏流冥冥自王屋及其出地時所在怒漩復操舟試中流不到更無陸國工臨劫碁先幾料收局
假哉一子顛奚翅衆人辱

少年攬八極常懷無窮思臨當軌轍阻方悟輪轂非不當改輪轂將歸中薪炊戢影事耕釣四十更不遲
徐茅中路語謬也聞知之

夫子枉相假自來太學初遭時一詬斥所假彌有餘深心出苦語校量攀戴余天命人事間獨公費脚躡

流涕望千載息壤猶區區

因勗臧舍人索諸果木於馮果卿同年汝桓

百年已決爲農計四海常參種樹書都道馮園名日下千花萬藥衛精廬
江鄉翠栝不易得文果哀梨得更佳期與清溫長孫子不愁變枳橘逾淮
馮君尙有河南樹乞與更煩王舍人引水開園甯小事安心接待九州春

中秋日附舟省叔兄於江西

去年重九日霧曉出江壩歷閏裁周歲辭家又趁船秋隨佳節換月向旅人圓未甚悲離別匡廬在眼前
至貴溪喜晤叔兄

連山落水到灘分枕水山城帶暮雲入境但饒風俗簡逢人已說長官勤文書堆裏鴉翻樹衙鼓聲中豕
散羣難得阿兄真耐苦歸能歡喜報嚴君

別叔兄歸里

見惟旬日別經年臨別朝來倍惘然量帶略同三尺舊檢梳時訝一絲宣人間憂樂都無賴海內文章亦
浪傳隨分終期早歸隱草堂果木半齊肩

雨中望上饒諸山雲氣

將雨山雲忽際天有時山忽上雲顛晚來更被橫風擾萬點青蒼盡化烟

東崦纔晴西崦雨南峰旋沒北峯明不知何處雲無事坐聽灘頭新漲聲

上灘二十二韻

歸路初桃迴臨灘拾級同水從玉山下舟游貴谿東磊砢連厓碎陂陁會一猷坻痕新漲到礪道昨宵通
隄隘流逾激巖回瀾復沖射催千羽勁挽失萬牛雄大達翻平安將旋卻渾融自然成搏躍一瞥遽投空
灑灑驚翻鶴輝輝沒飲虹亂披瑤玉佩纖次水晶葱組練飛旂撓琉璃覆盎盅跳珠聽的歷噴雪併玲瓏
正爾諧琴筑時還中徵宮蘇眠蠶簇葉合陣烏喧叢洵洵晴都胸囂囂語忽聳蘊修齊偃碧楓落偶漂紅
響近兼知碓停多欲下馭九支九折阪弦殼六鈞弓夜嘯愁山鬼朝泐見裸蟲更無巫峽夢况滯石尤風
傍鷺頻炊飯窺魚輒柱篷未妨歸路緩鎮日數南鴻

右臂患風微學讀蘇堪寄丁恒齋詩意甚解脫因和其韵寄恒

莊周昔論道特重支離疏其於形德間往往解天拘丁生求名實用意介墨儒搖精而勞思一病歸江湖
右體瘳不舉左與持而扶勞生以養生未脫文字筴鄭生妙語言神識超頑軀謂生有不病病乃生所通
其旨一萬物其言不枝梧別來僅一歲生病忽到予漸能掣擎物差未妨作書舉室物醫藥慮臂成枯株
而我一笑示用右恆左舒勞逸代進退寧當秦越殊不揖蛻冠帶不札辭人奴儘有尊者存遺土真區區
讐言中風溼試問鱗然乎雞彈委造物首脊安生無儻能卽相視鑑井招犁輿

恒齋寄所畫扇題曰山水虛深茲境足吾兩人徜徉否詩以答之

恆公畫意如冰雪寄我霜紈秋尙熱對之獨坐迥生涼山水虛深存此說滄江日夜流潺潺君山狼山疑可攀中間或有避秦處曷棹孤篷相往還

王五丈自合肥寄詩見懷依韵奉答

淝上巍然老輩存書來舊夢一重溫儘收海氣歸詩卷遙想霜髯照酒尊原信何人猶好客應劉無地爲招魂

謂吳武壯朱曼君

蒼涼久已拋簪紱落日風煙况爾昏

惜李鎮

三十年來數總兵煙銷雲過不知名能令士飽民安臥獨有長沙李定明

李瑞清

瑞清字梅庵江西臨川人光緒甲午進士官江甯布政使

遊雞鳴寺與范季遠沈鳳樓程野梧夏劍丞諸君集豁蒙樓登望

世危憂轉深時暄心自涼良辰集儔侶遙情乘風翔珠簾貯輕陰瑤席納山光江郊霽晚氣澄霞藹微明衆綠合爲烟曠望但渺茫鍾阜疊巘嶢臺城互低昂頽基翳荆榛靈宮杳森荒坤維若旋輪朝昏靡有常勝敗豈由天淘汰固所當相期在千載榮悴非我傷

陳銳

銳字伯弢湖南武陵人光緒癸巳舉人官江蘇知縣有抱碧齋集

哭詹秀才

念與君相值交誼託死生何圖一朝盡蓄意倏無成悲風從天來雨雪灑嚴程喜君猶及歸得與歲華并
不死于道路甯非邱壟名念與君相值推解同衣食婉孌且如一心兒鬱忠誠雖非同氣生勸勉若弟兄
常得對尊酒高論馳八紘逮我游鄉國橫舍廁羣英每歲一再歸促席如故常寂寂中有得久久要不忘
君褒室家志驅迫而不遑南舟浮湘潭西至宣恩城江漢故安流沅澧鑒至清放然瞻四方險阻無不平
時運無賢愚天定曷可爭坐令憂患來苦勞搖其精蓼蟲耽所習豈敢復旁皇惟我慰子情努力相扶將
君心有然疑必得使我明君存我豁達君死我激叩誰能紓我憤訴之于穹蒼昨歲在孟陬挾策趨上京
行李苦寒月君送我北征扁舟洞庭湖欠合不得傍舉手揖君山九轉如望衡颺驅疾東下二月至海上
其時君別去我迺汎重洋去去復不忍念子歸路長誰能三千里努力相扶將嗟我遭薄祐行能少光榮
一叩卞和足壯心遂漂灑逸若隕階籀青青非故莖君書速我返道重名爲輕直置無遇合且得同醉醒
窮秋南到家少少得安寧土園翻新芋果樹擗香橙願言攜手好白首爲編氓歡情以茲洽禍兆以茲萌

君從黔中還臘盡偶小病今春初六日溘然殞其命我初聞此耗惘惘疑且驚哀慟久一決注泣乃失聲
跣步奔其廬桐棺儼前庭呼子絕聲響視子無姿形寡婦號中帷麻衣雪羣嬰長此謝躡愛游神于杳冥
嗚呼天聽卑如何殲我良追維連蹠姿含華斐其章讀書通世務盥潤百鍊剛爲善弗荷祿重歿其天齡
逝者如可作萬恨毒中腸哀哉世路艱久生亦徒羸懽怨一朝盡氣絕目遂瞑君已歷此劫委蛻翔英靈
英靈果來翔脩夜寧再暘而我獨處廓悠悠以俛俛固知泪已枯揮之不成行有情必有悲有悲必有盈
聊復爲此詩九天以爲正

見池荷感秋

搖落向橫唐夫蕖晚獨芳砌陰微見月葉響欲來霜乍覺孤尊盡遙知一水涼闌干無限好爲女坐秋香
笛去樓仍在華開檻易孤漸看秋已到自可繆相扶豔思銷紅燭涼聲滿碧湖思歡勿復道慊慊祇驅驅

送寄禪上人還山詩

汝本爲僧者胡然入我門新時能鍊鍛奇骨必騰蹇此去尋方廣由來悟道根瀟湘秋水闊山龜佛火溫
人間不可住此別欲無言

春懷

春愁江上來駘宕不可住一波復一波遂令新成故煙開兩岸細沙白獨纜度人鳧共一光各各向前路
吾生亦擾攘去此莫回顧愁深江不知江深春又莫

纖手理叢蕉，露寒風割絲。放汝夜溘瀝，爲我憂參差。沈沈捲綠簾，窄窄掃蛾眉。睽睽窗眼深，曲曲闌干迤。
一葉一太古，一華一天涯。莫言天涯遠，因春寄狂癡。

春雪卽事

初春雪紛紛，始覺寒勝臘。微茫江介凝，墮垠天宇合。棲鳥暝不啼，宿鸞拳已接。凜風一飄動，渙若龍解甲。
其先極騷屑，其繼乃重沓。掀騰盡隈曲，飛灑及階闔。有時弄狡獪，夜半猛力壓。瞠目失平原，得勢擁高塔。
餘響尙浙浙，銀竹戛亂葉。想見藐姑人，清拔立閭闔。黃海方波濤，誰能更利涉。老夫心迹并，幾日頭不帽。
閉門課蠶鹽，忍凍傲僮妾。牀頭所埋甕，傾注酒屢乏。嗟哉生活疎，何以慰朋盍。賴知今年熟，三白兆先睫。
蝗蝻度無災，菜麥青可搯。忽憶遠東戰，冰血久噴喋。皇仁蓄天威，閭左稍安帖。所慮露氣變，見鷓遂及蛤。
我有苦寒曲，心悲語叢襍。浩歌望江南，晴鴉汝來答。

徐乃昌

乃昌字積餘，安徽南陵人。光緒癸巳舉人官江南鹽巡道，有鏡景樓詩。

李審言屬題慈竹居圖

人生真樂惟庭闈，勞勞塵鞅徒爾爲。昭陽先生篤天性，行年五十猶嬰兒。賢母生長自華臙，裔於自奉豐。

於施日糝蠹篋贍三族戚鄰舉火忘斯飢黃金散盡意不悔更歷百苦甘如飴異哉造化應如響英彥挺
出鍾靈奇長庚之星自天降庭階煜煜生神芝熊丸咀含助劬學淵雲曾史聲交馳才子高陽亦孝子經
師有道兼人師桑弧蓬矢四方志惟母有命兒敢違脩羊遠致薦甘旨絕勝五鼎陳牲犧鍾山高頂望鄉
國白雲縹緲心追飛身在江南夢江北黃葉一棹思還歸丹青點綴見深意膝前孺慕何依依扇枕簞祛
九夏熱堆盤筍茁三冬肥賤子披圖敬且羨小言何足揚芳徽但願平安歲歲報慈竹北堂永駐三春暉

福田寺

蕭寺傍雲岑蒼然萬木森人煙半村郭城市嶮山林頭點三生石身參丈六金前溪溪上月无礙印禪心

橫波夫人畫幀

拾取花枝著意看香閨妙筆見來難青溪舊志翻疑誤祇解眉娘善畫蘭

元武湖晚眺

爲踏春泥載酒行滿湖寒碧暮烟生覆舟山色臺城柳一樣傷心畫不成

陳澹然

澹然字劍潭安徽桐城人光緒癸巳舉人官候補道尹

答石遺

劉表鎮荆襄諸葛臥田畝雅樂動九州炎綱已紛紜漢廷俱朽骨漁陽聲自哀如何鸚鵡洲孤冢無蒿萊
少小慕奇俠長懷漆室悲獨憐病母衰江表時逶迤哀哉鮮民生誓傍丘隴側顧瞻黃口兒吏更翻飛翼
一子思求科學乃復出遊莽莽江漢間曹劉爭霸地異人久不作世亂吾焉寄言求當世士幸復得石遺石遺不作官
借箸籌當時丈夫貴樹立敝帚復何貴潦倒偶狂歌聊發雄怪氣登高望箕穎腥風萬里來沈沈無淨淵
強顏溷塵埃

擬古

屈子湛汨羅終古江流白生死安足論孤懷聊自適

夜坐

空山何寂寞但聽松聲寒出門見明月方知天地寬

王景沂

景沂字義門江蘇江都人光緒己丑舉人官內閣中書改廣東長樂縣知縣補嘉應州直隸州
瘠廠過訪奉呈一首並懷東原

陋室能來長者車，寂寥羈旅意何如？安心欲訪無生法，用世惟求相斫書。鶯燕老君評玉雪，馬牛嗤我在襟裾。南天桂十如通問，擬傍桃榔賦卜居。

讀槐樓病中雜詠題後

天遣詩腸取病寬，渾然虛白得還丹。鐵門限外千年調，玉版聲中一字難。作夏可知行樂趣，送春準擬折枝看。夢醫尙寐吾方始，欲寄陳芳覓暫安。

福廬先生枉寄亥既集讀竟賦謝

一貧報國愧多財，本來句意三字稱官列上台。投老昌詩猶課日，吞聲每飯自興哀。病鴟凌鳳知何有，腐鼠呼鷄更不回。賸好推枰延橘叟，冷吟銷盡揆天才。

和槐樓瓶中芍藥卽用原韻

盆盎能留絕世姿，浪蜂驚蝶莫教窺。幸逃風雨猶爲福，取媚軒窗暫入時。贈遠祇應懷孟弋，埋香須遣近要離。大千春色從人看，比似鷓鴣借一枝。

寫近詩就正於志齋復書謂當與松鄰同讀再簡一首兼訊松鄰

吾宗詩律早升堂，道子開元遠擅場。二妙取懷相賞析，百篇低首待平章。自憐微尙牽人事，未有中聲起國光。腹負真慙讀書少，眼明今喜得朋良。

徵字前輩招同小汀漑根書衡攝影命曰光緒五舍人圖屬題仍用窺字韻

短髮斜簪俱種種故宮茂草正離離直廬禊被寧三宿閣道看花又一時塗抹東西成老物喧寒南北有分枝鄰家賸喜朱顏在傲幸登牆再得窺

汀公少年有朱美人之目因戲及之

夏夜病冷積拔可邀食閩荔不克往夢回口渴憶粵中黃皮果不置寫寄二絕句

已倦橫陳疏女頰

宋人詩荔子新剝女兒頰

所須丹藥火吾宮爬搔痒垢除巾襪賸受涼宵一簾風

渴羌曾作近南官

始知身作近南官山谷謝陳正字送荔支句

山驛鳴肩啖露團絕憶牆陰金彈子江南無此可人酸

丙辰正月寄炊累江甯

七載炎州別相望閱歲寒羈孤轉江海旅食守叢殘枯樹餘生在狂花瞥眼看梟鸞一毛羽蛟蜃各波瀾錯有量金鑄饑愁買玉餐自然堪隕涕何地足憑欄念子從軍幕臨文據將壇新詩能惠我傲骨不應官西漢酣歌老南樓賓主歡愈風煩草檄活國待彈冠腰瘦心逾壯時危地孔安近聞摧六虎早與說廉丹

麥孟華

孟華字孺博號蛻庵廣東順德人光緒癸巳舉人

任公書來規慰至摯然區區之意似有未盡深知者賦此畚之

鬱鬱孤懷不可寬天迴地動總無端定知憂患是何物坐閱飛沈賸古驢半局敗棋驚劫急九州放眼覺

才難著書合是窮愁事敢怨空山薜荔寒

吾曹所學期能信風雨雞鳴更幾人倘有龍泉知此意豈愁牛斗不能神六州鑄錯嗟何及十擲成韃氣
未馴哀樂中年陶寫盡祇餘肝膽尙困輪

譚嗣同

嗣同字復生湖南瀏陽人諸生官候補道員加四品卿銜參與新政有莽蒼蒼齋詩

石遺室詩話湖外詩非漢魏六朝盛唐不道復生年少異才不爲所困惜存稿不多耳

潼關

終古雲高簇此城秋風吹散馬蹏聲河流大野猶嫌東山入潼關不解平

兒纜船并敘

友人泛舟衡陽遇風舟瀕覆船上兒甫十齡曳入港風引舟退連曳兒仆兒嘵號不釋纜卒曳
入港兒兩掌骨見焉

北風蓬蓬大浪雷吼小兒曳纜逆風走惶惶船中人生死在兒手纜倒曳兒兒屢仆持纜愈力纜糜肉兒
肉附纜去兒掌惟見骨掌見骨兒莫哭兒掌有白骨江心無白骨

秦嶺

秦山奔放競東走大氣莽莽青嵯峨至此一束截然止狂瀾欲倒迴其波百二奇險一嶺扼如馬注坂勒於坡藍水在右丹水左中分星野凌天河唐昌黎伯伯曰愈雪中偃蹇曾經過於今破廟兀千載歲時尊俎祠巖阿關中之遊已四度往來登此常悲歌仰公遺像慕厥德謂鈍可厲頑可磨由漢迄唐道誰寄董生與公餘無它公之文章若雲漢昭回天地光羲娥文生於道道乃本後有作者皆枝柯惟文惟道日趨下賴公崛起獨沈疴我昔刻厲躡前躅百追不及理則何才疏力薄固應爾就令有得必坎珂觀公所造豈不善猶然舉世相譏訶是知白璧不可爲使我奇氣難英多便欲從軍棄文事請纓轉戰腸堪拖誓向沙塲爲鬼雄庶展懷抱無蹉跎生平渴慕矍鑠翁馬革一語心漸摩非曰髮膚有弗愛涓埃求補邦之訛班超素惡文墨吏良以無益徒煩苛謹再拜公與公別束卷不復事吟哦短衣長劍入秦去亂峰洶湧森如戈

崆峒

斗星高被衆峰吞莽蕩山河劍氣昏隔斷塵寰雲似海劃開天路嶺爲門松擎宵漢來龍鬪石負苔衣狹獸奔四望桃花紅滿谷不應仍問武陵源

自平涼柳湖至涇州道中

春風送客出湖亭官道迢遙接杏冥百里平原經雨綠兩行高柳東天青蛙聲鳥語隨鞭影水態山容足

性靈爲訪瑤池歌舞地飄零黃竹不堪聽

瑤池俗傳在涇州城外

出潼關渡河

平原莽千里到此忽嵯峨關險山爭勢途危石墜窩嶠函羅半壁秦晉界長河爲趁斜陽渡高吟擊楫歌

山居五律

雲生秋谷雨樹拂曉河星自欲關佳境因之上草亭虛憐一室白坐擁萬山青爲覓松根史攜鋤種茯苓

楓漿橋曉發五律

橋上一回首曉風侵骨寒送人意無盡惟有故鄉山野水晴雲薄荒邨缺月變役車休未得歲暮意闌珊

怪石歌七古

神人綠章宵馳奏平明謫下蒼龍宿寘地屹然賁奇獸歷萬萬劫猶未宥如何剝落商山右無有鬼物爲留守誰其知者弔荒墩敲火礪角互白晝似此英姿天所富淪沒嵩萊不見售我來幽谷昏黃候覩之不敢攝衣就疑是戰士披甲冑又疑河朔橫行寇若非山魃出世宙定類木客鼻鼉北溟大鳥濡其味南華真人短其脰或者驩驅逸內廐昆明石鯨逃禁囿不然天竺亡靈鷲月黑深林獻猿猴心折神駭莫敢嗽樵乃詔余此石瘤急趨往視顛且仆撫摩歎嗟信良遘石兮石兮何痾僂女蘿紛披帶青綬我與子兮今邂逅殊勝彎弓命鏃鏃手持木杵宣大叩雷雨夜鳴獅怒吼怪哉補天女媧后此石不鍊絕悠謬地不載今天不覆古有樗材石其又自我欽之若危岫濁酒以酌歌以侑石其正我謬石其歆吾酌其首秀而

瘦其腹漏而透其貌陋而縵其氣厚而茂其膚繡而籀其紀舊而壽天孫遇之支機授浮邱遇之納諸袖
精衛遇之翼爲覆初平遇之叱以呪蘇髯供佛重金購米顛再拜祈靈佑今雖棄獨側清溜嶽崎礪柯世
罕覯幸而逢我味同臭我其攜爾返巖竇八九雲夢誰共究高枕江流含爾漱

甘肅布政使署憩園秋日七絕

小樓人影倚高空目盡疏林夕照中爲問西風竟何著輕輕吹上雁來紅

邠州七絕

棠梨樹下鳥呼風桃李蹊邊白復紅一百里閒春似海孤城掩映萬花中

林旭

旭字暉谷福建侯官人光緒癸巳解元官內閣中書參與新政加四品卿銜有晚翠軒集

石遺室文集暉谷力學山谷後山寧艱辛勿流易寧可憎勿可鄙後山學杜其精者突過山谷
然粗澀者往往不類詩語暉谷學後山每學此類在八音中多祝敵少絲竹聽之使人寡懽遊

淮北年餘所作則淵雅有味迥非往日苦澀之境方滋爲暉谷喜而遂陷不測之禍矣

題三游洞

閉門不看宜州山臨去還來訪窟顏聊欲向僧尋枕簟溪軒暫臥聽潺潺

還家題齋壁

嘉樹殖有譽故都望生喜行人四月至夏雨灑芳屐最念手移梅旁出芽如指海棠枝上蟲斑綠狀踈跂
筍生不擇地廊墻石盡起治蕪理芳草坐定青襲几南鄰荔支熟高繖張紅紫筠籠亦相及饑眼慰無俚
去年大雪寒實小醉如李

書聲諸弟好燈窗無隙地旋旋行復坐我自知何意登盤主簿果飽啖萬事置亦還五叔父白壘灣歸團
團五日泊但言肥無加欣慰舉杯栖少孤依大母西日追無驥夢歸見生存歡笑家人侍夢境不可尋歸
日卻涕泗

再題

相去常悲天一涯如今可是到家時畏人客子成何著耐向閒庭數日思

新濟輪船逢續九丈和予宿侯府詩感其辭尤哀更答之

先生髮白不鬢鬢心緒千頭老弗戡失第尙羞行卷謁無官終被小兒慙天涯旅食惟身賴海上相逢各
淚含我是哭師君悼友此情可許別人諳

閔月湖荷花

同遊爲林昭通紹年

月湖六月南風吹紅裳翠蓋浮漣漪昔聞其語今見之眼前反覆人得知壯夫腰鎌方縱意漁父拏舟自

垂淚哀哉斬艾不自保紛紛載去如束藁風水之說詎有憑邦人波靡誠可憎花神伉爽愬炎帝妖氣天
闈反見擠蒼蒼豈必矜君子我懟禍端由自取中通外直得之性蒲稗雖多何足競一朝讒口巧中傷坐
令喪氣及羣芳藏山居士倘見此爲爾痛哭摧肝腸

宜昌城南有漢景帝廟

城南漢景祠鬱鬱依大栗婆娑舞巴童迎神激清瑟普土皆王臣瘴陔猶薦苾惟王禘其祖禮先所自出
從王肅說郡國奉禋祀我疑章武日孔明禮樂材斟酌得疏密儒生許孟輩會議想奮筆惜哉無史官憲章坐
散逸罨思此僅存取證諒難必號亭戰後此地東屬或孫休廟歲久訛爲漢也

暑夜泛姜詩溪

清溪十里幾多盤收束將窮卻放寬山要攔人攔不住側身讓過乞人看
擊汰聲齊力未孱扁舟催進幾灣灣我們冠者偕童子只有篙師束手閒
大家莫把仙源說那有仙源到兩回昨日好山撐不近明宵須換小船來
橋柱孤栽細石平相將上去臥縱橫不防山賊防洋鬼犬吠兒啼籬亂鳴
本來沙路有人行溪水長乾江水平過去中元游十日中秋毛水月空明

叔嶠印伯居伏魔寺數往訪之

窗外丁香玉雪色窗下兩生坐太息可憐太息空爾爲舍人縣令官秩卑朝出空遮御史車莫歸還草相

公書宗廟神靈三百春卽今將相未無人言戰言守言遷都三十六策他則無深宮追念先朝痛根本關中敢輕動擲鼠忌器空持疑餒虎割肉有盡時書生不自有科第能爲國家作廢計東家翰林盡室避猶聞慷慨排和議

約游西山會文學士宅聞和議成學士憤甚余輩亦罷去

都言踏破西山石

踏破西山石都下有此語

我望西山勢不行爭怪憂時文學士但看煙翠亦何情

病起漫書

耳目與口鼻不思何錄錄苟能得其養心亦卽快足四者彼何知惟心寔有欲所以養心者必先此四族愚奢厚自奉反以滋垢黷一鳥能遺音豈必奏絲竹一花可慰眼豈必陳綺縠誦詩味芬芳聞香氣清淑領略信靡窮我亦我能惱

病後關門趣自深天明卽起似幽禽食單寂漠添鄉思詩句頽唐趁倦襟檢點舊書看復放商量佳客遣相尋更欣秋月光輝足不惜窺窗夜夜臨

寄題宜昌姜孝巖濤園外舅所作亭子

夢見孝巖羅樹青偃松聞已化龍形宜州近日添新語一郡游人上沈亭

重九出游旣夕泛舟秦淮見月

佳節心隨物色搖出門四望未蕭條新霜紅盡冶城樹商略獨游畏路遙

人閒別自有嬋娟平視誰曾見月圓與我共安喧裏寂更無人賞亦翛然
病髮絲絲隨葉落客懷漠漠借船眠鏡中原著通明我多事看成徹兩邊

靈澤夫人廟

故國何人與奉匱竹竿從此釣於淇韋昭吳史應書卒不見春秋宋伯姬

太夷丈屬和其移居詩逾歲乃呈一絕

窗前種竹經年活舍後栽花近水便占著青溪如谷口百般忙裏作神仙

張園梅花

張家園裏數株梅歲歲相逢總盛開花上盈盈歌一闋風前豔豔酒千杯芳波照影知誰見斜日攀條却
獨來眼底風光渾不是一回思念一回灰

無題

海上今年二月寒出門何地有花看思先清曉車輪轉意共黃昏燭本闌世界愁風復愁雨肝脾爲苦亦
爲酸東隣巧笑頻相訝倚柱哀吟故未寬

申前意呈石遺

流水游龍去等閑同車惠我待君還王官行李愁奔命胡婦燕支笑破顏宿雨反風寒作雪高樓含霧遠
如山縱然沾醉憂能入不及逃虛日掩關

懷仲奮

平生少交友仲奮寔和唱久別雖無書夙意知不忘近聞廢蒙楚能復輕悼喪一年作客三四歸日暮高堂正爾望好學深思世所希蚤白已作星星樣年來萬事况違心難從問訊知何狀故山雨溼梅子熟憶否同看三峽漲昏因洽比得相從年家君是丈人行豈惟共學事文句更期適道正斬向始君嘿嘿尙自謙感我殷殷不多讓深於訓詁作詞章孫孔本朝相頡頏篋中纂述今當成只恐惡懷多廢放懷君作詩不寄君君見詩時增愴悵

和人觀張園車馬

春去初添車馬狂縵纓御者意揚揚看街樓閣人垂手過眼雲煙鑑眩光趨趨散眠芳草地盈盈歸去牡丹坊難知此日園林價莫轉詩人錦繡腸

得三叔父書

叔父歸鄉里我心日悠悠昨者寄書至惟其疾之憂跪讀三四遍涕下不能收出門已三載倦關樂暫休諸弟肯讀書但苦肌腸懣選官緣資格爭席傷鬻鬻還如稻梁雁因風俟九秋衣食非粗足安作馬少游吾黨二三子進取力所勸書問久不具愛我猶怨愆懷哉劉牢之孝儀少孤寔命猶扶將借我母門戶枝相樛讀書成後進雲路視何曠操心病咯血新來可瘳不吾師楊夫子川好學罕比儔漢書寫百過記誦如水流窮經志不墮皓首誰見酬小夫擁臯比妄用相踈鱗近來鄉校議悅若寐而鞦遠惟循循意欲見

皆何繇南齋千竿竹風來聲颼颼上有百好鳥終日鳴啾啾去年防火道斬伐若去讎好鳥四飛去巡視安所投向來憐惜之聞此心內抽今年新筍長庶幾復有鳩因聲問此君歲寒盟可求

柳屏問刻詩

自憐蚓語與蟬嘶百首煩人爲整齊不畏仙官來攝取夜深疑有樹精啼
清風明月無窮物臨水登山自得之萬里更堪經九折王良獨有轡如絲

張園呈石遺卽效其體

深篁傍水搖蛛網三兩拒霜照眼明窮巷幽姿端可比秋風斜日若爲情殘荷昔日看猶在遠客臨行思
自生且欲留詩當報體仁人一序敵連城

和友人韻

錦車使者歸來晚霧閣雲窗又起家楚岫夢回洵美矣漢宮望久詎非邪君王自失河南地顏色能驕西
海花生不逢時尙傾國也將續命託琵琶

海西菴東偏小院梁伯烈榜曰藏山伯烈二年不歸矣

端坐能窮萬物妍江波日日看洄漩信知丈室維摩詰得傍瓜廬焦孝然賢守早亡惟遠客山僧深閉自

安眠枇杷千樹真過我來值繁霜十月天

先生許爲晚翠軒作記言集山多枇杷樹當以軒屬我

鹿港香

拌和花香飄細細雨窗殘夢被驚回欣然援筆誇鄉物猛省今從異域來

拔可將以三月歸閩贈之

李子少於我其才殊清美云何遭天酷心事如暮齒嗟我亦鮮民羨子乃有恃子言憂寔深門戶方子倚有妹須擇郎有弟僅斷爛全家待衣食遠道謀甘旨孤生愴聞此不如子多矣作客得所依萬事如家裏所欠體俱弱長者憂弗喜子有晨昏事歸路見桃李得歸歸亦悲我誠不如子哀情展復收惟學語可紀自我始見子回顧已千里天資苟有餘學問寧無底昔我有所爲微睨不謂爾子寔工爲文彬彘世莫比又復善書翰得第卽太史天下藝固多安用窮人技我時喻其意漸漸道之邇翻反頗多姿幡然忽自改年輩但相若下問曾不恥自嘆日皇皇與子共憤怩江西與西崑分別知避取古人雖去遙發篋一一在吾鄉今陳伯初先生鄭太夷丈有作亦模楷當思膏與根韓公豈妄耳自得乃變化萬象奔俶詭字句得失間固可助壤累我言日漸狂子色常甚驕卽今所有者如林見蓓蕾吁吾憂道孤賴子能不忘作詩叙區區惟以永相矢如或傳示人嘻嘖必焚起高識幸不搖陋體任成瘡子如謂我非焚灰擲流水

拔可束裝再贈之

晴天自起行人意小疾偏逢寒食時直想見期先一快猶存別色得無癡歸寧堂上多君慶致腰裝中有我詩爲問詞人王又點整時觀面竊相思

南塘詩三首并序

南塘者正陽關圩外舟楫避風春夏時咸入於此塘上大王廟鹽務官商宴集所在茲地特爲佳勝歲三月李子拔可沈子弢甫將歸福州同人連日出餞爰爲詩三章抒情寫景或以遺後來之好事者焉

南塘水漲多新景河濱神祠壓森潺湲影澁澁過屋角水鷗跼跼下花間鋪行什器堆船賣士女春衣上冢還風物荒城惟有此却思歸路可追攀

南塘水漲多新景連日無妨取醉吟窮眼難逢花滿院春愁誰見柳成林依依酒半將移晷采采闌前欲去心上已清明歸併了只除行樂總休侵

南塘廟裏花爭好我與櫻桃獨有情來度清明思略似回尋詩句夢頻更誰念離人愁斷絕櫻桃花下過清明甲午京寓詩 柁樓驚豔闌前過絃柱含聲醉後鳴并合要將愁力勝不堪風景滿前生

南堤桃花

堤根數樹對泱泱傅粉施朱自試粧淮水東流思不盡春陽欲暮日初長山僧栽種開誰管游女經過折或強自被詩人誚輕薄柳陰不妒有鳴榔

送春儼韓致光

循例作詩三月盡眼遭飄落太驚心拆成片片思全盛綴得疎疎祝久禁肯記帽檐曾競戴無情屐齒便相侵冬郎謾把傷春酒早日池塘已綠陰

四月雨

日出澣衣雨復下天公不愁竈婢罵姑將婦來覷人持竿驅之了不怕雨晴於我何所分亦愛窗間有夕曛下筆時時成一笑雕蟲應不與斯文

江南雨熱梅初黃淮北雨冷川漲長人言日發二三尺鹽艖銜尾還兩塘故園大水年年淘昔日兒童那知恐夜半官河浸入庭起抱花盆墊書籠

坐月與歸試二君

關坐無燈思一靜暑生得月意成涼垂簾教作窺人態閉戶因嫌隔壁光欲下沈吟如顧影送歸微嘆想回腸行人明夕江頭望照我遲遲尙念鄉

述祖德詩

父母不逮事百事不足爲不諱王父母此語深可悲恭維吾祖德敢云吾知之外舅沈濤園激揚多厚期本於先公意詔我家乘遺謂言承積累宜作爲歌詩小子實兢兢靡日而不思命名不得咳抱孫未親懷永念臨沒嘆况積孤生哀慎重良有以聞見求無歧託始三四歲所記可依稀聞人說公公作官在安徽信歸向兒道公公念著兒分付教爾雅明年爲延師堂上張小照於此識鬚眉愁跳畏噴喝每過首必低壽辰五月八學把阿婆卮酒闌凶問至驚哀終日啼是年唯己卯此後多傷悽吾父麻衣歸遷居旗下街庭中龍眼樹書案設當階手寫不記紙淚下時如縻竊窺顏色惡側坐不敢哈心目憶可見禍酷痛交摧

易簣執手泣太息兒尙孩年至十二三書篋恣翻披吾父曩所述手澤如新題先府君年譜男某謹次排
東流隨宦記言土瘠民疲粵寇凡三至城內家蠱蠱生齒既未復文教非苟施邑中鄧析子好持官是非
好召與之語舖以酒肉糜襦袴爾所利鞭箠官有威感愧或遁去自此獄無欺又云戊寅案文書存可稽
別本逾寸厚鈿鈔累萬微敘述似未竟欲傳恨不才童騃究未省今知意在斯犬牙相錯地自古言多違
爭桑處女傷瀉麻吾水茲寺門夜載藁界上晨亡屍豈嘗飽毒手直是支誣詞閱實赦無罪譁謂有私
風流秋浦咏響絕不可追池州府吳姓視錢卽甚悅含怒故多訾人情易反覆如萍隨風吹獨持南山筆嶽嶽

難得移媚人猶及止殺人奈何哉安慶孫太守控告義所希孫穀庭先生致書皖藩甚激切手錄存十紙祖父兼有當時

詩天知民不媿睡起心自夷卸事將赴省寄孫太守林司馬調陽詩後半云未必同舟皆按劍誰知陰雨獨吟詩此心天鑒民無媿統如引舟

去寄語淚勿垂白骨可覆視黃泉豈遂埋忝名爲父母那忍事委蛇民冤苟不雪罪大亦何辭列書達制

府申請揭驗制府驚且疑爲民能如此豈非良有司事實良未明萬一亦可危私誼况桑梓沈文肅公督江人言有階

梯移文召伍伯調江西著作破棺求瘕者萬目見日月一朝抉雲霾父老喜害去池守職道路迎君回還愁升

擢去豈悟運化推廉吏竟如此天道諒可知先世有薄田亦足供歲時爲官而祿薄不以家人隨五年古

彭澤清對菊花杯中問更事故斗米豈勝炊負郭既不保沒身反得非嗟此實明德感念空增歎匆匆二

十年一得而九遺誠當書此事留布諸方來民情苟不誣知有望江碑天閣苟不遠恩澤敢妄幾吾父一

片心不與七尺墮七月急歸去尋檢舊書齋情知漸徙失諒未付塵灰老師吳峰五表叔魏幼施當時皆

目見故實良可咨縣社有雞豚官府有檔批成詩餘涕淚令名思用貽

與石遺大興里飲罷過宿有歎

往日矜夸一任謾遠來共醉事殊難高樓罷酒天初雨短榻挑鐙夜向闌流落傾城同一嘆付量終歲得多歡此懷恐逐晨鐘盡留遣回腸報答看

洋涇橋與太夷丈對月

河干風月足情文暫獲相從清賞分夾岸人多俱有役當樓曲好與誰聞傷春日往心猶在興利時迂議尙紛不遣詩人憂世事還能回眼醉紅裙

滬寓卽事

隔浦車塵漲暮天虹邊門巷漸含煙獨謠負手誰能喻百計安心或未賢王粲憂來空假日嗣宗醉後只酣眠河流樹色寧知我眼底憐渠盡意妍

福州寄內

人海投身未作謀多君送我思何周江干燈火殘宵月客裏園林臨別游攜手何當歌有道寄居聊得顧無憂入關志氣吾能勵望遠凭高莫自愁

八月十四夜拔可宅中露臺

家山風物別成忘良夜乘高試一望月靜方知雙塔闌霧低惟覺滿城香驚枝宿鳥難安夢聞笛離人易

斷腸直恨清輝同萬里誰言秋思在他鄉

與拔可別後却寄

少年爲道欲安心莫以端居礙陸沉叢桂小山真好住白華處子孰能侵書聲課弟燈初上竹影關門雨
自深新爲高齋作寂寞據梧不共夜分吟

再寄拔可並訊仲奮

客還孤陋少情親厚我猶夸李與陳絕羨殺雞人有母直呼作黍孰爲賓欲言已盡原堪去相見方秋更
待春路曲樹陰壓清泚記同詩客訪經神

寄陳仲奮

謀身或未能輒有當世意夫子愍其狂登高共一慨山河猶吾土胡爲視若異珠玉久不生悽愴少輝媚
嗚呼誰使然已矣非人事

吾黨二三子望古期一至卓哉豈不賢行處人或避羣陰方利陽山高不絕地政使隨俗耳誰得謂非智
煩君但一計何以安吾睡

丁酉九日泊舟煙台寄鶴亭二首

別君若翌日登舟作重九萬里好家山翩然得我友主人掩戶出巨盜窺所有已去俄復來居心疑不厚
莫謂國無人一旦落君手

落葉未足悲觀寒情一至孰云東鄰女不下阮生淚此意旋自隱妄謂止禮義不圖揚其波乃使慚無地
泥犁誠對簿君亦無所利

戊戌元日江亭卽事

倚闌雲起亂鴉呼黯黯西山望未無乍入闌虛催夕景還連風色散平蕪主憂避殿當元日臣職操兵見
嗇夫如我閒官神所笑何祥欲問自疑迂

同琴南拔可稚辛至雲栖題名而去

江路山光百轉新靈關雲木倏相親全收雄突歸深窈不露莊嚴自淑真脩翠含陰留宿潤雜花浮水散
幽春誰知未是逃名處尙有亭前泚筆人

禮蓮池大師塔

天外飛禽逐磬音石壇幡影見深深詩人宿具開山手世難旋移卜隱心老樹刺天青自直空潭留日綠
還沉有情多是栖栖者初地微茫豈易尋

直夜

鳳城六月微涼夜省宿無眠思欲殫月轉觚稜成曙色風搖燭影作清寒依違難述平生好寂寞差欣谷
皆寬身鎖千門心萬里清輝爲照倚闌干

呈太夷丈

聞命書思既竭才池亭起早獨徘徊寒生曉夢知方雷雨轉秋陰喜漸開救僞未妨行督責乘時自合仗
雄材先生平日吾師事試問如何區畫來

獄中示復生

青蒲飲泣知何補慷慨難酬國士恩欲爲君歌千里草本初健者莫輕言

卓 揆

揆字幼庭福建閩縣人光緒癸巳舉人

題皆山樓五言古二十韻

早儀石遺室往從阻奔走晚登皆山樓仰止見星斗先生清以耀文采閱而厚老爲諸侯師徧與名宿友
國變遽歸休解却京朝綬種橘如種瓜佳蔭及數畝結廬城市中高處一搔首石鼓趨其左翠旗拂其右
于烏瞻在前越王瞳在後就中位一樓天漢窺軒牖胸吞幾雲夢寧鑿此培塿瀕洞滿神州息壤山中有
禽象赴四旁一樓翕然受偏東宜平臺周視廓無垢樓中書如山箸自主人手世儒慕風雅樓榜競某某
在人不在樓黃岡竹易朽先生如元龍百尺名以久海藏峙海外千秋此其耦會齋平生詩北面匹園叟

周行原

行原字頌騰號厂泉安徽合肥人光緒癸巳副舉人官度支部郎中有蕪生館詩稿

石遺室詩話厂泉句如蟹肥秋自瘦蟾缺暈逾圓收來隴嶠莽蒼氣盪作海濤澎湃聲晤子皆

工

郝聘珍從舅歸皖將入某帥幕詩以餞之

隔年肥上夢好逐燕還家行篋惟吟草離亭正落花湖雲雙袖溼江月一帆斜會訪龍山侶攜樽翫物華
干戈仍未息琴劍欲何之孤露依人早漂蓬避世遲狂傳巒府語悽觸渭陽詩繡刺毋漫滅明珠價自奇

滬上酬荃莊

戀君蘭臭不差池歲暮言歸屢誤期岳裔金佗真大筆王家珠樹最高枝秋風燕市悽簫管殘雪江樓照

酒卮余與君皆來自京師失馬亡羊何所惜劫餘猶待起瘡痍

眉庵留飲郡齋話舊卽次其述哀韻贈之

借寇例堪循銅符久茹辛居官多難日聽訟獨醒人樹葉行車跡日前枉過山莊梅花臥閣身狂奴寬禮數絮語

雨如塵

東坡生日與眉庵諸君宴集張易吾齋中分均得長字

行篋珍公兩詩草

余家舊藏公自書定惠院詩二首適載之行篋是日出跡座客

持爲公壽發光芒雪泥同印梅華閣烽燹已韜紗穀行

萬古神思通笠履一燈禪味引壺觴大龍山下峨眉客江委江源溯正長

次韻贈江菊圃

莽莽猿蟲造劫因隔年京國接葦塵權藩離合紛馳檄鉤黨恩仇一轉輪清話宜秋甌茗澹陳歡如夢筆
花新待尋三十六峯去雲海光中著此身

哭李宜人

生道而殺人問天夢夢久

宜人歿於產難

生也繫何恩殺之竟何咎敬遺與語忘呼名蔑一有修短原正命蒼蒼

筦樞紐云胡容產鬼肆虐莫援手我父滯遐方作達聊慰母母病痛弗任淚枯眼昏黝缺君奉羹湯盤匱
能潔否妝樓香以歇遺挂黯塵垢鼠糞積空榻蛛絲網疏牖嫁時舊奩笥媼婢銜恩守檢點單鳳釵摩挲
雙蝶鈕留斯轉增戚棄却安忍負返魂倘有術稠桑趨恐後

今日大刀環鏡破難飛天異日紫鸞膠琴斷難續絃唳經戶君位豎旆招君魂醮壇恪將事焉知幻非真
南岡烏桕側卜日厝之安風雪一殯宮肌骨寒不寒夜臺渺何處裏糧行路難炭爐尚堆爐紙灰應化錢
試去乞闍羅重締來生婚

我性憚早睡君長坐待之更魚每三躍刺繡無告疲清芬佩范史陰律宜周詩孤寒感拯貸宛若化勃谿

我編易遷怒慰解色必怡言須胸養春奚露圭角爲勵學期屹屹干名恥孳孳詎我旣縣歸與君永別離
傷哉小兒女索母呀呀啼且復抱懷中結之以棗梨君去勿縈念甯俾盧爲衣翩翩雙翠禽珠林上下嬉
狂飈蕩巢覆雄者失其雌哀鳴爾何辜令我摧肝脾

舟過衛陽感事

平壤潰將衛汝費家此

鸛鷓天半叫黃昏風雨瀟瀟過舊村遺恨空餘青坂在失機難解白旂奔
衛舊隸先剛敏公盛軍部下 衰楊人指條侯
冢叢莠今棲伯有門豈是罹殃成識語
鄉人訛呼衛陽爲衛殃 淮南猶有未招魂

古意

別君著羅衫啼痕漬衫袖今日衫袖寬始知爲君瘦別君斷膏沐蛾眉不復掃今日磨青銅始知爲君老
當時恃君愛殊忘妾貌媿妾貌易憔悴妾心無改移代君持門戶爲君操井臼訛言從何來言君娶新婦
喜眉奩雪樓臨舍

蹙然空谷足音聞部署壺觴話夜分元祐詩人慣循吏建安才子半參軍車旁麥稔滋新雨江上蓬萊隔
暮雲
雪樓將有皖江之行 已是劫餘皆老大感時况復愴離羣

寄山中虛腹上人

山中習禪宗蘭若鬱蒼蒼澗水聽不腐松林行有香卷簾霞補衲采藥露澆筐金偈鐙前演和尙禮法王

鄭沅

沅字叔進湖南長沙人光緒甲午探花官翰林院侍講

和蕭叔衡見贈韻

早從柱下悟無名不學揚雲賦墨卿未免天花留結習蕭齋寒月夢三清

送蕭隱公歸粵

螳螂不見雕陵鵠牛角那知珍孔雀棄官我已鷹辭去國君如魚縱壑長安百事無一可獨有文游良
不惡爲君弄笛祝長年海雲深護南飛鶴

商南道中見紅梅感賦

商南城西第一嶺初春地僻凝孤冷紅梅嫣然出荆棘過客紛紛那解省不知天公獨何意遣此名花事
幽屏高寒自詡絕時俗點染猶能競春景謫墮幾時情可哢妍媚雖增態逾靜我行入陝無一適日疲犖
礪遭榛梗盤登冷餅充朝飢寢藉殘芻消夜永緣溪尺寸足廁闕逢人十九顛垂瘦忽逢絕艷照幽巖駐
馬裴回淚如綆四山濯濯無寸蘂獨樹姝姝擢奇穎如今棄置分固爾相逢流落安能忍目迷魂倒竟忘
行僕夫匿笑日移影比來憾頓詩思盛賴見此花爲一醒折攀未忍留奈何去矣莫辭長酌酹

陶邵學

邵學字子政一字希源廣東番禺人光緒甲午進士官內閣中書有頤巢類臺

石遺室詩話頤巢與簡竹居梁節庵諸人友善亦粵人之言風節者句如崇效寺觀青松紅杏
圖云凝塵臺榭無人處如雪棠梨欲暝時餘如衝煙雙鶴浴寒碧冒雨一峰尋晚香萬事有懷
常暗盡九原可作竟誰歸澆花小試春風手放鶴期聞碧落聲饒有清氣

咏懷

狂飄振栖翻駭浪驚潛鱗幽人守素履汲汲懷其珍吾聞沮溺子耕鑿謝時人狂歌隴畝畔相從潁水濱
鄒魯有遺教絃歌非隱淪胡爲肆貧賤屈志嘗苦辛憔悴手足勞所愛在潔身先民信可作斯道諒同遵

近陟

近陟依山迴夷觀得樹深朝光陰似暝人語少於禽待客常懸榻拋書每在林沆瀣多古意恨嬾未能琴

水亭夜望

野氣日沈夕清光照獨游螢專草閣夜鼉王野塘秋殘月猶明水疏星欲倚樓蒼茫雲壑外何處隱靈虬

小園秋興三首錄一

跌坐從穿榻之行自繞廊嫩寒花箭破斜日茗旗香愛誦兒書熟憎看客刺長平生似蝸迹少出便深藏

黃鳳岐

鳳岐字方舟湖南安化人光緒甲午進士官廣西候補知府有茂園詩草

秋行邊野

載酒出壺關驢兜山外山采風者艾側斷訟古藤間行潦消踐徑秋煙淨瘴蠻短衣騎匹馬官樣爲民刪
秋老荷偏嫩露濃桑更肥無風聞虎嘯不夜見蟲飛荒墾官先導流亡客盡歸我門今若市可以換征衣

余設墾局及通裕押

野老饋壺漿邊官例舉觴一談知稼穡十載歎兵荒憫此巢南鳥投他有北狼查劾吏太平休粉飾敢告各

琴堂

石遺招飲並覲大集賦謝

詩老人非老自敘大集有詩與人俱老語以余觀之人未與詩俱老也情濃酒亦濃蒼茫歌猛虎意氣感元龍舊格翻新調今時見古

胸自憐多難後失喜此相逢

度隴 茶陵尙書約往蘭州督署與其長公子樸吾同行

漢皋入漢川十里九灣轉岸遠閉天門水急吞潛沔山到澤口稀水落沙心淺襄陽勝跡多我輩登羊峴
南風催行船河口蒲帆展扣榜過南陽官橋荆棘翦舍棹買鞍馱龍駒毋戀棧

秦地首商南馬聲哮亂山世無采芝隱誰得賞荷閒七十二渡水六百餘里間乍雨復乍晴武關又藍關
明月洞天出暮雲秦嶺還險到藍田平山秀石無頑直走長安道瀟橋絲柳攀

蜀游

清水出隴山所過多廢堡片土半空撐四顧無環抱匹馬行其中肝腸驚斷草前驅近陰平鋒石割蹄爪
萬轉入秦州始見川原好柳異固原遲花似長安早勾留十日間登臨願未了

妾家北城隅門對嘉陵水枇杷繞牆陰榴花照窗裏辭家從我行臨別彈綠綺劉郎衛八君詩寫薛濤紙
趙老歌且悲手攜兒女子遠送燕飛南涕泣情難已我過雙魚坊君猶一鵠跂

野牛溝行并序

三月新疆饒中丞電稱野牛溝賊騎三千將竄玉門請湘軍堵截時湘軍分捕巴燕戎卡爾岡
並扼哆吧平戎涼州各要勢不能分魏帥問風岐風岐請招良回馬隊先往偵探魏帥然之檄
募啓行

胡爲漢家營盡煩回紇馬步卒行苦遲密途熟苦寡募彼往牛溝以類探狼野軍儲旣自供兵道不庸假
風雪立象山五莊分上下閘門走峽門眠沙無屋瓦大通見孤城哭盡守陴者

薄泊登雪山雪深及馬腹旁有凍僵人不得收骨肉千丈落冰溝鐵蹄走且仆衝寒紅水泉乞火綠林屋
北過大通河潘效蘇老留餐宿春宵翦韭來自唱猛虎曲爲我算前程俄博虜在目

且發白水河風揚青海波狐裘忽如失流民將奈何午飯沙金窟陝將璞偏情多斜陽到俄博冷瘴侵城

坡支帳宿黃草計不從潘皤縱行野馬川百轉出盤渦一綫達海角蕃地克斯阿

狹道出扁都平途騁張掖回兵誇我騎自願供驅策胡爲楚漢兵紛若大鴟嚇豈知虎穴探爲此牛溝役
入溝復出溝梨園淒涼極彼未叛銀湟何須竄玉塞當道莫買驚天山安枕席

廣南前敵雜詠

書生膽滿軀子季過我勇前驅一隊兵盡是獠夷種

夜宿楊柳井且走蜈蚣箐雪霜不到處草木盡疑兵

西洋江水深來自夜郎國人馬不敢嘗一日變五色

羅貢扼三塗普廳通八播旱禾兼水禾瘴氣防香糯

八角滿山香山橫富州半一被綠林侵孔雀皆雲散

酬諸軍贈黃將軍歌賀菱湖戰捷并序

冬十月二十六夜安慶馬礮三營兵變據菱湖火藥局攻城時值太湖秋操守城兵僅三百中
丞朱公以百兵屬鳳岐出捍鳳岐攻其不備奪回菱湖蓋天幸也岳君障東張君翊六張君之

純胡君壬杰枉歌爲賀而薛君倓善劉君竺佛從叔性田亦由京師寄詠風岐作詩報之

將軍得名四十載兒戲至今猶未改飛天一作羽林郎經戰隴滇兼桂海自嘲此腹負而公何意高歌青
眼待以我乘夜擊菱湖手提百夫氣百倍收回武庫電霜森不惜淋漓揮藻采其實老天真面何敢貪
天誇奏凱感君長歌挂壁間比之曹霸丹青在

孫雄

雄原名同康字師鄭江蘇昭文人光緒甲午進士官吏部主事有鄭齋類稿

東義寧陳伯嚴前輩

鍾阜蕭然晝掩關民胞物與訂愚頑世無知己諧同調帝有恩言放故山江漢群英推領袖匡廬千里照
容顏銓曹後進無能役鑽仰思居弟子班

讀袁太常昶詩集有感

中江書院祀名宦漸西村人有草堂夢兆早符于少保碑文誰撰蔡中郎鞠躬效死扶天步苦口披誠上
露章海外同聲頌遺直蚍蜉撼樹莫輕量

曹元忠

元忠字君直號虺一江蘇吳縣人光緒甲午舉人官內閣中書有北游小草

石遺室詩話君直工詞詩不常作專學玉溪生

贈天韻閣主

碧玉小家女青樓大道旁楊花生命薄李樹代誰僵涼笛縵烟思秋衣怨夕香南湖好風月端合住鴛鴦
誤入華鬢劫回頭計慙差樓前盡珠翠門外卓金車風響衣交串日嬌裙透花誰知紅燭夜背坐泣琵琶

代題潘軼仲所藏戴文節山水卷子

友仁不作克恭亡五百年來此擅場樹是無根山懜懂本朝也有米元章

題冷香先生空山菟道圖

結屋梅花裏蕭閑味自知死生參谷牝窮達悟山雌合眼太初世觀心平日時勞形憐我拙所願得君師

書季貺先生題古玉佛堪詩後

維摩丈室安容膝彌勒團庵小打頭寄語道人張伯雨別須精舍瓶玄洲玄洲精舍有玉像龕見句曲外史集
金石收藏有別子寫經造像盛流行轉嫌白石書齋勝未署金塗佛塔名

題冷香先生寫窳橫詩意冊

翠磴竹陰流綠潭松氣溼倒景水中天茅亭一青笠
紙窗臨水開箭徑入山近昨夜鹿離眠榭葉深一寸
荒荒欲雲天澹澹穿空日風來木衣單雲去山骨出

歐陽述

述字笠儕江西彭澤人光緒甲午舉人官安徽候補道

舟次偶成

江氣涵夕暉紅溼重將墮檣急聲嘔啞帆輕意婀娜沙堤柳眠浪野渡花明舸時見歸墟人林外一鋤荷
煙邨合新綠戍樓上遙火相對定誰閑江山鷗鷺我

舟次

風澹驅不飛空江坐相悅去帆峭如刀亂割青山色

宿天寧寺望殘月

一鉤出深夜慘色雜黃碧只合白楊頭沈沈照幽魄

落花

煙雨空庭霧曉寒山蕪歌罷挽留難闌干一角無人到翻是殘紅耐久看

山行

石氣泉聲冷客衣巖松礪竹各清暉半山人影停樵斧看我藍輿度翠微

蕭延平

延平字北丞號武湖漁隱湖北黃陵人

題楊忠愍墨蹟

楊忠愍墨蹟一幀草書書唐人七言絕句詩云泝水東流無限春隋家宮闕已成塵行人莫上長堤望風起楊花愁殺人左有番禺屈翁山先生題跋云賢奸之判卽義利之分固已凡小人當國口脅口而附和者一時不乏其人偶有特立獨行之士顯斥其行無有不受其害者蓋聖明之世小知大受皆奉公循職雖懷奸邪急無所爲自上失政則奸進而賢退甚至賢者罹其害而不知小人之奸正所以成君子之忠也苟無分宜父子忠愍特一朝名彥耳安能與日月並明哉今觀口書不禁慨論及之右有樵李李君實先生題跋云本朝忠諫之臣首推容城楊

忠愍爲第一當世宗惑於齋醮之時分宜父子柄國竊權其直諫馬市一疏忠烈之氣爭光日月至今冠蓋之倫追論及之凜凜猶有生氣戊午仲秋予於海王村得之筆墨奕奕有神如挹剛烈之概因重付裝池乞天門周少璞師及晚學主人吉林宋君鐵梅題而珍藏之蓋非僅寶其書抑以重其人也辛酉孟秋漫社第二集爲延平值社出以徵題以先生詩浩氣還太虛丹心照千古十字分韻延平得古字敬題長句

共和七年歲戊午海王村頭遇書賈殷勤示我椒山書展卷歡欣動眉宇神采奕奕生光芒意態雄傑勢飛舞翁山君實景前賢珍重遺墨留跋語解囊市得重裝池熨貼吳綾護故楮焚香掃地懸清齋正氣凜然塞環堵憶昔嘉靖墮紀綱太阿倒持縱狐鼠仇鸞市殛分宜來前驅豺狼後掛虎蔡京生攸嵩生蕃鷗臯鶴鷗以類聚媚子攀附躋要津縉紳牽連辱囹圄深宮但計青詞工盈廷誰將衰職補惟公建議鋤奸邪慷慨如撾禰衡鼓馬市一疏批逆鱗幸免餘生膏鎖斧狄道歸來倍激昂糾嵩十罪大奸五拚將赫怒攫雷霆不忍深恩負君父語涉二王非有因獄成三事竟難判輪囷膽氣揮蝨蛇悲壯聲情泣風雨伏闕有人救直臣回天無力悟猜主可憐碧血滿萇弘寧復赤心鑒忠武枷鎖香風吹滿城節義文章自千古賢哉更有張夫人上疏代夫古烈女但恨虎豹伺九關覆盆未雪遭沮阻夫忠妻烈扶人倫百世綱維賴不腐回頭時局幾滄桑太息故宮迷禾黍明祚久隨士氣摧墨寶流傳爭快覩鈴山亦有冰雪情至今棄捐若糞土

集涂子厚參議瑞芝書屋和半園

小園新闢庾蘭成初月窺簾魄正生常熟遺書留秃筆髻公吟草播先聲居鄰北闕千門曉家憶西川萬里行三載忘形頻過訪門茶賭酒不勝情

夏敬觀

敬觀字劍丞江西新建人光緒甲午舉人官浙江教育廳長有映盦詩存

石遺室詩話李拔可有詩友二人曰夏劍丞曰諸真長介以識余有年矣真長蹤跡稍疏詩不多見惟記哀邁過恕齋故居二作審曲面勢善使逆筆去年屬拔可代覓其詩則皆造語用意能透過一層者惜其太少而真長以爲得此已足若必求益則賣菜傭所爲已劍丞爲皮鹿門高足今之學人於詩尤刻意鍛鍊不肯作一猶人語視其鄉人高伯足陳散原未知其徐行後長者否也余嘗題其詩稿云命詞辭浪語命筆梅宛陵散原實兼之君乃與代興蓋喜其能自樹立不隨流俗爲轉移耳

園中暮春

十丈春陰搏桂葉一籬疏雨養薔薇無人識得柯亭竹斫取新篁抱筍歸

拔可新宅白籐花

我言覆籐須作廊君言籐宜屋爲架塗髹漫聖有何好不如白花似銀砑鄰家種籐數百步宛枝長虹紆可跨春風曾不強分別一樣開完始休罷我疑屋中君坐臥外有束縛寧不怕君方治酒召賓客曰今花開我方暇不愁風雨使齋粉落在常階猶足藉北園有地三畝餘千萬買鄰休論價我言喜謔君莫惱君出每晨歸必夜歸來秉燭看此花脂面吳姬妨妒罵

晚步塘上歸臥作

殘日沒波作秋味萬道斜光畫雲氣海山沈沈入夜冥挂眼天空萬星沸鄰家鬪鴨傍南牆水底影追鴻雁行三更呼名人不解蛙唱蟲吟夢一牀

秋夜述懷

暑短得涼早秋味已分半夜索簷牙聲風滿櫂葉戰露氣滌吾骨星色曙吾面置之星露底皎皎眞質見南塘水波冷割此一匹練蘆花散爲餌薄與鷗鷺嚙比鄰鵝鴨闌曖曖夕陽眷物意自冷暖天賦各貴賤

金陵江頭送客旅樓曠望

風幕連城闕山花墮酒杯雲光翦天出舟影截潮來望望歷陽樹濛濛歌吹臺橫江萬里客眼向北樓開

登項羽繫馬臺

項羽都彭城自失帝王基勇勝而無學不足與有爲一挫喪其身山澤橫涕洟戰地不戰力屈殺江東兒

十月朔風勁我登繫馬臺黃雲澗城郭下見百尺埃誰持青霜劍摧石如撥灰芒碭大澤間雄氣盡一時
此邦四戰地胡馬頻來窺戎兵數百年文物皆南移河流水爲患河去地益疲饑則生盜賊惡水窮山噓
不聞雍門琴寂寞深古悲

用前韻貽李梅庵

梅庵作書技稱絕點畫直造古人拙有時畫水還畫松墨花着紙磨不滅北極山氣朝入脣噓出一片天
光新齋鐘徹河五里潤聖手去作傳薪人

滬上喜見陳子言時將往粵以詩阻之

朝從江上來暮咽海氣冷厭見燈火喧短檠照孤哽凍手瀝肝膽呵氣壁有影耀耀鶴柴人凝眼秋骨警
出我懷中詩見之色邴邴吾曹舌已僵張吻疾求茗艱苦陳數語有類瘖人請口含貫休吃喉藏汲黯鯁
鬱茲中腸熱辨貌轉凜洗舉世譏譎然溝壑亂蛙黽上有鷹隼怒下有犬聲獷饑涎擇肥噬不慕此瘦瘠
再君寧滬中魚母爲逸海嶺憂歌縱干忌睡耳實不醒矧吾擁腫木言出若瘤癭誓缺羈馬銜同握汲古
綆

輓陳於勤

陳生任俠虎豹姿常持一箠天下馳學書學劍萬人敵飛筳智術胸中奇南人駛船如駛馬空灘夜雨心
不疑懷提鉛槧歷要害漫瀾海石窮山鶩飛鴻在天杯在手胡女舞飲春傲傲偶然治島若御國片語折

獄民歌詩斗衡剖折蒙吏語剝剝儒墨無焚瀆強鄰假道正伐虢海水晝立旋風吹親探泥丸入虎穴變服得矚秦人雌華元登牀功不錄排媚衆態良足嗤穆生在楚不設醴王戊意怠機已危去之琅琊作扞衛邑鬱蝨處夫何爲田橫已死國士盡賓客慕義咸涕洟祇今櫬槍出頑焰后意欲寵蚩尤旗彌天戢棺有深痛絕好身手空性穢

贈陶駿保時爲憲兵司令官雅善音樂

雍容幕下陶司令白馬花袍美少年早使諸軍稱魯肅果能狹道死龐涓聽宮考角吾知懼崇禹生開世不傳猶有鏡歌稱曲部看君飛騎漢營前

拔可築樓於城北旁植竹木大可二畝自居其家於通州而以樓假予作此謝之

城中二畝宅大可納宇宙九月菊氣盛籬援苦刻繡西風除黃葉一夕林木瘦稍覺霧爲壁杲日出而晝平野度秋氣無隙不穿透開屏負鍾峻捲幔見江岫豈求數仞堂但令心不陋謂宜詩人居李子於吾厚

焦山放歌

楊瀾吹漂一千里六龍負波日加篷中有石柱根自深誰謂江清能見底九秋風日弄浮媚我攜二客一舟艤曉鐘出林葉有聲清梵穿堂石生耳博山當窗香茸茸北固諸峯羅案几砦西羽化不知紀拄錫招之鶴可起東峯雀糞白佛頭攀籐上巢握鷹子層巔四望紺宇空指畫江山若伸紙烹茶對江朝至夕枕聞聽潮急篙矢散歸寺門燈火盡市樓頰向西欄倚七年五至四不渡每望仙鬢暮煙裏美人娟娟臥秋

水青蒼者天覆以被吾家小姑無對值靚飾重簾差可擬

自題詩卷

好古肝腸世所憎空鑪無火伴書燈慶窗市語聲初盡傾几梅花冷可凭海水入詩生夜雪茶瀉注硯作
堅冰苦吟縱與年俱進那及緣愁白髮增

除日雪晴寄伯嚴

一白真銷大地塵曉晴便見雪精神江湖已露開年意草莽相看隔世人萬事破除端不易小詩更始務
求新公才未分謳歌老南史書元正待春

鄧尉山四古柏行

纓舟入山方二月野梅倚天亂飄白春寒社樹不吐青衆香惟擁數株柏一柏晝吟風露聲一柏夜噴山
谷平一柏束虬天際直一柏蒼龍地上行欹眠偃立皆有致氣骨閱世彌老成旁侍諸孫色可喜修能未
足內充美封胡羯末在一家天壤王郎慚不似先皇品題恩寵渥春膏被野翠衣醜崇臺無梁未輿致不
強夷齊食周粟五松對此發愧顏四皓方之遜高躅我來日午坐其下已後齋鐘啜僧粥心知不朽乃正
氣力戒樵斤禁鋤斷

書夢

春江如雷鳴窗下聽雨歇移燈向牀幃入夢化爲月

鄭太夷五十海藏樓落成詩以壽之

七閩多奇彥海藏人中龍五十客春申始有一畝宮歸然妙構造上覆青蒼穹堊以太素色不與華屋同
四旁敷芬葩六窗貫晴虹君時然吟髭哦詩聲摩空呼吸通海氣夢寐結秋嵩所志洵儼儼此室常虛沖
梅櫻幾開謝年少歌春風舊狂或回施玉面今稱翁君詩且自哀頗歎虞翻窮收身居東海位置憑天公
茲語殆知命意與萬古雄因思抱書史老耄或相從春渚織溪毛殘錦尙可縫庶求久視術毋爲去歎悰

暮宿駐馬店

五日渡一水十日越一山一生車馬上甯不歌路難而今無此苦萬里真等閒南蔬辦晨饌北魚就晚餐
聊題駐馬店一辰期往還落日射流塵汙洛色未殘想見扶桑月正掛黃流間

偕朱漚尹李惜誦訪趙堯生楊昀谷徐匯寓廬不遇閱日堯生昀谷與胡鐵華聯句約游龍華寺

觀桃花雨阻不往和答一篇

殘花披雨若兵過白髮彌愁春事左蜂逃蝶匿色可憐誰能載酒強相賀詩來期約若不踐夜窗再展眇
昏破東坡山谷有家法更喜少游珠玉唾吾曹所穫在苦吟苛稅幸免詩人課寒菹得蛭咀貧味切莫籜
龍冤殺个日昨造門未裹飯但覩枯茶生壞鏗心念主人竟何適止此久如氈耐坐峨眉險不易上朱
霞雲堂路亦坳避人東海良暫安合眼還家夢頻作會當同爨煮舊字甘讓市兒呼醋馱日投一詩亦不
惡勝遣吟腸輒啼餓空腔悉索持送似報餉還期迭爲和

壬子四月送婦弟奉母至潯陽別去明日予渡鄱陽湖過姑塘八里許石磯觀鑒弟沈舟處痛絕復蘇既抵南昌久之追寫九十字以紀予哀

喪婦百廿日但覺事事非寢興久無節辰出亥始歸朋友勸強顏而從心與違亦復厭見我嗔我終日歎惟可語婦家百語百痛諱一朝別歧路守雁真孤飛淒風鬻湖船往渡姑塘磯甯知後死兄去死亦幾希頹魂厭皮骨久絕復來依

謁墓

孟夏涉墓門山木蔭已老手植拱把枝今茲各環抱去里逾十年匍匐告皇考衣冠易初制野服照塋草矧爲異代民孺子髮亦皓銜哀撫弟棺淚若天池倒諸孤不成立教養待吾了脫身兵戈間又復喪而嫂鄉人勤慰藉酬答吻爲燥吾生留此眼及覩世變早垂老念衣食田舍且莫保旣夕出墓廬徘徊桑與稻流泉繞荒壠羣峯插蒼昊

重至蘇州夜宿漚尹聽楓園賦呈一律並簡大鶴

閩門柳色最淒清夢逐吳鴻復此行秋去隔年循短巷市荒入夜似山城幾人白袂能終臥二老黃巾了不驚還向萬蟲聲裏坐薄雲潮擁月微明

信宿金山下曹氏園用東坡金山寺涼字韻答真長

東臬盤散月孤涼分領僧徒下舍香風露入秋侵坐列莎蟲專夜織愁忙得安短榻依初地無住疏鐘出

上方獨有沈哀勞夢寐與君商酌到微茫

自泰安入濟南車行泰山谷道間日晡始盡得詩四十韻

載馳入青徐莽莽千里原高厚浩然氣積此時一尊羣壤營大聚億筭皆東屯壯哉國有枳翳爾山之樊
衢陌勢開張塔寺姿昂軒行賈頗充物負鸞亦囂喧買致一拳松胎彼千歲根玄冬雖凜凜物色自溫溫
少焉及谷口仰止惟崇垣方駕銜首尾衡輓相鉤援駝飽厲去鷹蹄疾追放豚流覽駭萬象回顧愕精魂
稍卻修嶂迴復逼層巒或翼禽奮張或骨獸猛蹲或鱗髯而磔或介首而髡神房翁縹緲仙閨女嬋媛
嵌空冰雪白俯海雲霧翻想見臨日觀曾可呼天閻昔者聞父詔於茲參化元披衣立頂石夜半明朝噉
機綜何冥合宙宇彌吐吞匪惟魯所詹直以震爲門開闔電一瞥圖畫視久存三古世不遠六合難具論
我今賦北征所歷得微暄但欣乘欄過未獲磨崖捫緬往多附麗何者鑿批根視精隆璧請德至升柴燔
豈謂神祇荒將令黃兒蕃銘策易磨滅政轍誠儉昏等之禍福極而况事物繁哲人戒躓堙仁者心動旛
神來滿坑谷意往平恩冤未能萬蠹負乃馭六馬奔斗杓誰與齊落日不留痕坂幽平者陂壑暝清而渾
星光出隙罅黛色終眇眇杯莫薄魯酒媒敢告齊婚平生喜兀岸茲游開鈍悒崇高不自伐胸中難狀言
既除婦服哀不能盡詩以道之

世間候再寒地下亦一年登丘望落日夕夕沈虞淵斯人好顏色一往不留妍我非金石軀在理無獨全
始喪恍暫別疑君便當還魂魄逝益遠夢寐眼將穿兒女如雁行幼者及長肩長大母不見但在阿父邊

攜兒往野哭野老嗤我顛顛亦莫自持知且不謂然誰能剖胸臆告使陌路憐歲週服既除日久境必遷
肺肝習悲酸奈非藥可痊入夜朔風凜缺月中懸風凜有時溫月缺有時圓惟人生死際破碎不復全

移居又埭角口占

吾聞烏擇木未聞木擇鳥得樹三百株巢居不爲小

壬子除夕

屠蘇杯在手此歲遂除畢豈惟一歲除吾年亦除一壬子溯庚子追論至戊戌駸駸十五年頗已懼今日
吹灰弄葭管舉世弗中律何從尋好春到我寫詩筆

次韻答眞長

凌晨裹飯至入門問歌詩感君存此問請以詩答之自惟天地間何處置我宜散之恒沙星一片明河漪
奈何復有月亘夜相俯窺我心與明月萬古以爲期終竟有缺憾造命匠師誰宿草纏荒園及春黃淒淒
不能去諸眼留以叢舊悲那復興到語痛發止肝脾鶯燕影亦好何以春鴉兒比巢屋旁樹叫啼各以時
鶉鳩獨先鳴羣不察其私庭前梅放花喚看枝離離春色縱可歌老爲少所嗤謂君不知我持詩更似誰

次眞長拔可韻

凍雨不知鏡夕近東風挾自海中來我無客座溫溫酒但借鄰牆白白梅老至交情真有數置之丘壑亦
需才便教七日無煙火肯斲松杉竈下灰

和王荆公古詩

少年見青春頗獨異恒狀但覺春風來於人多孟浪矧今老將至氣衰莫之抗東鄰同歲子鬢髮黑無恙
一生不傷春歡娛到年壯風花正作惡蹠躩空江上同時作春游白頭怯吟望

道人北山來知我南山遯問我去城中二山孰爲遠引去看北山幽幽曲度層巘老松生琥珀修竹連坡坂
吾山雖可居種樹恨已晚留汝松竹下信宿不思返

秋日在梧桐午陰得俄頃涼風忽入葉墮地聲不整掩書散沈迷歛闌窺淺井客來再三瀆人事不可屏
稍起與周旋清月已出嶺

前日石上枝枝葉稍騰上根株雖不大秉性殊崛彊意在百年外豈爭一春長積寸且有餘還當達千丈
輕雲衣秋嵩不礙天月朗小松氣如之終竟是吾黨

日出堂上飲月出飲未闌賓馬列堂下主人未盡歡華鐙燦綺席明月無人看舉杯勸長星一酌再亦殘
主人已易姓斯堂當改觀棟桷窮刻鏤祇用加朱丹高花歲一開慘淡窺闌干回晝作長夜爲樂良大難
令吾操鳴琴不忍堂上彈

急雨

天上明河不得懸陣頭急雨澡林蟬隔窗酷似多荷葉夢裏移牀睡水邊

湖南內亂左南生以書來告奉母避居東鄉而以滬南之危慮念及我兼詢其亡姊骸骨代書答

之

我念子昆弟今在山之阿黃巾不侵犯孝養神護呵定知泉下人亦念母髮皤書來急焚告免入子夢多
吾母亦六十耳再聞兵戈奉之避何所驚鳥無完窠當時圍城西汝姊厝松坡幸以小舟進載之出渠河
不然且災及其謂稚子何報詩託雁足迅過洞庭波

眞長以長歌和余種菜詩答次其韻

麒麟在野龍在天大盜不止聖不前我雖不聖亦不盜時無舜跖爲之先歸而有田甘作稼往訊鄉老謂
不然竄身海角刈蕪穢短鎌在手如矛鋌種瓜種豆得有幾饑渴所恃無根泉而我至樂有不壞日待子
至相留連瓦孟之樸勝嘉籩家蔬之甘勝小鮮天生薇蕨義不采豈不猶比夷齊賢日居月諸皆西遷天
道胡爲能左旋我今與子四十年未嘗一日少羹饘

北行車中口占

車前岱色已殘秋北去幽燕客更愁可紀川原惟故物所經城邑異吾州塞林欲近參差起落日無涯黯
澹收便入國門稀好夢三年三至那堪留自辛亥每歲皆以秋北征

歲盡南歸

上京客已久北候難早春一日忽思去去不別四鄰驚心省漢臘禮俗最近人及時嘉拜慶長吏宜免噴
齋糧渡河淮三夕臥車茵昨行堅冰上今觀波鱗鱗洵知江氣暖入屋如烘薪吾廬盛松栝不見百二旬

婦子出林下爲撲衣上塵

南歸十九日仍北行

天色微能辨雁行河鐙收焰隔重岡
載人北去車難駐換歲身經思更荒
不見淮波春渺渺祇愁岱嶽夜
茫茫往來共此三千路客意無端異短長

崇效寺牡丹

五色染羅綺翻塔愁且妍自是有情種
得生兜率天鼓鐘日般地春風還放顛
酒香出僧屋客來泛觥船
幾日斷唄唱不惜戶限穿豐頤易銷滅
盛妝良偶然俗眼極富麗卸去滋可憐
客莫嘆空枝俄頃卽百年
百年花百開歲一近花前

歸林居三首

久厭灰土燥歸愛江南雨雨聲同到門
潤氣溢堂廡翩翩南飛鳥抖擻溼毛羽
慈鳥一春鳴思子正良苦
衆木森水次雜花脫林塢饑來就時果
寧必仰官庾

鶴性本非凡豈落羊公手請休炫座客
不舞蓋已久今觀人臣者等求爲功狗
鶴聲上九天乘軒意何有
夏水及時長海氣入窗牖
鼻汝從鶴來白羽一刮垢

長歌非自詗所欣仍吾屬松齋兩三間
頗免炎蒸酷矧茲江海濱聊可縱遙矚
月來照几席卷簾撤明燭
長安短巷內豈便萬事足嵇康七不堪
懶慢尤取辱

亂後移先妻骸骨厝於西湖之上將營葬焉而未果經歲始來奠之

別君今三年入夢已不多况在喪亂後厝骨湖山窩昨來奠清酒不見朱顏醅靜坐松下奈此九泉何

輿行錢塘江岸口占

五月錢塘江畔行西陵草樹隔潮生
歊蒸日氣初過午旣甦山光轉不明
崖岸自隨沙路遠筇輿還比布帆輕
漫窮清淺桐廬水世少嚴光釣亦名

同胡栗長登開化寺六和塔是日余四十初度

與君絕頂望江天鷹鷂盤空不得前
漫道脚跟無處立何妨簷下片時眠
鳴潮直上三千里積日而今四十年
試覓荒碑捫宋牒當官文字賴僧傳

塔碑刻宋時敕建牒文

雲棲寺竹徑

理安長枳直插地雲棲大竹高參天
二寺竄然止聖處枿不蠹朽竹愈堅
昔稱理安景無對未看雲棲真枉然
頃窺幽徑避白日步步到寺循花輒
又如葦葉作廊覆左右柱立皆修椽
露骨專車巖壑底表影累尺僧房巔
空亭住足一遐想夜至風露宜娟娟
蓮池大師涅槃去香光寶墨彌新鮮
老夫白髮回翠葆欲借蒲團爲坐氈
人言此寺惟有竹他景不勝名虛傳
正惟有竹便佳絕雜樹亦衆何稱焉
願筇不斷盡成竹連坡長到澄江邊

湖上三首

西湖如故人相見記疇昔清光迥盞與一笑展眉額憶今三四至每至樂晨夕枉然謝好住老至寧不惜
世紛到湖山崢嶸自蒼碧嗟我四十年雙鬢已斑白夢中見林逋待我孤山石梅鶴了不避知是主人客
西湖三面山清景詩難摹誰能一筆畫寫此湖山圖出郭驚湖光但恨才思輸西子自持鏡方不爽釐銖
朝陽初在山水面輕紅膚清風一放船五月吹菰蒲越語花葉底醉來答吳歛鴟夷莫載去林鳥恣相呼
西湖爲佛國衆峯如蓮花南山對北山鐘聲晚相拏浮圖千尺影倒水日已斜清風生皓月何處容夜叉
二畝雷峯下老將安我家葺茅共妻孥親手植桑麻歸爲樂天民此念當非賒

李道士賣字爲活已三年矣鄭海藏繼之以草書聞於日本人

與世相聞行狎書臥牀穿被十年餘百番釐致江南紙大牯竿投海上魚不獨枇杷鮮入市

魏人關枇杷與鍾繇同時

次韻答子言二首

習爲不驗言不若農與圃得人諛募金不若江上賈真同寶燕石客笑不吾取廢然返巢居鳴鳩對衡宇
枳欄水楊柳勝如築百堵松柏與豫章長大經幾暑期君日一至蕭然坐廊廡抗聲歌商頌樹下行拖屨
亦有竹與葦呼兒編笥宮教茲暇豫吾奚用持屣塵客宜從石請與此長相處醉入無功鄉多謝野人士
登臨問樵漁手竿腰且斧

此生儕儻保因樹駕爲屋醉遮鶴柴翁曲巷有鸚喙一杯不言語癩馬揩枯木再飲如翻水寫詩筆至禿

頗聞蕭山尉遣迎來急足煩君志州壤山水皆可錄渡江颯風雨試繼西陵曲定有許伯會書以敦越俗

林居絕句

蛙黽收聲雀又喧勞勞晝夜與更番先生冷淡爲生活臥共髯翁閱此園
欣欣衆木日相親意許先生作主人便與支牀龜百歲不須埋土鐵千鈞
掌中斷取九州大擲過恒沙世界外却然身在瓜牛廬上有長松爲遮蓋

題胡梓方贈張宗楊詩後宗楊陳石遺之僕能詩

十年破甑墮塵埃力學成名有自來此士猶居千指下大夫翻愧九能才題牆胡子詩頻和違位梁髯手
重推梁髯謂節庵試問羲之作麼語文章差遜郗方回

明十三陵

軍都山色蔽黃埃隧殿幽雲黯不開老監賸能求橡栗後王曾爲補松栽歷泉置案形空勝鈴鐵書磚事
可哀得免椎埋出藏器黃腸題湊至今猜

重九風雨不作登高會

作客近重九那能更緩歸前夕渡江浦暖回身上衣家人辦裝棉笑謂寄遠遲輕囊便提挈不待從者持
今晨當登高海上無翠微睡起開雨窗松間霧霏霏節物異感念因復憶京師京師已飄雪江南柳未稀
京師食魚羊江南魚蟹肥我庭菊作花我室琴可揮婦亦藏旨酒薄醉面生緋

題蒼巖上人山水圖

舟車越山川一日可千里今開畫圖看千里在一紙草樹千萬重雲峯伏而起一日誰能窮四時紛其美
吾思長年從行脚病馬將前退以筮山旋水轉不得歸子規雖啼客無耳衣如瓠葉風翻翻大師何往抑
何止

別林居

昔者賈浪仙揚州借園宅初無人我見久更忘主客一朝將別去以詩酬竹石竹石且能言再請從所適
浪仙果與俱辭去如弗獲竹爲浪仙蒼石爲浪仙白主人縱不憚強止終何益至今某氏園惟有浪仙跡
吾無浪仙才敢以今比昔寧謂竹石情勝吾松與柏

新春

春風不入時來在漢臘後王城酺十日惜不得官酒紅塵暖游步吹面彌作垢強買新花枝欲簪羞白首
相知罕新人落落齊年友杯闌憶綺語且看春光否人誰不姣好春與增老醜不如不逢春猶可歲寒守
贈張仲仁

日歷如山治事廳還於下省見西銘濟時文字輕繚練邁古風流素几屏過巷夕陰常寂寂對廊春樹自
青青深談更復思吳會父老相持子美亭

拔可前來都門暫留卽去別後彌復相憶作此寄之

君來十日歡歡盡更不適諸生况又去惘惘數晨夕晨夕春已暮念我今久客城中花方盛無君共游屐
來時不及花我意爲君惜又愁花易盡使客傷春劇沈思轉憎春終去來何益亦如憎子來曾不暖我席
崇效寺看牡丹白者最盛

唐家不獨美人肥紫蓋妝臺比醉妃應是太真初未貴詔將白練作仙衣

樊山挾東同遊積水潭

京城西北隅稍稍遠塵埃玉泉分其流積水入凹壠西涯舊隱廬淨業題寺榜門前數十樹隙地如平掌
其右有高廟石阜沿流上俯收湖水清側致落日朗小魚供坐釣歸鳥引柔吭其南普濟院樓軒足清賞
隔水略可辨繞堤三百丈院中蒔洛花大不給盆盎紫藤掛疏疏風蟲恣吟響淪茗話游迹昨今吾始兩
樊山歷三僧題詩在書棧挾東亦已舊攜孳歲輒往平生屐未至耳聞時夢想便擬收閒身游目河嶽廣
後此三十年精力應勉強當成一段奇相約休持杖

三貝子園籐花徑

架籐爲徑兩山間密絡香花勝紫鬢故遣羣蜂嚴作衛好春螿手未能攀

和左南生觚社七詠

痴僂承蝸先累丸累三累五力能殫吾生用拙劑圭角始得鮎魚上竹竿
跳跟相打眼中驚決勝應須耐百撈何似里中探黑白少年羣輩櫻公卿

創局真追洪水前，放勳何世此何年。
老來眼有蛛絲繫，難讀樓頭血淚篇。
從來象戲出宮闈，道喻陰符發殺機。
吾里宸濠舊封國，可能地下起婁妃。
宜和戲局詔頒行，復見蒲萄上苑生。
畢竟吾丘能進用，枉教突破霍家罌。
名駒絕影去如風，何物英雄抵魏公。
備亦吾儔得計晚，猶輸燒掌火光中。
入務何堪一局棋，多應官職折因詩。
爲君更破酸鹹戒，側坐閒看劫盡時。

真長先以書籠寄江南賦此調之

冷落無如都水監，長官請急吏曹稀。
誰能過子成枯坐，我亦相逢說罷歸。
入幕宿廳鳴鎖鑰，當風閒幔走
蟬蟻。篋書先趁江南便，應告居人免寄衣。

重陽前一日過海藏樓夜談

叩門惟見月當樓，竹徑松窗夜自幽。
勝會共欣明日健，豪情真向此間收。
絕無一語論京國，應笑頻歸似
置郵。聊復就君成洗耳，詩清知比潁長流。

爲徐仲可題新華書畫冊子

老友閨中譽且憐，還因題畫溯當年。
歲已酉，吾婦曾爲新華繪歲寒瓶供圖。
墨痕八幅馨香在，絕歎人生遜紙堅。

女生

女生命曰良良者，意取止憐汝。遭貧父撫弄，歎無已。
我年踰不惑，六女三男子。今年更增衰，又動搖一齒。

汝生誠已晚教養何所恃既歎復轉念在我翻可喜念我六十時當盡遣汝姊誰堪慰膝前汝正頤而美
生女甯不佳人勿謂耳耳

書謝安石語

謝傳昔汎海吟嘯殊自樂舟人伺其意逕去風轉惡羣公面失色雅量獨難度如此將安歸徐徐言近諠
用茲推萬事進退要斟酌似彼操舟人性命安可託

初見盆梅

北人不識梅本開冰雪裏錯道是唐花惟堪亞桃李開口大北勝姚黃與魏紫富貴真有種凡花難並比
人情愛紛華鮮不遠君子看慣洛陽花寧復能賞此

贈陳石遺

誰言喧囂中不可寄幽躅城東石遺室遂若在山谷庭前雜花木中秀一叢竹竹本南方卉未宜太行麓
十種九難活冰折雪又覆奈何生君庭經冬色猶綠我家江南岸風梢千麤蟲自我來北方真色不入目
尋君取君詩一就竹窗讀爲我洗煩愁不須酒盈斛吾詩當終窮吾貌當食肉再拜先生言改詩恨不速

題師曾槐堂

先屋後補樹久待始成陰何如因樹爲不負古人心此槐真厖然歲月亦已深堂雖非君有居可鳴君琴
我今爲君來時時登足音朱門多大槐未屑偶一臨佳人如佳樹相對生古吟因人買山隱拙哉支道林

木誠不生巢自會翔幽禽

花塢

不知花塢許深山但覺流香出塢間一一結庵穿竹徑人人誦佛閉松關杜鵑枉用啼春早胡蝶能教宿
草閑試望白雲堆裏白何如來客鬢毛斑

夜過拔可新宅納涼

義義街樹燦燈光中夏過君覓夜涼百步能寬閒壤美兩端不掩玉河長未愁明月干苛禁祇有清風是
慢藏畢竟此田由海變高原何處可栽桑

危樓

去天一握聳危樓但欠山光起倦眸此會歲來同候雁吾身老健及殘秋埃車過市風初冷煙突連江日
易收欲共天隨商去住無人不勸稍淹留

設酒候散原翁及夜果至賦此戲贈

欲待翁來醉一觴座中有酒戒先嘗李癡飢渴能堅耐鄭老眠餐改故常已苦索居留盍久果酬望歲喜
應狂入門刪盡寒暄語卜晝何如卜夜長

座客有李梅
擬鄭蘇載

晚入江寧城中

雄城收草莽墜夢掠樓檣問少親朋在過驚里巷荒徹天新畫角扶路禿垂楊未改惟山色誰憑挽肺腸

濟南遇雪

插翼載夢魂一宿見齊魯奔車偕宮下冷不聞鐘鼓曉來萬胡蝶翔就客身舞邈然歷下山境過意彌懶
去年蝗蔽天及冬蠅入土今夏復搆兵此城如沸釜四縣况未安舊麥空倉庾探丸及良家質田廩求取
事急賴天時歲豐或有補佇看至牛日瑟縮忘所苦

題姚叔節西山精舍慎宜軒兩圖

斂金庀材成廣廈牛毛學子鱗角寡使民識字計以年終竟六經付擗搗吾曹少年讀書處頭上纔有數
椽瓦通人百輩出窮廬我雖不才勝於野披圖一讀姚氏記追憶承平舊鄉社縣前山色昔所親邇日誰
堪蓋茅把渡江始識通州范近因叔節更識馬通州范當世桐城馬其昶皆姚氏之壻流風飭聞安福君文字薪傳侔二雅

觀君所記真名言未能以語譏譏者畫山畫屋良憮然老去何曾一日捨叔節自記安福君之遺訓以釋慎宜之義

送竈日作

災生元二不隨除漢臘蕭條送竈餘誰信小神能謹告人間罪惡不勝書禮記祭法鄭注小神居人間司察小過作醜告者

二月二十二日葬陳左兩淑人於杭州法華山心涼亭之陰書此示兒輩

照山松炬繩雙棺線淚真淪九地寬自是念頭垂老斷亦拚骸骨異鄉安指塗溪定江流合鬻月林愁雨
過寒及此身親封樹事要令兒輩識峯巒

桃花謝後作

桃花蔽蔽已盈陂風後無多掛在枝不忍重來踏花片祇應遙立看些時

至長沙主於左太傅家憶壬寅與左淑人居甥館今且十六年而淑人歿已七年矣感愴書五十六字示內弟良生南生兼答南生喜余至之作

入門真復雜悲歡翻咽千言在肺肝咫尺春櫳都改換連宵雨枕更幽單
妾年夢斷頭先白後死心孤世亦殘了了仕婚彈指過謝庭今日獨回看

春江

奔江無束爲春狂萬里煙花入渺茫岸草亦隨波路遠不知到海幾多長

雨夜宿恪士湖莊賦贈兼示仁先

喧君寂寞廬溼我久繭足滃然白山顛颯爾跳湖淥桑條老猶黯荷背半已覆終朝滲未止入暮昏且速
倚看徧六窗美睡逾二宿題門杜陵句十字可三復况有驚坐人與君接鄰屋屋小纔如舟並浮煙水腹
君言兩屋間來歲閒以竹劖筍當共飽森廊亦分綠會見增坡陀何憂水生谷

同散原翁游掃葉樓遂循東岡得鄭介夫祠還過烏龍潭望薛廬賦詩一篇

半千山水窟歷寺殘秋蕪止車大木下黃落照霜鬚信步叩殿扉土階竄飢颺其旁小邱山風擗吹徑枯
樓宇差完整伏檻城數牖蒼鶻連復嵐絡窻明網蛛眼爽視壁字翁題掛西隅磊落妙心畫突出焚札徒
兵戈六七年夢寐承平徂悠然過耳鐘未敵鼓角轟東岡起槃散詭說慰日晡兩山密竹間緊誰講精廬

疑當事猿公有女有丈夫將搜一段奇披榛從樵蘇下散溝間雀飛啄屋上萋乃是一拂祠卓爾熙寧儒
知名荆公門苦學宿繩樞數諷免役法帝鑒天下瘠建祠福州沈政能飼雞雖因念蔣謂公獻畫事與符

五策悟仁廟歎比流民圖

康熙時常熟蔣伊繪十二圖疏言其狀又五疏救荒策仁廟東巡見飢黎歎曰此蔣伊流民圖也

緬德八九帝未料喪神珠顛

覆豈有故世變古所無塌來禍洪猛士悖薄典謨飯豆羹芋魁大纛張萑苻半千所遭時固勝今日吾走

鑑潭上影蟲柳穿魚蒲薛願猶幸民岸幘老江湖

薛廬爲全椒薛慰農所居在烏龍潭上薛沒後其門人顧石公居之今顧沒亦十餘年矣

鄭蘇戡哭子詩有云潛魚爲飛鳶久羈等一縱魂魄猶樂生億測恐難中余以爲不如釋氏瓶雀
之擬且因其意而廣之聊以慰其沈哀也

誰能起蒙莊對殯談名理知翁有深悲慰語徒爾爾讀翁哭子詩請試廣其旨我愚未聞道豈足了生死
姑捨血肉軀妄將天上揣凡軀累千鈞登陟艱舉趾夢中生兩翼栩栩猶自喜設令釋重負昇天直如矢
寧復仗羽毛去地纔數里天庭端冕旒羣仙整綱紀文士鏘鳳鸞猛將森虎咒豈如下土臣犯上作姦宄
因思往天都骸骨定敝屣奈何比飛鳶跼跼還墮水等之雀爲蛤徒見鯨魚鮪鄭翁不須悲我言或非詭
靈牀倘可證書以詰令子

鄭叔問舍人挽詞

老死相因至悠悠是九原相看萬事了寧有一朝存几案親遺札歌詩抵罪言立椎榛棘地誰問鄭王孫
遠跡投吳會其如謝豹何萎春從草木費淚與山河怕聽臨風笛直無返日戈惟餘井水處都解樂章歌

夢過垂虹曲春歸大鶴天一空
爨鼎架盡換米鹽錢小巷侵書帶
殘鐙冷坐蘊白頭傷氣類流涕似長川
和拔可病起之作

相看臥榻訝佯狂漫取人間百病嘗
曾是夢中留我飯誰教世味腐君腸
再生作會誠歡喜比壽從今孰
短長萬事在天難逆料九秋蒲柳各蒼蒼

哭俞恪士

生存累萬緣朋友亦其一緣盡判人鬼幽明不相悉
來生果何境閉目黑如漆一見一回親生交愁短疾
病起尙過我詎知一面畢讀君最後詩痛絕爲擱筆
湖風淒殯棺空榻猶在室使當絀黃泉骨入那復出
平昔憂老病果死曾無恤游魂類初生甯更念昨日自君關隴回喪亂歲已七舊宅臨青溪壞幕散春駟
早料蟻穴堤一潰難止汨收跡向西湖繞舍竹纒密小窗對南山過君曾促膝遂爲墓上廬微塵厚書帙
觀此百追念平生重品隲大節略不苟宜仕亦宜逸晚詩尤自道語語見真實樟亭勒游記十友君先失
呼君君不聞夜葉空蕭瑟

五日立春

莫喜春氣回舊歲從此休莫憎春色晚既至如奔騶
開歲始五日東風噓海陬乍觀羣物欣中已包百愁
於物僅小遂於人直仇讎蹉跎少壯心努力造白頭
初禽鳴屋角所思往芳洲與汝共天地寧知身是因
李幹丞自武陵來喜得伯弢近狀因以詩代書寄之

武陵豈有避秦居應是黃巾不犯閭自擇水田聽布穀閒過路家見蟾蜍菖蒲身老薰風外瓜蔓情深夏
雨初一見李君頻問訊強於得報數行書

海藏樓看菊和寐叟蘇戡

長廊對花豪乘秋氣彌盛萬枝照鬚頰衆色葩且正主人富兵略部勒明號令治花如治軍壯夫齊奮迅
蓬勃天地間緝錦由素絢名品雖不同秉賦固一性中園厲風霜凡質早疲病丹楓醉如泥彫傷一夕竟
芙蓉甘晷晚顏色僅朝榮同時尙如此春華寧並論寐叟夢餐英妙語作菊問首出讚歎詩要是南山詠
歎然會主賓共履君子行遺世從伯夷此花亦清聖

次韻和真長同步湖上乘月歸一篇

月出城中日落湖水光不夜青山晡與君散策數百步烟嵐抱水成三隅寒林多風野炊白歸艇近岸波
鳥舒冬來清景少人賞靜趣更勝春嬉娛薄冰晚結浪紋皺蒼昊入底星如珠人生得此慰寥寞底事樂
向湯火趨君今銖寸許田舍寄此湖社比櫟株朋僚會飲不一赴出門徒步安車無攜姬挈子觀刑于道
遇立談每須臾我家東湖躍馬地棄鞍握手鄉音呼爾時年少各自負氣若江勢胸吞吳君家西湖再會
合照水白面今白鬚

冒廣生

廣生字鶴亭江蘇如臯人光緒甲午舉人官淮安關監督有小三吾亭詩

石遺室詩話鶴亭詩如舊人漸少黃幡綽新句平添白練裙梅邊笛瘦人雙玉花影筆低月一
丸請君試問頭上月曾照清寒與攀摘日色不到處苦氣綠一尺短橋臥流水竟日無人迹雜
花三月暮孤艇大江潯皆佳句也

贈孫仲容刑部二首

許鄭無文章任沈寡經術千古滕薛爭一言齊魯失觥觥孫仲子淵博未有匹往籍多淪亡後生誤咕嗶
窮年仰屋梁一一爲梳櫛著有周禮正誼墨子閉詰餘事工文詞藻采復秀出左升儀鄭堂右入平津室始知根柢宏
枝葉自茂密如水有本源其流日汨汨咄哉一孔儒晞名不睇實

重過葉蘭臺先生故居書贈道生裕甫兩孫世兄

阿大中郎總不凡故知回首我何堪青蛙閣閣池塘路淒絕當時秋夢盪

自楊花橋夜歸口占眎內子

駿駿車走傍江十里歸程近轉難常恐林間明月墮抵家不及兩人看

雜書八章答洪小江先生 錄二

左顧儒人右稚子百年蟬蛻行樂耳人知次公醒而狂不知臣朔饑欲死出門惘惘將何之文章薄技世所嗤可憐亦有禰衡刺磨滅懷中今幾時

束髮掉鞅馳文場結交十九皆老蒼逝者既痛不可作生者遠別天殊方白眼蒼茫書咄咄欲語不語無騶卒腹中踈踈走車輪口中巉巉生石闕

五疊前韻懷仲虎歸太倉

水紋衫薄晚涼生憶爾孤篷落日橫行到玉峰回首望斷霞紅處是天平

六疊前韻寄義門

江湖流落玉溪生長念神州淚眼橫一曲鈞平聞廣樂始知夢裏有承平

因循

拋殘金彈知何惜夢徧銀牀總未春東澤偶然留綺語北方從古有佳人暫來小閣同延佇閒話中年各苦辛裘馬五陵空嘍喏珍珠十斛已因循

餽春詩無七言絕句補成三首兼懷肯堂 錄二

當前不醉更何待後日相思亦惘然曾笑仙人太無賴要留老眼看桑田平生事事都迂緩乘興尋春春欲歸一種蒼茫誰會得自栽楊柳已成園

師承歷歷吾能說，小子曾曾出外家。解道冰寒知火盡，不將秋實廢春華。十年寥落虛題目，四海因依有歎嗟。百計未能娛一老，撫心難制淚如麻。外祖周季況先生

爲何潤夫題江亭玩月圖

江家亭子帝城隈，乘興曾來一百回。愁裏孤蘆秋蕩蕩，眼前天地雪皚皚。漸深哀樂耽禪悅，難忘高寒語酒杯。聞道衰遲舊司馬，攀條斜日過低徊。花農嘗種柳亭畔

送潘蘭史歸廣州

燕臺三月雨冥冥，門外驪歌那忍聽。春水方生君便去，今宵何處酒能醒。愁中潘岳添絲鬢，歸日揚雲有草亭。老我十年成一別，嶺梅南望涕先零。

初入盤山

襪被薊門西，駕言入盤谷。深沙沒馬脛，疊石妨車轂。陂陀漸透迥，登降隨起伏。頗驚石打頭，却顧雲生足。謾謾千尺松，森森百圍木。泉流澌有聲，山削瘦無肉。窮追恃腰腳，仰視眩心目。太行蜿蜒來，至此勢一束。平生麋鹿性，冠帶苦局促。會當濯滄浪，一洗襟抱俗。

萬松寺舊名衛公菴登樓望遠忽發歸思

天半高樓獨倚闌，悲來雙淚落沈瀾。有田自是躬耕好，垂老方知出世難。衛公功名中人而結菴盤山知其有出世之想矣 一晌

鐘魚依淨域十年車馬誤巖官家山亦有荒菴在余家水繪園亂後易名爲菴誰與松篁共歲寒

李衛公舞劍臺

兀兀荒臺峙夕曛山僧能說李將軍倉皇馬革東征骨慘澹龍旂北地雲愛妾儻攜張一妹故人偏值蓋

蘇文蓋蘇文即虬髯客兩雄相 匈奴未滅英雄老撫劍淒然淚雨紛

青溝弔智朴上人因過其墓

我游崇效寺輒憶青溝僧青松紅杏不可覩但有棗花歷落欹枯藤京師崇效寺爲青溝下院舊藏上人青松紅杏圖卷庚子亂後歸錫山楊

氏貪多愛好盡凋謝丁香花發香騰騰竭來策蹇訪盤谷濟勝喜得吾良朋入門滿眼但瓦礫殘垣廢礎

苔花凝野棠數樹白似雪欲下不下盤饑鷹空山古佛不見面何況佛坐長明鏡百年人事有衰歇坐此

萬感來填膺大師投筆起淮泗整弧旂拔會先登松山杏山一再敗遼陽殺氣方憑陵承疇生降象昇死

天廢明屋誰能興歸來萬有棄敝屣茫茫覺路求金繩平生心事說不得一花一樹留吳綾上人徐州人松山杏山之

戰身在行間敗後爲僧其畫青松紅杏圖卷蓋不忘喪元之意荒墳三尺東澗土弔客未必來青蠅我生已落王宋後漁洋青豆惜不親

祇承爲師高唱梅村句吳梅村有松山哀杏山哀詩山鳴谷響疑相響

吳門感事寄淮生丈卽用其冰泉唱和韻

花步新涼雨瓜皮舊勝游可憐垂柳色猶似去年秋桓笛聲何苦黃釭淚未收南朝江總句還望極元搜

謂亡友
建綴

懷民自綏遠城寫詩見寄依韻奉和八首錄一

食蓮心苦食梅酸自署陳人結古歡身後方知吾輩少眼前未覺此才難餘年飽飯天猶妬癡想尋花春

又殘百計安心安不穩臥看簷角月光闌

和心太平
屋即事

琴南約泛舟二鬧

往從楊樞密得見山蘿圖字若蠅頭大卷如牛腰粗

田山蘿大通秋泛圖
今藏錫山楊蔭伯家

去年耆侍郎壽民拏舟約我俱我

時絆塵網結想空菰蘆平生林處士蓑笠煙波徒十年客長安頗厭京塵汚朝來踐君招道出城東隅飛

飛掠乳燕獵獵鳴風蒲吾生為客早中歲多羈孤聽風與聽水滋味酣江湖乍聞柔艣聲便憶吳娘飲自

從別江南此景歎已無迢迢布帘影約約酒家胡維舟綠楊底策杖行斯須荒墳禮公主

二關東有公主
墳俗稱佛手公

主純廟第
四女也神木驚枯株

關南里許有巨木長六丈餘
橫臥於地人騎馬上不相見

差喜腰脚健未愁風日晡那能長夜遊手玩明珠

醉臥短篷底廣唱相唱喝

卽事

繫鞵無去處獨立聽潺湲池小剛容月城高半負山尋花春事盡行藥病身閒我未知魚樂魚應笑我頑

再和笑拈

佳客招邀恰兩三祠堂新結小詩龕水邊何處逢多麗池北今朝續偶談落落酒徒餘我健沈沈春事借

花探葦灣回首成天末觸撥吟懷百不堪

辛亥春在京師與陳伯潛鄭蘇堪諸
君修禊葦灣忽忽四年幾同隔世

宿覺庵觀放生

七聖已俱迷一宿云何覺荒庵踣城西壞塔埋山麓年年結妙因佳節記佛浴東嘉風俗醇信鬼從其朔
她珠與雀環古有報施速世情貪生噴佛性慈受毒師昔了無生六祖嘗謂宿覺汝甚得無生之意見傳燈錄本傳有生亦當贖
夙世佛佞我諸兒嶄頭角平生於內典有殊好而璋兒生與佛同四月八日瑜兒生與佛兄調達同四月七日琛女生與佛弟難陀同四月九日轉憶東坡言有子
萬事足老來頗戒殺但不因求福六道有輪迴生天爲汝祝

丙辰秋在武林購得朱竹垞爲汪叟所銘硯明年正月讀風懷詩因成詩案一卷卽用此硯時案
上膽瓶插蠟梅紅梅各一梅新摘帶雨雨滴硯田覺滿紙香艷可呼起詞客英靈也口占得一
詩

摘梅帶雨供軍持雨點時時落硯池我有風懷誰省得竹垞硯注竹垞詩

注香泉爲我畫甌隱園中花木各賦一詩錄一

一分流水二分塵種就前身薄命因商女莫歌亡國恨世間猶有息夫人 桃花

陶伯銘以所藏大周國寶屬題

內家才調上官兒押角何妨倒好嬉捧出殿前人定訝猩紅醉映六郎時

分韻題宋本魚元機詩集得樓字

此寶真無價伊人字莫愁薛濤同播諾李冶足風流生小鷓鷯巷平居燕子樓黃繩新結束玉枕舊雕鏤

奪婚人爭妬傾城命不猶薄逢京兆怒真斷美人頭紂絕冤難雪江東集未偷臨安殘本貴士禮舊題留
狎坐頭濡墨分曹手探鬪畫圖還恍惚印記總綱繆流轉嗟無定沈吟涕未收憐渠鸚鵡禍憶得鳳凰囚
光緒問傅彩雲以虛婢致死 往歲收周勃謂蘇提督元春也 同時泣杜秋嬾妝來素素禍水歎柔柔至竟
下刑部獄與元機事絕相類 蘇與傅同時入獄
開籠放何曾下筆勾辭幾連性命債儻有恩仇一代回文錦千金集腋裘賞心於沈范得句謝應劉名刺
清微著人難卜賽求卷有清微道人題無玉 還君三太息寒具當汚油

潤州雜事詩十二首錄三

管領東南處處山用俞似妻趙夫平生蠟屐不曾閒何須更有凌雲濡足褰裳老此間

石淙遺帶日摩挲恩怨推排奈汝何不是永嘉人作相誰留佳話配東坡楊文襄歸潤州實受永嘉張璠排擠葉子奇草木子有永嘉人

作相宋當亡語

宋元兩志久凋殘良友殷勤盼覆刊我是名心摧不滅要留坊本媿臨安彙在永嘉曾刻永嘉詩人祠堂書十三種以畀甌人頃來鎮

江吳印臣諱諱以重刻宋嘉定元至順鎮江兩志相期及晤陳善餘則嘉定志陳已覆刻至順志亦有寫本以艱於費不能獨任息壤在彼吾當爲善餘了此一大事

同傅沅叔宿金山妙高臺作

人事有變遷大江化爲陸自從南岸連平沙百年山寺無人宿遊人耳食金山名但到金山心已足江光
夜碧缺月生海氣朝紅初日浴可憐此景最澄鮮付與山僧享幽獨妙高臺上水調歌卽今寂寞誰何續
孰奇笑我老不休襍被記同陳獨漉高談雄辯未成眠喚醒栖鳥飛簌簌謂今年元夕同陳善餘宿此 傅君投劾謝簪

組揚州飽看垂楊綠等閒爲我過江來暫借僧房避塵俗與君小別曾幾時雲手爲翻雨手覆吾儕只合攤破書世事依然劫殘局不知許事食蛤蜊但得餘年友麋鹿明朝預約遊南郊半日偷閒看修竹只愁今夕巴人談地下東坡怪耳熟沅叔蜀人

雨中遊鶴林寺

夙聞鶴林景在雨不在晴誰能戴蓑笠冒雨爲山行朝踐遠公招喜斷簷間聲攢眉卽無酒已熟秋田稔座客索我詩我詩催始成忽然片雲起四山晦不明玉女罷洗頭盆水天河傾琅玕十萬竹憂憂鳴琮瑋膏歎米家山潑墨奇難名今來始解悟畫意從茲生沈酣日以久變幻態遂呈墓田好山光化鶴應有情

相傳南宮歿後爲寺伽藍寺左有古墓陳眉公碑稱卽南宮葬處 歸來解溼衣短榻茶煙橫料得李鄴侯煨芋談深更謂樹人是夕宿山中

周少樸寄眎試院酬和詩奉和吟詩秋葉黃韻五首錄一

八載臥江海病若辭林葉何以比愁心雲山一萬疊牀頭亦有酒薄醉不上頰囊中亦有詩薄吟不盈篋寧惟處燕幕直等巢蚊睫短髮無復長跛足不得捷朝來讀公詩心喜恍見獵羽毛信已倦尙一奮髯鬣已未除夕眎家人時老母尙病中

兒女團圓樂歲聲當杯一笑涕先零天憐艱苦增親壽病到膏肓乞藥靈今夕願借司命醉明年多寫度人經至誠金石終能格說與妻孥制淚聽

庚申正月九日里居不戒於火藏書焚盡詩以志痛并告海內

書鈔閣藏書外祖周季況先生得孫淵如嚴鐵橋諸老所校明臨宋本北堂書鈔以名其閣得自帶經堂福州陳氏堂名乾嘉諸老輩雜選施丹黃晚歲

苦鰥獨故事仍中郎甲午歲余舅氏雲將逝世外祖仍中郎仲宣故事藏書悉歸余薄宦二十年出入恆攜將儼居近廠肆京邸在後寓孫公園寓

目皆囊緜俸錢到手散久久書成倉經營上下屋辛苦東西讓雖無田二頃喜得琅嬛藏丁巳歲始購集賢街西老屋藏

書其中樞關潤州不復自隨何圖絳雲樓一夜招天殃羸秦毒再見文武道實傷有客爲我言此書殊不祥周先既賈

禍萬里幾投荒光緒初丁雨生中丞覲外祖藏書甚切外祖有不君亦坐嗜此踰證名利場爲君誦柳文能爲郁秦峯一語致觸丁忌上書殿劾罷官遣戍

賀君今吉昌收涕謝我客客未知我詳自從更憂患萬有畝空王明知一邱貉聚散理不常與其聚殲旃

孰若散四方所嗟三百年文獻湮莫彰平時慕遺山嘗慨野史亡私冀宦早成歸去羅典章結亭傍家術

著作青藜光今來付一炬此願云何償焚書除精本孤本外尤以順康至光宣十朝名人專集多至二千餘種皆闕掌故爲可惜竇龍負周先所負斯

文喪銘心總絕品合眼卻易忘作歌告君子何以解我腸

上巳日散原招同宗武伯臧飲真蒼厓上人秦淮修禊

佳節不易逢良儔日以少西江散原翁一見一回老那子與于皇想復同襟抱朝來尋水嬉林塘恣幽討

鍾山黯無言王氣掃未掃一篙一槩間都仍六朝臺同是不祥人湔祓恐難了姑爲排日歡坐對風景好

題几谷上人雁山飛錫圖

五年管領南北雁有屐不蠟嗟我頑大龍湫前千尺瀑夢裏五色紛奇觀前年私計再按部了卻公事窮

追攀罡風吹船不得渡坐失入手三神山心知猿鶴怨岑寂孰令人事成問關謝公不過斤竹嶺強詞聊

解慚心顏焦山老僧好事者水墨潑出千峯巒想當飛錫渡甌海一瓶一鉢隨身單此山南戒號晚出濛濛雁雨生夏寒雄如羣真跨獅象秀如列女驂龍鸞又如羽箭得猛士褰衣博帶朝千官奇峯拔地一百二各各變相開榛菅自從諾矩羅化後可有尊者藤蘿間上人宿覺有根性若見六祖應涕漣歸來好景恐遽失指爪狡獪神氣完五峯十記行篋有便當高臥遊汗漫

李五峯有雁山十記稱於時余曾刻其集

李宣龔

宜龔字拔可號觀樞福建閩縣人光緒甲午舉人官江蘇候補知府

石遺室詩話拔可少與噉谷爲文字骨肉爲詩共嗜后山以余所見則皆從事鄂渚後學荆公而酷似海藏者工於嗟歎所謂悽惋得江山助也近讀其少作始悉得力后山不亞於噉谷稍錄其哀噉谷贈陳公寬深閉諸首以見一斑其至者固不專在此願與世之賞音者共審之

焦山枕江閣同瀨尹丈夜坐

風江終日意難平不掩秋蟲入夜聲地盡偶容山突兀林深微露月崢嶸陸沈自古將誰罪息壤如今尙可盟汲水採薪吾亦慣甘從寂寞送餘生

東山夜歸示同舍諸子

遠火依微鼓角哀，獨攜夜色與徘徊。
風從北島排山入，月傍東籬出海來。
淺醉不辭寒作伴，孤行自喜意難回。
明朝更踏波濤去，側望蓬萊未可陪。

夜坐示貞壯並寄劍丞江南

眼中時事益紛紛，默坐相看我與君。
秋老葉聲時作雨，夜寒海氣易成雲。
窮愁強飲終難遣，異地狂歌不可聞。
千里映庵明月在，故應分照白鷗羣。

視金陵故居

胸中空嶢嶮，尺寸未藉手。
開窗納鍾山，江南是吾有。
區區邱壑戀，用意頗自負。
吳楚一蹉跎，花時隔杯酒。
得閒乃坐誤，亂至復誰咎。
惜哉魚鳥鄉，遂令豺虎守。
徒薪已無及，增竈不可狃。
九鼎方淪淵，破甑那回首。
側聞解兵令，其衷殆天誘。
刼灰待收拾，於汝亦云厚。
逕荒就蕪蔓，樹槁變衰醜。
意惟傾青溪，庶可滌塵垢。
嚴城夜再起，獨嘯誰與友。
蟲聲和月色，慰此循牆走。
懷歸恐無期，辟地寧可久。
何處覓高原，河清俟人壽。

爲吳劍泉觀察題鑑園圖

事業欲安說，溪邊柳成圍。
當時扣門人，百過亦已衰。
此園在城東，地偏故自奇。
世俗但貴耳，濁醪爭載窺。
那識賞寂寞，惟聞簧與絲。
我癯喜獨遊，扁舟弄漣漪。
拊檻一片雲，鍾山遠平籬。
花竹不迎拒，魚鳥無瑕疵。
豈惟客忘主，青溪吾所私。
中間共出處，就官淮之湄。
土瘠民力瘁，百無一設施。
鄂渚得再覲，征車方北馳。
歸塗望楚氛，微服鷓退飛。
陵谷事已改，變遷到茅茨。
相逢忽攬卷，不收十年悲。
鄭記似柳州，平淡乃過之。

夙忝文字飲可能欠一詩巷南數椽屋有枝亦無依儻免熠燿畏惛惛還當歸芳草結忠信吾言茲在茲
病中別貞壯

書來幸相存起懦發愧赧形骸雖慙隔肝肺要可盟平生嶽崎人踏浪未嫌遠意行忘所適憂子目力短
幽齋夙相依夜語燈火伴人物忒臧否幾輩遭不滿作詩乃餘事此詣世亦罕浮埃掃羣籍俊語諷不斷
寫成將一葦謂我固能辨謀篇戒色莊馭句取行簡持此質鄭陳知言謝不敏吾詩久不作志業付荒誕
縮手閱過船萬辱忍一飯韓非著說難身世託孤憤宋王一居州挽士那容緩寒砧上吳霜滄江入歲晚
子歸計豈非畏此自厓返病起復懷人不如終偃蹇

昌平明陵道中紅葉特盛

羣龍佳氣鬱難揚可欲終堪殉所藏多事丹青勞力役空教樵牧管興亡峯巒已帶邊頭雪柿榭猶酣夜
半霜那識橋山松檜美爭誇宮錦裏宮牆

贈陳公寬

征衫過我意匆匆短榻殘燈語易終故國如塵成小住江船有夢更須東好憑羨鳥青雲志取慰噴鳥白
髮翁臨別不留吾豈恕家人歡望固相同

深閉

客處荒城歲月增此身未改舊峻嶒不寐始覺多餘暇深閉猶能遠所憎研水豈分寒裏暖瓶花亦解佛

中乘冥然端坐窮羣態杞柳杯捲各有稜

醉山招遊南樓病足未赴時立村有襄陽之行文東亦將返吳下矣

幽人去訪鹿門煙遊子言歸第二泉此會定知成索寞好懷那更重流連娑娑有與吾非淺犖确無端病
不便賴有一川風月在爲君夜起扣孤舷

子夜聞歌興盡而返

端坐真堪擬陸沈小車聊遣散幽襟月寒水影微妨路風遠歌聲細出林物外寡歡成獨往人間可語算
知音歸來百念仍消歇祇有霜槩對苦吟

哀噉谷

我生寡所歡往往歎氣類寧知哭死眼遽乃及晚翠平時略細行未盡可人意遂令授命日四海謗猶沸
丘山挽不前毫末豈所計狂藥眩舉國覺痛尙復醉欲迴非爾力搆釁俱取忌肝腦所不吝天日有無貳
顧或引之去感語動涕泗小臣自恐闕君難安可棄衣冠赴東市嫉惡猶裂背似憐黃鳥章臨終徒惴惴
吾子有今日夙願百已遂當賀更以弔自反覺無謂願收聲徹天願忍徹泉淚敢以朋友私辱君死君義
寒風今九月歸骨返郊次孤罄泣淮水大阮愴山寺誤聞穎兒歌恐傷侍中志行常謀速朽種梓待成器

長台關寄太夷丈

楚山連峯遮不斷淮流東去何時返北風不哀遠行人殘雪猶明望歸眼幾日神州事更新門前江水老

詩人平生難遇垂虹興一舸還期乞此身

同默園夜談

雨聲似鼉峯連夜不逆耳平生懸一榻千里待臥起尋思少時事歷歷猶可紀堂空楊震鱣巷散承宮豕
隔牆轢釜人惡客爭染指問貧作何味糠覈未容鄙鑑亭一泓碧面目識閩士他年會當還此水或不恥
主人奮刀筆夜動輒自喜子非鄙生徒儒術竟奚恃桂林山水窟得句定累紙詩成勤寄吾世變休撫髀

徐州道中

車行追日落淮泗失回顧亂山隱塵埃野水送飛渡連村缺人力舍柳無他樹去年雪苦晚一麥猶堪慮
道旁哺蔡饑船粟爭濡响勝衣已學乞姑息真汝誤展轉入徐州嚴塘鬱高怒秦越異肥瘠朱陳互嫁娶
當關森虎豹行李挾恐怖吟罷自推窗暝色沒雁鷺

秋夜宿海藏樓呈太夷丈

丈夫出處要行意猿鶴何心動相異盛年已惜付蹉跎到老端須養才思南荒不樂早歸來睥睨世間商
位置一日樓成海內知滿壁題詩附氣類銀鈎鐵畫作欄檻醉帖垂空寫奇字入門不見果下騮倏忽奔
車掩耳至由來懷抱不同俗鷗榭濠堂猶夢寐當前物態公莫失竹亞楓翻各斌媚山塘遠爲致雙枯手
植應堪資好事他時風雨聽龍吟記取高樓夜深味

得劍丞都中來書賦答并示貞壯

我詩愆約如積逋君書索詩如催租填膺萬感吐不盡落紙乃覺一字無兩年蹤跡比嵇阮酒罈茶肆知
吾徒君居幽勝絕人境俯仰嘉樹三百株閉門物色足高詠病中寄觀還起予春來攬鏡對婦鬢稍怪漸
與朋友疏途窮得意會有此舍此不樂宜何如子言世故思熟爛顧犯火宅爲嬉娛雲堂一頃耕不得此
役政坐飢所驅前宵叩戶月似水揖客出見舍中雖一庭蟲鳥語無恙却費猿鶴時相呼嗇翁老矣強一
出欲盡地力紓艱虞山川不寶秘密藏竊恐夜半負以趨時危百事等無及猶望落霞照桑榆袖間請奮
二三策拜官近親留緩圖我今懶散就棄置江南欲歸非故廬當年攜手看霜菊回首夢斷臺城蕪山陰
居士行亦去海上形影將誰俱却愁耿介駭流俗匹夫有罪懷瑾瑜紛紛牛李一轍耳出口不用相賢愚

宿獨流鎮夢桓弟

書來未道病堪驚猶信重陽可見兄豈料間關收汝骨只教入夢伴歸程蟲沙稍待原俱化螻蟻無親詎
有情單枕獨流何意聽此愁生死定兼并

龍沙公園贈餞別諸君

龍沙亦自有林塘乍動秋聲氣已蒼共倚高臺看廣漠不知落日嚮何鄉胡塵捲土來千騎江水淘愁注
一觴正是籌邊須好手漫教兒女笑沾裳

桃源感作

孤城曠野坐無謀富歲猶留菜色憂俗敵不妨施督責地偏何處得吹求北來民氣仍堪用東去河聲未

解愁徒手欲爲根本計固應度量不相侔

桃源城濠種柳數千株漫賦一首

越瘠秦肥兩是非繭絲保障一嬰兒民貧每易爭疆界力小猶思奮設施斗酒築塘聊自勞午陰蔭犢待何時區區詛祝關渠事留與公言告有司

乞病獲譴詩以解穢

兩年救死與扶傷獲退如聞赦一場厭與百僚同唯唯未能三月便皇皇期願自古關名德拳曲何堪律短長妙語解人終恨淺強將一障繫存亡

芝罘雜詩錄五

海濱稽歲入繭果號稱最東家葡萄醅待價勢益倍買田一頃足種樹十稔大是邦堪遨遊豈必念吳會蓬萊失左股已破鐵門限誰歸汶陽田此願無乃誕沈舟千帆側般鑿信不遠何日張吾軍國恥長在眼諸子詩作祟睡聲帶吟哦苦語困肺腑祇贏白髮多我病宵不眠無詩空嗟我小待窗紙白寒雞鳴相和爲吏卽爲吏放手便一試云胡持兩端置難欲就易王侯磊落士駸駸不受轡但令範馳驅行子所無事天空山若浮雪盡海逾碧北風賈餘勇驚浪已搖石來帆不能寸去鳥渺無迹覽此愴忘歸燈樓報將夕

劍承徙宅將爲京兆之行車埭角林木之盛無因再至書以寄慨

貧無置錐地坐擁十畝陰於理難久專遂令世故侵子有俯仰事幽憂固難禁顧我三年淹舍君將誰尋

一朝別園樹不聞鳥遺音細數石上苔寸步堪沉吟國中爭奪場謀夫方駸駸貌取失子羽難哉面同心
儻得把臂交豈必深入林

登天柱閣答乙竄丈

雪裏江城望未孤猶留殘照送平蕪山川坐落詩人手徙倚能收半壁圖未許大邦稱魯衛從知本志陋
曹吳罪言在篋今垂老夜半微聞覺痛無

過盟鷗榭有感寄太夷丈奉天

庭前病檜自蕭疎門外驚鷗不可呼飽聽江聲十年事來尋陳迹一篇無投荒坐惜人將老望魯空嗟道
已孤賴有勝天堅念在稍分肝膽與枝梧

蓋平丈自鄂來滬浴罷出遊賦贈一首

車中躡足促東歸相見纔收涕一揮豈有圍城羈玉貌還從雩舞試春衣所居薪木聞無恙手拓槃盂任
亂飛若問存亡凡楚事却愁無地說知非

感事

雕闌玉砌落人間夢裏春江去不還已戒金與辭北苑尙愁石榴銅南山君臣到死恩猶市婦孺憑高事
本難十日鑠金方代出漫隨虎豹上天關

訪公約臥病不出明日予去秣陵賦此爲別

行近溪光路向東鄰園閒掩竹千叢重尋短巷親高論
悄對虛堂作病翁好客但誇茶可飲說詩空笑餅
難充一城改盡新霜色賸與何人看晚紅

贈幾道丈

爬梳萬說欲探源善轍誰窺衆妙門可笑蚍蜉爭撼樹
無言桃李自成垣少年喜勝古如此國子爲文道
益尊鄭重城西一區宅歲寒山色與溫存

登小蓬萊戍未退不得入

十里秋原到眼明不因犖确廢山行愁看蜃氣連兵氣
愛聽松聲雜海聲躡武求仙俱妄念鬢絲禪榻兩
忘情吾儕未與人間事醉尉何勞問姓名

伯父郵寄丁香海棠數株新種都活賦呈一首

園花排日各先開北卉逾春始遠來急騎數程勞望歲
老懷垂眷過親栽稍看雨後嫣紅出頓覺風前暖
翠回待與遠階勤護惜明年花底覆深杯

題徐仲可天蘇閣圖

先生風味愛高眠烟雨南湖已可專老傍吳趨貪小隱
爭投越紵賦新篇短筇踏浪娛東野赤脚鷹門傲
玉川更與歲星談韻事傳柑歸記細君賢

倚伏

倚伏紛紛敗與成，閒看物態最分明。
籠禽得飽終思避，野蛤知時已亂鳴。
瘴海坐連千里勢，凍雷難壓半城驚。
多情春水貪何事，苦待曹瞞走後生。

寄觚齋湖上別業兼懷仁先侍御觚齋青溪有樓避地以來不歸者兩年矣

世事年來觚不觚，猶留風雨守菰蒲。
光黃有客能招隱，吳越相望比具區。
夢裏溪流繞腸胃，尊前湖影浸眉鬚。
徘徊一壑將安老，欲效臨川捨宅無。

贈貞壯

敵車奔走塵埃道，一書未成麥欲倒。
此言在耳已經年，重倚危欄送晴昊。
漪園風物殊可念，過雨海棠衣半縞。
舊遊趁酒不省錄，狼籍苔枝紛似掃。
北歸纔說已逡巡，燈火紅妝生懊惱。
治河三策空復上，徒手猶難障潢潦。
千官盡作室懸磬，救死惟思一簞犒。
粗材絳灌尙交疑，痛哭洛陽寧可保。
世味從來蘊五兵，蚯蚓於陵甘食槁。
閉門喜汝百無關，待抱添丁看花老。

吉林土們嶺車中看紅葉

土們紅葉天下勝，飲馬河西霜獨盛。
千林丹赭錦成圍，石轉峰迴通一徑。
初疑躑躅滿山隈，簇簇舞衣翻火陣。
又如野燒蔽空來，頰尾落霞帶餘燼。
出關所見乃有此，古蕩天平差足競。
忽然木杪豁江光，城郭人家生綠淨。
當門楓榭各紛披，盡與新妝鬪端正。
車行迤邐不嫌遲，喚作江南吾亦認。

夏口暑夜視文東病中遂偕至江畔小坐

岸樹彌天不動枝收燈園館欲施帷攜來苦熱猶如此歸去無眠定可知病骨那禁危坐共渴心直恐大江移廿年試數磯頭客忍死相看更幾時

病起示家人

化鶴微茫竟得歸病中龍性亦難違魂飄不識家何所眼定驚看柳合圍早信幽憂能作祟漫因迴念更增歎佯狂未死寧吾意留與人間閱是非

春盡遣懷

漫道春歸無處尋園林暗長價千金不經風雨連番劫那得池塘盡日陰牖下勞生成玩世車中物役卽安心詩家刻意終何補未抵行歌一往深

魏室吾師在野有直聲守梧二年以治績薦於朝行得御史臺矣爲忌者擠去歲晚臥病呻吟中篤念君國子時亦以引退就師海上得讀平時幕府草奏歎師之不遇而重爲天下惜也

諫草積盈尺平生殊爲人作郡偶出手機鋒等絕倫言責果有歸正氣可以伸摧奸何足論大義待敷陳誰知含光璞已遭近前瞋御屏撤書名拂衣就沉淪世論競憤懣歌辭吐清新君門如天高病榻勤相親一朝揭日月西風消庾塵事敗不可諱不遑終及身空有蔽賢羞奚傷卷懷仁

離合垂十年師友義不晦連宵語出處正色莫敢懈沾沾章句士器小易滿潰及門能有幾志節共磨淬病窗愛花枝妍語破細碎江魚與橘柚遠味雅見逮時艱卒掛眼一飯九嗟喟學道苦未墜投官思早退

毒口從擲揄用意固有在冥心懷獨往豈恤世議隘吾師秉忠貞此語不予貸歸歟有狂簡侍坐暫一快
聞南塘水榭落成寄墩谷

記從別席小盤桓院落逢花離立看春氣強將禪力勝詩情暫放客懷寬滄波不改東還意草閣應生五月寒塵眼新來摩欲倦往時容易說觀瀾

汾弟書催急歸五年留滯今且去楚矣

持此安歸意可傷出門負手楚天長寒江向晚波初碧病眼經旬葉盡黃閒味飽諳忘有我孤懷旋轉入思鄉披書却感居人語爲掃松篁待解裝

和董卿

握手依稀憶國門南歸牢落向江村蔣山別久雲猶在白下秋來水更喧往事上心空惹恨故交回首祇招魂年來生事尤堪笑起視吾蛇缶不存

韻坡已矣宗孟復有所繾綣而重違其家人之意詩以擴之

登車執手意徬徨便遣蹉跎恨更長感逝已枯終古淚屏居猶坐少年狂病來一洗絲篁耳贈子惟餘鐵石腸眼底洵洵天不厭直將彼美老何鄉

嵐山旅行風雨後櫻花狼籍悵然有作

東風吹雨太無端俄頃花開旋復殘酒倦傷春人易睡樓高近海晝多寒商艱屈抑知誰拯國論棼紜已

厭看尙恐多憂損懷抱百年記取一憑闌

法源寺懷叔嶠墩谷

樽前苟活數同遊坐久纔知子罷休客裏風光殊可念衰時人物本難留沈寃白日君門靜恨淚春風渭水流痛定若思蠹賈策也應功罪訟從頭

九日擬遊武昌西山雨甚不果

未到西山已足誇孰知秋序變天涯雨聲坐使人留楚霜意猶慳菊作花眼底江湖添浩蕩酒邊肝肺長槎枒登高能賦尋常事千載居然屬孟嘉

題林迪臣太守畫像

三年謁蹶赴時艱一臥終傷枉肺肝舉國共知無黨政滿城爭泣不欺官堂堂泉壤人長在寂寂孤山歲已殘冥想平生深可味霜湖風晚白鬢寒

呈濤園祖舅

生世苦恨晚聞見不足尊過江依荆南朝夕勤討論共硯密州塔相攜意尤溫爾時比晁張酬唱列坡門年少負盛氣謂溺可手援攀關犯虎豹戴盆終銜寃徘徊汝潁間囚鳥隻影存何方逐東野空悲失逢原士風挫不振仰看日車翻

信州寶井堂大母手所額兩家傳故事視此井闌石旌旂迎改鎮枯朽再蒙澤根本計農桑利病究郡國

江湖衣帶水談笑可却敵緬追范慶州異代無慙色又聞黔中行躬畫治邊策一編同荷戈篋書盈盾墨
外臣輸肝膽事去空腕扼惟餘蜀錦棠新陰連舊植

餘皇雖屢燬肯殉未爲辱東南擁互保功罪猶相贖自從綱紀墜輕重特舉足遂令踏浪兒反覆覲大欲
交綏馳一使問道踵相屬坐收兩國金曾不費寸鏃廉恥道已喪隱患在心腹當年謀匡攘豈意遺此毒
至今咎左袒得謗尙如屋狂言公莫呵不招請抉目

海濱棲遺老歲暮將安歸赫赫中興頌胡然歌式微藏舟徒夜壑狎鷗任忘機避地託借隱閒吟懷五噫
淵明詠荆軻報韓良自期身世無乃似入山守東籬吾亦愧俯仰傲霜附孫枝舉酒問甲子詩中存義熙
龍性浩不改一門鸞鶴姿坐待天下清未知昨日非

贈高夢旦丈

泥沙翳珠玉糠粃擺笏斗衆人惜其棄君子自謂取著述數十年陳編未離手熟思竟何得書出誦萬口
向來濟時彥行藏見所守獨立洵佳人遺世却弗受似迂亦非迂吾道在不苟庭闈溫如春婦子皆可友
稍嫌近囂塵日月隘戶牖勤當辦一廩爲君榜崇有君自鐫一印
文曰崇有

同穀之毅夫壽丞登天平山看紅葉

俯觀松與楓獨醒雜衆醉吟眸一迴透酒面反遮避茲遊雖未深所收固已遽方知林壑美天巧覲位置
有石皆能峯無雲不藏寺交陰蒼玉珮倒影赤霞帔貪看秋色好寧恐雨勢至亭商愛晚坐閑閉兼山闕

孤抱儻侻侻何物緣非放棄斜照不吾欺繁霜耀同志

哀次女昭質

平生木石腸臨老戀兒女爾姊有遠行一力欲藉汝汝性得吾偏褊衷非所許秉身雖云懦好學莫能禦
如何遭短折病久卒難愈徙癡事無及內熱空自煮牀稜摸欲穿鼻息斷猶數傷哉不出戶一出卽死所
廿年櫝中珠掩此和淚土雨鍾會當晴風柯向誰語

汝病人豈知吾愁翻見疑相牽遊西山猶不謂汝危歸視計已迫鑊砭遂雜施以死將誰懟活我亦此醫
香花昇一棺瞑目甘息機毫髮不受垢無煩盥以匱但恨願未了何妨待吾衰恩愛若是妄悲憂寧自欺
達理不可喻魂氣終安之咫尺果從我虹橋非路歧

園飲呈太夷丈并示子言梅泉伯屏呂塵諸君

養花自成歡枯槁欲有味循廊千百繞頓忘老將至吾園盛芳菲風雨催春事辛夷最侷儻卓立肯顛頽
丁香工含愁海棠慳破睡自餘無足數斂色如相避招要來諸賢酌酹不遐棄雖爲寂寞賞却引無涯思
毋爲太區別轉恐隘氣類一室勤掃除何嘗非攬轡但令樽有酒豈必飲文字物我誰能齊庶幾漆園吏
由靈峯至靈巖遂遊大龍湫沿路有作

空山本無塵萬竹自掃灑持茲一念垢乞與瓶鉢瀉昨遊宿靈峯蓋頂茅一把暗泉細繞露客寐不遑假
晨興逝安往決去終難捨徘徊石橋側商略欲結社數峯如束筍筆筆堪摹寫回看寄榻處棲鶻未肯下

看山宜閒行不在寺與洞爲人作近玩有目反難縱靈巖視靈峯宅幽稍磬控屏霞屢開闔列嶂密無縫
周遮疑設伏植立儼排衆直將天柱重屈比仇池供何人巧位置造化但好弄真常探龍湫狂想一帆名峯

龍湫已自奇豈待風雨至破空碎懸玉百丈恣飄墜谷吞喧始斂石翻濺逾沸雖淹虹日彩盡洩草木氣
此泉旣百村一脈萌千利苟能盡其用掣電可立致潔身徒好修洗耳亦細事要令天下白不與世相棄

挽高子益丈

殘月暉暉北戴河同光共影夜深過苦言已信慳來日病色猶堪挹逝波彥國豈期天赦促欒城再聽雨
聲多惟餘卅載師門感風義留看媿媿阿

爲蔣孟蘋題密均樓圖

弁陽蠟屐世難求六葦今爲子所收始信詩才齊石帚不因笛譜隘蒙州一縑未許論殘唾百尺真堪占
上頭寄語樓成須告我茗溪深處欲淹留

答陳子言見訪不遇獨觀園中辛夷之作

淞西小園春日遲辛夷先開爭炫枝過門共數白石塔千騎緩轡萬肯移狂風急雨空爾橫玉立不受相
瑕疵當前有花不自賞留與嘉客來尋窺詩成寄我改復竄滿紙已黑心猶疑我因君詩感物役暮歸對
花彌歎咨夜光不用恥投暗無月猶得皎人衣

壬戌九月石遺丈自閩避地來滬同爲宜興之遊從錫山登舟凡三宿乃達龍池善卷二寺寒風
陡作丈老矣不能復覽縣東諸山還途賦呈

日短看山如不及恐因陽羨拋無錫梅園猶得辨湖光萬頃堂前已曛黑夜帆穿汎西復西張渚登程意
殊豁便尋南礪到龍池滿寺秋陰圍寂歷松低被野不妨平竹矯翻空偏爾直徘徊危磴聽潺湲三兩霜
楓堪小立暝煙誤認國山過不見穹碑餘瓦甃善卷古洞在何許絕頂攀躋耗筋力乾洞仰笑淳于天水
洞出哇於陵食一洞騎山背兩泉洞後泱流洞前激駢脅雖深可逼觀尹邢避面幾相失手却山僧秉炬
隨明知有路誰曾入犯寒遣興甫及此茶鐺忽助溪颺發向來作健君所能擁被胡爲氣先奪他州無此
贊公房歸權莫忘水精域

陰雨

陰雨成秋晦端倪未敢窺虛舟能受觸壞木已無枝一死寧言殉孤衷要不欺向來君國事反掌有安危
庚子八月夏口感事

風雨江聲裏孤燈落楚鄉妻孥隨權去枕簟入秋涼喜亂終輕已殘民劇可傷誰憐孤士感拭眼對蒼茫
石遺丈以木庵集見寄予時亦方爲噉谷刻晚翠軒遺詩作此奉答

江上五年別燈前三百篇勞生殊未已論世此爲賢感逝渾無淚攜家仗有田書成想歸去霜橘不論錢

杭州雨中

滄江一夜雨吳越頓生寒客路未嫌遠征衣微覺單欲搜庭實志言訪考工官縮酒非包買徵求意未安
信陽道中

吳楚遊將倦栖栖更汝墳饑寒無上策烏獸欲同羣歲惡憂行役民訛費解紛平生高尚志至此漫區分
淨名寺

水住雲猶起峰包徑忽微客心知有異人境變全非鳥語邀深入蟲聲塞潰圍蒼蒼鐵城障持是欲安歸
能仁寺散步

勝境皆離俗誰分第幾重好山空有寺連日不聞鐘水活宜編竹峯欹半偃松此遊真畫裏欲畫更何從
大谿遇雨

犖确行看盡呼舟泝大谿水生孤槩急山入短篷低雨店蚊爭飽風篔簹並棲獨留詩句健泚筆尙能題
贈散原丈

東野高寒未是窮斜川况有老坡風卅年負謗關人望萬口言詩掩此翁入夜星辰應繞座平居節義自
稱雄多情誰及青溪水長照樽前菊與楓

題齋翁林溪精舍

誅茅縛竹費經營壓瓦琅峯翠欲傾江入倒懸三峽勢鶴鳴時作九皋聲開山筆縷規殊遠投老菟裘制
更精可似穰侯憎客子到門車馬便須驚

題陳藍洲先生湖山佳處卷子

牧民亦已勤投老事耕築遺愛楚江深閒情湖水綠憶昔客錢塘聞名慕高躅遊君舊遊處有畫皆堪讀
當時頗自珍落筆不輕屬甘從官長罵肯受相逼促茲圖雖寫梅妙帶陂與麓歸雲無定鄉得住便安宿
叔通今斜川喜尙亦絕俗幸梅顏其軒張壁過百軸持此配寒泉道豈遜秋菊乃知善繼者不諱嗜所獨
高穎生丈屬題重修環翠樓圖久不能就適丈避地來滬行又將歸撫時感歎易以斯作

前詩缺未報終思落君齋誰期避兵人路旁謀烏棲握手話世變袖圖命新題短紙有滄桑里閭懸可知
卒歲幸自保久留將焉持悔禍勢難俟言當拚一歸就令付不測猶賢立無錐爲權兩害間取輕未爲非
還君舊山光倚欄同安危昔年猶是樓書聲却賊圍守死式乃祖瓦全或在斯我詩似逐客能無疑我爲

挽乙酉丈

病榻長年坐欲穿自參世法入深禪形骸未害荆公垢笑語猶含洛下妍肯信魯戈難返日空隨汾鼎夢
攀天九原縱有堂堂在祇恐斯文已失傳

遊鄧尉

水宿微嫌夜榜喧曉行纔及寺鐘聞湖光收暖將成雨梅氣盤空半作雲到處林樾皆入勝避人猿鶴可
同羣道根終淺無緣住歸及城中理放紛

送又點丈赴天津

郡齋十日寒江鄉連宵雨纔聞南歸客又逼北行苦簡書豈不畏慷慨獨近古奮然被短褐一往氣無伍
山居病足繭此去或猶愈但懷吾黨士有過孰能補川塗罷遠送義豈靳江泝舟輕意氣重人散憂患聚
高風渡河津清淚溢肺腑嗟予奔走身江海共鱗羽相見日固多政恐非吾土

潤州逢義門小聚旬日並送之官嶺南

揚州館裏丁香樹認熟相從鄰舍郎幾度卸車同一夢宣南春盡雨鳴廊
夜久聞歌意覺悲病餘逢雨睡相宜風懷未老誰堪用各向燈前有所思
白浪如山送我歸嬋娟故舊與心違眼前還過焦南路祇欠相攜到翠微
潮陽海氣吾能說荔子風光子奈何此去莫爲瀧吏笑要將懷抱擬東坡

夜宿鄭家樓

鄭家樓外晚經過萬竅風鳴一枕波知是昔年行水地起看畫壁認黃河
夜泊三牖

歸舟纔信一身輕夜永霜高夢不成底事多情寒鼓角遠過三牖送人行
出都別映庵

老至逢春暗自驚更堪啼鳥鬪新聲風光未與潛夫事不待花時已出城

飲海藏樓遇李審言賦示二首

樓健秋高酒意勤詩人猛士各能軍
義皇儔侶無多了祇有黃花可與羣
看菊奚須道強同階前離立受西風
若將俯仰論身世一隘何堪更不恭

金陵視伯嚴丈并訪鑑泉觀察不遇

一病能教萬慮空獨行猶作百夫雄
穿城繞竹知誰見只有鍾山與長翁
青溪鷗鷺散無蹤放櫂臨流意亦慵
識而吳園數株柳真成未死復相逢

海濱口占

鬱熱城中火始然
竭來海濱暍風煙不須更待秋
前雨但聽驚濤已自眠

金陵晤仲炤卽爲其題雙松圖

羨君解避人間熱歸就松陰讀父書
不見干霄翔矯翼尙存偃蓋蔭游魚
槃槃閱世都如此謾謾吟風足
起予遺直料應傷幸免刻痕留證斧斤餘

辛亥之變松爲駐兵所伐枯其一枝鋸齒尙在

遊碧雲寺

扶病能來獨倚闌寺門一步一盤桓
松聲自養山中靜石氣難消雪後寒
斷塔仰空猶射日古泉入定不生湍
翠微佳處還多少留待廻車取次看

與宗孟夜談

長孺真成老秃翁寬饒依舊猛如風
夜泉共試頭綱餅淄澠何須問異同

哀陳師曾

義甯父子皆獨清槐堂不官足代耕江南大范相士能納女館君稱舅甥荀龍頭角各崢嶸亦惟元方可
爲兄擔簪盤髻遊東溟學成恥隨雞鶩爭蟠胸邱壑手縱橫石溪石濤笑且驚況復能詩早有聲目中熟
睹無彌明金石刻畫技尤精力追太末及吳興意將挾此驕公卿黃金堆床筆不停孰知遭喪悲弗勝奔
慰老父來兼程須臾袒括從母行庸醫誤人性命輕彌天戢棺夜冥冥鍾山青溪影弔形間闌縈携孤
負誰云哭死非爲生遺蹤永慶風露零白頭何堪鍾此情扶將先使出愁城長鑣託命徐更營人生在世
開闔瑩江湖聚散真浮萍吾有四松相對青拂拭寶之同韓陵

挽陳伯弢

半生犢鼻褌隨處皆倒屣自從困假寐手板百僚底文章有何神妍醜等倚市未如騁滑稽談詭猶可喜
子雖武陵人世變逼坐視改之依稼軒無術救鄉里遂令鬼擲揄窮乏到沒齒騷魂招不歸楚些空滿紙
殘年望添丁宜有果羸似回思秦淮歉覆水亦不起

康有爲

有爲原名祖詒字長素號更生廣東南海人光緒乙未進士官工部主事

君士但丁有遺殿戶牖尙存屹然高十丈其製摩色金盤甚麗多其遺製吾曾購得之

君士但丁帝雄姿不可方丹青有遺殿戶牖半頽牆三國歸靈統東都關喬皇金盤摩色麗摩撫起蒼涼

那釐利在錫蘭山顛六千尺開大原有湖多花不暑風景佳絕當爲南洋諸島最勝處

楞伽絕頂六千尺罨畫明湖翠壁開繁柳繁花漏園路不寒不暑好樓臺

印音呼錫
楞伽

錫蘭再訪佛跡數處其塔殿最莊嚴者皆千年物非佛跡也自晏那拉積布拉外楞伽真跡近在

歐林布二十里者迦利膩圓塔頗大周廊二百柱天已暮燃燈擲花佛前塔前有菩提樹僧摘

葉相贈

圓塔嵯峨迦利膩周廊繞徧摘菩提此是楞伽說心處道場悄悄佛燈凄

耶路薩冷觀猶太人哭所羅門城壁男婦百數日午憑城淚下如糜誠萬國所無也惟有教有識

故感人深遠吾念故國輒爲愴然賦凡百一韻

崇壁嚴屹屹圍山上摩天巨石大盈丈瑩滑工何妍築者所羅門於今三千年城下聚男婦號哭聲咽闐
日午有數人曲卷肩駢連憑壁立而啼涕淚湧如泉慘氣上九霄悲聲下九淵始疑沿具文拭淚知誠懸
電氣互傳載真哀發中宣一人向隅泣不樂滿堂緣借問猶太亡事遠難哀憐萬國有興廢遺民同銜冤
譬如父母喪痛深限年旬豈有遠古朝臨哭旦夕酸羅馬後起強第度揚其鞭雖殺五十萬流血染城闐
當時嚴上帝清廟金碧鮮我來瞻遺殿華嚴猶目前珍寶移羅馬痛心亦難諉正當吾漢時渺茫何足云

吾國二千載亡國破京頻劉石亂中華洛陽慘風雲侯景圍臺城一切文物焚耶律繫重貴雅樂遂不聞
聲至宋徽欽汴京虜君民豈無思古情頗感騷人魂或作懷古詩亦傳哀弔文未有憑城哭至誠逮野人
婦嬰同灑淚千載慟遺民吾跡徧萬國奇駭何感因答言祖摩西奉天創業勤艱苦出埃及轉徙紅海濱
帝降西奈山特眷吾家春十二以色列奄有佐頓川大關所羅門兩王尤殊助拓邊大馬色築廟耶路顛
武功與文德焜耀紅海濱餘波躍耶回大地徧遵循人種我最貴天孫我最親豈意滅亡後蹂躪最慘辛
羅馬與薩遜蹈藉久紛紜英暴當中世俄虐今尙繁遺種八百萬飄蕩大地魂有家而無國處處逐辱艱
被虐誰爲護蒙冤誰爲伸傳言上帝愛我呼彼充瑣窮途無控訴憑城號吾先言罷又再啼四壁啼益喧
哀哀不忍聞吾亦爲垂漣亡國人皆恨惟汝有教賢他國不知愁同化久忘峯汝誠文明民文明成障愆
區區此遺黎艱苦抱守堅雖然猶太教今猶立世間吾游墨西哥文字皆不傳英哲與圖器泯滅咸無存
讀學皆班文性俗忘祖孫豈比汝猶太能哭尙知原哀哀念遠祖仁孝無比援它日買故國獨立可復完
先眺必後笑物理固循環吾哀猶太人吾回睨中原四萬萬靈胄神明自義軒唐虞啟大父禹湯文武聯
孔聖寔文王制作大禮尊聖哲妙心靈圖器文史篇後生坐受之枕莊忘其源如胎育佳兒如釀蘊良醇
我形胡自來我動胡自遷我識與我神明覺胡爲元喜怒胡自起哀樂胡所偏我詠歌舞蹈我飲食文言
一一英哲人化我同周旋忘之我坐忘悟之大覺圓一往情與深思古吾翻翻莊周夢化蝶吾寔化國魂
若其國竟殤哀慟不知端凡亡非我亡騎士托古詮吾未免爲人多情猶爲牽吾爲有國故身家頻棄捐

哭弟哀友生柴市埋冤雲哭墓已不獲先骸掘三墳十死亡海外讒侮百險煎受詔久無功纏身萬苦難
十載連亡人拂逆痛心肝我本澹蕩人方外樂談玄胡事預人國誤爲不忍纏今既荷擔之重遠難釋肩
地獄我甘入爲救生民難受苦固所甘忍之復忍焉久忍終難受去將舍旃浩蕩諸天游懽喜作散仙
天外不能出大地不能捐國籍不能去六鑿不能穿猶是中國人臨睨舊鄉園睚眦涕被席耿耿傷我神
願告愛國者猶太是何人

卓孝復

孝復字芝南號巴園福建閩縣人光緒乙未進士官湖南按察使

石遺室詩話芝南罕作詩而出筆老成句如送鶴亭之官溫州云莫對新亭揮老淚偏從雁宕
隱吟身答王完巢云淮海冬深艱得雪吳淞江好苦無山輓嚴幾道云掾國苦心寧徇俗著書
弘旨類談玄皆見用意壽張薑齋云洞庭山水天下奇壁間往往得君詩蓋君與薑齋先後守

岳州也

送林健齋登岱

老得山水樂斯游亦壯哉豈知傷心人忍淚談劫灰廿年官翰林乃躋御史臺累疏陳闕事天聽卒難回

一麾出滇池僕痛馬虺虺所至有賢聲帝始惜其才節旄歷中外登爲廊廟材引之實密勿又啓同列猜城狐恣憑凌徒黨護其魁方正不容瓦釜驚鳴雷竊粟方自嘲君轉倉場侍郎欲去且徘徊鼎湖天地變陰靈掃不開邸第連西園所求在貨財乃成婦人仁錯鑄留禍胎維新皮毛耳騷然徧九垓名義雖可假蓄亂實根芟神州嗟陸沈此老心彌哀破涕尋禹穴來訪孤山梅時方覽越中山水歸東欲陟泰岱招呼碧霞來冥鴻意何適萬里空塵埃

寄沈東綠杭州兼呈濤園

東風吹柳枝江干長新綠柳枝解留人又來此託足江湖如奔馬龜赭力難束舟行多風波欲渡仍躑躅河豚味雖美嗜之慎去毒世事甯足論且醉杯中醪我醉君復歌莫唱斷腸曲

寄鄭蘇龕同年

君隱吳淞我薊州十年書札未通郵浮休亂世成孤往乖隔殘生共百憂曾讓大名出頭地壬午同榜君領解獨留元氣護高樓君築樓滬濱名曰海藏櫻花時節村醅熟待買春江訪戴舟

步岳除夕感懷見寄答和元韻

守歲何知夜向闌魯戈駐景事原難遙驚烽火連窮谷幸借風光護小欄三度見梅嗟久客一冬無雪過輕寒故人遠遺闔江味笑向齋廚檢食單

徐園觀盆梅

臘盡不見雪，節候過九九。徐園好事人，探梅亦無有。登堂質主人，假蹇不任咎。云我家江南，香雪萃淵藪。春從驛使來，遙致猶反手。一盞置一株，冷豔盈戶牖。高者僅尺餘，枝幹不嫌醜。圃人得花權，折條工解剖。盤鬱故險絕，態狀隨所取。或小類侏儒，或瘦同邨叟。如摹史籀書，枝亞似蝌蚪。如觀古樂器，中空等瓦缶。士女快新獲，問客慰意否。絕豔照衰顏，落拓從人後。猶憶孤山中，處士得佳耦。皎皎抱冬心，閱盡榆與柳。覓哉放鶴亭，清風垂不朽。老守偶清游，林下時攜酒。暗香疏影間，補種約半畝。比來避地人，羈絆閱歲久。所事未免俗，對花嗟塵垢。風景眼中非，愴然一回首。

題林畏廬首安耆年會圖

釣龍臺畔與君游，四十年來各白頭。此會那堪興俯仰，橫流未忍計沈浮。樽前腰腳誰稱健，圖裏園林總覺秋。偷得閒身在人海，西風謾謾倚高樓。

送沈東綠奉天

才名冊載拙身謀，東去閒關續宦游。自有車茵容一醉，不消時抱酒錢愁。好處宜從反覆看，清標亮節照琅玕。滿天風雪遼陽道，可有梅花伴歲寒。身世悠悠電泡過，此行聊爾慰蹉跎。豨膏無濟方輪轉，况歷關山碓礪多。

胡思敬

思敬字瘦唐江西新昌人光緒乙未進士官監察御史

上巳日同人招集天寧寺晚飲石遺寓齋

陳侯晚歲游京國笑拂詩龕作寄廬
騁說故應傾稷下論才直欲到黃初
攢眉入社愁無酒叉手閉門貪著書
坐誤芳辰花事去夕陽古寺獨迴車

題吳吉士秋林讀書圖

數皇中興盛文彥京朝學派凡三變
壽陽白髮稱老師內殿傳經受殊眷
六書絕業尊二徐淳熙槧本會親見
曾倣百戰收江寧然燭軍門讀文選
一時幕客俱應劉疲驟馱書一卷門才獨數潘
尙書金石摩抄自矜炫白眼高歌滂喜齋
殘磚斷瓦搜羅遍條忽承平四十年
廣陵一曲隨蒼煙絕域方言滿都市曹郎奮臂爭版權
太玄奇書覆醬餗胡兒碧眼登經筵漢廷公卿草閒起笑溺儒冠罵儒士
東方誦書廿萬言不肯低頭拾青紫執戟金門長苦飢侏儒飽食何曾死
南州舊交吳翰林跌宕縱橫富文史
搗來示我秋林圖一卷行吟雜悲喜
鄱湖水漲匡山高鄉夢遙遙幾千里

送陶谷太守之官

故人天際去六月似深秋一路猿聲苦孤吟上峽舟江流吞白帝謫宦擬黃州君若懷京國詩宜別集收
魯谿訪魏斯逸

春風二月雨絲斜來訪南州孺子家亂後相逢宜皂帽山中飯客祇胡麻營巢苦恨身如燕避地還疑國
在蝸車到柴門徵不起雲深何處覓丹砂

庚子紀事詩錄七首

四字紅旛夜集梟春燈謎語雜歌謠可憐一炬成焦土使相登樓拜火妖
捷書一夕達甘泉六貴同朝拜賀箋欲倚淮東平寇難高駢但解媚神仙
樂洲燈影幻妖烽牀上癡豬欲化龍十族牽連同日死大將軍是酒家傭
十萬纏腰上玉河沙棠載使盪秋波嗷嗷野哭多新鬼雍露聲中發豔歌
宗伯辭官早積疑當年名在黨人碑荒陵暮雨昌平道一騎從亡哭路歧
朱家結客散黃金酒後論交一片心末路慘遭文字禍空飲一劍作龍吟
擊筑悲歌酒未銷尊前淚涕聽童謠百年文物消沈盡相宅淒涼賣賜貂

林開謩

開募字貽書號夷倣福建長樂人光緒乙未進士官江西提學使

題漳浦黃忠端公畫松長卷

長城自壞空投幘
萋叔三年血猶碧
生平餘事及丹青
屹若銀鉤森鐵畫
素縑流傳三百載
鶴幹虬枝生面闕
想見雲煙揮灑時
肝肺槎枒心鐵石
取義成仁公已矣
曠代而還留手澤
楊侯生長公故鄉
私淑瓣香珍拱壁
運會復丁陽九窮
後之視今今視昔
我亦西臺晞髮人
坐覺松風動虛壁

酬陳散原

青溪卅載侶煙霞
宗派西江數大家
黨綱已鑿元祐石
隱淪還種義熙花
投身蓮社堪終老
留眼桑田未有涯
新歲辱承鐘呂貺
酬君細響愧箏琶

寄馮蒿庵

詩集編年紀義熙
平生私淑是吾師
八公草木銷兵甲
九老丹青畫履綦
弟畜幸隨先進後
黎遺同待太平時
活人無算天應眷
明珠光兆夢熊羆

舟行望天柱峯懷乙庵并呈散原

連朝寒雨壓江城
天柱峯頭忽放晴
傑閣高談成昨夢
危樓歸隱證前身
劇憐老鶴無衰貌
且與閒鷗續舊盟
此去栖霞招正字
故人相望淚縱橫

傅增湘

增湘字沅叔四川江安人光緒乙未進士官教育部總長

別天成寺

殘春送我出天成三宿浮屠尙有情別後難爲今夕夢再來誰識舊題名庭花何意遲遲發野鳥如呼緩
緩行有約青山終不負買田二頃待歸耕

西甘澗

步出西甘澗垂松綠過橋煙蘿留隱客雲葉壓歸樵僧老餘悲恹泉幽破寂寥中盤初入徑宿黛似相招
由田家峪至白峪寺山勢平秀茅舍錯落春耕方急果樹著花如錦宦成歸隱者多於此買田焉
盤阿栖隱處幽絕是東山春事田園樂詩情水石閒鐘疎知寺遠松老待雲還聞有投簪客編茅此掩關
登雲罩寺舍利塔

大行走薊野其陽曰田盤萬年孕奇秀千仞凌蒼顏五峯插霄漢挂月尤巒岼古寺出青杪隱隱流潁丹
塔影塞外落鈴聲天半寒我昨渡臨洵縹緲堆螺鬢緣道出山麓仰面窺霜壇真疑住真仙勝絕非人寰
山靈夜詔我幽夢猶未闌破曉理策行亭午披禪關人出鳥道上路轉千峯端何時開雲棧凌空鳴玉鑾

孤松挾石起作勢如飛鸞一鐘懸樹末古鏞長編爛意興旣飄發腰脚初忘艱西望山西一笑向長安
東觀東海東手拂珊瑚竿前擁薊門樹後指古白檀萬象紛來赴千里歸憑欄碧嶂挂天紳羅列如朝班
翠屏與紫蓋一一蛟螭蟠連岑恂詭到此皆幽閑似畏中峯嚴俯貼不敢干青天何蕩蕩大地何漫漫
起陸爭龍蛇竄穴驚狸獾長城出遼寒疊堞無堅完落落悲風來猶帶秦民酸世變亦何已急景如飛湍
嗟余墜世網束縛慙纓冠修名苦不立憂患相循環如以一坏土障彼千丈瀾如以單極航轉彼百尺磐
年時旣非舊智力復苦孱猿鳥失本性置之籠檻閒一旦見林壑欣然天地寬勝遊豈易得幽賞天所慳
平生幾兩屐到處窮躋攀憶昔來茲寺弟昆尋清歡相引上絕頂撫松一盤桓九原不可作感逝摧心肝
摩壁尋舊題墨黯字未剗伯子獨深喟早見霜毛斑季子塔上書石繡苔花乾青山久相待孤雲誰與還
濡筆續前題大書恣深刊山石有時泐結想真愚頑自寫歌嘯樂寧恤招譏彈何當謝塵駕長伴山僧閒
春花發古豔澗水鳴幽潺天風振衣袂更飽煙霞餐如何輕揮手好景讓人看

鮑家橋觀飛來峯

急雨新收翠掃空鮑橋流水照芙蓉行人未識黃山面先見飛來第一峰

橋南一峯特秀上人云自黃山飛來者

宿松谷庵簡孟嘉丈

五龍挾水爭雙澗萬竹留雲宿一庵十里入山心已醉與君對榻飲烟嵐

湯池感牧翁事戲題兩絕

朱砂紫石接仙壇度世登真亦未難藥谷買廬何日遂知公猶愛進賢冠
洛罷湯池怯嫩寒玉真素女感無端他年試手清冷水贏得佳人雪涕看

自湯口出山追述游蹤奉簡張七丈孟嘉五首之一

平生腰脚健到此略從容裂石穿鰲腹緣雲絕鳥蹤奇情生四海微命寄孤筇
夜伴維摩榻驚心說九龍

入黃山四海謂黃山中四海也

謝公嶺

靈區晚出駕天台木人歸異境開山水清暉寧久闕謝公去後杜公來
龍湫石壁有番言來三字

雨後觀小龍湫

老龍超妙疑入神小龍壯悍殊絕倫一朝欲奪老龍席驚起屏霞樓上人
小龍本住藏珠谷西北峯巒仰天束滄溟咫尺寧澹忘森森鱗甲蟠陰腹憶昔命侶來靈湫
霏珠屑玉姿輕柔似收江海飛揚氣聊伴羈人澹宕游無端照夜流霆擊千鈞弩發天門裂
洪焱怒挾山虎行狂霖抉破潛蛟穴斯時小龍忽奔起礪兵倒瀉天河水劈開翠峽肆
騫騰真仙惶駭妖魍喜峩峩天柱何尊雄萬撼不動生雷風坐看覆雨翻雲手小奏掀天揭地功
屏霞微寐情悽橫身欲睨元黃戰入耳猶爲三日聳仰頭更苦雙眸眩吁嗟龍兮爾何怒泥蟠天飛各有數得寶爭竊常山符肆妖敢藉蚩尤霧飄瀟晴晝冰雪寒十里淺瀨翻驚湍田沒新禾溪斷渡行者居者皆愁歎梅雨潭沈白虹走石梁洞黑陰蚪吼應和相呼各自雄巖前驚倒聽詩叟

兀坐深悲轉自怡橫風逆雨一伸眉爲語小龍莫長恣會見霜清水落時

舟至大沽海口感賦

江湖流滯不知還半爲求書半看山愁引蛟龍搜海舶覺來虎豹塞天關懸泉落枕長娛夢展卷焚香一破顏載得煙霞與虹月扶開兵氣鬪朱殷

辛酉小除夕爲藏園祭書之會與會者武進董二綬金仁和王五叔魯嘉定徐二星署蕭山朱大

翼庵吳江沈七无夢溆陽張七孟嘉長白彥四明允海寧張大冷僧侯官仰十幼石主客凡十人余以今歲所得宋刊中說文選坡集臨川集清虛雜著諸書相示星署以宋本陸宣公奏議翼庵以宋本漢官儀來會展翫竟夕因爲詩以紀之

藏園寂莫城西陬中有一人癯而脩丹鉛怗怗老不休拂塵掃葉心無髮臘鼓聲催歲且逾折簡召客八

九流不聞管絃發清謳不用樽酒傾牢愁霜華五夜生瓦溝花氣掩藹芸香浮牙牌錦匣珍瑤璆蕭選半

部傳明州坡集前後傲鄧侯孝先得坡集三卷以名其室清虛雜著誰所售樊盛吳繆相贈酬此書樊山以貽伯義松鄰得之以貽藝風藝風

沒哲嗣子河汾中說虞山留有牧翁跋絳雲一炬疑姦謀臨川鉅集兼金求祖本乃復思秦郵名鈔汲古森銀

鈎雜記幸遇東家丘桑經杜典祕閣紉一朝妙合欣匹速水經通典亦得殘宋本以配舊藏皆庫書也滿箬之穫歌甌窶部居

甲乙供獵蒐主人痼癖不可瘳更招朋好相綢繆座中諸客黃顧儔尋聲結契來騶騶誦芬畢世勤雕鏤

精心恐失如慮囚王郎奇風溢十洲墨皇坐擁張茵轉卓哉嘉定矜貴游陸集出自公馘劉蕭山門業傳

金甌大力獨夾風雅朝漢儀三卷思壯猷故應集古追王隸東陽才筆逾枚鄒清言妙發常決瘤阮氏簿
錄鄒校讎閉戶夜夜焚膏油溷陽畫理追朱絲從我頻泛茗賈舟零篇斷簡紛不揉集腋貴比千金裘午
門峒巖閣四周彥子闢館良自由鞞囊八千真汗牛冷僧健筆孰與侔露鈔雪纂千卷哀一任俗子空誇
說侯官農部歷十秋連宵聽唱量沙籌竭來就我開新籥酒酬落筆心手柔清遊良會互勸酬紙窗竹屋
風颯颯寒宵聚影燈一篝異書瞥見開雙眸本分龍爪字白頭佚文墜簡工繹抽世人嗜好殊薰蕕長安
盡日飛輕轎上祛樞柄下貨賕往往杯酒生戈矛坐令大陸翻龍虬殿門怪烏啼鷓鴣飢烏千萬聲啾啾
書生無力鋤鵝毳且晚視息聊自媮遼刊金槩勤咨諏宋塵歲祭絜肺脩長恩神明今在不人生五十波
上瀉叔世功名多繆悠金注未必勝瓦摳何況雙鑑堪名樓黃金散盡寧足尤但祝年年長獲收安能役
役榮利爲人羞

章華

華字縵仙湖南長沙人光緒乙未進士官郵傳部主事

迴鑾後代張文達師進宜春詞

禁苑春歸上柳條試鐙風裏聽宮簫侍臣新自秦州至風景毋忘過瀟灑

吳綱齋南齋以先人所著吉齋叢書見貺爲題扈從負書圖

一篇遺稿玉琅玕亂後重披墨未乾神物不遭秦劫火官儀猶見漢衣冠朝登雲巘書籤重夜渡滹沱霜氣寒莫忘西巡新掌故好將祕記補金鑾

羅惇融

惇融字揆東號瘦公廣東順德人優貢生官郵傳部郎中有集

長沙張文達師靈輻南下志哀

凌晨促府趨行李廣路塞入門問諸孤洒涕氣彌結執其少者手泣對腸欲裂傷哉十齡童類父入毫髮持喪若成人賓僚嗟秀出贈言勉孝友勤讀光先烈聆語信知感亢宗理可必婢僕淚恒襟不忍棄斯宅風淒靈輦舉日慘衆哀激觥觥尙書府龍門高百尺萬流爭趨壑存問及鞮譯去年壽觴舉冠蓋傾一國今年素車來杏不盈什一生死交情見喧寂世態出飛旒出國門易水流嗚咽

憶昔辛壬間籌學集衆謗憂危耿不寐委曲跂一當積誠恃信主卓絕賴冥剏于式黃紹文章宗吳汝嚴

復天下望江詒王儀號博物張鶴李希實哲匠五百識賢聚時流孰堪抗屹立鎮駭流百川此東障僣僣

生徒會天門開誅蕩羣材待陶甄皇風日敷鬯志未竟十一孤懷冀誰諒萬方悲一概山頽吾安仰

邱齋庵屬題所藏黃葉邨山人獲石圖山人斃地作池得一石案有斑篆七字留贈山人黃葉村圖而記之亦淮上一故實也

山人獲石碧池裏石上留題黃葉字黃葉本屬山人村自寫石交傳石史淮上常年此異聞嘉道風流久更新邱生忽與山人遇黃葉爲村畫中住昨日携圖向我來畫固堪傳事更佳前生君豈江南客一櫂秋江臥小齋嗚來世風賤騷雅笑君此卷胡爲者美人誰報青玉案老衲宜親白蓮社小篆斑紋破紙看黃葉山人意態閒人間畫石誰能癖侘傺風塵一冷官

題羅兩峯鬼趣圖

子非鬼安知鬼之樂胡然開圖令人愕偶從非想非非想青天白日鬼劇作羣鬼作事自謂祕逢迎萬態胡不至豈虞鬼後不生眼一一丹青窮敗類中有數鬼飄我冠自矜鬼術攫美官果能變鬼如官好余亦從鬼求與援問鬼不語鬼穉笑鬼似揜我非同調吁嗟鬼趣今何多兩峰其如新鬼何

自邢臺至鄴道中書所見

千樹萬樹梨花雲十里五里黃茆村榆錢柳絮不知數一路野花紅向人望中平蕪極天碧紫燕黃蜂逐南陌婦子嬉嬉急早耕太行已換青葱色如此春光客未歸懷古中原歎何益

莫愁湖茗坐曾公閣因展漚陽尙書所留莫愁小影題後

湖稅當年歸別業湖爲徐中僧樓今日祀人豪姚惜抱江天小閣坐人豪句曾文正至賞之許仙屏建閣湖上公書榜焉波光浮檻荷千蓋山

色侵船綠一篙城郭秣陵歸夕照江山茗椀坐吾曹盧家少婦驚鴻影恐占茲湖位最高

半山寺卽荆公捨宅

亂栽花竹公歸處捨宅千秋贖此堂髡柳尙傲含雨翠萬荷齊柄遠風香爭墩轉益林泉趣補屋寧知草

樹荒陶齋補亭今漸就荒更策疲驢衝潦去鍾山一角坐招涼

登清涼山

烟巒林杪出雲扃欲挈江流赴石城袖底三山收紫翠尊前六代入空冥一流向盡傷頽照千劫蒼茫勝此亭收拾湖光從倦鳥疏楊歸路帶寒星

上盤頂雲罩寺暮不達而返

一筇身出萬松顛脚底諸峰氣藐然張袂平收東海水剪雲散作薊門烟飄搖清楚斜陽古睥睨荒臺冷月懸慙謝僧難容匿笑投林還在暮鴉先

宿萬松寺

千峰絕頂支床處夢裏松濤雜梵聲高月轉霄迴夜氣空階鳴葉迸涼醒萬綠滅後餘禪味一枕頽然接太清襪被尙思從老衲稍憐寒拾不同盟

萬松寺待曉

萬峰高下影窗前星斗依微接曙天溫酒徑思然宿火尋詩無著近枯禪霞光動海諸天豁日氣蒸山衆

態妍百折筮與過鳥背梵鐘先我落平阡

辛亥九月任公歸國至於遼東旋還須磨賦呈四律

海東風急怒濤喧馬角看君入國門握手不知成涕笑剖心寧暇說寒暄頭顱十載江湖膽烽火神州天地昏急劫危棋空袖手祇應還臥舊邱園

須磨海畔千帆過漆室憂天日萬言淚盡精靈從化石狂來詩卷與招魂衆難踞地時親母萬卷撐腸獨閉門鼙鼓聲中驚起坐殘山一角是中原

黨碑元祐新除籍頭白東坡海外歸威鳳羽毛宜自惜屠龍赤手欲何之蒼茫帝所鈞天夢零落華年故國衣黑水白山王氣盡人民城郭是耶非

相期四印齋頭坐翻踞雙濤閣上層山鬼女蘿松下月燉煌經卷佛前燈百年此日並哀樂一姓何常問廢興歸去倘携三島月海山雲氣夢飛騰

喜桂十東原至自海外

欣然闔戶一矚儒歡笑臨觴婦子俱殘雪驟因情話煖七年寧志尺書無故人後死留今日長物平添有短鬚世變等閒寧足述尊空市近莫愁沽

弔寄禪和尚

生死臂屈伸人世無去住法緣彈指頃歸雲無尋處酸辛我豈免亦曰有情故天童憶兩宿雲氣入巾屢

論詩見燭跋示我天痕句

師宿天台詩袖底自生知海色眉端青壓是天痕寫以示余蓋得意句也

他年藏骨地笑指手植樹歸舫得長篇因

循滯尺素初驚飛錫來云當十日聚良晤市隔夕宿約不及曙

師言是夕過訪余謝焉乃約翌晨已示寂矣西風遲掃門馬背

馱禪去

是日師訪雷西榜出門西榜問和尚的禪帶去否師言你見那裏有禪西榜曰馬上馱的甚麼師曰請乃揚鞭去

禪宗失龍象大雅歇韶濩聲聞兩俱寂

問師了無語

師戒體陳涅槃室余入視焉

沈沈法源鐘葉落風自渡幽明我所解夢示王文度

游天童呈寄禪上人

祇役苦炎威涼颺竟山牖天童渺何許欲往但搔首午氣勢無道臨流聊自救一葉從所往清風與之守
遠林日已沈大月皓如晝平窗雙鏡動文毅千波皺螢鏡亂漁火蛙鼓催鳴漏科頭臥船唇仰面數北斗
夢迎風露深一枕試曲肘驚眼明朝瞰維舟已谷口僧將篋輿迎並挾嵐光誘魚磯聚谿童塵籬立村婦
山泉奮杭稻畦缺補蔬韭巖居爾何娛不識苜蓿宥叢篁翳高厓呼吸涼雲受距剎尚十里山容歷如繡
連峰翠透迤聳秀失培塿高鬟恣萬態妍枝無一醜妙績赴我前一瞬落輿後心知難追慕延景疲左右
秀嶺忽當面萬綠入懷袖危磴巖林杪俯氣狎猿狖川原闢列罨豁若揭蒙葑初疑靈境竭忽笑蠡測陋
踰嶺闢前局下趨落深白一輿山所圍折旋變昏晝林靄綠如瀉界白但巖溜高松排空來蚪柯恣蟠糾
數里深列衙大材足堂構睥睨數百祀儻借佛力佑豈感斤斧赦直犯風雷門天半萬玉鳴強聒笙歌奏
渺不覩匹練但見雲氣覆四山青濛濛大竹森千畝據高此聚族厚積非自寇崇峰破天慳太白鎮地紐
千畝朝所尊肅肅誰敢友禪關豁深巖穴儻齋壽琳宮警霞起祕閣銜瓊鏤奎章先朝煥經藏勝代有

緇徒嚴戒律廣座洪鐘扣寄師出家雄異材挺天受行脚半天下奮髯氣抖擻宏交盡人豪投詩盈篋杻
思力幽局破高論玄穹剖真宰一何私爲師闢靈鷲噫余困塵鞅老鶴笑顏厚入山豈不深信宿行太驟
歸舷袖巖雲合眼飛泉吼

題石遺所居小秀野草堂

背城幽築占春深僵石疏花柳十尋舊主尙聞尊酒帝荒庵今已闕詩淫相從鋪啜誇餘子每喜風騷得
嗣音更醉清觴慰猿叟斜街花事未銷沈

石遺精庖節庵誇爲冠絕何道州草堂小秀野草堂爲石遺書之

正月初二日雪晴作

去日渾無惜別情拚將潦倒送吾生爲貧妻子耽微祿漸老賓朋戀上京病態翻供詩境熟春痕新向酒
盃晴雪中喚起西山睡心擬花時看耦耕

吾生

不飲豈爲明日計吾生寧惜以詩窮一廬天地佛香外滿眼公卿春雪中世事推枰千劫換生涯食粟半
囊空晴來病起思人日傳語梅花護曉風

雨宿雲居寺

屢借僧房娛夢境松篁交翠雨淋漓雷聲縱壑千林動瀑響連山萬派隨蔬笋未嫌充腹儉苾芻翻怪夜
眠遲思量何物堪酬對苦苒昏燈自改詩

雨後別雲居寺

林樾新雨靜，含光翳葉陰。中試鳥吭深，磻留雲隨意。住亂流因勢出，山忙未容谷飲憑。茆蓋翻喜泥行滯，筍將此景豈能輕棄置。待收濃翠入奚囊。

房山道中

結束看山不費催，昨宵已夢蹋巖苔。筮輿幾轉槐陰路，便有嵐光潑眼來。策策飛鴉林際迎，單衣簞笠趁涼輕。看他熟麥黃千隴，動我歸耕一往情。村鼓秧歌競賽神，爭看躡舞沸河津。故鄉每歲逢今日，艾葉菖蒲滿四鄰。

入山口號

遙見石梁知寺近，心隨流水傍溪行。萬松不隔浮圖影，數里俱聞山鳥聲。

壬子正月十二日作

夜半驚聞戍卒呼，咸陽一炬變榛蕪。飽颺今識鷹難養，非種誰言葛易圖。葦下已成肱，篋盡道旁空見糶。鉤誅九門禁夜行人斷，蕭瑟春城冷月孤。

游二閘同宰平居礪孝覺

橋臥蒼波柳拂堤，望中風景似青溪。依稀林際紅衣女，可有人家舊姓西。萬葦深深一櫂涼，綠陰多處見紅牆。珠江煙水閩江月，相對何人不憶鄉。

開口奔泉萬玉鳴，小亭列坐試茶鐙。
洗清十日胸中惡，深悔年來嬾出城。
柳外蟬邊看水嬉，凌波拍拍浴鸞鴛。
賣茶叟說滄桑事，付與村童唱竹枝。
知有乾隆公主墳，豐碑渥紀外孫恩。
雕甍石馬思全盛，零落同昌廢寢園。
舉網枯翁剛得魚，貼波雙燕晚晴初。
舟人定說秋光好，萬疊蘆花雪不如。

謝堯生侍御訊病次元日韻

逃世早知無妙法，中年寧惜費詩才。
病如禪味參逾出，春似貧交去又來。
人日尙留殘雪好，梅花知爲冷官開。
齧鹽日課耽新歲，媿爾風流訊玉臺。

病起作六首

吾身侈頑健，况復攝起居。
自誇壁壘堅，久與疾病疏。
倉卒不戒寒，病勢若決渠。
治之幸不焚，肝鬲甫一舒。
扶床起攪鏡，錯認山澤癯。
窺牕見殘雪，且試盤中蔬。

平生不識憂，何者名爲苦。
貧乃天所畀，樂則吾自主。
寬腸納宇宙，斗室在環堵。
病魔爾何物，亦或敢侮。
泥我困牀蓐，幽我閉門戶。
苦我祇此乎，順受亦無忤。
終有霍然時，樂趣吾語汝。

亂亦豈可避，時亦不必傷。
熟看相斫書，亦互有短長。
起滅信偶然，時過亦已忘。
術者侈天口，京師有大殃。
大戶競徙室，小戶嚴蓋藏。
吾見之熟矣，自擾謀非臧。
賊來吾閉門，賊去吾徜徉。
萬一竟入室，無囊亦無囊。
破書塞滿屋，賊睡走且僵。
吾生忘憂法，三字莫思量。

吾友有梁宓問我養心法曰一切放下此語至簡質宓言不易造吾謂當努力四字謹受持千言盡枝葉世每憎吾狂然而不欲殺吾非佛圖澄鷗鳥自可狎履險每如夷何必適樂國

明朝有米無此自明朝事今日且飽食萬事付美睡或言陳後山終竟以寒死吾尙存破裘諒亦不至此有歌必須聽對酒不強醉百年固可樂夕死亦適意或望子孫賢此意更無謂教子盡吾責非以爲自利吾責既已盡亦不復省計華嚴百萬言遊戲而歡喜吾雖未學佛斯乃佛所賜縱非極樂土恐是初禪地病榻已強離燈火能勉親取携堪自力勿以煩家人據案始獨坐稍覺夜氣新輟詩逾數月製曲恆自珍今宵忽伸紙一瀉無邊巡吾詩如里謠放蕩足一欣苦吟究何必庶非無病呻

鄧 鎔

鎔字守環號忍堪四川成都人官陸軍部有荃察余齋詩存

摩訶池晚眺

御水流春漲廢池無人更奏聖琉璃草生凝碧春猶在藕泣香紅夢已遲杜宇千年非故國煙花一卷譜
新詞至今古木宜華苑衣服雲霞鬼唱詩

峽中雜詩

峽中之石石盤陀峽中之水水瀉瀉公毋渡河公竟渡如馬瞿唐奈爾何

螺紋迴旋萬山環江水一流一轉灣割據英雄幾成敗坐享天險好江山

拒秦端在結齊婚一賦高唐豈寓言

宋玉高唐賦欲楚王聯婚于齊合力攢秦巫山神女指齊女也孟子

察以蜀地當之又詭爲帝女瑤姬之說謬矣

雲雨荒臺今夢醒更無神女有啼猿

送林山腴舍人還蜀兼示成都諸友

風塵京雒縉人衣倦鳥知還悟昨非從此在山爲遠志况聞有母寄常歸暮春三月羣鴛亂寒食東風社

燕飛惆悵常階紅藥句中書空憶謝元暉

天際歸舟望轉遲春閨正是斷腸時花風念四剛婪尾弦月初三待掃眉舊字迴文蘇薰錦新腔樂府柳

枝詞夢華儻續春明錄莫忘清狂杜牧之

清孝定景皇后輓詞

門楣光采鳳凰窠

后爲承恩公桂祥女即孝欽之姪一門兩世正位中宮都人榮之稱大方家閨桂公府爲鳳凰窠

姑惡聲中帝奈何春殿錦袍宮怨少

秋衾銅輦夢痕多脫簪人尙稱姜后鍊石天難補女媧附葬崇陵應一笑何因揮淚對宮娥

燒骨揚灰灑向南降元臣妾更何堪女堯禪國無前例濮邸承宗作長男白馬禳京周七鬯黑貂正臘漢

綸稽拳拳一璽如文母徒與班彪助史談

望海樓

陂塘菱葦故行宮，舊院閒廊曲曲通。橫欄御書巢野鴿，交床破褥繡盤龍。一從翠輦歸天上，時見珠鈿出地中。閱盡興亡誰健在，天甯隨塔拄晴空。

淨業湖尋李西涯宅地不得因往高廟訪白堅甫樂其所居水木明瑟作此詒之

荒墳已沒畏吾邨

順天府志李東陽墓在畏吾邨即今三貝子花園北極樂禪林與大憲閣間法時帆所訪得僅屬疑似今益不可辨矣

遺宅還迷德勝門，儘有弄

田屬鉤盾

昔人已有寂寞西涯變稻田之歎今田皆清皇產掌於奉宸苑

依然積水浸城根，暖能浴鴨桃含笑，密不藏烏柳。坐髡文采風

流前輩盡詩龜，今日亦無存

法時帆宅亦不可考

賃廡如君此最宜，玉泉冰解正流澌。養魚經共鄰翁讀，羅雀門教小婦持。飯後聞鐘僧說偈，花間布局客

圍碁爲煩留下西頭屋，待我追涼借榻時。

題崇效寺壁

六度看花白紙坊，閒曹容住一潛郎。不知倦客垂垂老，猛覺僧雛似我長。

吸盡香醪費盡才，賞春都爲牡丹來。我偏愛此宜消夏，兩樹楸花一院苔。

高蔚然樹丈年七十矣猶以細字爲余書扇詩以謝之

簪花舞笑鏡臺前，老筆君猶勝少年。今日重將詩扇拂，下車三步爲橋玄。

去年損庵於余扇頭書近作詩有蔚翁老筆如年少之句即題

蔚老所書卷子詩也今損庵又捐館矣

寄題李勁風渝州禮園

十年前過浮圖關戍兵吹角耕人閒

農炊舉火耕人少清角吹寒野戍多餘舊題浮圖關句也

關門立馬望形勢蜿蜒山入江中間山

如率然首尾應二江縈帶雙玦環誰知別業勝亭館卽從茲地誅榛菅憑林架棟古木古因巖鑿屋頑石

頑伏案平視星在戶推窗俯聽雷鳴灘獨兒拳毛雪之白胎禽露頂砂同丹鄰童就塾跌兩脚郵姑拾橡

丫雙鬢佳花美竹皆可翫玉盤金椀能盡歡舊朝瓊書獎孝義

閩有孝義堂以清朝賜額名也

勝流詩筆工雕刊尊公久

習計倪術城居湫溢通閭闈春秋佳日樂遊此登高曠望開心顏邵窩隨行得安樂謝屐濟勝窮躋攀清

時程鄭比萬戶君家元季稱二難養親養志養口體百年采采陔之蘭一朝九鼎淪泗水天地瘡痍民痍

癩丈人墓木亦已拱餘生我輩多憂患龍蛇起陸伏殺氣猿鶴招隱思故山何當作賦遂初服乞借尺地

安蒲團是時解脫文字縛惡詩如此應從刪

汪榮寶

榮寶字袞父江蘇元和人光緒丁酉拔貢官日本公使

故國

故國煙塵首重迴風廊愁對夜簾開天臨大野星辰遠秋入空山草木哀一夕商歌催鬢改萬方羽檄阻
書來龍拏蟻鬪知何限同付殘僧話劫灰

希馬出示先德文愼公詩集因題

十載長安看奕棋津橋兩聽去鵲悲

戊戌四月常熱罷相及丁未五月公去位並余游京師時所見事

上尊賜酒餘酣在已是虞淵日盡

時

吉日車攻是雅音南山瞻仰變哀吟百年興廢真陳迹但賞瓊琚致自深

三多

多字六橋蒙古人杭州駐防官奉天都統有可園詩鈔

石遺室詩話六橋爲樊樊山詩弟子富於隸事逼肖其師尤熟於滿蒙各地方言與故實稍雅

馴者多以入詩今所錄率多此例

重九味春太守招同陳壽松翼棟袁巽初思永兩觀察嵩允中瑞吳博泉學莊李友之益智三太

守鄒筠波鋒方佩蘭象瑩兩大令吳山登高座中有傳誦何棠孫維棟觀察皖中憶杭詩卽次

其韻

除卻西湖不是春崇樓傑閣日翻新倘按安石爭墩例我算西湖舊主人

白誠六橋故戲云

欲從大海看潮流先上元龍百尺樓天下西湖三十一漫誇名勝止杭州

題郡署虛白堂壁

放衙閒片刻和月凭雕闌欲喚香山叟同吟白牡丹

歸綏得冬雪次尖又韻

白鳳羣飛墜羽織大青山下朔風嚴精明積玉欺和壁皎潔堆池奪塞鹽蒙鹽產於池沙亥無塵卽珠履沙亥蒙言

鞋板申不夜况華檐板申蒙言房屋明史作板申鐵衣冷著猶東望極目觚稜第幾尖

無垠一白莫塗鴉大放光明蔑戾車蔑戾車佛經言邊地也難得遐荒皆縞素不分榆柳盡梨花瓊樓玉宇三千界

霧幕瓊廬十萬家預兆春耕同穎瑞陳平宰社餉烏叉滿蒙以少牢祀神饋餉其膊曰烏叉

答懷帥悵別

尙嫌會面太星更星更綏遠方言稀也萬里軺車我忽征拜命正逢庚子旦十月十四日奉旨二十四日望闕謝恩正庚子也相思應繞甲

他城即怡克圖臺看馬耳雷同掃去冬歸綏得雪次尖又韻厚卿諸君同作月照燕然山共明儻得異時重把酒乘風破浪定兼程

奉敕毋庸來見迅卽赴任六疊前韻恭紀

天語飛來以力更庫可以力更歸化地名庫可譯言青色以力更土坎也乘軺繇此便遐征行經萬里剛經歲守在三邊豈在城犖

确鉤心堆鄂博鄂博堆石爲疆界觚稜回首望通明喜逢瑞雪今冬足處月西郊笑數程

送趙萼樓曾棟農部還京

萬里同看肯特山忽聞高唱大刀環長安故舊煩傳語不羨封侯羨入關

邊庭

冠劍年華已過了飄飄形影尙邊庭雲環瀚海東西白嶺界胡天內外青豺虎負嵎風助嘯蛟龍縱壑水騰腥萬人師長權安在唐詩萬人師長權安在空讀兵家玉帳經

疊前韻

肅慎承恩到箭丁東督代蒙古王奏請變通台吉屬下隨人箭丁出路等事已奉旨依議會看荒服悉來庭萬年王氣無邊紫一髮天山未了青倚馬上書仍賈勇存羊下箸不除腥疏裁各項陋規廢羊仍舊可憐甌窳燕然石我未鏘銘彼勒經圖盟杭愛山一統志按當

即古之燕然山南石壁鏘度人經係古梵書

三疊前韻

故園心起笛聲中多少愁難借酒攻節鉞縱殊蘇屬國梅花應笑趙師雄蔬餐塞上回回白蒙人不事耕種六七八等

月稍有蔬食回回白菜名樓比江南寺寺紅惟廟宇窮極精華獨爲安攘籌補苴羣居忍與雁臣同

次和杜樊川書懷寄中朝往還詩韻

欲洗愁腸萬古埃仙娥秋水挽縈回車將縮地通鳥得鳥得爲張庫汽車道適中地樓已連雲到紫來新購回俄員柯樂德樓屋與罌

東紫來關相望鬱督軍山庭久徙突厥處頡利之紫於圖蘇湖殿畫遙開元太宗作涼樓曰圖蘇湖殿即書生那

有安危略出鎮終期濟世材

喜任卓人承沆推事至倒壘前韻

深山移到不凡材新種老松一大好班荆笑口開童子偶教猿叟代近畜一故人爭逐雁臣來舊鈔書借

雙溪隱新拓碑分九姓回京友紛索古石刻拓本九姓回鶻可汗整暇敢師裘帶輩西風雖起尙無埃

和士可謁車盟巴勒和屯成吉斯汗廟卽敬題所摹圖像後

百戰奇勳破乃蠻一生偉抱睡完顏屠耆合獲哈達罕角端蒙名哈達罕達平聲讀曲律同瞻撥里班太祖特稱木華黎博爾木博爾

忽赤老溫爲撥里班曲律猶華言四傑也鍾愛拖雷寧少子發祥沆海亦名山臚胸河水湯湯處想見騎龍避暑還

人間無敵始英雄黃禍於今警不窮併亞吞歐驕大彼拔山蓋世勝重瞳起家草澤仍沙漠自古帝王子孫惟元後仍

守故土世受藩封遺恨蓬瀛只颺風太祖滅國四十厥後世祖征日本颺風敗舟默祝九旂常助順武揚八十六旗同

詠哲布尊丹巴呼圖克圖

一出金瓶便獨尊竟忘先輩自西奔沙畢衛門公文申動言我師哲布尊丹巴之庫倫或駁禁不從余嘗謂之曰汝輩忘噶爾丹之役乎乃語塞沙畢卽沙門維摩花

室爭相入羅什盆鉢已早吞無上上乘新世界想非非處小乾坤定邊終仗降魔杵此亦西方不二門

總無妙法說哥更活佛亦那有慈航濟衆生呪鉢浪誇蓮出現舐刀還爲蜜相爭前達賴喇麻來庫倫蒙衆之飯依哲布者移而

頂禮達賴因達賴爲黃教第一支哲布乃第三也哲布怒欲以武力逐之幾成大戰鬪丹書克欲年年受丹書克貢獻也三年一遞哲布改爲一年

爲民請命起而反抗往返部議始從定章般若湯先日日傾嗜酒無度首犯教規不信金剛身不壞自家奴篤失雙明雙目已瞽也篤譯言眼也

玉門關外本無春惻惻天邊竟有人雲朵白描菩薩面梵嫂敦都克拉穆卽察汗達拉察汗達拉譯稱白菩薩桃花紅現女兒身沙

多扣背有桃花兒者尤名於時扣背蒙女也色空幾輩能垂戒香火前身未結因一任廣長蓮舌妙度遼安穩勝仙真諺云神仙難過

大庫倫其習染
之不易免可知

危疆何以轉爲安膜拜應慚對可汗登哩囉曾并政教教力干涉政事不下西域遠賴官斯土者初則利

矣讀九姓迴鶻碑所謂登哩囉者亦其人也高勾麗合鑿艱難哲布久思非分時以廣參歡喜禪無補大發慈悲我本寬儻得

橫行兵十萬軍中自有范兼韓以三十四旗地面僅有二百五十名之宣化客軍分駐各處正籌練新軍又奉部令停止

贈賈郎

萬人如海笑相迎月扇雲衫隱此生我惜賈郎仍不幸儻逢劉季亦良平

遼東五仙詠錄一

丁令威

城是民非塚壘然去家千載始成仙今人學比前人速化鶴歸來陌卒年卒六十也詳

十疊牙字韻和夔齋主人

兼并文武大林牙遼百官志大林牙翰林學士也又行樞密有左右林牙天錫能詩敢並誇潑墨如傾饒樂水喀喇沁爲古鮮卑地饒樂出水焉運

籌當賽瀋陽瓜近人瀋陽百詠詩云批紅判白知何事儘有輸贏說賽瓜人才金史帥安石王位元朝脫不花莫笑梁園舊賓客春風

不坐坐東衙此間稱副都統署曰東衙門

重過萬泉河

傾城剛記共觀荷不見明妝照素波瓜蔓水皴魚呷凶蘆花風緊雁應囹僧髡秋柳青難髻象鼻寒山綠

尙拖一樣小紅闌略約無人立到夕陽殘

何振岱

振岱字梅生一字心與福建閩縣人光緒丁酉科舉人有姑留稿

石遺室詩話梅生爲余書扇錄西湖詩數首乙菴諸人見之極賞其鐘定聲依無際水詩成意在欲開梅諸聯實則君詩語能自造而出以自然無艱澀之態或病其隘而不廣余曰以東野之貧絕千古遺山尙日以詩囚於東野乎何傷

襲九鶴置酒袖海招予看菊

一貧天地無秋色十月賓朋始酒杯紅日旣爲菊花好青山須就故人來

廣意

紛紛寵紫攻聽賭坐亂人意令失真適然閒靜理我素始脫蟲窖仍爲人無書嘿坐亦欣噏偶夢得句能
嶙峋始知對客有至苦先不稱意奚疏親我生局脊正坐此胡爲緣物成愛噴力微不足攝羣動乃令方寸生荆棘出門一笑吾過矣高雲寥廓無纖塵

後插菊詞

列燭何知有月明畫堂無客愛更清空庭百本殘秋後留與幽人伴五更

同霜杰入杭

始發意已遠江聲秋杳漫紅舫非不小人意自然寬蕭散斯風致山林見肺肝平生輕世事孰信一游難
入杭舟中雜詠

江聲爾何恨入夜殊怒咤青山絕有情船頭紛來逐

家家門前樹樹樹盡臨江看盡江船過紅樓人倚窓

仲春客邸日課山水一紙非云習畫聊資遣悶爾

歷游佳處輒追尋邱壑何資意自深如彼枯槁消永日向來粉墨耗雄心拋離竟比投荒去慷慨猶餘渡
海吟虛寫江南煙水態好春無日不輕陰

荃庵累月無書詩以懷之

吳雲秋轉繁南望迷未瞭鷺江吾有人羈旅同爲飽擬貌訊近肥探衷見前皎春書密似櫻秋事疏于藜
向時朋舊盡彼此亦半老焉能不我思狂酒臥煙島

題所畫蓮花

畫蓮不作春花媚宿鷺遮魚與自奇一畝野塘天乞與東風何力未曾知

里橋晚坐

橋盡山幽處山迴與寺鄰樹冬多古色野暮有行人
郵戶工芻酒歸牛穩負薪故鄉情自好佳氣恐難漚
鶴澗小坐澗在理安寺之前千松萬竹高翠聳天真仙境也
地天忽自通一碧不可絕舉眸悚陰森恐入神靈窟
萬篁爭奮挺叢樞皆聳拔橋行俯寒澗自古流蒼雪
惓惓琴思生冥冥鶴迹沒出山衣蘚香湖光滿不滅

理安寺

百澗競成響一潭私自激縈苔下絕壁小磴爲幽亭
聲外尙含秋意中欲無僧久坐聞香氣何必存禪名
江湖流濁世湍激何時平真當守此水心根同孤晶

紀別

佳蔬侑晨餐臨行食欲噎中歲別衰親誰能腸似鐵
去爲就食鳧忍託壯游說去年謂今年家居戒不出
今年如去年嚴裝催早發今年視母鬢又白去年髮
小舟凌夜行大舟旁午發海水自彌天兒心惟繞膝
偶題

夏夜

何因成目值片晌念依稀水靜如留影花暝不辨衣
樓臺橫海色車馬亂晴暉一醉仰春宇歌塵雲際飛
夏殊不淺氣猶寒夜豈忘深睡故難小具杯觴惟勸影
了無蹤跡與追歡蕭蕭葉吹能爲雨灑灑梔香乃
勝蘭待和魯娥舒短嘯年來寸緯已拋殘

鼓山靈源洞同茶庵公望看月

松去月盈尺月高松影圓不風秋自籟臨水屋如船綠欲浮山去寒都集曙前披衣商瘦句未抵淨名賢
鼓山達摩洞憶碧琴

古洞受江色無雲常夜光松梢片帆白簷上一星黃此際禁寒坐青天欲語忘七年懷舊夢猶繞佛前香
登鐵槍

雲痕變滅一興亡鈴語沈沈碣草荒立馬城陰高處望塢尖留得古斜陽

所居牕前種竹數竿

簾前竹數竿肥瘦雁行列幾時病掩牕所種喜都活寂寥取有慰後時恐難別及茲未別時坐對忘移日
舟行曉望

櫓枝搖及曙光柔星落漁燈淡不收舟宿向來能早起沙頭猶有睡鳧鷖

尋靈隱寺

小船通密樹樹裏更藏橋港縮霞光直山冥日氣焦竹香連寺遠石骨爲泉銷佳處吾能奮疊天路未遙
喜晴

可有朝陽意山頭隱薄紅已銷草根雪真託夜來風遠水餘寒滿長天曉夢中一游觀變態晴雨小窮通
孤山獨坐雪意甚足

山孤有客與褰裊，悄向幽亭藉綠苔。鐘定聲依無際水，詩成意在欲開梅。暮寒潛自湖心起，雪點疑隨雨脚來。一飲恣情宜早睡，兩峯曉待玉成堆。

孤山曉望

菰蒲聲中見人影，殘月瘦竿挂答答。翠禽摘水作花飛，一行都上風篁嶺。欲曙湖心天轉黑，寒松無風如埴直。是誰喚起海霞高，紅抹峰南轉峰北。

對菊

牀前置疏花，枕上雨聲好。欷枝出整葉，無一令人惱。向來強對客，異趣損懷抱。始知古幽人，刻意憐芳草。

冷泉亭

枯冬貯春青，含氣發靜秀。巖花附松篁，雪壓彌茂下。有一泓水風吹碧，煙皺寒林寫。猿思數葉石埴後，斜陽與之紅向空。見明瘦昔夢落，何許片雲臥晴岫。扞懷誦賂詩，倚冷坐移晷。

上海寓齋留客夜談

散鬱無端恣譴譚，相看已倦更清酣。門前雪滿不須去，枕上鐘殘猶可貪。積憤撐腸歸雅吐，凌寒摩背約幽探。姓名早謝人間識，甜苦心知此二三。

步尋靈隱寺書所見

長松老鬣交空翠，晚稻秋香打晴穗。人家樹頂偶鳴雞，草徑風前有遺毳。寒流細石引人深，遇澗逢橋聊

一憩鈴聲沈沈出煙際小隊香籃馱細騎野翁山行盡榭笠越女村裝亦高髻風傳唄語驚葉下三竺相
聞隔秋靄我生于佛不知度偏近僧居足吟思興來倚石立移時看竹聽泉忘入寺

孤山舊游處重來仍居此地感賦

別杭未兩載我老湖逾碧不知湖上山識否前游客臨流一顧影衰槁成春色我顏非被酒對景神自憚
始知煙水氣足蘇秋士瘠孤山尤芳靜勢與前湖隔小樹裏晴漪空廊耿虛白寬襟理前夢嘿坐試秋夕
昔來梅繞簷今來月照席惟有勝遊心不隨景光易

又

靈隱寺門溫舊路冷泉亭上似前生臨風坐久澗花墜欲暮吟成山靄生完翠自春知佛意停瀟餘響放
雷鳴猿公去後經香絕爲我蓮天問月明

當席作

晚識芳菲恨春懷換故吾蹉跎聊掇擷辛苦事歡娛積礪容消酒高歌或勝吁紅牙真解意一再按吳趨
湖口數峰奇峻漸乃平衍

世路誰能測巉巖總待平江流依岸勢山意見人情衆綠森初夏迴紅照晚晴薄游還乘興辛苦定何營

大風雨

昨宵早省天氣惡青蟲圍鏡撲花落五更鄰樹嘯天風一雨新涼滿江郭積水浮階成小池石榴花墜紅

離披水中瘦草出細葉宛若蘆芽搖綠漪林間有鳥翠毛濕饑不欲鳴仰頭立爾豈無巢乃避此欲施之
食飛忽急西來一片雲尤黑影入疏簾作暝色欲書詩句索明鏡更檢漏痕安行笈天公既雨底用晴雨
中人意尤蕭清閒聽却憶春前夢宿火紅蕤愛此聲

營睡不成聞鄰房薛翁鼾聲書此

鄰翁談笑方未已貼枕鼾聲已雷起如馳熟路駕輕車黑甜鄉遠翁能邇吾聞至人以踵息神與天游魂
自適其餘蠢者生不靈槐蟻蠕蠕同一國世間只有苦心者一夢能甜古難得我生不怨漫漫夜何取將
心與睡敵影形相贈大有詞枕簟於吾略無德明月既墜天垂星短衣緩步游中庭風吹露樹聞葉聲夜
氣殊佳視畫清翁自美睡吾須醒人間勞逸無須平

和內子對菊

紅葉寒山思不禁黃昏小閣動清吟細將肥瘦量今影迸以歡愁理舊心剪燭與君消好夜彈琴何處起
秋陰斂頭瓶上相思意未辨花人孰淺深

以茶葉饋鵲潭並詩一章

鵲潭理蹟時隄勉事詞翰壞帙盈巾篋細石羅几案苔巽儲澗汲石竈足薪炭濤聲滿草堂風影蒲葵亂
鳳文青龍斑清晨自獎勸有時摘黃花髻與膽瓶半起舞影婆娑蟋蟀助清歡任真任酣嬉秋色競爛熳
其詩瘦而天與俗肺腑判能以情勝才善讀愈璀璨丈夫未遇時何止泥沒軒君得自娛理誰亦能謗訕

秋山今可遊與子一蕭散更攜所嗜茗松火煮寒澗我能質短墨作子茶經費

高昌廟獨步看柳

曳日搖風意不禁長堤徐步盡千林年時莫怨芳華歇得庇行人且作陰

黃家樓上林樹蒼藹宜夏賦此贈儲齋

樹影爭入樓迸綠寒牕牖時挾車馬聲遠作風雨驟尤宜五六月秋氣私夜晝展簾涼鋪玉吹簷暗疑溜
我來賦蕭森展眺不覺久樓閒人意寬短句輒勁瘦天風颯然來燈火林際漏夜深如有聞墜露香岑袖

寄狷生潯陽

客行迨不復洪州強謝君言祇益愁

君云與僕迨不復南昌行初不謂然

會面有期須好抱冥心自詭忘前游書來仰日常

移屋花發題詩定滿樓覓夢欲長宜盡醉江流到海更江流

雨夜與墨泉時君赴粵

風威晚不霽雨力夜逾猛垂天洪濤傾擊瓦怒馬騁雜以松竹喧翻使羣囂靜念當羈旅中萬聲集孤影
斗幄卽荒巖夜氣悚悽冷家居偏愛雨深簾燭花耿敲詩倚暖枕漉酒熱春鼎靜憩覺勞生况味此細領
倦矣閱江湖行復背鄉井思我舊游侶歡悰非往景各有白髮親所期勤定省聞君亦有行壯懷希一逞
朔雲驅京華南花踏五嶺苑枯安足計貧健亦多委有如小稱意告慰約互竝明當攝兩屐離杯略酌酌

病起放言

景光經病得良題詩筆求新只舊蹊不死故應磨爪嘴浣思無處着塵泥性餘駘蕩終難抑意各沉酣莫漫詆開口今晨向山笑仰頭秋色與雲齊

樓坐

穴牕受日散朝寒盎水培花注夕乾吟逐春新忘髻醜醉呼客去愛樓寬讀書簡欲尋歸宿涉世難疑度石灘消息沈思何不可未能雷動且泥蟠

燕燕樓爲陳敬如作

燕燕來何處高樓結翠叢美人將小字攜手贈東風柳帶雙心綰筠簾並語通多情蓬島客點綴費春工
今晨 六月念三日

今晨可是病昨夕夢歸家嬾起似中酒憎人欲避譁骨酸思母撫食減怪僮加瓶水忘添注紅蓮聽自花
病夜得詩以左手書之

左書殊自勁伏枕寫新詩燭燄風高下蟲聲秋繁縻江湖將八月志士有千思一病無由奮皇天肯放慈
喜鞠序至 鞠序在滬聞予信即日渡江來祝

竟得生相見支離猶有人遠來驚睇眎客病得心親一喜勝諸藥平生只異身江湖風浪惡回念汝勞辛

秋夜喜雨

六十日不雨瀟瀟忽樹頭高天孤雁遠一滴一聲秋病思澄於昨枕邊聽更幽雖然不成溜終勝月當塵

夜聞隔院讀書聲

沈沈誰鼓風侵帷有書聲出林際遲錄翻碧血空沈憤表讀出師多咤悲當時作者意慘淡精氣不盡於
文詞自非與古共哀樂縱使百讀無絲窺高月流空雲不飛棲禽羣跼孤雁嘯此時百靈同肅聽燭燄不
動天風微起看夜色散鬱勃嗟峨病骨重披衣

暝色

暝色不可寫只疑天漸低當秋尤黯淡獨坐最淒迷雲缺有星出林深多鳥棲此時何處可銀燭憶塵西
夢醒作是夜嘯序回申江

夜半西風吼如虎夢醒對床猶喚汝江船一發遂天涯野泊燈檣杳何許今宵孤月胡爲光照人離恨成
心傷孱軀解道息思念豈知伏枕還霑裳

張園

侵曉張園車馬靜散疴自愛近林塘更無人與分荷氣祇覺風來盡露香馳道雙環松影合紅樓一角柳
陰藏歸途見日纔簷際續夢猶能半枕涼

南昌西街酒樓寄友

青山與菊一牆頭耽酒時來占此樓燈火吳歛渾似夢晴明春醉不如秋樓名江片雲孤往如人意低雁
誰邊落暮愁少有江南風味在題詩便欲語同游

游虎邱不樂却憶杭州

虎邱一搶似雷峯祇欠南屏數杵鐘偏向吳天思越水劍池西畔對寒松

寺前晚眺

種菜元無地看松覺有心雨中宜野望天際豈輕陰

戊申人日郁如招游長慶寺

細竹長松梵宇寬七年人日兩憑欄

壬寅人日同白庵彭初游寺中

山僧自是吟邊物祇好遮林傍水看

舟夜

寒逐江聲上枕旁起看殘月在高檣真疑短却前宵漏送作今宵一味長

江閣望狷生去舟

去颿那葉吾能辨江閣潮生著意看他日歸篷應過此有誰爲我戀闌干

敝瓶中雜花

野性悅嘉樹亦復著時卉環室堆落英書叢塞文綺一花一片春色界包禪旨久欲歛芳懷臨賞不可止
晨聲動倦枕唱賣有新藥蠻姿彼自逞亂真乃貌似二月梅未花五月菊可采非時與後時生意難索解
瓶中何所有石榴及梔子二花以品言位置次蘭芷取其中時令無復傷旖旎插花不及根供爾止杯水
廉收亦篤護在我既云侈記注入瓶時吾其作之史

壺尊

倦將求息何能息強自爲寬那得寬靜看飛雲閒看鳥旣憑庭樹又憑欄

四更起坐

性僻偏成爲我病每耽幽靜好沈思夢回夜氣初澄後吟答秋聲欲下時坐撫素琴消一曲仰看林月上
高枝將宵作畫謀還得羣動潛休合有詩

述懷寄狷生潯陽

爲交非一軌要在諧所性吾嘗對俗子氣索如積病廣坐嗤寡歡衆流嫉孤泳堂堂見吾子皎皎發輝映
吾性得所依烏知世誰聖寸尺有短長爲子奮一聲尤懼有遺匿呈露匪不竟百年須臾閒邂逅幾意稱
皓月滿南江素心幸可證

又

審性足知命未用惻天意世情豈能外幽靜奈夙嗜雲壑縱圖覽林水時夢至衆忽獨感深羣謹若仇避
柔蘇失元旨悲咤多秋思齊賢懦寡力嫉惡勁用鬯素痛孰爲砭治躬老未粹窳朽君何譏吾生非得氣

又

我狂處身疏子默用意澄子實我之則益子吾奚能過愛遂忘醜厚德徒赧承今交異古道相譽成友朋
願子念我好尤念其可憎我亦攻子闕落落羞哇叮磨勵出沉摯愛重生箴銘庶有異恆交惡木驚受繩

再寄狷生約游西湖

賤者無所餘素志儻一肆君壯我未衰試與綜游事神州環大瀛崇觀已無覲庶幾關隴壯吳越抑其次
茗雲雲水閒漁釣小恣意吾嘗泛江艇湖西一再至酒傾蓮桂香魚有濠濮致此中疑可老此願期苟遂
與子共徜徉葺宅收煙翠論文析奧蘊得意卽取醉如是者數年別去亦無對

夜坐有懷狷生

別子無幾時念子千萬端知子亦念我客處常寡歡大江日夜流懷抱取一寬無爲嬰世事辛苦煎肺肝
芙蓉損秋紅桂華滋曉丹夜起散衷悒取弦爲子彈恍如執子袂共憑鳴澗湍子雖不在前意邇毋敢謾
望海

青冥久涉想世外若有遇空香飄清風澹月洗白露龍寒動澗吟鶴悄接秋步尋聲絃暗聞乞夢席潛布
萬松蕩巖谷一花見幽素惻惻隔明輝悽悽追逸趣海與天同遙積恨無由訴空種人閒愁定長瓊天樹
冶山碧霞閣理琴

擁香二客坐悵悵古籟傾樓不受琴萬瓦寒煙收晚雨數鴉荒意託疏林推移與適無勞造斂放皆非漫
着心指下風湍鳴乍定此中幽響合潛尋

夜飲

小酒成情洽微醺失夜寒妻孥從意適風雨與燈闌聽竹能忘倦吟詩足紀歡門生尤解事擷菜滿霜盤

疏雨

兒童仰天笑自語歷歷星光何來雨竹間池上偶數聲夢餘聽之絕有情一雨添秋疏勝密正似龍門史公筆翻江倒海豈不能著語有時在幽逸

小樓對雨寄狷生

樓上風多寒已滿隱几看山忘日晚看山愛看雨前姿匿翠浮光千婉變樓西南隅氣更佳雙峯列峙圓如卵峯下詩人學屏居花樹冥冥闕池館舉家聽雨向名山此福能消今已罕朝來示我山中吟區畫新寒紀昨暖天公無心作氣候裘袷屢更吾亦懶潯陽林子有同志惜哉不見江流遠雨聲不歇夜猶寒滴滴懷人驚夢短

初一夜同阿嵐飲

微醺人意天然好無樂能歡似少時世事翻騰醒未可濁醪作用晚應知竹風簷際撞千玉花氣宵中曳一絲對酌與君真勝俗宜春多寫宛陵詩

初二飲姚末僧家醉歸

古香一室不緣花飲客醅醪自啜茶勝事今年勤記取開春二日醉姚家

不勝

不勝思古憂時意畏見深心短氣人自滌盞盆安怪石燈前百遍賞嶙峋

人日同愈予宿濤園談藝不寐

娟逸雄豪各自奇，縱心孤往世難知。
秋林黃葉無多子，須見經營慘澹時。

今亦

今亦何嘗是無須悔，昨非直將家作客翻。
以去爲歸春淺花新，茁風來絮自飛。
荅川西上路無數釣魚磯。

辛夷花下作

葉伯聰二梅精舍

貪看辛夷踏破苔，雨餘爛熳倚牆隈。
不辭終歲長含蕊，爲揀芳時始肯開。

伯聰爲予言辛夷結蕊一年春初始花

貌似蓮花

兼氣息勢成筆陣，得胚胎一枝漫効微。
之乞就賞真須日日來。

春初寄狷生

不多飲酒畧吟詩，一事差強解自怡。
看畫焚香常乞譜，攜琴犯雨去尋師。
文書誓約慵裁答，流坎隨緣罷念思。
便是春初好消息，殷勤江海報君知。

小樓

小樓坐及欲棲鴉，料峭新寒晚漸加。
纖月度林初散影，水仙欹石却慳花。
規量行笈安詩卷，檢點裝錢補

畫。義晞髮舊遊應待我，梅莊猶得見橫斜。

將有鷺江之行聞有梅莊爲謝阜羽先生讀書處

東坡生日集二梅精舍

髯公晚年坦忘累，一石一花見用意。
天人一漚早嘗省，贊李微言洩靈祕。
世人不知加噴恚，公自胸中無

許事我生賦命亦窮冬喜與梅花得交臂百美多捐愛見存違合之悲難割置願持一念期後枯愛養心
苗長靈穗公詩我苗期後枯持此一念靜此中儻許有微合完守幽欣祛怖悸公生仄飲常耽酒蕉葉過三吾亦醉陶然
住處想平生百態翻新休妄議

不寐聽雨

悒悒不可寐夜聲池樹多攝思旋起息記夢亂真訛詩儻因寒峭春其奈雨何憶花兼憶別往歲但消磨
入春數夜連雨阿嵐每爲置酒微醉有詩

雨夜

春寒飛不到鐙煖酒酣中取醉聊宜薄題詩莫愛工簾花舒捲影檐竹短長風歡意因人具吾心有汝同
坐消巷柝轉更更一例幽人愛夜清半睡已將新夢接極思翻覺百愁平細燈善養寒滋味疏雨真諧嬾
性情敲葉傾池時迸響驟風過處著微驚

客夜示藥根

夜游忍峭寒遲眠恣性癖悶來取戰勝百計使之懌更鉦四五轉轉轉與慳惜傾壺灑餘醞耳熱面儻赤
倦睫坐強摩神光尙奕奕與子幸無猜箕踞縱談劇尙賢通紳佩嫉惡奮鞭斥上邀董狐階百靈接咫尺
驟雨橫天來庭樹聞蕭撼穿扉若有光無乃月生魄烏號鬱鉤鞞鄰嚙中怨噴散衣更去履抵脚絃疇昔
細聲不震塵大聲旬墜石萬籟集虛燈古懽追一席髮宣意則壯吾狂子頗亦良契無老醜久處見媿媿

根柢善自翬毛疵莫用摘途趨區博隘生理渾寬窄請數元會理厚翁以爲關聚散焉有常摯意視今夕

冬日循城南至仁王寺

背崖依堞盡荒村磴轉橋迴得寺門霜氣著林冬葉靜雨光沈水夕煙昏山禽信有迴翔意野老能爲感
慨言乞藥勘碑十年事無人共覓舊苔痕

夢遊理安寺鶴澗醒追寫之

碧蘚作花依古岑幽叢不雨濕涼襟微香亭外僊風肅萬綠琴邊鶴迹深絕壑天光時隱見一山秋氣各
晴陰靈僧櫛笠穿雲去黃葉千峯不可尋

同石客夜經鼓崎

山幽幽處樹冥冥風力迴篋走怒霆遙與隔江鐙火映一禾穗上一飛螢

湖上對雨

隔湖數峯橫莽蒼湖面翠禽飛不上橋門水接寺門雲荷葉聲添瓜葉響乍看高下漲寒光旋覺迷漫拓
舊廣平畦一白散濛濛層堞迴青交溼溼游龍鱗爪露纖磴矯首空明攬深敞聖湖舊游坐可憶六橋雙
峰略相仿三年不到看跳珠鱸膾蕪絲勞夢想人生淹滯待誰語卽事成歡聊縱賞扁舟蓑笠爾何人風
雨如斯徐盪槳

寄懷石遺丈

石遣人天眼衆妙參真源時亦露端倪微微爲我言天秋霜始降梧桐黃正繁片月在林陰過雲滅其痕
先生凝然坐謂此至理存賞之以幽寫動靜參玄根我亦取琴彈流泉鳴潺湲夜深不告歸秋聲通一垣
鴻鵠志八表焉能守鄉園去矣已經年無繇同清鱗涼來遇昔景獨憶將誰言京國正西風馳思勞夢魂

春感時外事
方念

惜春何忍見花飛張幕懸鈴事已微千里魂銷同况味經年頭白爲芳菲傳書黃耳渾無實吹浪江豚苦
作威豈有鄰翁知愛護借人畚耜計應非

花落花開總有時芳愁只在舊園池飛茵墜溷終吾土浪蝶狂蜂異所思早慮風霾妨始蘗長嗟藤蔓束
柔枝玉兒漫戀雕闌好倚損羅衫却未知

自古沈愁未是愁如今春色忍登樓祇聞索饗鳴墟鼓焉用揚鞭策土牛綵樹張花仍錦宴華林奏樂漫
移舟散黍谷須吹律安得鄒生與遠謀

疾雨橫風近畫檐春人小極只淹淹討方重讀桐君錄請命時煩裨史占贖面從來非悅懌齊心還計有
鍼砭禽言格磔難舒鬱願奮雷霆啓戶潛

池上晚雨

萬荷欹側作秋聲受雨池心更恣鳴涼處皆香披習習暗中生白瞭晶晶劈空雲疊懸崖狀透樹燈含遠
嶼情豈意迴風還得月杯中早映水痕明

泛湖雜詩寄陳仁先

舟行情俱移去岸纔數武煙光來親人流碧落霜宇澹然遠近間輕鷗帶三五一時諸峯意依依對忘語平生愛蹤跡尤慕舊儔侶世情有遷變此水足肺腑我舟定何適小泊便佳所風自湖心生晴寒峭于雨湖氣升爲煙顏色自相媚餘映及岡巒與明兼與翠浸深看彌好根株俱有致正緣不分明濛濛存畫意一舟並我行低篷列巾髻雁邊送忽遙先過煙中寺波空影自颺我槳但徐曳殘雪猛飛來秋老蘆花外

寄題蒼蚪閣

一廬滬外照淪漣簾几空明坐渺然點易閒承花葉霧窳天時擁蕙鑪煙人如華岳凌秋旭心與真靈結古緣最憶邨厖驚吠客小舟撐近竹籬前

每逢

每逢古樹疏籬景便作山居野處思此性宜無纒若分長言不離澗阿詩大丹可煉心先淨小築須營事莫遲語與老妻偕汝隱布衣充煖菜療飢

和墨泉年丈

巨篇報我稱雄裁雲屋天構非凡材積年藏畔聊委蛇探喉出鯁聲先譴嗟君何事苦傷懷我吟爲君散胸悝昔者玄黃初判時帝力雖厚久則疲黃土搏人分等儕臨窳者众完者稀蓬蔭戚施復夸毗闔然無剛愎以微有點而噬爲梟鴟亦悍而吞爲鮒鯢周設冥翳窮捕治其類難盡還蕃滋跂跂趨趨咸無知無

怪徇俗行姦欺帝心仁愛時憫斯謂此身存心已疵象以豐食禴之衣居以旃屨誇夥頤造物於是豈有私美高止此安能奇其餘賢哲生魁瓌已異靈性同靈釐大寶大烹躬斯宜執簧秉翟卑無辭就令伏蟄世相遺文章萬丈騰光輝惟道顯晦相推移譬如氣候區露霽終常烈澤驅蛟螭少須天地還清夷今我與君同鬢絲植身矩護常少諧朱扉畫角出復歸長笑羸馬安荳藉秋清月好芻新醅與君一飲轟怒雷二豪螟羸彼胡爲

只在

雲漢清期隔素心天門佚蕩罷追尋豈知汗漫盧放境只在晨香與夜琴

和墨泉園中白牡丹新開一朵時方有所根觸因卽君意廣之

聊勝荒枝壓小園

原詩園枝雖盛無高格一朵猶當册作王

看花劉子最知言不將孤色輕千豔肯放閒愁長舊根素面暗迴

鏡影亂香房小斂雨絲昏銀鞦洛下春騎蕩真悔當時枉斷魂

海棠

花到海棠春力盡更難色界匿餘妍高寒儻有移根處思遍圓靈切利天
花裏天人是海棠雨中獨立
泫殘妝世間絕代無當對除照迦文卍字光

早起

早起家居一大事先收爽氣待晴暉蟲吟鳥語天初判竹尾蒲鬚露未晞曙戒清微消夙習意塵生滅愧

玄機勝情猶欠江山助且得關門課隱微

羈寂

在羈能見羈寸心自有寂抱之游于塵晶然不可惑向來制微功亦用搏象力虛白生我前未可蔽一息
信知羈寂界不翅人禽畫何時兩境忘十年達摩壁

江流

江流趨海無迴勢江樹經年只舊青掠燕檣竿雲黯黯飄花溼路雨冥冥陸離世事隨奔轂浩蕩春愁落
短亭地向東南驚足斷人謀已窺望神靈

答墨泉賦六根舌字之作

物情知覺元殊絕巨細奚容失區別若云動植混可同夫豈人禽類將一孩蟲虻卵禮不傷慈悲奚待西
方佛我吞爾噓果誰是可憐強弱相殘滅異時相視等濁體何苦縱饑剔毛血與君老去學齋心六根先
憊一根舌豬蔬魚蒜放箸空簡澹隨宜異饕餮奚須選味求食譜浪逐彼曹作罪孽問來芻酒摘園蔬相
從便醉高樓月

過雁

過雁聲高獨夜飛涼蛩語澀欲明微留香襟上無時滅印影心頭欲辨非呼月滄溟將夢續飄花時節怨
書稀一庵消伴鐘魚老宣髮猶常願勿違

環翠樓第十二集時丁香盛開主客分賦

東風吹聚高樓雪灑作林梢萬瑤屑何人著力與整齊翦柔香吐鷄舌

夢窗筆談鷄舌今丁香花樹老皮皴榦蟠鐵

闌外青山對歸巖此樓如在萬山中此花曾及承平日靈禽喚起舊春心浩蕩古愁隨百結酒酣詩思亂

香雲欲詠漫愁稀故實

劉君龍生爲予云丁香花少故實

黃昏坐對窗几明過雲乍露青青月

江閣楞根上人夜談

綿雨沈春意不怡忽驚明月出江湄相逢今夕真奇夕先向來時問去時水閣玄言疑佛現世塵苦趣豈
公知明朝有約過香積筍嫩菌柔一朵頤

山亭

二十年前燈影青今宵照我復山亭猶存明祀南塘像

威公祠占於外夷鄉人爭回新塑像其中

能語前朝古塔鈴對酒有僧

傷劫火隔林無月看春星槐黃舊侶空存沒滄海無絲聚散萍

山房餞春並送僧楞歸太姥

怕爲遠望却憑高近海南風只怒號衣上墜花香色冷天涯明日夢魂勞蕪根千里愁難剪禪悅平生醉
可逃歸去支公蘭若好應無鷓鴣怨林泉

小齋漫興

印上漚波亦自怡偷閒據槁偶成詩合榼酒味苞雙藥百和雲紋瘦一枝悶暑無如亭午後病天乍度熟

梅時等閒憂恐乾坤毀結念圖書叩宓犧

鳳凰池邊一石可坐舊偕碧琴游搶江途中憇此重過憮然四首

舊日洪塘路離腸江水迴眼枯松底石曾坐碧琴來

失侶友世人遭傷比飲鏃四海一碧琴愛我如骨肉

汝亦有誰與秋墳自苦吟孤魂違我夢在日日相尋

此石故依然碧琴汝何處性交不到頭人閒罕全趣

狷生自嶺南歸海上有詩見示作此寄之

嶺海棲遲忍獨愁吳淞涼雨趁歸舟人生二頃何容欠負盡風光欲白頭

不忘粥鼓齋魚分未盡樵山釣水情吳越頻年稀對影拋離鷄澤愧鳧盟

晨窗

羃樹雲陰隱薄暉小窗蟬唱曉涼微香煙不信輕紗隔進退濛濛自在飛

茉莉夜遲其香愈烈

珠釵鬢髻簇銀蟬漱漱風香浸管絃吾夜乃非渠媚得道書讀罷且安眠

補錄去年六月十五看月絕句

露竹風槐夜氣清粉牆一角影瓜棚莫嫌看月中庭小儘有樓臺負月明

奉和無辨城東水榭見憶之作

臨流就竹使佳晨地僻尤宜寂寞身略近風光斯憶我知君同趣亦無人
今日雨涼不可出一晴還熱直須來風香佐飯非常事爲屬池荷緩緩開

和無辨見與之作

衆鳥高飛山更幽與君商略理前游買蓴早起皮招陸挈榼晴行白寄劉顧影已憎花插髻嘔心何悔雪
盈頭吾田有稔須相勞行見千篇抵滿箒

漫與絕句

古書萬卷氣吹馨坐看雙龍壁劍青買得蓮花還自供吾心太極是神靈

一席

一席吾道場一房吾洞天有酒立長瓶有書橫萬篇醉中多古思與語皆先賢神山果何處蝸牛忘埃垤
出門屬墜謫近人憇罪僇凜凜復歸來放意初安便敲扉者誰子風來時冷然故人惟汝好無猜如當年
披襟理鳴琴秋聲生素絃鱸香出簾隙塵世疑雲烟

儺

煌煌大書張誠示神鬼與人同象魏猶綠菡沚寓勸懲未始空文絕無濟吏胥何心書細字但道饒需急
捐稅牛毛繭絲析法律父老扶藜讀垂淚儺也古禮近游戲設教君常翫初意帝命祝融教夔龍剛卯旣

中央色備陰陽精魅各縱橫衰亂祈禳益靈異鼓鉦雷沸動塞途防風長人從侏儒黃金四目來于于眞
繪贖幣相酬輸堂廉勿謂吾民愚土耦能與人驢娛民牧猶是血肉軀漠視民瘼轉不如昊天二氣何時
調咎徵無聞氛祲銷蒙熊方相且不用何況干楯妨犁糞

和無辨代棋

肥瘠相看越與秦若除文字幾交親身心從此堅相約萬趣希微莫待人

秋夜對月雜詩

竟覺秋新月亦新池邊樓角乍親人漸涼何日非佳候適我清羸欲老身
素歡清景不相期愁絕當年韋左司我亦懷人明月夜欄干雖好各天涯

無辨以野翁兩字見稱余方依人愧不當此雖然是吾志也賦此以謝

平生鹿豕有心期拜錫頭銜愧美詞下選無田供歲釀官廚分米慰晨飢漫郎敢竊瀼西譽釣叟虛懸魯
望詩老去猶存長缺伴翁雖果矣野何時

江上雨夕

千山萬山晚迷濛平林吞吐雲烟中飄葉繽紛屋上碧零花狼藉階前紅人言雨大風常止豈知雨急翻
多風大江空闊吹尤烈渡橋常恐肩輿裂却忘衣溼貪遠望天邊行鷺明于雪何來老翁引舴艋箬笠持
竿弄秋影風狂雨驟總不知世外君子是耶非

答無辨秋池之約

秋池淨碧試來過，直少人同趣始多。知子有才能用意，不將蕭瑟看枯荷。

溫泉浴後坐而晚眺

山氣陰沈晚靄中，日斜更染淺深紅。適當坐處一泓水，却爲人來幾樹風。浴罷身輕如服散，詩成句勁當彎弓。獨游能趣吾如進，偏是生疏得暫同。

閏七夕洪山橋酒樓

西村江水帶平田，菑後農家尙有年。人伏稻叢惟見笠，羊循草路不須鞭。微覺暑殘涼意生，池荷猶送晚香清。停車山徑知何意，記聽寒蟬第一聲。布帆一片是漁艫，天捲長虹入小窗。楓葉蘆花都未有，只憑寒日看秋江。松間千百點流螢，照見二更江路青。我愛輕涼足醒酒，憑渠疏雨換明星。

嵐君怡女賦香烟詩詞頗清麗予亦繼作

霧閣雲窗禮玉晨，醮醮如寫幻中身。心惟一瓣曾千結，影到難疏不可親。柏子秋陰沈夢境，蕙花老色損愁人。烏絲銀字緘藤篋，却擁風爐理夙因。

苦趣自嘲

飢驅僕僕負朝昏，插了梅花又出門。拋却天人親俗子，肝腸何日不煩冤。

道途語默百違心老骨奔馳已不任
千里安能勤訪友五年未得靜橫琴

婁塘曉發

細花猶燦昨宵鏡曉夢沈牕喚不應
何愛紅牆鄰洞府已成下界望觚稜
悽悽曙色催飛轂歷歷星芒帶翠
塍誰謂川途容獨往臨分有侶只難勝

贈陳明

字主欽嘉興人

陸沈天醉痛神洲舉世忘憂此老憂
信有陳明真國士一生義孔在心頭

君善易

鄭容

容子國容福建閩縣人布衣有無辯齋詩

石遺室詩話國容足不出里門所交不過里中三數子而有詩一卷甚爲陳穀菴鄭太夷所賞大略近體工者似後村誠齋世有爲詩數十年而未能或之先者亦以難矣句如夜坐云風雨何能愁夜坐但無可與共聽人花朝云酒杯在手休輕放老去春光更值錢中夜有感云生存強作中年樂死諡甘當一字狂課徒偶作云弟子讀書聲漸暢此閒何止一瓢喧景屏軒池中云與君夜半月中坐看此林陰水底天晨作云看畫已完還展卷何曾虛坐綠陰中根樓晚吟

云哀吟自足仇茲體醇酒婦人寧易謀雜書云軒冕者誰子譏我不善變禽獸之富貴寧敵人
貧賤後數聯語頗驚悍

送龔九鶴葬

臨歧一慟涕洟瀾撫我平生死友棺黯黯相看親骨肉寥寥知己白衣冠人天何處尋歸路風雨無情作
暮寒從此北邙墳上望白楊黃土兩漫漫

九鶴死歲已周作此祭之

貧賤驅人事可悲總無暇日泣君時生平談笑思猶見魂魄飄零祭豈知隔世故交疑昨夢昔年墳樹長
孫枝雲車風馬歸何處欲盼精靈來下遲

和梅生

元作極念碧琴
故有吾儕之句

和寡不悲緣子在酒闌相意且眉開吾儕有淚得弗易流輩雖生猶可哀

大雨河水溢寄陳樵琴

眼中積溜欲平廊想見餐醢戶外塘虛檻差容通野艇前庭直欲設魚梁門生家近堦相守書卷樓高可
預藏一事讓君瀟灑甚床頭濯足有滄浪

贈林叟

園林聞道一塵無何日裁詩立座隅早歲已能端所履旁人但解美其鬚得閒閉戶理花樹有約攤錢過

酒壚早計買田歸隱去天留此老與吾俱

睡醒

睡醒殘更別有情夢痕秋影不分明水流花謝思前日鳳泊鸞飄過半生照几牕螢疑火在墜階林雨似人行枕函敲遍無詩句孤負鐘聲與雁聲

始覺

始覺蕭條悲客心微紅燈火屋廬深西風莫更吹庭樹留與寒蟬數日吟

和鍾壽若河樓小飲

毋因一雨敗遊興卽雨仍須攝屐來來日更看河上樹恐成黃葉點青苔

贈鄰人

一貧漸覺風懷減百計難將世事遺居傍君牆燈火近應聞歎息夜深時

物理

樹頂孤蟬似詠詩籬根羣蟻亦陳師忽然雨至丸泥溼高處風來一髮危始覺人生多幸免細觀物理已無遺近年頽放爭機息惜此頭顱欲白時

送林雪舟游杭州

孤雲獨去鳥高飛祇剩閒身對翠微出處原隨天性便過從漸覺故人稀漫因世亂荒治律要念親存早

拂衣浙水有情襟帶隔艤舟他日或相依

題友人湖居

世俗縛人如網罟安得將身作漁父生買城西十頃湖死埋湖上一抔土吳生與我同肺腑結屋此間意自古未能唾手得斯湖先借漁舟弄風雨

月夜聚飲花下和拙廬

能令秋色接杯盤誰道蝸廬位置難簾捲月如詩句好露深人共菊花寒數枝斜倚尤多態昨夜遲眠祇自看但取眼前清趣永何須風味話尖團

有欲邀予入詩社者作此答之

強與時人存古調可知吾子劇無聊何如高臥南牕下雁語蟲聲共此宵

醉後同林大年過開化寺

身廁俗人間賢豪亦等閒新晴生意興薄醉出郊關寺得明湖助僧遲倦鳥還佳時偏易暝行戀夕陽山依然

展轉兵間眇小身老天不屑死詩人依然來坐梅花下細細焚香拂戰塵

月夜懷天遺

明日天遺定寄詩詩中定道月光奇何妨今夜虛齋裏爲擬先生獨坐時閒話無人憎對影清輝如水見

低眉從來氣類多相感，思子還知子我思。

次韻天遺夜譚有感

百種矜奇讓少年，等閒贏得一嘻然。坐遲夜燭知人倦，意澹秋花爲我妍。未梓新詩須遞錄，難逢佳士且隨緣。九原喚起何少龔子輩，共語光宣喪亂前。

七月九日碧栖招集李園沈公祠

秋炎承殘暑，逼我欲無地。體胖居未廣，坐此成大累。山陞沈公祠，境間人所棄。軒軒神宇旁，吾師精靈萃。祠中附祀枚如夫子師性本蕭閒，亦喜飲文字。碧栖此佳招，風雅侔氣類。褰衣亂木間，商飈習然至。露果低可摘，風蟬逸欲墜。平池明樹底，細路接城次。野趣謝塵囂，冷身足吟醉。新蟾送斜陽，空明滿蒼翠。歸路更悠然，白葛生涼意。

石道室前新鑿小池詩以落之

石道先生無不奇，閉門頃刻開方池。平生看瀑記多少，戀此勺水將何爲。池上竹竿敲寒玉，齋頭書卷明深綠。客來相對澹無言，不知有雅何論俗。微風初動波粼粼，無萍無藻無纖塵。曉起憑闌意自得，能使詩句生清新。頻年世事因瑣瑣，安得時來一靜坐。先生之樂似有云，不必觀魚但觀我。池水養魚

化城寺晚望

百忙未忍棄秋晴，隨意來登舊化城。一片新經兵燹地，夕陽莫放十分明。

雨中登鏡湖亭呈同游諸子

亂雲爭堆山逾奇，白雨更與湖相宜。湖天近暝復迷離，飛橋遙樹生寒姿。扁舟渺然人影小，枯荷殘菱相參差。晴光澹澹未爲好，異景乃在煙波時。何事亭間徒悶坐，湖上老漁堪作夥。不如往借一釣槎，弄水弄煙無不可。

雨夜寄枚生

各將風雨作良宵，莫怪常人道寂寥。多此池亭三兩樹，比君書屋更瀟瀟。

夜歸

家無兄弟依朋友

陳元孝句

朋友於今孰可依，心怯淒風街靜候。手携耨子夜深歸，溷身濁俗生爲贅。託命殘

經力已微，更蓄滿眶憂國淚。何人林下與同揮。

夏夜偶成效放翁體

大馬高車赤日中，何如坦腹北窗風。晝長漸覺閒無賴，睡美方知靜有功。徒具癡肥非道勝，卻贏窮拙未詩工。箝籐巾葛呼兒辦，預備他年作老翁。

爲半野軒購鴛鴦作此寄之

好與鷗鷺作比鄰，池亭點綴助鮮新。爲渠伉儷謀安處，卻是人間獨宿人。

夜吟

夜分少破移時睡，明旦多添幾首詩。
紅日一升佳想斷，只餘世事使人悲。
莫怪年來少作詩，性情不與世相宜。
羌無清興多孤憤，未足娛心且謾時。

游深山居園有感

門掩竟虛佳日過，園荒想見主人忙。
老松不比閒花木，灌溉雖疏亦自長。
能清蕪穢便良圖，小小園林可自娛。
所植已繁難檢點，放他瓜蔓上高梧。

夏夜攜壯兒納涼作

插花淪茗又焚香，父子相携作道場。
忙者得閒時亦暫，晝雖恆熱夜彌涼。
漫憂國少三年蓄，翻喜身無一藝長。
澹薄門庭冷情性，不妨世我兩相忘。

小西湖憶龔九鶴

煙林愁色入模糊，似展登臨舊畫圖。
世短老懷誰可共，君存吾黨不曾孤。
扁舟記取看斜照，雙影冷然落此湖。
今日獨游歸未忍，水禽向暝正相呼。

五十自壽

蕭蕭短巷嵩山麓，中有欺斜一椽屋。
同居老嫗八十三，膝下兒年六十六。
嫗健門庭任掃炊，兒行風雨如黃犢。
山人依此百無憂，飯飽眠酣事課讀。
鰥夫有子不妨鰥，安用梅花作眷屬。
床空夢靜逐孤雲，窗淨風清過疏竹。
入則几榻有琴書，出則鄉鄰無謗語。
逍遙我且爲身謀，何暇隨人僞歌哭。
吾年五十未留鬚，健

啖依然身不羸披巾曳屣意得水濱林下來于子古人已往今人傲胸蓄妙言無可告不如把酒賦新詩獨立蒼茫聊自賀

初秋坐夜

不遣燈光亂月光無風露坐自生涼梵言隔院千聲佛花氣中庭一脈香良夜能令拋美睡老夫非爲怯空房十分消受知逾分更冒詩名未免狂

西湖曉臨

平生幽癖愛晴煙來看濛濛破曉天社事已凋誰念及湖流雖早尙悠然早寒少忍吟樓上初日須臾出樹巔著我綺窗朱戶裏此時不過任酣眠

正月十六日憶烏石山僧

連日笙歌已厭聞幽齋無侶坐思君渺然能與茶煙合惟有烏山一片雲

壽富

壽富字伯蕪滿洲宗室光緒戊戌進士官翰林院編修

和彥復見贈

故人天末問平安拈筆臨風意萬端劫華夷同苦毒危時仕隱兩艱難白雲芳草應無恙玉宇瓊樓日愈寒別後情懷驗雙袖至今熱淚未曾乾

送石道南歸別後寄

瀟灑元龍意氣真登堂握手便相親山河千里有知己文字三生悟夙因賭酒鬪詩消永晝落花飛絮寫殘春那知傾蓋論交日已是驪歌送別辰

西山轉瞬又經秋木葉丹黃豁兩眸萬樹霞光當日落滿林春色爲霜留峯頭畫本隨時變囊裏新詩到處收惆悵燕京好風景故人何事不同遊

袁勵準

勵準字珏生直隸大興人光緒戊戌進士官翰林院編修

贈別四首呈仲實索和 錄一

君魂何處賦來歸南北東西今昔非早歲曾爲梁苑客頻年又息漢陰機幸無一臥違青瑣忍對千家坐翠微况我秋來最傷別離心早上灞橋飛

楊增華

增華字昫谷江西新建人光緒戊戌進士官四川候補知府

秋日同香宋侍御游西山宿戒壇

秋風吹白雲挂在城西岑一山如馬鞍中有七寶林唐碑漸苔沒石罅花深深坐久夕陽下數蟬調古琴
松濤與鐘磬並起作梵音吾曹抱冷性涼月初在襟有酒且復酌此樂難重尋倦後夢無據山靈知此心

山中同香宋作

亂後石幢在到來秋味真一龕松入定三日雨留人老至思殘納山空得古春酒闌同說夢和月問前身
贈曇寬上人

卅年留得破袈裟鎮日關門誦法華愛衆常聞申五戒安禪不廢演三車參山度海身將老食粥棲茅願
已奢記取松風傳妙偈人間何地似君家

壽堯公

坐對黃花憶生日一杯重屬傳鶉觚近來闕事復安在老去閒情頗不孤詩力驅風鬪松石夢痕和月落
江湖與君脈脈共秋味誰信人間有腐儒

題石遺所居小秀野草堂

斜街記訪俠君廬小坐貪看月上初
便具杯盤皆雅澹微吟草樹亦清疏
秋風一別驚殘臘閩海應能著
老漁俊僕臨池如谷口寄詩端合使渠書

君有僕能詩草
書酷似鄭蘇堪

訊伯嚴

一樓自據爲天地樓外車聲逐日過
夜聽海潮知夢短口銜石闕閱人多
思鄉賸有青山在對酒其如白
髮何想得閉門無可遣燈前展劍詠荆軻

四海無家對影孤餘生猶幸有江湖
鷺鷥人外能相慰龍象天邊不可呼
酒後偶聞評穢史年時真悔讀
陰符舍君痛哭知無所明日登樓看海枯

會祭陳后山先生未至示同人

近人偏嗜梅都官君胡獨取陳后山
書來約我法源寺醉以芳醕敷椒蘭
今日何日歲欲闌我恨不如老
衲閒月餘悅悅無一字政坐不諳曹洞禪
知陳最深者三賢曾輩蘇軾黃庭堅
王雲掃門已不及僅從魏
衍得數編君之黨陳與梅抗三賢雖好無此專我於是日不與祭亦如王子嗟
緣慳吾曹論古何敢偏窮
源要溯天中天梅陳好句絕可愛其力僅足造一關強譽一家冠千古逆知古人心未安
后山有知必大笑子言允矣詩仍寒我懼一寒尙未徹去來苦被塵勞牽袖詩呈佛不知愧佛當洗我菩提泉

送堯生歸蜀

歸計真忘蜀道難，燈前強說醉鄉寬。時人自古爲時棄，諫草零星作史看。天地故應窮位置，文章曾不揀飢寒。荻花風葉瞿塘路，後夜秋風寸寸灘。

題伯嚴清明上塚詩後

寇退曾子返晴廬，悅在目亂來幾清明。殘陽蕩林谷中丞，退居時夢寐憂顛覆。寧知十餘載，遽已丁百六。公子人中龍窮老，走江麓歸來春非春。含涕薦野藪，七日別山去。四山杜鵑哭，銜悲渡章水。鴟嘯風雨屋，示我上塚詩。其聲淒以促，問天天豈聞。相對但躑躅。

約伯嚴遊大梅寺

大梅古寺補迦山，花木中天玉一彎。漫士墨痕逃劫外，美公詩卷散人間。芳甘泉味能留客，掩抑雲心學補關。老去陳陶堅自晦，可無幽處寄荒閒。

有感

便得微風散暮陰，鴻荒元氣渺難尋。抽刀斷水羣蛟泣，倚杵看天萬鬼瘖。此後煙雲隨變化，古來賢聖各消沈。卷菴不死空淒絕，政苦無人與拔心。

次韵醜堯公見贈

來往人間未是歸，長安漸次故交稀。酒邊此意供長嘯，夢外何天遂退飛。相對無絲論得失，所憂甯獨爲寒飢。羅浮一例峨眉好，老轉荒龕舊草衣。

贈香宋漱唐兩侍御

用意微殊救世同，柏臺交舊古人風。
愁來食藥心常苦，事到移山力已窮。
自笑一官應棄外，頗聞十疏半留中。
尊前糾得天方醉，早報寒江釣雪翁。

題堯生侍御香宋圖

一官山色夢嘉州，羨汝南榮松菊秋。
綠綺親傳蜀僧語，清池猶省宋時留。
閉門高臥疑安石，當代論詩數倚樓。
暫別家園知復悔，渺然人海泛虛舟。

酒邊一卷當還鄉，笑我南遊髻欲霜。
八載燕臺共春夢，三間茅屋付行裝。
恩仇併世悲牛李，文字西行重馬楊。
老去願充園圃役，畫中鋤月醉花香。

王式通

式通字書衡，山西汾陽人。光緒戊戌進士，官大理院推丞。

題島田彥楨函宋樓藏書源流攷絕句十二首

意輕疏雨陋芳椒，賓客文章下筆驕。
割取書城歸舶載，蘋風淒絕駱駝橋。

李宗蓮函宋樓藏書志序盛稱濬園先生求書之勤，謂乾嘉間

石家嚴氏芬椒堂南溇劉氏疏雨山房皆以藏書名，嘗見二家書目著錄寥寥，豈足與先生比長繫短，雖大旨蓋實錄也。

儀顧堂前子弟佳一家志趣尚難諧清風輝映吳興錄晉石厂承咫進齋歸安姚彥侍方伯名觀元罷字後寓蘇州蕭家巷公子慰福字

公蓼父子皆好藏書方伯刻咫進齋叢書公蓼別刻晉石厂叢書

丁董羅陳嗜好偏書亡同損一宵眠重思獻縣違心語泡影山河祇偶然叔雅授經叔韞士可皆有書癖聞信相告束手而已紀文達言

趙清常歿子孫鬻其遺書武康山中白晝鬼哭何所見之不達耶大地山河佛以為泡影區區者復何足云我百年後儼圖書器玩散落人間使賞鑒家指點摩挲曰此紀曉嵐故物是亦佳話何所恨哉語最曠

達然文達又言嘗見媒媪玉佩數事云某公家求售外裏殘紙乃北宋槧公羊傳四葉為憫恨久之則仍未能達觀也故葉綠聚太史詩云山河泡影談何易一見公羊涕不禁

翁潘大雅今銷歇江費風流並寂寥坐使靜嘉騰寶氣人生快事讓君驕陸氏甯宋樓十萬卷樓守先閣之書盡歸岩崎氏靜嘉堂文庫

日本藏書向闕史集部今驟得此宜彥楨稱為人世大快事

疏草重尋一涕洟藏書初願總參差雷塘弟子思前夢親見虛懷討論時長沙張文達師擬奏設圖書館疏稿已具事不果行師於今春

二月覺於位

調停頭白范純仁俯仰千秋獨愴神有客為書會乞命湘濱宿草已三春首用廣雅相國詩句光緒癸卯年相國在京湘鄉李亦元刑部

名希聖曾進建館藏書之議相國有意提倡會以出京中止而亦元不久下世嗣無議及此事者

巴陵方與歸安陸一樣書林厄運過雁影齋空題跋在流傳精槧已無多亦元遺著有雁影齋題跋所見多巴陵方氏藏書庚子後大半

失散

海外琳瑯亞漢京客探祕笈品題精微聞東士傳新語翻案來朝畏後生客秋九月二十八日在日本東京借仲戩子培兩提學至鞠町

御料理地宮內省所轄之圖書寮觀內府藏書典守者羅列精本請定甲乙意殊誠懇培老謂東游以來惟茲事差強人意仲老戲曰君勿慮防島田明日翻案

歐化東行漢籍摧書生有志力能回竹添餘論篁村教家學師承造此才

彥楨所師爲竹添君名光鴻字井井著有左傳會箋棧雲峽雨

日記其尊人篁村先生名重禮學兼漢宋平生無他嗜好但愛書籍藏弄二萬餘卷見鹽谷時敏所作篁村島田先生墓碑銘

未窺舊籍談新理不讀西書恃譯編亞槩歐鉛同一映千元百宋更懵然

侯官嚴幾道先生每教人以瀏覽古書熟精西文爲研究新學

之根柢客冬晤先生於上海語及近年國文之衰衰科學之無實太息不已

三島於今有西山海濤東去待西還愁聞白髮談天寶望贖文姬返漢關
如海王城大隱深遺經獨抱幾沉吟白雲蒼狗看無定難遣牆東避世心

鄧實

實字秋枚廣東順德人

題徐俟齋畫山水

故山如在有無中堪歎遺民落筆工賣畫驢歸人獨坐數株松翠晚搖風

秋夜檢亡弟秋門遺詩

白日忽已暮西風吹我廬幾日不出門庭葉落已無大野空蒼蒼寧爲載愁區來日適大難去者不可呼
海水日夜東暫留難斯須嗟哉我弟兄壯歲多崎嶇南北萬里別坐哭天一隅天寒各歸家慘慘顏色枯

生無一命寄死無一日娛汝歌動我悵汝吟憎煩吁汝病我鋤藥泥足荒丘塗暮歸坐床頭寒燈照人孤
一朝辭我去埋骨青山墟月明荒草碧萬古長歎歎我悲汝不知辛苦獨愁予愁予亦已矣生死竟何如
寒風吹敞帷秋堂夜空虛黯黯青楓林魂來若糝糊展篋欲吞聲終宵自躊躇俯仰千載名人事恐見疏
感此不能寐起行步前除草蟲鳴我旁微霜沾人裾

題方君羊城雜詠

江東詩句阿龍超白紵歌詞紫玉簫我倚紅闌聽不得殘鴉煙水柳波橋

鄧方

方字方君一字秋門廣東順德人有小雅廬詩集

石遺室詩話余未識秋門曾識其兄秋枚皆才人也秋門早卒年僅二十有一已有駢體文一卷詩八卷千有餘首大略五言多近漁洋七言多近梅村斯已難矣茲特錄其不近梅村漁洋者若干首斷句如鶯花話舊張三影詞賦哀時郭四朝夢尋紫邏蠕蠕塞身號青山僕僕仙東南孔雀飛飛去西北高樓渺渺憑一城花月庾開府兩鬢江山趙倚樓集句如三峽樓臺淹日月五陵衣馬自輕肥對仗皆工

雙瀑

雙泉天際來勢若龍引頸餘波下擊地又如虎嘯猛清寒及一里奔崩應萬嶺入暮山有神我來先自屏
凍逼身半僵骨戰血逗癭衆山靜已睡獨對一片影時聞擊拊聲羣仙宴峯頂磴滑不可梯陰陰羃寒景
風吹礪松月高照石壁靜去眠高士祠秋鐙夢江艇

吳淞江口觀音閣坐月

涼風吹雨過海水萬頃碧飛閣對吳淞返照射畫壁壁上雲氣開古佛露鐵脊我來待明蟾焚香坐瑤席
道士暮不歸瓦鼎餘素食紺殿氣冰冷下睨見飛翼溟濛淡水洋月出若可摘皓皓天河秋磊磊疏星夕
迴睨寶山城城影水中黑沈酣萬家夢上有片月白是時聞哀鴻淒切不可極無人伴清寒兩鬢上江色
但見白衣神佛火光寂歷

火車中望都城諸山

曉月下蘆溝行人坐山脛出郭未五里巉巖峙萬嶺拔地形鸞翔竟天勢馬騁玉泉頗蜿蜒錦屏獨修整
巖去奇若失峯來美先逞巖霞鶴背晴初陽雁邊炯西山百枝幹下盤十萬井遙知登高人俯見田稜稜
千仞青巒秋天色壓我頂西風吹枯山野火燒亂梗車行迅風颯驚魂與輪迸揮手謝山神遙見飛鳥影

雁門行

鄉尻聞人述甯武雁門關形勝譚次色飛爲撰是作

三晉山勢皆趨東東連薊門盡堯封山西之關四十餘扼險踞隘疑爭雄中有雁門最高絕關形屈曲長蛇同偏頭下垂五寨口拖尾走繞三城衝樹木鱗鱗萬萬片蛇背突兀摩蒼穹雲中趾爪微有無全形半入天門峯鵬鳥扶搖不敢度猿猴攀捷驚讎馱馬頭裂石劃汾代得觀此境非天窮蜿蜒一線開地軸疑有鬼斧兼神工天梯上下互鈎鎖獨馬左右穿蠶叢虎豺逼人氣已慄懸崖半步心先忡仰眎一髮掛藤蔓盤虛人馬如蟻蠓絕頂側窺見全晉噓吸上與青天通我馬不前路陡斷舉手欲接冥冥鴻入關積氣冷徹踵層冰萬丈無時溶此地相逢半人鬼漢家戰骨爲沙蟲關內關外一萬里但見秦月懸青銅明明照見秦牆中古時燭淚堆龍窻暗門落木嘍金絨草間礪礪何王宮劉琨通胡割五縣塞土又作千年紅惜哉此老大非計不如獨眼唐家龍三垂岡下馳紫電綠衣義兒終成功殘唐半壁魚肉爛太原獨守甯非恭後來北漢橫草起死寇亦掣南來鋒抱孫弄子日爲樂四十有載無稱戎與圖南隸乃天意割除終勝長城公朔雲燕月我來處鼓聲播動干穹窿念家山裏烏嘯風青蛾老去歌雲空壯士無家枕白骨宮人遠嫁隨秋蓬何年燒荒山童童監門夜守狼頭烽撫彗星兮躡天虹登臨涕下雲濛濛揚鞭走馬復西去古人不見誰掛弓

梅

細雨關山路江南兩度梅真成道旁折復傍戰場開雪裏行舟泊春前驛使來垂垂花自發歲暮有人哀

去滬城

源裏王圻宅江前季迪家我來問漁父人去見梅花舊館生春水孤邨入暮霞招魂楊老鐵哀怨起琵琶
有送

細雨一杯酒野花飛客途東風動人柳幾日到姑蘇華髮作孤客綠春生五湖如尋賃春客爲過伯通廡
與同學黃四任二家兄實君午出北郭小飲寶漢茶寮觀馬廿四娘墓券

落木急寥空蒼蒼秋色中重城臨粵秀萬嶺導南雄霸氣殘山紫尻人古柳紅茶寮話金石醇酒向西風
放言

風雨高吟兩鬢塵閉門敢已定千春花邨事業虛者舊獨漉文章見苦辛滿地江湖餘我輩百年河嶽幾
詩人古賢遺直今寥落香草誰家著意新

楚火

楚火連橋下帝京大江無數鐵枝橫山圍故國南朝小酒釀兵廚北府清歸雁斜飛瓜步月落潮幽咽蔣
州城景陽又是樓鐘動霸氣潛銷是此聲

樵官上冢詞

亂峯陰霽畫零星羅葛風香礪上亭如蠅行人高下去杜鵑紅外四山青

東箱題壁

酒冷香微下玉鈎更無人處獨登樓梧桐吹墮一階影暮雨瀟瀟曉未休

羊山雜詠

寂寞呼鸞古道微，斷垣殘瓦雨霏霏。
銷魂不見王貽上，斜日紅棉作絮飛。
寶漢茶寮賣酒旗，濃秋煙景晚唐詩。
馬家廿四孃如夢，一路青山叫畫塵。

沈贊清

贊清字雁南，侯官人文肅孫，官廣東候補道。

讀舅氏木菴先生遺詩，泫然有作。

青山圓碣想靈暉，可但能詩世所希。
七品宰官從薄暮，先生絕學直扶微。
觀人子弟深自省，先生對鏡風
霜屨厚非少日，拊頭期宅相。此時胸臆祇重欷。

曾毓瑜

毓瑜字□□，湖南湘鄉人，有東溪詩草。

西征曲

當年肆伐振軍威，疏勒城頭羽檄飛。步卒日行三百里，旌旗一到解重圍。

窮邊山隘費探尋，回部魁渠一戰擒。西過敦煌六千里，豐碑紀績邁裴岑。

湘軍擒余小虎於明約路立碑紀功

十里荒郊草色殷，戰場寒樹弄斜曛。可憐雁塞迷離塚，半是湖湘子弟墳。

桂念祖

念祖字伯華，江西德化人，有遺詩一卷。

次韻酬某君

詩心淡後無奇句，世事談多有淚痕。與子細尋無味味，共余相喻不言言。當來彌勒終生世，過去巫咸尙理冤。試把十方三世看，鐵渾崙亦不須吞。

登關口臺町最高處納涼有作

登臨爽氣新，愁客暫怡神。草木都遺世，川雲解媚人。趣幽雙蝶見，涼早一蟬聞。那識家園路，炎天莽寇氛。

贈陳詩

吾哀謝靈運，心雜誤清修。又慕李長吉，才奇預聖流。古今三語掾，天地一詩囚。詩也真同調，何年結習休。

傅嶽棻

嶽棻字治薤湖北江夏人光緒壬寅舉人官教育部總長

自中歸鄂舟中書感

舟行溯江尾未覺離海門洪濤接混茫運化同崩奔但見滔日勢誰知濫觴源非聞海若語將爲河伯言
世亂輕遠行心寂辨羣喧結侶得良友密坐情話溫遠樹若禾稼微見青黃痕秋風正搖落蕭瑟滿乾坤
流波無時休生理日難論家山阻雲濤荒江日昏昏

舟行中江上流晨起卽景

晨興懷秋深江光淨毛髮水煙如白雲漠漠山水合舟近漸疎散次第見叢薄安得長空濛中著幽人宅
清景急追琴歸與畫師說

松厂時
尙在鄂

石遺老人避兵北來過小齋讌集卽次其贈散原韻奉贈並呈天琴泊園兩丈

雪力不如雨破塊九衢昏墮厭塵盪衝寒一老闔然來不分今卿與昨拜
簪霜氣不憊故鄉歸隱好江家居頓被羣兒壞未來萬口已爭傳消息先遣詩爲介秋風不得會幔亭
客星未許釣嚴瀨兵間轉側度如常真人固知息於內上都耆舊勝東南雞鳴能破風雨晦召邀勝侶盡

晉書
皇甫真傳

詩流到處尋常無酒債，岷然並峙皆大國。有如潯江分九派，秀句茗翠插鮮新。雄詞鯨濤跋澎湃，吹噓元氣可回春。善養寧虞豹，食外從來大隱宜。金門翁曾一誤，其可再銷憂。較勝粲依劉，乘興無同獻。訪戴冷齋夜話具，薄供漫說滄波性。所愛杜句滄波老樹性所愛時流佞佛食無肉，知味仍受孔子戒。佇看一戰霸詩增喜，過破賊聞兒輩。

林翰

翰字西園，號羽人，福建莆田人。光緒壬寅舉人。

石遺室詩話：西園詩工不淺，意境時有獨到處，惜其讀禮里居，余又避亂遠遊，不得就其全稿。選之。

秋日雜興

中原此局算衰殘，蕭瑟江關活計難。白髮黃金雙怪物，看人老大與飢寒。肯損秋齋一夜眠，望空微喟壁瑤箋。七分星月三分雁，占斷東南萬里天。

謙宜招賞牡丹，因讌客不赴，詩以紀憾，並和見示之作。

佳招不赴自提壺，爲問名花笑我無。久客鬢輸山色綠，新年詩共雨聲麤。百場冠蓋都成闕，一席風騷獨

向隅檻外落紅君莫掃倘容叩闥補歡娛

遊濤園

列坐聽談詩名園許一窺振衣上危磴側帽避低枝江遠烟帆小山空晚鳥飢兩朝興廢事猶有老松知

環碧池館賦呈同社諸子

勸君莫拒飲勝地那易得亭榭抱幽意花竹弄晴色昔人遺水石所以待幽客池魚無遠心庭鶴有倦翮及茲物感靜把酒共芳夕不醉負名園風林發歎息林梢纖月上照我髮將白

春盡日飲匹園歸賦

江城一角遠塵喧小築樓臺有此園白酒與春期後約烏山俯座聽清言燈前看鬢花光在園中有花光闌竹裏行廚野意存頗喜今年塵累少屢陪籍湜到韓門

奉約石遺師暨社人四月十八日飲宛在堂

中年光景已奔輪再到湖堂不是春記否禊辰同倚檻碧桃始綻柳初勻苦覓尖叉百不成携魚沽酒出西城片時占作湖山主端恐詩竈有笑聲平遠臺前欠一詩又攜衣著對風漪明宵遊興知誰足坐到鐘鳴月上時

社人三次集半野軒賦答仲純特觀鑑保秀淵梅峯

名園豈厭頻頻至只恐名園厭酒徒天下荔支吾邑最嘗以莆產荔子餉同社湖堂明月此間無上月十八日集宛在堂雨後得月而

十五夜之飲則未秋華髮驚爲客向晚紅橋想釣鱸園內有絕愛平池人影定天然一幅說詩圖

秋日集怡山長慶寺分韻得居字

佛家六賊一曰口談詩飲酒真狂愚三山之閒戶十萬何地不足供行廚晨興嘯侶山西郭競跨柴轂乘
笥輿千章老松十尋蒞竦立不動迎路隅山門金剛駭異事入告佛祖皆軒渠詩人與佛乃殊嗜從以肥
因兼大魚佛言詩人亦不惡其性大抵親浮屠伊蒲且具地主饌饕餮何損梵王居寺鐘沉沉日照席亭
午置酒臨前除須臾座中狂態出眼耳鼻舌驚萬殊或移枕簟就禪榻或索鑄鑰觀御書寺有清聖祖御筆藥師經

如髡溯擅諧笑或若嵇阮能歡飲閒情或問交甫珮豪氣或話終軍繻輕雲微風散塵暑千佛列坐寬有
餘佛也莊嚴客放浪揮之不去歸徐徐似聞蓮臺有微旨咨汝屏翳將雲車怡山諸客興未盡汝作陰雨
爲之驅亦使卜晝不卜夜免酒肉氣熏必芻陽烏忽匿西海嶠客去不顧疑絕裾北山黑雲逐人至頭上
盤盞傾萬珠徒行未將笠與屐自笑巖溜垂鬢鬚野曠何山得借避路滑相戒毋疾趨佛言薄懲此已足
還汝晴霽行康衢燈明移樽入酒肆好月仍與詩人俱我意詩人寡詩料安知此雨非急需况勞天龍洗
衣烏六垢浴盡輕我軀西向怡山禮佛祖道我拜賜爲何如

西園舊址分韻得賦字

主人選勝六塘路一水一木皆掌故中使軒車不再來園爲明督舶使者游讎之所孫陳林李隨朝露古今何歲無中
秋曾飲此園客無數我來倚樽待秋月與園林有雅素園名我字縱相同王謝爭墩那學步人生有力

古林泉歡樂未終造物妬陵谷易遷况片土他人入室公毋怒

園今爲網商公所

朝來繁盛夕爲墟捷足得之何

足慕廢沼已無畫舸橫小樓僅有綠陰護數百年來游讌場賸得水邊數行樹下階撫樹發歸興明月勸我且須住我亦海濱有數椽他時歸擬小園賦

同社諸子集湖上開化禪院並邀助甫友漁夜飲分得常字

雨菘霜蟹亦家常清夜湖亭勸舉觴雜樹亂遮三面水疏鐘閒打二更涼坐呼白月陪生客醉看青山似故鄉一事令人相動色新來詩旆頗飛揚

鑑保招同秀淵仲純友漁梅峰冒雨飲洪江酒肆既晴遂遊小金山限用肴韻

蘇侯豪氣能刺蛟臨江踞坐呼酒肴酒酣喝雨雨爲霽羲和捧日懸雲梢洪塘有山似京口具體而小疑浮匏山門留帶有家法速我訪寺褰衣稍我昔游江見樓閣阻雨返權山靈嘲雨師今日肯退舍一補遊興天所教江船不來午市散人影六七行山坳循山得園息腰腳簪組到此從可拋

順道觀曹能始石倉園

石倉新

主已豪富却與野老爭衡茅行行林際見澄練青山一邏江爲包水心孤塔逞骨力坐聽激浪鳴千鏡今年秋漲刷山脚梵宇破塌如危巢四十四公飽風雨

塔江寺有洪塘四十四先生龕

天寒守戶惟蝻蟪江山四面幸不改

此遊尙勿輕警警回舟試看山下石篙眼形與蜂窠湑茶坊一客怪久待

秀淵不登舟待於岸上茶肆

謂泉之美逾虎

跑涉江惜無中冷水攜與品茗閒推敲且歸作詩寫江色可有寒語如孟郊水邊行人指故宅不往爲恐

勞山庖

鑑保舊居在江側因暮未往

題濤園集

同光閩才門戶立公亦宏博矯風習

沈菴語

春陵之策杜鵑詩臣結有言臣甫泣諸夏無君亦已久閩編猶

署義熙集官左髯蘇兩可兒平生從容與拜揖瑕丘作史周道衰玉局謫官宋事急可知世臣矢忠愛意與千古通呼吸烏山有園富松栝影前兩度瞻屐笠遺詩猶作老松聲龍髯呼號風雨及采薇故人半告存晚晴篔外攜詩入

和謙宜息園落成作

吾宗豪俊世所驚卜宅酒衙常清醒俸祿到手不愛惜揮斥盡以張園亭園成置酒召賓客庭花百態開娉媵主人所樂客與有登樓一覽青山青好書萬卷不屬意意在梅譜兼鶴經客亦有園僅盈畝近市未足娛心形雜樹比梅孰妍好鵝鴨與鶴誰甯聲老逋家法不能守敢以凡骨儕仙靈人間倘有換骨藥吸景願與參黃庭息園主人且休息客去不擾園清寧梅花娟娟正弄影鶴聲一一皆可聽

伯修鐵庵以半野軒池魚讌客鮮白非市上所及以詩美之

六月荔支十月魚吳園食品兩稱絕紅蓮青草皆魚名辭碧池須臾化作銀盤雪盤中羣筍相槎枒勢如飢鷹攫毛血江鱸漢鰯那復思舉網便堪飽饕餮再來主人但置鱸雞鶩羊豚可不設

東坡生日鑑保將假息園祭之簡以長句並示社人

一年社事真草草祭詩先祭眉山老眉山後人念初祖雲駟風馭來應早常時李委吹玉笛江上主賓盡

傾倒息園梅花亦復佳香雪滿階未忍掃何人解奏鶴南飛舉酒定須問晴吳西湖酒畔無桓筭歌詩亦足開懷抱

用坡公陪歐陽公燕西湖語

設位先爲三日齋擁爐未脫一行稿摩眼瓶花政笑人寒肩吟聳詩難好

陳敬

敬字公和號大彌福建侯官人光緒壬寅舉人官廣東知縣有問神室詩

石遺室詩話大姪大彌六甥沈墨藻口皆未嘗言詩余壹不知墨藻所作可存者竟有百十首遲之又久始見之曾爲作一小序後在都付印又不寄余今年欲選其詩倉卒遂無從覓得矣大彌亦有詩百餘首身後始檢出多苦語年少旅食四方中更骨肉死喪之戚也句云客久轉無家可憶官清頗訝仕逾貧可以知其身世對句指其父宰博野時稿中有七言古體一首大致頗工而塗乙狂草不可盡識矣

鶴仙樓晚眺

黃埃滾滾拂雲平
根觸天涯去國情
老樹疑花殘雪在
壞垣忽紫夕陽明
人遊燕趙多悲慨
詩入中年有變聲
我欲借君雙健翮
試搏九萬睨滄溟

憔悴

憔悴惟餘瘦勝肥過都歷塊素心違一年疑短吾將老十上難行術已非生意不除春草滿歡情漸減曉星微連宵忽作還鄉夢便是還鄉詎息機

花朝

料峭東風日又斜土牆茅屋是吾家天涯行徧無芳草敢向花朝更問花

寒食

衝齋冷淡似僧寮記節還看插柳條時事漸非糠及米人言大誤爵毋刁故鄉可過多佳日惡夢連番到昨宵爲憶小西湖上路魏城宿草定蕭蕭

偶成

一室豈天下還須好自謀鑿池期得月種菊試粧秋王衍空三窟張衡只四愁西風如有意吹夢下南州

秋晚

韶光無奈去匆匆稚柳嬌黃不耐風玉宇高寒憐顧兔沙洲縹緲見飛鴻片雲出岫難成雨孤日行天忽貫虹莫向危樓頻徙倚滿川煙草斷腸中

大雪

一粲能教萬瓦妍深寒直欲警朝眠熏爐著手頻疑燼舊釀沾唇漸覺賢且忍積陰過幾日會看大熟卽明年不堪回首平生處華髮蕭蕭欲墜顛

哭寅兒

此恨真無淚可傾况非襖袂更鍾情平生兩度傷心處樓下無人見月明

亡婦死日亦櫛居月明如晝

董子良

子良字仲純號弓園福建長樂人光緒壬寅舉人

次韻答謙宜招飲中隱齋賞牡丹

也作詩人也作官也將隙地拓來寬新懸齋匾顏中隱欲富春光買牡丹杯酒忝陪詞客集盤蔬遠勝腐儒餐此花自昔吾州少醉向窗前仔細看

答梅峰招集環碧池館之作

我悵春光留不住匹園餞送有餘思何期環碧飛觴日緊接花光索句時宿酒雖醒猶作病舊逋未了又催詩長篇說盡池塘景險韻尖叉敢鬥奇

張葆達

葆達字秀淵號知非福建閩縣人光緒壬寅舉人

春盡日石遺師招飲皆山樓賦呈二首

春光九十日兀兀塵中擲及茲一隙存轉覺春可惜惜春還自惜我與春同客春去能再來我髮年年白
歡情忽尋常幽事貴陳迹

樓高不百尺啓牖卽鳥石借問春何如淡冶在崖壁下有竹與梧風作雨聲滴山青樹亦翠交映高人宅
宅在城市中人與城市隔入夏涼意多問字來晨夕

同西園飲宛在堂

疎雨瀟瀟響釣篷晚霞明滅半湖紅一龕可似瓜皮艇人在煙波罨畫中
三五凭欄話二更好風斷續月分明風經酒醒翻生冷月到人稀更有情

同人集長慶寺遇雨

凌晨蔚食行西郊一路秋風作涼吹野人三五帶犢耕紅日穿林露在地林深雲密不知處但聽鐘聲時
出寺生平萬事盡讓人獨此尋山偶先至到門山僧揖我入掃榻煮茶陪坐次我謝山僧勿爾爾我是山
人非官吏焚香參禪固未暇躡屐探幽良要事寺前寺後何所有萬樹松篁千株荔老松吟風隔嶺濤叢
荔凝煙滿庭翠人間快樂能幾時天公咫尺雷雨戲頗怪沈吳江諸子命駕蒼黃敗人意雨中紀遊古曾
有所恨簔笠猝未備疾行只博雨打頭一領葛衣如水漬須臾雨止素月升無事自擾天何對

謝鳳孫

鳳孫字石欽湖北漢川人光緒壬寅舉人

九月廿七日散叟約恪士仁先絮先鳳孫同作富春桐廬之遊別後得讀散叟仁先詩奉酬

曉帆發桐江羣峯修眉展富春富紅葉茲更碧山滿青女代炎官赫赫張火繳眼暈欲翻蜿蜒勢不斷
窺窗屢坐起敢學嵇康嬾瞑目避炊煙神遊太虛遠造次具珍膳味兼編與樹素心蒼蚪子獨抱晚菘噉
薄醺際靈境巖巒浮杯瓊水逆江路緩天長暑景短方勝山陰游寸步恣周覽

山陰富春皆一時新遊

岸轉峯更奇秋晚色猶綠扁舟沂清瀨日晡客心促皎潔雙釣臺東西峙山麓石磯鑑泉均魚鳥媚幽躅
道義天地心嚴謝一髮續興亡各千古豈在歌與哭我來登巖巖累息躡雙足臥磴忽入夢夢回乾坤肅

丁巳九秋蒼虬閣中菊花開時鳳孫遊西湖伴住一月臨別蒼虬贈詩四首奉和

早菊迎我來晚菊送我去匝月窈窕情行行復留駐縹緲京國魂暫從湖山遇飄零經幾秋輾轉戀恩路
從容義熙年俛仰黃叔度皎皎憐花心淒淒別花路有菊不歸好歸同菊心素

澄水際芳菊甘馨齡可延在昔胡伯始飲父風羸痊我友隆孝養構室南湖邊歲歲開菊圃九秋羅綺筵
戴日富精氣培花資婉顏豈惟食飲補療親增壽年我憇洗心閣繞榻妍若仙寢與同魂夢深情久纏綿

氣類互蟠結相適性所天知我莫如菊我知菊天全

春花爛如火秋花冷如鐵故人忍寒餓共爾齧冰雪復見天地心萬劫芳不滅亭亭晚秋英矯矯霜下傑我心如石頑相賞恣幽潔偶然情有鍾金石亦碎裂萬物終歸根血向首丘熱根北花忽南終古持晚節

同彥和登掃葉樓

世治物常春世亂物常秋猗猗送亥歲敗葉紛九州誰爲國掃除一洗世道憂頻年茅簷下顧影歌同仇默默終古恨鬱鬱臺城遊夥頤六朝蹟先訪半千樓

龔牛千明亡後畫掃葉樓以白見後人因以名樓

不圖寸心事得與古人侔

繪圖著忠憤君豈書畫流沈綿三百載圖毀樓空留區夏成落木秋風况轉眸天心儻厭亂箕帚安用求
愴然向誰語莫愁湖上鷗

同友人謁木蘭山

好黠近乎智好誠近乎愚與其智害性甯以愚自居鬼神愚者敬忠孝愚者圖人苦智不足我求愚有餘
五十學無成無成終歸儒楊者斬一髮墨者捐頂軀孔孟重仁義大道彌寰區宗教各異趣歸異途自殊
不學昌黎關微覺宋賢拘溝通以證理峻拒寧非迂存順逮沒甯浩氣歸太虛我忝仲尼徒毋以黜逸吾

學海樓將歸喜雪

昨宵集霰聽敲樓起視亭臺玉滿頭造物欲成清白志故將冰雪壓歸舟

江行

連朝雨雪送歸船，
脅支離學睡仙。
遲暮春陰珍尺璧，
尙迴流水駐天年。

江舟風雪中逢立春日感賦

天涯何處避狂秦，
洪水依然歲又新。
皜皜宜人思海日，
淒淒如晦作江春。
百年強半閱春秋，
學道艱逾逆水舟。
兩岸巖峯能起我，
不隨惡浪共沈浮。
年年春至感蹉跎，
八載家居野趣多。
學海樓頭梅萬點，
蚤傳消息達行窩。

上九日賦長句呈東軒師

昨宵夢繞春申浦，
一別經年幾風雨。
方壺蓬萊望依稀，
欲晉雲颿風泊沮。
南極老人益壽星，
光騰海日燦樓宇。
上燭九霄下九幽，
儻令死灰活如炬。
華山童兒道家子，
五彩囊盛柏葉乳。
真人一飲躋錢鏗，
永永春花秋月主。
盥手試焚金鳳香，
洗耳欲通玉皇語。
未知遐福何當來，
忍使神州遽如許。
閩風元圃仙人侶，
誓挽乾坤逐豺虎。
鍼膏砭盲滅二豎，
山川鬼神起拜舞。
爲祝金剛不壞身，
龍象扶法恢天人。
一滴甘露三千界，
霑溉衆生勝沆瀣。

友人招飲夜歸學海樓對月作

小飲歸樓月色闌，
沈沈夜氣擁胸肝。
傳家已悔謀生拙，
炫玉從知入世難。
慙汗祇緣心迹異，
私愆不待鬼神彈。
醉醒歌舞都成夢，
獨愛孤鐙自倚欄。

鄂渚遲劉君樸生不至歸舟賦此

壯歲盛師友，曷學敦古道。衰歇兆門牆，哲人遂萎槁。殃及構李賢，崑山碎環寶。漂搖遂至今，短髮垂垂老。
人海幾洶洶，息交苦不早。四十始識君，雖識聚亦少。君足遍天下，我身寄江表。一別輒經年，分飛瘁雙鳥。
兩度京華遊，過從無昏曉。巽言與法語，鍼石俗情掃。昨歲賦南旋，勸我勿歸好。今春拯徐災，呼我舟同造。
豈不念飢溺，營壙事未了。書來訂期會，如飢思一飽。江城走踐約，聞上廬山嶼。三日遲不來，黯黯夢魂遶。
君攬香爐瀑，我濡漢皋雲。水寄長懷江，流東浩浩。人生會有時，作合由天巧。三世環循速，百年鉤隙眇。
相期萬慮消，庶得真如葆。聖道貴藏密，修士賤虛矯。一念千密移，寸心萬劫撓。生死呼吸間，安能互相保。
我恨世因深，塵網困顛倒。饑驅南北勞，倦憩妻孥擾。耽寂孰如君，瑩然寐先覺。入世泥不滓，澄懷月同皎。
願時賜箴言，以藥平生惱。作詩寫心憂，翹首匡阜渺。

舟下九江望廬阜呈東軒師二首 錄一

江近潯陽浦，撐天巨壑逢。船頭迎曉氣，雲頂落奇峯。岫轉回天馬，嵐環起臥龍。嶽崎終古事，追步竟何從。

贈慎先四首 錄二

學書兼學劍，日演龍虎勢。手揮金剛拳，心會太極意。直體同射德，通變達易義。操柔以制剛，所投無不利。
末世多彊梁，捍國賴利器。扶陽斯抑陰，願君竟其志。

我老不足畏，君胡不我棄。竭來共晨夕，飄縷憂患事。絮語遣晝長，聯床禁夜睡。遠遊不忘親，投筆苦無地。
時復勞筋骨，豈惟調血氣。天涯夢魂中，君家幾昆季。

仁先歸自京師留滬暢談竟夕別後賦此

人生重離別暫聚彌沈繇盡歲圖一晤終宵詎能眠並作湖海客相逢歲寒天覩縷舊京事淒涼燈火邊
舊學心共證新詩口能傳吹毛絕芥蒂坦腹逾虛船溫語寒夜暖繁冤繭絲纏敢以當仁讓而忘着鞭先
夙駕不可挽曉雞已鳴顛送君武林去出門一愴然

客學海樓兩閱月將歸度歲呈東軒師二首

臘曦曝高軒寒冬暖如春皎皎雲天誼迢迢賦歸人晚學忘道阻聆弦識廉溫土室靈光在老淚鬚眉真
巖挹首山餘時與甘雨新厚遇無以報千秋此閒身
學海百川志效嘵螳鼓車蠡測竟何裨豹斑時一肝壑大魚喜縱鄰多德仍孤登樓譬學道外狹中亦如
覆黃期九仞惜陰况三餘得師復得地征邁奚躊躇

周從煊

從煊字念衣湖北人

石遺室詩話念衣陳仁先詩友古近體皆工仁先曾寫多篇見貽惜亂後失去只存三首
約仁先游洪山不果來

傾城士女洪山去各有情懷對暮春子不強游時可惜世方多難事來頻垂楊應上枯僧肘碣蘚終淹獨
客身他日望君鴻鶴志直留孤塔與愁人

鄂垣和仁先天寧寺聽松濤

昔我京師因羈旅穿花踏月眠僧庵天寧古寺獨未到佳勝往往聽人談老松兩株最奇崛變化雲物生
風嵐都門故人詩筆豪雕刻細木非所甘一篇松濤寫天籟寸管直欲開江潭我居深山松最多斧斤所
赦尤鬻鬻年深上引千歲鶴月黑下臥南山魍樵夫牧豎倚呼嘯豈有車馬經趁繆歲寒心同託根異君
賦其北吾歌南

和仁先菊花

我亦年年遺物華晚尋黃菊是生涯似綠籬落成秋界頗見盆盂窘好花薄叢上枝迴暝色一叢分路入
山家何時酩酊同江濟更約劉郎手畫叉

徐思允

思允字裕齋號茗雪江蘇武進人前官學部主事

和昌黎感春詩

出門四顧何所之不尋同樂尋同悲人人看春不我顧還歸空齋誦文詞莊生沈冥少莊語離騷反覆如
亂絲二子胸中感百怪所以縱跡絕詭奇忽然扶日墜昆侖俄見垂翼翔天池東風卷地野馬怒安得乘
此常相追

我悲固無端我樂亦有涯斗食佐史免耕劇得借一室栖全家官書不多日易了舊業雖薄還堪加文章
豪橫逞意氣草木幽秀舒精華如今一事不可得豈免對景空咨嗟

立春二十日日日寒凜冽九陌長起塵衆卉焉敢茁爾來日漸暖又恐驟發洩少年狂不止老病苦疲茶
百鳥已如簧飛花亂迴雪勸君守遲暮病發不可絕

一年青春能幾多坐令千古悲蹉跎夜燒紅燭照桃李日典春衣償醉歌百川東流去不返淚眼長注成
脩河我從崎嶇識天意纔見光景旋風波去年看花載酒處今年不忍重經過一人脩短尙難料萬物變
化將如何

憶廣化寺

千金築館闢蒿萊却鎖重門未忍開湖上清光餘幾許春來風信又多回事經變幻忘初意士失雕鐫定
不才此局廢興爭屬目寧論吾輩寸心灰

胡琳章

近代詩鈔 胡琳章 林思進

一四九〇

琳章字鐵華四川富順人

上巳日叔海先生招集天寧寺晚飲秀野草堂

秀野堂今屬石遺鈎沈本事出元詩老逢上巳花經眼客散禪天酒滿卮舊夢湖山成大隱昔人曾未有

深期江淹彩筆陳遵轄一瓣心香叩導師

謂香宋師

晨訪延真閣話別

曉風涼透揚雲宅聽雨高人睡起遲四壁有書忘作客一官垂老坐論詩清談似飲廬山水薄醉思眠董
子帷約買扁舟同上峽滄江紅樹話秋期

林思進

思進字山腴四川華陽人

得守瑕書知石遺入京與癭公並有垂訊之言賦此代簡

舊社星霜十二年故人相望各山川從來蜀道青天遠愁說幽州白日邊正字閉門今幾載讒書新著定
何篤勤君更問朝雲夢老去東坡祇半禪

向楚

楚字□□四川巴縣人

思歸

落盡楊花滿御溝不堪烏夢憶延秋周章小智還匡國陶令高歌且倦游臘至怕聞三虱訟朝來誰爲衆
狙謀潯陽自有人閒世浩蕩乾坤一白鷗

延真閣話別

揚子玄成鬢有絲留應無計去何之還家作客書爲累學道當官佛是師十載詩名傳日下一麾明月向
峨眉浮雲莫歎廬山遠婚嫁遙遙我亦思

潘博

博字弱海廣東南海人

題彊邨老人歸鶴圖

彊村老人如老鶴不向人間爭飲啄九霄唳罷獨歸來夢醒空山雪花落老人養鶴如養兒俸薄不免時
啼飢胸中飽貯出塵想不識貴人軒與墀傳聞此鶴人所贈毛骨奇逸不凡近亦如老人古心性玉立塵

埃冰雪靜老人當世稱詞仙鶴亦起舞能應絃荒庭僵石橫蒼烟與鶴相對應忘年此鶴平生有故事出處去就略可記大鶴山人鶴阿師爲寫斯圖傳畫史鶴兮鶴兮得所歸青田石老苦生衣月明試向華表立人世如今有是非

贈伯嚴吏部

戎馬倉皇此老翁天教身世杜陵同廿年歌哭江湖上八口流離道路中夢斷中興成白首酒醒宙合戰羣龍夕陽冷照離離黍掩淚題詩續變風

黃孝覺

孝覺字孝覺廣東人官法部

東園夜坐

廊虛閣迴轉芳微坐起無端晚忘歸萬里還家明月在青春作伴昔人非曲池水長知魚樂細路花深養蜜肥亦擬城東買村舍只嗟心力故山遠

短述

疊摺空箱舊嫁衣謝家殘夢過依稀上清齋醮符靈識下苑滄波失後期窈窕東鄰求對值迢遙南雁寄

當歸無愁最是黃昏燕猶自穿花款款飛

江亭

不到江亭三百日尋常雲壓覺天低城尖徑仄微微雪布襪青鞵滑滑泥水閣當山時極目女牆高日又
趨西遶林亦有南飛鵲揀盡寒枝未肯棲

陳曾壽

陳曾壽字仁先湖北蘄水人光緒癸卯進士官監察御史有蒼虬閣詩

石遺室詩話仁先爲太初先生曾孫詩學自有淵源少時抗希騷選唐以下若無足措意者別
去數年出所作則古體雄深雅健今體悱惻纏綿肆力於昌黎義山荆公山谷者已深所謂韓
豪李婉王適黃奇仁先已有詩自道所祈嚮矣近年屏居西湖築陳莊於蘇堤第一橋閒時出
游江南名山水殆徧詩稿如東筍惜未盡錄

游天寧寺同左笏丈作

驅車塵冥冥隱見孤塔圓大佛相接引一徑凝蒼煙升堂坐初定微風度旃檀開窗納遠秀小幅橫輞川
春芳滿秋砌悴葉猶扶妍想見腰鼓發車馬何喧闐暫榮悟常寂愛此蕭境閒茶餘恣游眺奧復窮諸天

殿古金界境樹老秋陽殷何代萬石鐘橫身臥高阡出手試一擊龍吼殷河山煌煌乾隆碑天筆矜如椽
明政移寺瑤狐鼠多功緣真源一飄瀉薰腐爲洗滌惜哉灑掃缺歲久生荆菅園陵虛有神運化悲循環
俯仰日向暮勝迹空流連松風無世情謾謾吹面寒

天寧寺聽松聲

斜陽紅滿地雷雨忽在顛仰看四沓寥聲出雙松閒屬耳條已遠飛度萬壑泉老龍動鱗甲破碎還蒼堅
金剛萬豪毛一一威神全仰屈尋丈地開闔成諸天落落孤直胸迴蕩生高寒提挈四天下度入太古年
想見陶隱居擁衣但高眠無聞茲未能且證聲音禪

秋日同李伯虞侍郎左笏卿給事周孝甄御史往太清觀尋菊不得遂至龍泉寺歸過酒樓小飲

次周孝丈韻

節寒氣逾爽逸興當秋闌輕車赴晚道影墮蒼茫間當年亭館地今日斜陽寬靈宮訪秋菊落葉空池壇
人在菊成畝人去餘荒園因知隱逸士豈不視所餐迴步過蕭寺著履蒼苔乾長松迥古徑雜卉羅修欄
龍蛇動四壁贊賞還微歎文字爲小技今成空谷蘭歷歷鐘梵音諸天度鳳鸞地清坐忘暝茶罷神愈完
妙境如追逋瞬瞥迹已殘歸車就市飲嘈切千指彈一心造喧寂同境殊悲歡百年非可知放懷尋所安

戒壇臥松歌

戒壇之松天下奇尋常所見皆十圍一松據臺獨下垂橫出十丈猶蟻蛇健鵬探爪風在下渴蛟飲澗鱗

之而絕幽欲引陰蟄出承欬力負蒼崖危萬鈞壓空不及殆反走潛根應過倍雨洗蒼骨未濡足眼底渾
河犯高塹雲開穿枝落日黃萬里暮色浮孤觴欲憑咫尺精靈意貫入冥搜百怪腸

晨往崇效寺遲文石

侵晨看花去落紅猶未掃晨光在松巔奚童怪我早幾叢昨夜開遲過風天好初香未分蜂正色持窈窕
睡足出嚴妝午韻不如曉坐久三四移露逼衣裳少有酒斟酌之不待杯盤繞興盡遂言歸清景付啼鳥
不惜便歸去輕與來歲期昔年當花時踴躍猶悔遲花開到花落憔悴傷春詞如今異哀樂開謝了不疑
未見怯爛漫既見去若遺隨緣徇物我過眼酬芳姿人笑看花勤痼慵中心脾此寺曾幾來歲歲改情思
思之還淚落亦不知何悲

遲到義州翁靜院空遊人夕陽正嫣花藤杖久逡巡芳菲看欲歇獨念平生親頭白今再來廿載隨麤塵
黯黯風雨思奪此一笑春戢影忘世間暫出觸光新作詩寄餘慨悽惻同沾巾

徐茗雪及覺先弟先後自京寄菊數十種日涉小園聊復成咏

東坡謫惠州攜手葛與陶孤光掛海涯寒月澄滔滔清吟却老至寧獨詩中豪我生百世下憂端兩相高
開卷若有得往往破愁牢殘燈守菊影寤寐同寒宵

種菊無百本朝夕涉小園晴宵定微風清露一何繁葉欹宿雨態花漾千珠盤泠泠沁心骨匪我衣裳單
淪浹九秋心歲晚復何言

彌襟萬千秋滿意難一掬好花開較遲已履繁霜肅安能展過隙暇及秋陽暴濶幽或終古誰與發此覆芳馨雖不展應候聊結束浮生繭脩途逝者當何贖

亦有高秀姿亭亭滿月相得霜乃清嚴禁雨不悽愴空室了無悅得意千載上龍章雖隼烈天刑偶遺忘出爲一大事甘此詩酒放

故人慰我癖送菊託海槎諸弟續有寄幽居忽豪奢愧我所持約無物酬芳嘉資生日以薄託命餘秋花秋情月既望度度減清華幽姿還起予一笑迴青霞

聲乾知悴葉吟緩悲寒蟲殘月蛻曙光秋夢俄已空婉孌自婉孌一幘支霜紅蕭寥失依倚冷抱還冲融密移逝可悲真存儻子逢一勺有來秋抱甕勤未終

次韻節厂先生高碑店遇菊

時爲奉安崇陵
事赴梁格莊

孤疾鋼南山行行近天闕解鞍荒店小迴視白日沒蒼天何肺肝露下百草歇搜衣夢不成顛倒一孤月下階逢此花騷魂驚醉兀相遇定何心霜底一枝活欲采不得遺春結至明發敢苦塵沙黃衰愚天可達
月夜同李道人野步

夜色落柴門二人自成世衆木霜氣中葉黃影在地竹篠擁寒溪相蚪入烟態貧家惟白曉庭空靜如寺遙折轉寥天疏星耿三四清言不世出萬象破幽寐歸寫良夜圖清吟難題字

夜色之佳以京師上斜街
石遺室園中爲最今作此

舟中寫心

暫寫閒懷向水濱，片時鷗鳥肯相親。
蒼厓終古收殘照，碧樹前宵送晚春。
豈與韓維憂日暮，要知康節在風塵。
冥看正見孤飛翼，一爾翻然未易馴。

莘田使來得書感賦

江湖屈落劉莘老，風雪微茫歲又闌。
寄字盡隨秋雁沒，舊奴還作主人看。
三年宗國無窮事，一飯尋常九折難。
思折庭梅問消息，暮雲無際楚天寒。

贈念衣並懷左周二丈

昔從周左爲秋社，長憶先生鄂渚閒。
今見黃州新句法，更懷青瑣舊朝班。
南能北秀天難並，京洛江湖意等閒。
料理詩篇真事業，漫辭蕭瑟對江山。

偶成

曝書忽見故人書，猛覺虛光未掃除。
只此心情猶昨昔，居然三十竟何如。
慣愁出入公超市，小付生涯范粲車。
白日青春花氣午，不多時夢尙蘧蘧。

次韻覺庵棗花寺看牡丹

睡起未妨花事晚，芳春將去一嫣然。
笑看詞客過千輩，不憊風情又此筵。
紅杏青松都莫問，貪多愛好已能傳。
虛廊舊夢無尋處，料理迴腸苦笋鮮。

落花

早知零落付微塵，不耐當前恨又新。
長歲只供三日賞，殘杯寧洗一春貧。
寥天歷歷風輪轉，白日昭昭色相真。
客去花飛終有極，眼穿腸斷可無人。

讀劍南詩

愛讀劍南七字詩，自傷自慰總堪悲。
強弓惡馬真何物，村酤園蔬又一時。
萬里神州供涕淚，百年歲月易差池。
拋將直北黃龍憾，來寫江南白紵詞。

次韻莘田留別

同臥秋窗月庭梧，影已疏。人生幾良夜，明日是征途。
往世身如繫，還山願不殊。沈沈百年事，到此片言無。
與莘田夜話去後作

殘燈君獨去，深院雨來時。
契闊他年意，溫涼竟夕思。

周念衣約遊洪山不果枉贈一首次韻留別

年前料量千迴意，袖手籠寒及暮春。
向晚落花看更急，將行縱酒莫辭頻。
遠山孤塔千尋夢，宿雨寒蕉一個身。
欄榭曲幽閒亦好，郊原浩蕩付何人。

同馬卓羣至龍井

攜伴行山不辭遠，薄雲作暝迷高瞰。
纔踰風篁秋景絕，絳霞一抹霜林屯。
御巡磴道尙完好，荒榛故礎知

山門徑轉斜垣繞佛閣雜花羅列明秋軒老僧煎泉自提挈妙語茗事相評論更出新藏壓山產香沁荷
露何清鑿爲言珍璧不自享拜月一薦嫦娥尊曠服清虛三洗髓神慮皎皎無由渾還穿竹逕步瑩確湖
光遠漏如池盆曲流碧玉荇縈拂老柳紅浸珊瑚根湫澄龍去絕變化殘妝倒鏡秋棠魂我行違世更患
難耽此偶坐忘朝昏天風泠泠度笙籟妙意有在當誰言

十一夜月

夾湖枕一閣夢寐荷花香水明自生夜非月非曙光連林受風籟迴若天琴張澄宇忽蕭瑟古悲起傍徨
我魂招未歸鐘聲一何涼

寄莘田

時莘田初游
西湖遇雨歸

湖山好處似重來響水鐘聲喚夢回不分飄零老賓客白堤烟柳一徘徊
水上青峯三面環扁舟初入鏡中間先生眼界還難壓欲鏟城隅破遠山
新塚纍纍戰血腥偶然投瓦損泠泠君來連雨能無意重洗湖山一段青

夜夢作書畫真有契歲月來無窮二句似翻后山詩意偶有所會遂成二詩

新秋送殘暑雨罷來清風湖天出淨碧盡爲窗几供焚香展圖畫往往名山逢書畫真有契歲月來無窮
但使妙明在自有精靈通千秋旦暮遇何必非我躬得意已藏密五家詎能公知益却傷晚隘矣后山翁
高峯半雲雨觀棊坐一老楚天巫峽圖千古一畫稿天陰贊公房壁潤龍鱗好想爲宏偃筆變化松矯天

山谷游落星宴寢清香裊小幅對寒山妙絕無人曉我讀兩翁詩魂夢輒飛繞何當逢解人破祕一傾倒

寄懷陳弢厂先生卽題聽水齋圖

太白何睽睽獨與殘月曉鐘鼓夢西清如見顏色稿昔我見公初堂堂送張老倉皇臨夜半流涕看遺艸

平生無黨援死友心能表張文襄公遺摺弢庵先生增不樹黨援不事生產八字千迴鬱結意並世復誰道清酌陳哀辭奠罷自焚

稿我時贊几筵相視何淒悄蕭寺隔重湖僧房頗靜窈邀觴重九辰破寂一灑掃先朝雙白髮心苦詩愈

好是歲九日約弢厂先生及節厂先生飲十刹海廣化寺皆有詩別來無歲月合眼金華杳似閒退休餘不忍懷魚鳥幽幽聽水齋修竹

插天杪披圖意空多徵題情慰少初陽上金莖昔昔風露早來日自舒長論語半部了閒居三十年洗耳

事幽討再出坐子房傷哉爲綺皓翻然恣翱翔目極孤鴻矯

晚禽一首

晚禽啼罷夢初回繞砌芳蘭幾度開山月常看杯引滿松風不爲世悲哀臨流棲鷺同閒影過雨寒花笑

獨來天末涼風歸雁盡有誰乘興破蒼苔

廿八日同馬卓羣朱先生劉莊坐雨小飲

湖面冥濛山背晴三人水閣坐浮觥眼前指顧生奇景虹挂雷峯一道明

雨過山中晚步

四山下黃葉一樹猶蟬音天地入寒色殘陽獨立心風高盤隼疾雲濕挾鐘沈物外尋歸宿蕭寥悟自今

樓望一首

殘柳新芙晚更幽，湖天沈寂一當樓。
亂鴉脫葉參差暮，單雁重雲夾帶秋。
舊事已乾叢菊淚，閒心難繫故園舟。
危欄盡處從孤倚，攪入邊風畫角愁。

九月四日李莊口占

風過菰蒲作雨聲，水天一色晚來清。
新芙綽約殘荷褪，靜俯迴欄怯眼明。

李筠厂以錢南園曹劍亭二公遺札合裝一幅屬題

國朝名臣妙書畫，絕筆獨數南園錢。
家藏並驅有二馬，勢欲萬古爭騰先。
曹公翰墨世罕睹，曾見僧寺馴雞篇。
張公表幽目如炬，獨寶遺札逾瑚瑄。
京師崇效寺所藏馴雞圖有劍齋先生題語後有張文襄公跋以爲至寶

并當何緣豈非大節貫不朽，藝無多少皆天全。
二公忠直二楊匹，坤視嚴魏加能奸。
天鑒昭臨惡未逞，雖有隱忤無顯患。
豈如明代禍慘烈，廟堂幽暗非人寰。
至今綱絕那知此，座右獨凜秋陽懸。
堂堂風流殿一代，君家仲氏今南園。
嗜書還搜古遺直，嗟爾好尚殊亦賢。

病山先生獨遊天目歸述其勝且示新詩歛然神往亦擬一首

五年一日暫失憂，聽說東西兩天目。
雨中獨行世境異，有目所見惟松竹。
千盤萬轉出雲外，晚投佛寺仍山足。
道逢跣趺顏色好，削壁安巢當半腹。
連天濤風度鸞鳳，中有真龍帝衆木。
有巨樹一株土人謂之樹王絕頂老僧歲一往，必待兼旬霽。
紅旭光芒六合瘴，霧空四大海水一鉢縮。
我聞夜夢儻見之，插天青稜震雄蟲。
繁冤

覆盆入井底仰懼崇高悲短促熊啼猿哀酸骨死託命山中老尊宿至人道峻天與齊俯視螻蟻等平陸
乞公起廢與新詩萬仞憂端爲降伏

宿州道中

蕭條徐泗漫經過九逝英魂一盪摩永去南中淹日月忽悲北向看山河屯淮列幕酣歌急挾海崩雲變
幻多勢轉圖窮驚匕見遠塗垂幕定如何

予數夢至一寺門臨大江略似焦山定慧寺而幽窅過之昨又夢至其處因紀以詩

何朝遺古寺門對荒江開幽境出世閒夢中時一來紅廊繚千步殿角高崔嵬蜂房巧接連琳瑯淨籤排
簷竹浮江光几榻碧瀼洄老僧強爲禮雪眉映枯骸似言暮色深一宿且爲佳上鐙起霜鐘蒼茫入江雷
恍然暫已覺我夢何時回

大雨後同石欽至雲林寺

上山瀑流礙輿行寺門未入風濤聲轉橋衝躍玉龍橫九天派落千雷霆陰崖陡起萬佛撐樹不識春何
代青下漏日色變幽燄徹晶噴雪寒目睛徑深憩亭俯澄泓上方潛洄下震驚偶與石鬪波瀾成本來淵
默非不平突兀高殿矗蒼冥崇階百級排丹檻本末十圍仰列楹佛力一髮邱山輕去年奉母禮鬢纓猶
記塔鈴語丁寧今偕謝屐乘新晴賦歎奇絕昔未經山雨一夜愁淋淅翻然倍百張詩情

次韻蘇堪謝泉水一首

短瓢親浥愛澄澄巨甕行擔笑未勝試茗安能妨夜睡傾瓶聊可漱晨興松風一往縈殘夢石磴何時坐
並肱空說清游住塵界中心無奈醉蒼騰

南湖晦寄懷散原先生

濕螢亂開闔山影蠶半湖唵喁間格磔雜杳喧荷蒲青沈潛蟄作萬竅爭號呼長飈忽飄捲颯若幽靈趨
大千入星光貞明忽已無一息擬終古遙夜何時徂握雲天一角下有青溪廬脫襪此偃息諦吟定何如
蒼然化一碧高穹爾何寬故躑漸就窄蝕魄定亡存流人不惜日五載移寒暄相逢海枯年行見豕零尊
淹留竟何待去住傷精魂淒其望鍾阜白頭晚相溫寂寞復寂寞寒潮親故痕

蟻渡困均流出謂幾不免人落憂患中何異蛙在坎行行夢當覺暫未百年滿餓鄉雖窮處正堪一笑莞
德人妙天游萬態齊枯菟微生獨悄悲終恐法華轉

繁夢淮底村愁步千里積荷碧水到門洗眼湖上宅徇物情易遷俄復百端集初年耿志事千仞瘳冰雪
漫作徐泗遊惆恍對溝瘠未能六鑿通那救枯魚泣所學失平生銜髓餘慘戚有如臨化消空養千金璧
孤往遠因依懷遠互淒惻

九日一首

杜老佳辰對羣盜陶公九日闕持醪幽憂不出古人下極目依然天界高萸菊暫酬秋寂寞江山定覺氣
蕭騷舊京鮫字無消息斷雁西風首重搔

九日同人各攜酒肴至龍井登高

飢餒杯盤野興長，招提蕭散作重陽。坐深潭影閒雲過，望淺秋暉暮氣涼。却笑清遊貪寂住，翻因高處怯

蒼茫。今年今會還如此，濁瀝何辭奠侍郎。

于晦若侍郎墓在龍井左近

法相寺中老樟一株雙幹挺出皆大十圍其本殆不可量不知何年物也散原老人屬同賦之

法相院中長耳僧早空諸相藏鋒棱一朝永明偶饒舌結跏俄頃驚膚冰應身歷劫住山寺定光一線燃
龕鏡我尋春茶數來止但賞修竹青層層忽逢大身仰突兀老樟分幹雙龍騰互如天柱伸兩戒矯若雲
翼張孤鵬神物不敢臆年代但識倒掛千歲藤山僧築閣度長夏片枝所覆蒼雲崩四時風雨掃落葉老
衲偃偃階難升散原老人詫一見平生奇觀嗟未曾匡廬五爪震寰宇對此只落聲聞乘遯世无悶亦有
待發幽奇句精靈憑高吟千里起鍾阜佇聽夜半霜鐘響

遊西溪歸來湖上晚色極佳散原老人屬同賦之

行盡西溪三百曲，忽開天鏡晚晴中。仙山樓閣無限好，碧海銀河何處通。落日千峰橫紫翠，中流一葉在
虛空。時無小李將軍手，奇景當前付散翁。

同散原老人登六和塔

當年建塔鎮江潮，萬弩難勝一柱標。昔覺烽煙愁飲馬，今荒榛莽任棲鴉。老懷憑遠餘悲健，寒籟迴空振
悴凋。欲向簷前問鈴語，紇龍逝後更蕭條。

中秋日雨中恪士約飯于法相寺

荷已離披桂未稠淡雲微雨過中秋爲耽野飯尋僧飯還覺平流勝俊流小閣空山宜客夢寒芳深院助

禪幽

院中秋海
棠甚盛

相期更醉重陽節晞髮天風最上頭

散原先生來湖上次日蒿老亦至遂同遊虎跑泉

二老經歲別世亂積幽疾相逢在名山一笑乃至矧霜姿不改度取證寒泉影山光秋正濃高樹沃丹頂
澗流自磬鐘激翠上襟領虛堂倚懸崖削鐵石骨整嵐氣浮長廊清寒入甌茗還尋濟公塔靈蹟仰昭炯
爲齊塗割觀遂窵親等福心不能迴學道愧無忍適野情暫移隨杖坐忘暝依然廣長舌送客溪聲冷

子脩丈約同蒿老散老遊西溪飯于交蘆庵

欲雪未雪花冥冥汶流四望迷煙汀平生蕭瑟夢魂處扁舟一往如重經交蘆庵子水中淡伊人不見餘
荒庭年年秋菊薦芳馨遠山何許雙塚青閒居避世淵穎老喜載舊友攜尊瓶呼陳僧藏玩圖卷恍出犀
軸紛幽靈歡娛朝野隔生事何論風節垂高型酒酣不忍歎家國但說同輩多飄零荒陬遊過數不厭略
尋影事如江亭

京師陶然亭
蘆花略相似

飛來成畫唳寒雁北向且破愁顏聽

往金陵視散原老人因讀近詩夜過俞園看梅翌日同遊掃葉樓歸寄一首

詩哀餘古人愈好愈可哀巨刃破愁地擢數窮根菱閉門滅聞見據槁忘形骸寸心非砥石憂患滔天來
涼秋把詩卷再見春已回衆湏一日短孤櫻千劫灰輟哦語未定夜破隣園苔秉燭照霜月不負餘寒梅

卽幽洗囂暫覽曠傷高纒驅車清涼山淒象凌空臺名都士類盡城處逾荒隈災殃奪物性存沒供吁唉
夸父逐日影肉身覬聖胎所徇異清濁迷妄將毋儕老至一關塹壯趾多歧乖終古往不反莊語痛作諧
天全屹一老行直無疑猜還恃遠公法往參陶潛盃

雲林寺

不雨晝溟溟千山擁佛青松身證羅漢泉夢入風霆古徑惟寒葉秋茅有異馨無言坐巖石相對欲忘形
雲林寺晚望

入望禪機第幾乘金松翠竹白雲層高峯突湧長遮日正殿深冥欲上燈寂寂石壇雙塔迴沈沈鐘梵四
山響再來誰共茶時夢一個檻衫掃葉僧

柏因社觀柏

身行鄧尉心戒壇非松非柏森屈蟠西山今生恐不到對此皮骨空汎瀾從來柏身尙勁直故鬪奇肆橫
欄干神物中斷霹靂斧兩活不復資泉源我疑柏空壽者相忍辱節解降魔頑一物精誠有不滅奈何已
死誣蒼天平生松風滿懷抱得茲魂夢雙牽連不須長短較南北啜茗倚樹鐘聲圓

石湖山

歸橈晚尋石湖渡春湍箭激風裂衫大聲震撼海潮寺直下葉葉喧蒲帆巴僧肅客憩荒構了無果茗資
鄉談同游者王病老爲蜀人石龕立佛爛天眼特俾上吉施靈籤三光弛墜陷鬼域神僮欲福吾所貪地荒盜斥居

聚少范公祠宇空
穉穉惜哉目成不得往
香雪一樹明高檐

同人訪韓蘄王墓碑予陪散叟他游未果

聖湖春色付平章
諸將中原事久忘
欲訪豐碑問遺恨
當年居士已清涼

韓晚年自號清涼居士

同散叟重游天平山

石頭路滑我重來
白玉蓮花處處開
徒向愚溪記靈怪
頗疑虛費柳州才

散叟言永州石未能勝此

太湖石

飄泊東南天地間
眼明初見洞庭山
松風石磴無限好
祇共沙鷗片刻閒

徐園看菊已殘萎矣同莘老作

徐園殘菊愁吟眸
支離萬本皆垂頭
繁霜晚節豈辭避
夜來風雨胡相仇
與君來遲敢傷暮
要知劫外叨天優
強張孤芳祓物忌
姿回泉石酬清謳
牆陰籬落秋影亂
坐冷茗碗神夷猶
游人千睨各殊意
斜陽一晌因誰留
塵搖形役念念改
何須照面恆河流
臭味潛通花可省
對影或恐爲花羞
故根移轉久零落
年魂夢紛離憂
風露在天根在地
慰眼何時仍好秋

冬至前一日在朱棣老齋中見白菊一種微帶雪青色高秀絕倫索酒賞之

歲晚芳殘久寂寞
意外還看三四花
不知秋儂何意思
故開白雪迴青霞
孤標遺世誰見得
却爲主情難自惜
頻瀉深盃醉不辭
愛汝後時能獨立
我餘舊夢墮空漫
絕好花愁仔細看
飲罷閒情無住着
扁舟一

往水波寒

潼山村宿

曾無一溉蘇窮壤欲乞九河湍涕痕胞與斯民原妄念子遺末世自煩冤乾猶迫誅求令代改方知洪
滅恩水澀山枯夕陽盡夢魂悽惻住荒村

九日同病老疆老悖仲強志至焦山登高

漫游選地作重九焦山佳處曾留庵載夢扁舟倏驚起壓篷秋翠堆晴嵐松寥閣開置牀席持螯呼酒江
動簾我難破戒繼山谷舊京風味題糕語歸來有盃祀忠敏嚴裝屹立如遐瞻當年陪讌盛賓客招魂一
老摧霜髯盧爲節老所建抱巖娜嬾信幽步極目烟樹窮淮南僧房隱几待落日江聲上引風雷酣晚鋪重雲獻
日脚海門深宵開鏡奩橫天一抹展奇異飄飄赤鳳仙人驂浮生萬事此不負逢辰一笑良非愁歸山我
無真實意但剽絕景供遲淹暝樓歸倚盞明滅幢幢餘影搖鏡龕

焦山紀遊雜詩

朱老悲秋強陟臨病翁題壁感重尋孤吟已懣貪多習百劫難灰愛好心松寥閣有病老十年前所書楹帖堅欲易之

枇杷可啖書可讀欲伴海西寒病僧閒拓殘碑易香飯暮江聲裏隱登登

蘇牆月色海棠枝繞榻蟲聲來和詩乞米隔江王太守先生謫味是清時

健游高咏石遺叟曾與目成江上青臥病不來真憾事可無奇語愕山靈石遺老人約同來以瘡作不果

夷叔閒馳九陌塵看山宿約竟逡巡爭棋舊夢憑誰話淒絕重來作記人

丙辰歲同端忠敏來夷叔與劉君禮卿爭棋竟夜

解詠荆軻處士哀辛陳投契並豪才申君所學惟朱子却對江山欠玉杯

朱子遊山常攜一玉杯遇勝處輒醺然盡日

魂夢山樓戀夕暉前生結習是還非橫身滄海沈憂患一去名山更不歸

定慧寺山門夜坐

晚上峰頭觀落日霞表詩情極孤縱夜來山門踏明月呼吸風雷轉空洞松杉挂月是何年寫影驚濤法
梁棟千洞萬激聲合時門內霜鐘初發甕坐階五人相對閒撫掌山靈撰幽夢欲訴繁冤訪彭屈儻出琴
高波裂縫明月清風孰爲我顛倒悲歡笑搏控不如遺世老磐陀鎮臥奔騰了賓送

又一首

天水與階平山門坐月明檣鐙移殿影蟲響出江聲語寂鐘初發宵寒茗更清浮生愧流轉淨業羨無生
同人登高後往視散翁白下

聞翁止酒吁不樂得見開尊病却忘老屋拈詩妨燭短鄰園分榻破苔荒劇憐燕蝠朝昏促喜近鬚髯意
興長還約湖舟載諸老萬梅深處補秋觴

蔡甸上關師墓

遺碣重來又四春蒼蒼高柏鬱嶙峋聲吞注海傾天淚立盡蕭風淡日辰難答生成何敢死暫稽蛻委已
無身義川晞髮今頭白相向銜悲更幾人

山居雜詩

論才及宋代豈不先乖崖遺像留僧庵了了明去來惜哉太華蓮專爲希夷開不獨神清子事業限鑪灰
伊來有成人古德資扶培淵源不可誣變化非一胚周旋盧鄭閒陶範英雄才留鄴及新建所遇尤奇佷
下士未聞道拘墟獨難迴寸莛扣洪鐘焉能應風雷殘年託細字積懼當沈災海濱事陳原李梅婉變忘
形骸願挹彌天瀾一瀟千劫哀

人生實苦相種種含悽酸尋常暗飲刃不在血流川受者徇一瞑見者猶纏牽一端偶接觸萬象疢當前
反觀儻自覺不暇入悲憐陳陳往不復孕自無始年誓度無量劫佛力何有焉寥廓望前脩福心遣誰安
徑情絕陰欺差覺靈均賢

多塗趨一軌何事爲生機發憤以忘憂孔叟乃孜孜平生已半世晨光乍熹微常恐墮幽憂聞道曾無時
山空露氣盛蟲吟不肯遲耿耿對無寐孤鏡我因依

山中栗正熟坵苞滿田畛蒸爍拌醬椒侑酒滋芳辛醉中有陶蘇頗洗戰國秦山氣忽蒼涼炊香愛松薪
近鄰過朱馬數見彌情親雖止桑麻言不雜朝市塵一邱萬事舊開卷時汲新冷月與朝陽皜皜同昏晨
片端且論定眞作山中人

謝子漢之陽亂世泉比擁截流逢生源壁立見眞勇劉叟臥江澤破寺俯洵湧苦約過顏堪遠念生敬悚
至詣久寂寥雙繭或破蛹石逕秋氣高夕照明孤筇何時共游蹤物外一笑踊

郭則澐

則澐字嘯麓號蟄園會圻子光緒癸卯進士官國務院秘書長

歲盡日遊香界寺

支寒踏徧玉峻嶒共倚禪扃數廢興判歲命儔如有例尋山作健或相矜窺林暝意稀歸羽團雪詩心類
定僧此樂邨奚渾未省怪人選事太凌兢

江亭春禊

十年稗柳及樓窗去日風花付急瀧背郭稍憐遊騎寂借春先遣渴龍降新蘆滿眼妨吟屐老竹遮頭類
釣艖觸撥羈人湖海夢賣魚聲裏過桐江
無多煙景寫郊垞日下靈光說此亭寂寞詠觴成獨往風流舖餽亦前型強顏北客談邱壑招手西山在
戶庭欲叩後來應視昔祇憐摧鬢不重青

太平湖廢邸賞花

玉照亭前日易斜綠沈青瑣屬詩家荒寒不入金鑾記此亦宜南掌故花
高軒門外殷春雷無主狂枝爛漫開誰與池臺記與廢寢園龍樹亦成灰

黃邨車中

勞者歌相和風塵笑語溫解顏霜釀熟放眼濁流奔拱木沈兵器頽雲散夢痕幾家臨水住黃葉不成邨

李世由

世由字曉暉一名振鐸湖南寶慶縣人寄籍安徽廣德光緒癸卯進士官江蘇清河吳縣等縣知縣著有噉廬類稿甲乙二編

金陵喜晤徐十二丈時自湘中罷官來

剪燭更闌酒半醺霜天落葉雁初聞東山同踐中年約南嶽攜來兩袖雲薄宦早歸陶靖節談兵偏罪杜
司勳殘棋一著關全局黑白迷離苦未分

贈魏季詞丈次門存韻

黃葉聲中書掩門敝廬遙指水西村風雲匝地今焉往花雨中庭境不喧早閱名場懸斷夢孰從性海認
飄魂古微堂古楹書在剪韭烹葵一過存

車抵蘇州晤貞長

蜿蜒一道走輕雷咫尺滄江挾雨來忍淚莫談今日事且將新句侑深杯

夜夢異人彈琴旁有歌者與絃聲相應淒婉感人余借衆環聽悲從中來長歎而醒惜歌辭不能全記惟二百年來多好春之句琅琅在耳涉想無端不解所謂因續成二絕以記之

二百年來多好春夢中歌泣兩無因
嫣紅姹紫匆匆過留得廬山面目真
二百年來多好春江山依舊管絃新
楊花終是無情物處處隨風逐路人

得夫齋書感贈

風雨漫天勢未休孤鐙兀兀燭羣幽
薪傳待拾雙林燼海印遙分一勺流
忍視衆生纏水火知無酣夢到
王侯何時歸踐西堂約五嶽參尋伴趙州

夜不成寐有所思

造化無心成眷屬因緣過眼總恩仇
靈臺忽覺光明射此志難同婦孺謀
自許半生無一可故交幾輩並
千秋寒燈兀兀驚風雨知有潛蛟挾海游

寄某

喜君生華閩多文氣逾厚騁轡少年場
開襟眷孤陋中塗誤參差相期轉騰話
日照肺肝積愆或子宥
聚散東逝波新歡倏已舊曠觀渺無物
恩怨徒雜糅

次陳伯嚴吏部見贈原韻

園居穩占柳塘隈雨過疎簾映碧苔
排闥遠山隨客入傲霜叢菊著花纔
牽腸歌哭添詩卷繞夢風雷付

酒杯自覺年來豪氣盡媿將奇士數凡才

園居卽事四首

營巢雙樹鳥知還舊恨全隨落葉刪蚤起新晴無一事閉門竟日看鍾山

午飯堆盤芋菽香園人得飽灌花忙劇畦更種瓢兒菜買酒霜天待母嘗時老母因諸孫就學仍居滬寓

城頭笳鼓警初更近復戒嚴巷僻無人月正明最惜隔牆數行柳虛堂夜斷讀書聲

欲聽濤聲補種松籬邊拓得地三弓願今歲歲休兵革老傍青溪作釣翁近居巷名松濤

諸宗元

宗元字真長一字貞壯浙江紹興縣人光緒癸卯副貢生官知府著有吾暇堂類稿秦鬢樓談錄篋書別錄

夜過海藏樓歸紀所語簡太夷併示拔可

海雲斂月涼生芒栝竹影地森成行馬蹄蹴踏若翻水但惜損此寒瓊光打門夜半撼鄰睡主人延客先下堂兼旬再見已足喜况能坐對秋宵長主人論詩得真理近稱米氏推歐陽上規韓白許永叔出以簡淡非尋常老顛落筆不局曲意境往往齊蘇黃前聞沈侯語夏五文字不可輕其鄉此言當爲永叔發我

意若合衡與量嘉祐元祐在何世縱有作者人謂狂明星耿天露作霜我歸所止神旁皇人間俗論成嗤
點段拂豈果師元章

拔可補寫二十年所爲詩病中起讀不覺竟卷賦示一篇

一病遂教弛百骸君詩娛我晚來佳舊吟辛苦爲追寫此事從容有好懷學古自能成獨到嗜奇不信賸
吾儕西江宗派今無幾坐被人稱近簡齋

送人還京口

喜汝能歸更悄然鳳城南陌夢如煙心知一諾平生負事許千秋後世傳別日可思無強憶衆人相遇復
何賢獨嗟茶癖還同我好試中冷第一泉

雨中賦答拔可依韻

吾生在野早聞道下士相逢先絕倒與君握手十載強誰驅白日迴蒼昊操竿終不變齋瑟奮弩何能穿
魯縞人材令僕正紛紛賸可閉門同却掃北居五月今南來坐負花時被花惱家無半畝終安歸心憂一
雨遂成潦漪園昨過花如塵賴汝新篇供饋犒添丁待抱爲我祝患難相期得自保卽言任士治貧瘠但
數驚雷起枯槁平生自許果如何莫遣紅妝嗟我老

海藏樓觀櫻花

每歲花時輒憶君林光樓影漲春雲已看種樹三年大頗類爲香百和薰醉裏晴陰勞料量眼中朱碧強

區分能收海氣來，籬落歌哭人間可不聞。

夜從靜安寺過歸過，恕齋故居聞恕齋昨日葬西山矣感賦一篇

故人築宅臨道邊，我亦居此曾三年。明明七載同所止，吳風楚霧心茫然。西山昨日成新阡，一棺戢身碑有穿。園中花木皆故物，衛公戒子悲平泉。人間一事猶掛眼，當日屋成君病眠。憂時憤俗復強出，老守一轍無他遷。翦除豪猾奮彈黻，時論百喙稱其賢。惟清與介君可信，宮府不通繒與箋。國門再入騰謗譽，言有不用憂悁悁。鳴笳建纛送還鎮，我時竊歎君難全。牙兵日橫柄，潛奪崇朝禍發張。空卷古來覆敗類，如此爲之者人成者天。江聲東流日夜急，君何負此清冷淵。黃州鼓角不可聽，別語雖祕人能傳。戶庭重過見寒月，榆柳已老無鳴蟬。迴車腹痛在何日，我今躑躅來門前。

哀寒碧

昨游猶踏隔湖山，歧路真成痛哭還。壯歲胡爲俄頃別，雄心不耐病時間。可憐篋笥存衣汗，君有遺衣在余篋想見車茵濺血斑。昨與張君勳陳佩忍同弔語，不隨兒女作哀嫻。

約堂既卜居意有不樂賦此廣之

君昔卜宅金陵居，自謂鍾山落吾手。一朝捨去不卻顧，久閉春牕與秋牖。三年海上君獨開，十畝林陰今始守。騰書前日告京師，我爲申眉開笑口。南來扣戶初不知，突兀高樓隱榆柳。開軒衆綠相周遮，直疑鄰亦爲君有。平生自許策無失，此事何關狂以狃。當前快意豈偶然，草創中興聽評剖。

孤山晚興

寒同閒客坐斜曛打漿清波靜可聞出嶺雲偏留一抹界湖隄自作三分花光娛我遲常見塔勢如人不羣欲寫屋山忘歲月爲招顏寓及蕭耘

四月三日哀邁

汝生值今朝死先十五日生年未及周委化復何恤有母今哭兒有姑今哭姪爲言墮地事直至汝嬰疾我雖強不悲淚欲奪睚出幾忘殯在野忽念抱置膝我初聞汝病得書憶有失南還促宵征入門不敢詰見汝能笑曠若脫械與桎無何病中變不謂救無術沈沈汝病時寒雨挾颶颶晴光晚在牖汝竟一生畢我今寫詩處卽汝死之室魂小將何依夢嚙雜啾啾

病二日感書

病去若抽絲病來若排牆聞語我自失兀兀病欲忘記視池東屋還步池西廊雲明日晚出爛然同朝陽昨雨漲池流不沒惟石梁今看已漸涸積潦歸何方因之悟養生洗濯先胃腸寒者能時通病不棲膏肓移居惠興里自春徂夏雜書所感

鄉弄遲歸早卜居中興草創比權輿百年願可支門戶一室安能事掃除杜老堂成應自賀馬卿壁立竟何如東風花樹垂垂發劇憶來看是歲初

羣峰翔舞一湖開赤手曾思關草萊豈屑藩籬甘束縛還從杜橋辨人才垂梢霜橘明晴日解籜風篔待

晚雷付與兒童作經濟先生何意與徘徊

覆戶高梧百尺強緣墻花蔓雜丹黃有兒可住東西屋無客來分上下牀豈戀家居千日好（用諺語）
真如人海一身藏篋書別錄今勤寫略抵宵晨酒饌忙

我園

我園有一梅日往問消息高枝遲著花低枝初點的東風雖未來喜欲動顏色平生鬱此懷每可唾手得
况此爲我有寢食日在側縱使閱雪霜定免受殘賊明年更作計三數當手植土壤雖不寬耙耨恃己力
位置將何宜無意限南北終思我園中永不長荆棘

上已後一日挈家人兒輩出游湖上竟日

輕輿飽看環湖山兩隄束湖如半環臨流况際風日美從我恰得家人閒南屏午靜聞鐘語認塔爭言吾
到處兒童摹擬說山川尙辦乘船呼伴侶淨慈香火明祠龕人謂禮佛多祈蠶出門已見桑葉大間以高
柳垂毵毵行宮舊鏢孤山址今闢公園任人至一堂高踞萬花中置茗風廊徵往事詩碑在山覆以亭略
舉沿革兒能聽果教長此謝憂患髮鬢不染將重青人生行樂須隨分我亦年來忘喜慍全家日作湖上
游一任紛紛笑充隱

同拔可亮生泛舟西谿遂入花隴登桃源嶺下視江湖賦此記游

嶺輿谿樾恣幽尋一出能窮浩蕩心湖外有江山可數冬前不雪日微陰還從花隴穿芝隴已信楓林遜

竹林明歲重游應共祝忍寒三客再登臨

梁鴻志

鴻志字仲毅福建長樂人光緒癸卯舉人官參事

石遺室詩話衆異少孤貧肄業大學與朱芷青至相得爲詩喜荆公后山工於嗟歎有作必請益於余出關客瀋陽詩境益進入官後遂不多作大有身後名不如一杯酒之想故存略止此

哭丁叔正

板幹不解捨不祥未可離夙昔具此意持以當告誰叔正未中壽云胡脫串羈眞宰豈主張此中存天倪憂貧賤士事達者固不爲至非冠蓋徒憔悴寧所悲獨惜長安市氣類隨風披未來有世界心源終在茲人生有家室苦樂已均半解脫向文字無異益憂患吁嗟吾與子寧免墮此漩長安一携手文酒見崖岸今年斷還往衡宇幸可望驩情未相接存沒遽爾判過車折馬箠腹痛雜微嘆化鶴君倘歸忍見舊時卷

送陶谷之官蜀中

朝官勝外吏文酒與鞞版舍茲說官味得失當不掩時流落世諦乞外動驚惋延眞去隨牒此意誠不淺峨峨劍門路細雨隨小蹇詩人例游蜀陳跡那可免堂堂趙侍御贈別語微婉不言行路難但與志游覽

延真幸念此噴鳴任官長

郡將豈足貴所貴能親民親民亦虛語仕宦祇爲身臥治已上考畫諾稱絕倫吁嗟此黔首肥瘠越與秦吏治譬烹魚人才猶積薪積重未可返坐念楊侯仁連帥今世賢懷哉余所陳

我詩初不工爲之亦非久就中有甘苦不敢喻諸友何生夙好事鋟版落人手延真最先覩譽我不去口方今論文字名位爲美醜官卑詩竟好所得恐多苟君今遠作吏此事還廢否絕臺有止境高詠倘不朽吟成幸郵我媵以嘉妙酒

庚戌花朝後一日集小秀野寓廬小飲賦呈

絕代迦陵老箋詩秀野堂憐余能寂寞刻意問行藏微抱關朝局閒身稱酒場殘春花自好聊復慰流芳
瀋陽小河源野步

興來舉足城東隅美此一水千踟躕路人矜夸指衣帶云是渾河之所瀦水邊茶肆足歌舞亦有游女褰裳褰酒船備保勸我沾故知石魚非此湖惟餘此水能綠淨照我七尺清且癩東流何暇更汝惜自愧未老顏非朱三年京國役魂夢記上江亭愁日晡天游隨地可貧賤胡爲墮落居穹廬此邦冰雪有代謝腥臊埃壒無時無水聲嗚咽如有訴直似空谷傾城姝詩人畸士兼腐儒百不一可應時需平生懷抱豈殊衆漫謂丘壑供野娛墜歡散失無覓處何況清景難追摹歸來合眼夢烟水澆筆欲作江南圖

久不見沈隱書來言方爲大府治官書苦不得值調之

文人受賂古有例，儒者治生未無計。班金陳米自解人，頗怪異時劉允濟。盧生不廉况年少，正坐飢寒落荒裔。乍論肉食已流涎，却對胡沙實危涕。打門府檄促視草，遮眼官書等囚繫。治庖尸祝不受償，命筆爲刀書作隸。淮西石本絹五百，詔許昌黎市文藝。盧生胸次多古人，文學縱橫詩律細。要令利市動輦金，莫遣達官戒傷惠。揚雲不受蜀賈錢，劇秦美新亦已贅。相如得金使賣賦，歸與文君供取醉。較量得失果孰賢，不貪金銀那識氣。但論日食饜五鯖，何貴環書來十吏。我生賦命本窮薄，忍說讀書作吾累。殘杯冷炙，今已無授牘。抽毫倘能試，潭潭公府高真居。聞說青雲皆自致，吾舌幸在硯未焚。欲記南園頌西第。

同蘭隱夜游天津公園

捐書永日占文移，破例還家致可悲。照影池波吾未老，倚風羅袂子爲誰。沈沈人境趨長夜，宛宛心光似舊時。未有田園頻負戴，小遊劇耐十回思。

清明日江亭同芷青風持

斯亭在宣南高曠，略得地致如長安。客抵死不願吏林，峒夙所嘉結構亦殊致。以茲愜心理，終歲十數至。荒乘懷已孤，取徑世所棄。茲遊得二子，不飲亦已醉。吾儕未聞道，坐覺形骸累。猶能就蕭寂，被我經世意。倚闌試垂手，挂眼念山翠。風景固不殊，泫然搵新淚。

故山誰與歸京國，誰與住江亭。五寒食去日已無數，男兒重時會真若鶻。待兔何期好，身手俯仰溷世故。春城花冥冥到眼，但如霧坐令少年場孤賞。寄微慕傷高，取悅魂盡興。若可去斜陽，在煙柳歷劫此遲暮。

和哲維

世故挽人殊有力餘生相見且軒眉一鳴何地容吾喙萬事輸人勝以詩閱報攤書真兩失聽香讀書鬱
千悲何當共子謀娛野盡意看山快暫時

一閑

一閑兼百技天意不吾仁念此樓頭月相尋世外春玉情堅自潔龍性恐難馴亦有悠悠者車徒颺萬塵
春盡日被酒

多生病意恣侵尋隨分羈孤動倚吟葬送春韶傷覆水斬除鄉夢感棲禽意中小閣連平楚別後層城有
暮陰更與何人珍短夜自扶殘醉看烟林

題盧沈隱陳塘回首集

平生落拓盧沈隱曾共東京著夢華九死投荒疑併命萬方多難各無家黃雲夜擁行邊馬紅豆春生故
國花卻憶陳塘芳草地爲君吟過日西斜

懷朱芷青京師

眼中羣鳥接雲天忽覺春城道里千舉國從人容獨笑舊游除子算誰賢此身作絮終塵溷來歲看花忍
愛妍一事與君同鑄錯悔勞劬楮過三年

望李氏園林亭子

檻外胡塵風動天望中亭子恁人憐枯詩病面能爭瘦殘月幽暉不共圓去去忍尋通騎路休休難辦買山錢平生眞賞誰能會叉手閒庭一惘然

關東道上

轉轉車輪有萬周勞勞心緒近千頭乍驚午夢喧遼水忽送殘陽過錦州塵失雲中知近塞水明沙際誤歸舟蕭然疲役綠何事不信人間有壯游

榆關

懶說金源入獨松開門延敵事成空紅顏自足銷兵氣青史何嘗罪寓公四塞丸泥蒙叟篋三邊甌脫楚人弓君王自割燕雲地雞狗何曾是董龍

寄題烏山石壁岩舊讀書處

齋鐘不聽十年強苦憶城南草樹岡一逕裂雲松突兀數峯藏寺月昏黃舊隨洗鉢僧成塔誤記尋詩夢墮廊誰信出山仍面壁此心曾誓佛前香

海西兵事方亟余偶事纂輯有以時危見諷者詩以謝之

江湖漚沸大將墮辛苦昏燈尙著書誰計他年覆醬餒略知今夕勝擣菹焚坑豈僅爲儒禍鼎俎行爲舉國儲徐理殘編還語客便精馬稍待何如

所居之西有隙地爲賦一詩

淺樊荒圃屋西偏小立閒行此最便隨意牀敷林際草泥人茗坐竹間泉浮居底用成三徑沈陸何由庇
一椽使儼躬耕全性命故山甯有未歸田

過東華門史館

預爲死後求佳傳不惜生前說舊恩當日遺山真失計但營亭子不臣元
報國文章自不侔早登台省晚方州荆駝別有金鑾記彷彿先皇淚暗流

癸丑三月三日任公招集三貝子園修禊集者三十餘人卽席分得至字

春城窟塵土人事雜嬰累江湖夢中眼屢引輒不至揭來天氣新春物紛自媚游心枯後草欲苗未敢遂
滄江吾宗彥獨往輕世議能收永和春掬取還氣類郊園實近郭樓角帶山翠流杯一曲水中有興亡淚
神州待袂除袖手忍輕試獨當就林垞滌我經世意主人中坐歎不飲意已醉催詩更敷席春陰促歸轡

卽事

玉貌園城不憶家但聞啼鳩見飛花官閒豈有諾堪畫俸薄並無錢可叉朝貴且隨交子賤市民頻夢健
兒譁待填溝壑知吾分卻爲神州一歎嗟

八月四日東交民巷偶成

夾道槐枝小弄黃昨宵樓瓦見初霜秋空可語惟孤月客夜憑誰共急觴撫髀數來盤馬地支頤長對築
球場一閑何止全微命更把癡肥換瘦狂

九日携家人天津中街茶肆

佳辰有盡意鷄窮失笑三年陷賊中
冷暖自知聊茗飲冤親無擇付秋風
未隨物化仍憂患待與人言畏
異同眼底一塵心萬里獨能枯坐對冥鴻

海行抵吳淞口

舵樓初日見微明一髮淞流覺有情
老懶厭爲黃鵠舉歸休行與白鷗盟
風波知我能高枕書冊從今近
短檠獼犬莫疑蘭佩在世間隨處有魚羹

袁思亮

思亮字伯揆湖南湘潭人光緒癸卯舉人官印鑄局局長

楊杏城先生輓詩

華屋山邱恨湖波日夜流可憐前度月猶照舊時樓
穉榻悲長掩膺舟愴昔遊酒痕襟上在忍更說杭州
淒惻魂歸日孤明曙後星銜哀過故宅流涕對新亭
芳草黯無色秋蟲不可聽茫茫泉路盡雙眼更誰青

閔爾昌

爾昌字葆之江蘇甘泉人

九月十六夜月

皓月中天斂素輝偏能入檻復穿幃一年如此夜應少萬里仍多人未歸秋色芙蓉開晚秀寒林烏鵲夢南飛空庭立久忘清寐忽覺霜華上客衣

寄憶李美叔

故人有弟同爲客送別江鄉更惘然愛我自將兄事敬備書頗仗主人賢舊游十載銷秋夢滄海千帆隔暮煙太息荒原今宿草知君愁詠脊令篇

丁傳靖

傳靖字聞公江蘇丹徒人禮學館幫纂修有秋華堂詩

法源寺

南冠客繫古招提劫後山河滿目淒不待曹娥碑卒讀憫忠早爲疊山題

偶成

徐福當年早見幾載書東渡去如飛那知異代焚坑禍轉在童男泛海歸

南歸雜詠

十二月既望出都汽車所經隨地寄興感觸無端拉雜滿紙錄而存之以誌鴻雪

良鄉塔影望中遙往日郵程第一宵三百年來題壁驛唐家渭水宋陳橋
當時博野幾純儒北學榛蕪啓逕途顏李遺書競傳習偏無人道尹元孚
趙佗此地有先廬守塚人來帝號除西漢文章光日月開山作手兩封書
相公節鉞鎮漳濱畫錦堂開爛縵春怎怪孫曾思北伐安陽門第亦胡塵
黃流終古困宣防今日虹橋百丈強海水羣飛河轉定一杯我欲問蒼茫
廣武山前咽暮笳步兵醉語太槎枒羨他絕代王摩詰不詠興亡詠落花
客路三千未覺賒恩恩漢上已停車平生看慣金焦水一見江流似到家

何震彝

震彝字粵威江蘇江都人光緒甲辰進士官

訊芷菁

簾楚塵埃百不堪淺深世法已能諳
死生文字寧無恫跌宕公卿略少慚
伯樂眼高空翼北史公游倦滯
周南鷓鴣牛馬成何事誰點誰癡任細參

石遺先生招集小秀野草堂

草堂小秀野花事下斜街語成人意誰能適
天懷固自佳點茶供奕局釘坐檢詩牌
良夜厭厭永應知酒似

淮

陳士芑

士芑字翼牟湖南湘鄉人光緒甲辰進士官郵傳部主事

南樓感舊詩四首

南樓在武昌郡城中上踞曾峯下瞰通衢
隆岫崔嵬馬孤聳僕生於樓西之寓廬去樓才百
步稍長游眺其上苔碧松蒼古歡欲墜每吟山谷鄂州南樓天下無之句俛仰今昔感歎彌襟
先大夫馳驅王事去來無定然每還郡城必數數登南樓是時江漢澄清風物和麗庭闌色笑

之歡朋簪讌游之樂聲效增愉詠歌靡間康樂言四美難并者殆兼之矣歲庚子侍先大夫至武昌徧覽西山黃州諸勝復屢登所謂庾亮南樓者崇規幽構稍遜鄂州然風月固自佳也居二載先大夫挂冠歸僕亦遵海北上自是蹤跡不復至南樓矣歲序如環身世多故榮凋墓草哀動陔蘭常侍思舊之賦中散薄祜之嗟百感交於一身自念飄梗半生惟居武郡最久游南樓最習感往增愴輒賦詩四章非張南樓以志不忘云爾

蜿蜒黃鶴山雄鎮名鄂州蛇蟠走百里鶴去忽千秋南樓跨山起結構何崇逾奇峰忽中斷呀然石洞幽巨靈擘鴻濛遺黠何年留振衣一登臨浩蕩豁雙眸長江曳白練滔滔東南流黃塵迷八紘靈籟聞啁啾萬瓦耀金碧俯視闌閹稠車馬喧往來喟焉感蜉蝣哀樂嬾今昔歲序相環周清景懸心目栖栖懷舊游我生南樓下去樓不尺咫澄宇淨瑕穢風物信清美萋萋芳草綠嫋嫋秋風起吹笛招鸞鶴涉江塞蘭芷俯仰驚菌蟪寂寞年光駛浮雲變崇朝驚波激逝水時事多興廢剝復觀終始新錦迴黃綠異尚濡紫迴首緬良時盛衰固如此

少小侍庭闈學詩戒而牆觀政隨征車江漢翩翩幾度別南樓勞燕念星霜洪波涉梁子款段過光黃飄蓬逐奔塵忽忽成老蒼偶作樊山遊淹滯二載強聽泉寒溪寺哦松讀書堂從遊奉色笑公讌樂未央屢登庾公樓風月嘯胡牀嘉名遠輝映懷古情芬芳依依武昌柳陰陰南國棠遙與陟岵思白雲空飛揚永遺釜鍾馗徒增風樹傷三失愧臯魚惻怛摧中腸

鳴鳥念同羣，飛花戀故枝。感彼同心人，索居慘不怡。弱冠吟秋柳，塗抹挾清詞。王丈垂謬賞，雅才許言詩。悲秋發清嘯，一見湯生奇。藻思淪冰雪，靈根探天池。朱鶴唳雲端，鵬搏思怒飛。各有萬里志，燕雀彼何知。談天識鄒衍，被服光陸離。形勝攬域外，九州環瀛裊。裊卷舒入尺，素縮地言非。欺奇想排闥，陋論一吠吹。正名辨異同，商榷得良規。乖離視參商，晚晚曜靈馳。一瞬忽千齡，惕茲朝露晞。嘉卉有瑩瘁，華月有圓虧。存亡亦偶然，觀化奚足疑。末契託金石，曩游眷芳菲。他時過南樓，聞笛有餘悲。

林蒼

蒼字耕煤號天遺，福建閩縣人。光緒甲辰進士，官江西知縣。

春盡日石遺丈招飲匹園感賦

晨興喜新晴，忘却春垂盡。招邀得寸紙，陡覺新題緊。日斜過匹園，花淨樹留影。主人如春風，入座意先醒。相將上層樓，烟嵐出屋頂。全山餘一片，可惜無多景。丈云烏石山被人占，只有此一片耳。悵然下呼酒，咄嗟足蔬筍。尊前六七人，餞春只自飲。一年幾佳日，獨讓詩人省。繁華事易非，淚落還強忍。春去行復來，人老須酩酊。書堆中有世風味，久彌永莫問。落花時桑海亦俄頃。

晚赴敏生湖上飲酒罷相與泛月夜分始歸賦呈石遺丈

荷風散晚涼湖氣滿亭子舉頭未見月月意先在水洒闌扶醉行人靜景愈美天光何陸離火雲鬱成紫
夜幽燈力微時有驚禽起平生江海意晚歸弄清泚身世一扁舟且作須臾喜草樹已望秋冰輪缺如此
一似早衰人憔悴不自理悵然攜影歸遇我清冷底家臨河上月夜歸輒看水久之湖遠月依然不覺在城市

湖夜

獨遊興味易闌珊道左忻逢素所歡夜半西湖如我醒月中清景當詩看歸人欲盡心逾爽寂處相容地
尙寬生受涼風無一頃車塵明日又漫漫

人日石遺丈召飲匹園奉呈

草堂人日有嘉招坐遣風花不寂寥佳處園林歸一老百年文獻話先朝食單分付門生定春色從難白
髮饒歲歲強歡判美飲自忘身世落漁樵

匹園海棠二株其一自十月開花至今備極其盛一則不著一花感作呈石遺丈

海棠能作先春花占斷流光處士家滿意正當全樹發向隅別有數枝斜苑枯各自參消息種既元無辨
等差同在東風噓拂裏讓人獨秀幾嗟呀

宛在堂秋祭呈石遺丈

江海詩人隔歲歸湖堂依舊對斜暉薦馨故事留重九招隱家林屬少微結習略存香火社窮居只合芟
荷衣蕭條異代憂風雅滿眼秋陰木葉稀

路朝鑾

朝鑾字金坡號瓠盦貴州畢節人光緒□□舉人官四川候補知州

自題舊繪仙山濯髮圖

丙辰秋夜夢游幽巖絕壑間褰裳涉水抵石壁下見崖半鑿有汪水雲濯髮處六字石壁陡絕有人掖余登極頂俯視烟靄合沓深不可測恍至一處則有蘭若在焉老嫗延入指寺前茆菴一椽曰君盍棲此讀書且可避世醒而異之因憶趙堯老近歸隱榮州山中夢境得毋彷彿作詩紀夢兼寄堯老及得復書謂水雲曾游榮州有詩載邑乘並屬作仙山濯髮圖志之余初未見榮州志不復知水雲有游榮事斯益奇矣因徇堯老意作圖來游京師適同人有漫社之集出圖徵題先成此詩

畫中巒翠知何地物外琴心別有天留語他年猿鶴侶待君同賦夢游仙

丙辰九月紀夢并寄懷堯老

昔有謫仙人夢游天姥峰雲霓明滅變朝暮連天秀拔青芙蓉若有人兮呼我出青鞵布襪遙相從褰裳策杖度絕壑空山寂歷無人蹤清流見底漾寒荇峭壁屹立懸長松云是南宋琴師濯髮處摩崖奇字蟠

蒼龍飛滯激石響天籟疑聞琴語聲淙淙雲梯直上鑿幽險兩掖奮薄生清風峰迴路盡意憫絕頂憩
足祛塵蒙眼前突兀見高棟丹青圖畫開琳宮何物老嫗自肅客醜顏鶴髮方雙瞳茆庵爲拓半弓地讀
書勸我留山中阿母幾見桃實熟麻姑一笑桑田空俯視人間鬪蟲蝮齊州九點烟冥濛喚起謫仙人痛
飲吞長虹一醉千日不知醒層雲墮席舒心胸覺來迷離失幽境隔鄰靜夜聞霜鐘苦憶橫溪老居士萬
松深處支吟筇君隱溪山我塵土人生泡幻將毋同出岫閒雲本無意搏沙聚散何忽忽作詩記夢兼憶
遠因風寄訊南飛鴻

題箕公千巖萬壑圖

尺幅烟雲夢往還連天烽火照鄉關輸君十日閑窗坐寫出荒江劫後山
君籍蒲圻近遭兵燹故云
吾愛君家祕監風鑑湖逸興逐秋鴻待看競秀爭流處明日扁舟入剡中
余時有浙中之游將以明日行矣

曹經沅

經沅字縷衡四川綿竹人官禮部主事

題楊忠愍墨蹟得心字

容城大節啓東林遺墨流傳抵吉金兩疏挾霜寒賊膽一槐歷劫抱冬心
松筠庵故宅大槐一株係公手植見嘯亭雜錄訪碑焦

籠摩殘石載酒斜街認舊琴

公有嘉靖八年手製琴藏識輔先哲祠

生日瓣香循故事

公以正德十一年丙子歲五月十七日生劉美初集有拜公生日詩又法

梧門張小屋曹定軒拜公生日於松筠禪室見還期高會集朋簪

蘇齋跋詩近歲晤文孫帥則吏部亦有雅集

題雲陽涂氏瑞芝書屋

擊鉢催詩苦未成繞廊坐待月華生客來榆塞知邊事居傍蓬山辨漏聲銷夏乍過沈李節臨流初試踏

莎行

子厚新自北戴河歸

瀼西是處無安土奈此牆東避地情

題仙山濯髮圖

枝官困世網憂患恆相牽十年誓江水何計營一椽有時辨雙屐踏偏翠微巔巖壑之深邃車騎愁喧闐嗟茲九服大豈無好林泉凡想得勝境永謝閭浮綠蒼崖與峭壁名輩紛磨鐫憑高見曉日俯視森澄淵紺宇更幽絕中有煨芋僊清歌雜梵唄妙諦忘言詮於焉闢精室插架羅瑤編醇醪讀書味投老娛丹鉛鶴書不到門猿公恣往還詎惟避世囂亦以全其天此境本預構疑無他人先不謂子路子夢中先著鞭我聞浮屠說泡影看山川蘊廬苟適意片晌同千年底須買沃州一壑矜自專水雲傷心人詞筆何深娟偶然留雪爪適與夢境連三生儻可證請叩空門禪題詩報吾友文字今當捐

黃式蘇

式蘇字胥菴號迂仲浙江樂清人官寧德縣知縣

復戡書來問訊近作戲酬

有人夜半負山去驅使桐嚴落紙飛

復戡近得詩頗多皆于役睦州作

只恐龍湫同被刼苦思雁蕩未能歸書來翻問有

詩否別後深知羈宦非鵬也無厭搜句盡肯留待我遂初衣

立春日作

微雨不成雪荒城又早春山中風俗舊刼後歲時新盤菜猶歌杜桃花豈避秦土牛長寂寞無復勸耕人

除夜

尋常節物已心驚况聽山城爆竹聲歲歲光陰如此了星星毛鬢可憐生燈前涕淚兼家國海內風塵幾弟兄三載天涯游子夢白頭愁絕倚闌情

遂陽雜詠

小小飛泉亦自奇譬如無佛獨尊伊龍湫以外難爲瀑強爲靈巖賦短詞
鑑塘活水亦尋常却爲題詩憶紫陽俯仰祠堂雲已散瀛山一角晚蒼蒼

自平陽鼇江至桐山道中作

不喜江行喜陸行一輿載夢到山城誰知落日桐山驛又趁疏星問水程

夕照寺

出城不及里晴巒迎人媚沿隄信幽步曲折不復記雷峯塔插雲翹首忽已至逶迤轉蒼麓所歷漸杳邈
湖光搖空碧嵐影落寒翠隔水鳳林鐘一杵雲外墜丹霞出林樾隱隱佛廬寄頽垣剝堊粉金碧留題字
寺額雷峯夕照寺五字 入門覓宮殿草草十笏芘裙屐誰肯到久矣山靈懟我來遲夕陽孤冷契山意日暮僧不歸
蒼涼詩滿地

春日山行絕句

東風似虎惜花殘戀戀羔裘卻卸難嶺上凍雲山下瀑一般努力作春寒

王賡

賡字揖唐安徽合肥人光緒進士官內務部總長

呈石遺先生

憂患半生餘筆在聲名四海屬公多瓣香竊有言詩志青眼風塵巧琢磨
多慚射御未成名獨學無師手便生低首扶風甘下拜此心不異鄭康成

屈指前賢詩律細黃金近欲鑄荆公撚髭未解推敲法翻悔年來學放翁

契友石禪近勸多看唐少君宋又言宋之王陸可看余答以牛

山詩律極細甚願鑄金事之惟年來余詩率易之病固緣信口而出未暇推敲或亦自喜看放翁來也質之先生以爲然否

遙從海外識依歸載酒他年願莫違從此大潛山色外因緣請更結淮淝

荃莊昨寄到新刊大潛山房詩鈔有先生一叙述與壯鷗公當

年文字因緣甚詳

林長民

長民字宗孟福建侯官人官司司法部總長

石遺室詩話宗孟能詩而罕作其壽梁任公五十詩筆意倜儻以此鈔例不選壽詩附錄於此云十稔甘稔若軒羲新會學人今艾者五十已成天下老此是絕續非推移我來作意介公壽長日叉手攜無詞說公文章妙神化但能識字疇不知祝公事業峻山嶽頌聲未出先自疑文章便算公事業公或忌諱吾敢欺從來書生不得志動以簡檀鳴權奇縱橫論記歷藏皮貫串真理誰與誰周秦兩漢多作者東鱗西爪略能窺晉唐以來稱家數空有閒架堆琉璃陳言敷語競勦襲搬演仁義充家私人間萬種興廢迹載者濫載遺者遺紛紜殘闕五千載滿地散礫公羅之天既喪乎天未喪斯文後死同在茲公發大願編國史直與世運爭盛衰發凡起例卷第一已將吾土通大達二卷三卷行脫草望公書者如渴飢我昔慕公未見面但讀時論成狂癡買來畫像事頂禮夜夜屏息陳清卮公逃亡時我遊學同客一晤終稽遲神交私淑寧踰跡

長此終古亦心期無論世事開生面相將投筆言平治一試再試苦不驗滋者蔓草莽者絲也
知自來蓄禍亂一時摧廓無由施造物所畀別有在無乃長短違其宜近來新稿又累寸思想
所被融春澌講壇聽衆動千百無鎗階級皆健兒西郊矮屋窮研討出門一笑看殘碁殘碁急
劫聽生死畫枰檢子心自怡嗚乎公真知非復知命此詣兼造瓊與尼我生丙子公癸酉歲數
相差纔幾時生天成佛孰先後兩不敢計惟師資願公長健作山斗寸舌椽筆終相追文章使
算公事業一日萬言到期頤

題蹇季常對酒圖

蒼天胡獨弄此老畀以逍遙畀煩惱郎州有穴不肯依燕市屠沽雜形槁時亦挾策上侯門時與樵夫說
王道時復刻意追清曠舉眼看人無白皂口舌得官言轉妄窮愁致病顏逾好似俠非俠儒非儒篋中零
落說難稿百甕寒蘆未消却一尊清濁朝朝倒我昔交君各年少海岳看花春正灝檻外平疇接遠林書
囊來去足情抱而今歲月不一面咫尺欲前有泥潦十五年中幾悲歡人事天時太草草近聞束薪三鍾
粟病者受賜日以少乃知此事尙難致何況江田美魚稻君且狂醒了此生我亦婉變死相保圖中兀兀
最傳神四十年人頭欲皓

題乃木大將像

老父功成子死忠早期收骨黑江東吟成立馬斜陽句想見山花滿地紅

公二子從軍皆死戰後勒馬金州公有征馬不前人不語金州

城外立斜
關之句

雞冠松樹障如屏老鐵黃金鎖海溟此是本來朕家事無端山色爲公青

鷄冠松樹老鐵黃金皆旅順口山名日俄戰後一年余一一歷

之觀其
戰蹟

劉道鏗

道鏗號放園福建侯官人光緒己酉優貢官內務部司長

遊焦山宿松寥閣次穎生韻

勝流眼底已晨星詞客山中合有靈

謂端梁諸公

小閣坐看千櫺去荒齋來共一燈青名縑累本歸書藏劫火

多年冷佛經夜靜喜君吟興發蛟龍檻外尙潛聽

開歲二日遊湯山同縑蘅作

百年苑廢偶經過共倚霸漪感逝波春日郊遊今復始行宮舊蹟已無多園丁解說興亡事朝客空營安樂窩回首故山風景地溫泉冷暖近如何

次韻縑蘅抱湖軒曉望

頽垣繚繞水迢遙古柏蕭森閱幾朝絕似江南好風景綠波如鏡影雙橋

西湖寄懷纓衛

孤山亦有舊行宮，持較湯山便不同。竹自娟娟泉自好，獨無松柏泣秋風。

黃懋謙

懋謙字默園，福建永福人。宣統己酉拔貢，官總統府祕書。

石遺室詩話、嘿園詩酷似其師。駁菴先生蓋皆私淑荆公也。南北離索，不獲多采錄，其尤工者十一首。

聽水師招同石遺丈宿師子窩

荒榛宿莽晚蒼蒼，三兩疲驢陟數岡。山半畫廊連棟起，望中渾水帶沙長。風號欲遣寒專夜，葉積多因雪先霜。三宿浮屠猶自感，更堪人世有滄桑。

約石遺丈小飲，卽次其贈散原韻兼柬塾雲秋岳

西湖徙魚韻壘塊，和蘇三詩出塵墟。昔公磬折陳后山，諱日僧房爲位拜。

甲寅丈於臘月二十九日假法源寺爲后山設祭 抱經

還鄉垂十葇齒，髮未零神不憊。濤園療野盡沈泉，風雅公常俾勿壞。人方欲識今后山，知我親公乞爲介。生逢國火更檀槐，眼見平陸成灘瀨。重陰九城撥弗開，三度兵氛六年內。陽氣洩地冬不寒，夜雲障天月

常悔鶴糶屨久無餘米價鞋錢新有債天公殆欲昌吾詩故以窮愁來強派從公襍被宿山樓夢裏龍塘瀑猶泝相逢未穩送復急怕有驪歌唱門外北人歸北南歸南春半花開許來再乞食還能詩和陶采興無忘舟訪戴自同里閘泊同官豈徒貌敬直心愛客中沽酒待濡唇更援岐亭開殺戒蘇程兄弟定來過情之所鍾在我輩

重游戒壇潭柘二寺得詩八首

前游垂十年無恙此僧寺石廊列衆松各有名字尋思半已忘一二尙可記臥龍與禮塔再見定何世
世變寧有窮未識吾生屆若以七十期猶能三度至
飽飯及亭午六龍光照衣寺門出憚暑佛閣瞻峩巍升梯輒住足觸處生伊威徒倚佛闌干近山青四圍
紅牆遠可辨目力開煙霏回向禮法相旛錦風翻飛
屋脊雲如輪畏雨屢回首天公忽作劇小試彈丸手飛雹亂中庭敲瓦響擊缶雨來夾狂風銀竹散千畝
暗燈望明蟾滴瀝厭經久佛宇夜添涼平分到吾牖
峯峯新沐淨樹樹初陽明披衣起盥漱清脆聞黃鶯蒙密來營巢勝鳴市與城疑我是俗耳送我三兩聲
我尙坐僚底因循失歸耕南畝不課雨西山空望晴
甘心受微辛回想更有味羅暎信峻嶺坡壘復棋置草木深蔽虧升降無暑氣微風松子響細石苔花膩
太行來迴旋渾河入灌漑凡茲所見景再至倘予界

列輿行蜿蜒側入潭柘路繚垣條到眼急覓舊題句昔來秋正中衣袖濕桂露今知猗玗竹寺有猗玗亭四圍多竹

笑我顏非故來原持妄身去那禁回顧紗櫺佛祖林銀杏帝王樹

崩騰玉淵瀑廬山有玉淵潭雖遠猶人寰別後夢不到夢往風吹還劈山置此亭其傍水潺潺散流爲沮洳積礫

成波瀾龍潭縱稍勝未足償躋攀且莫較匡廬因思吾鼓山
論詩不知疲西際漾皓色開扉望林薄月痕一千尺清光臨靜境近歲無此夕露冷蟲噤聲颯振鳥擊翼
薄寒尙能勝正自得酒力歸視對牀人如雷動鼻息

示瘦公敷庵昆仲兼懷石遺園中

回睽京國七重陽不待凭高意已傷雨點斜侵窗背白秋容盡變樹梢黃浮屠會合懷前例節日朋儕欠
一觴寄向皆山樓上訊世間何物勝還鄉石遺歸里築皆山樓於宅中

江庸

庸字逸雲福建長汀人官司司法部總長

上巳日集天寧寺晚飲小秀野草堂

數里城西路無花祇見塵昔年曾此聚庚子五月侍癸生師遊此斜日少遊人風厲春難冶松高塔與隣禪堂容小坐

所悵是芳辰

春夜懷人

皎皎霜前月松枝拂地寒巷深車轍斷親健酒懷寬拭目看新績支頤覓墜歡美人渺天末遙夜憶琅玕

二閩餞別陶谷

郎署浮沈易白頭一麾原勝薊門留今年社事隨花散自昔詩人好蜀遊惘惘離思生水次蕭蕭涼雨過
城樓東坡老願嘉州守君愛凌雲醉月不

南遊雜詩

江南二月春寒重留得梅花待我看一任梅花盡搖落水程半日好看山
聽雨宵深夢不成只愁明月阻山行南來爲踐看山約乞放蘇杭十日晴
泠泠山雨著衣涼風過殘梅滿院香偃蹇四松霜雪裏不知人世有滄桑
清溪迴合樹榭暮雨霏微一徑斜鄧尉山光原自好此行初不爲梅花
行盡橫塘始見山靈巖依約溼雲間斜風細雨鷗波路一棹衝寒又往還
雨過蘇堤愛晚霞湖樓一夕當還家江南二月春光好紅是桃花白杏花
消受春波槩一枝好風吹柳碧參差夕陽忽下孤山路一角湖亭露酒旗
二月湖波碧似油桃花爛熳柳絲柔心中無佛休隨喜獨步西泠拜岳侯

竹樹蕭疏水一涯
當年樊榭此浮家
我來一事過前輩
曾看山茶五色花
垂楊一碧草芊芊
綿雨後溪山好放船
何日移家住吳下
飽聽柔艣送年華

林志鈞

志鈞字宰平福建閩縣人官司法部司長

贈芷青

安得生來不入城中冷
暖見陰晴殘秋久
客有倦意經亂聞
雞多惡聲歷劫蟲沙歸寂滅
一心家國太分明
桃椎曳索風塵外
儘自無言意豈平

次亮奇牡丹韻

名花一見破千聞
色相還從眼底分
簾幕影空開淨宇
旃檀香遠擁紅雲
地偏不惜連朝過
日煖初宜帶葉薰
寂寞青墩溪畔客
東風獨立思氤氳

八月廿六早獨遊江亭

行野廓秋思無爲守
一室車塵騰九衢
到此諸想黜清曠
接旦氣心事對白日葦
寒花影澁風勁逝羽疾
迢迢雉堞靜俯仰自蕭瑟
窪水弄雲景枯涸亦誰恤
看山憶舊躅爲樂瞬已失
小立豈久留去住固難必

送嘿園之廣西

八載滯京邑局束轅下駒宙合浩蕩內守此寧非愚君有萬里行壯哉七尺軀而我不得去相送徒增吁
桂林山叢叢客路多崎嶇歷險見致遠歸思得夷途况君富佳句風物堪追摹從來賢達士自有邱壑娛
鳳凰獨飄翔所集與衆殊羞從鷄鶩爭坐爲世故驅蹉跎顏休低才力時所須美酒出深巷照耀溟海珠
但行莫惆悵離合無時無

九日游天寧寺

重陽無雨復無風寺靜人閒一笑同簷語飄鈴虛想像塔形控野自高雄節寒盆底菊初蕊柿老霜前葉
漸紅回首家山烏石頂小樓只在夕陽東

世亂鬱鬱久爲客杜此語辛酸不可聞隨興又成今日意得閒便與俗人分蟲聲迫砌數叢草雁影高秋
一握雲轉盼仍須感陳迹祇愁無酒遣微醺

哭芷青

寢門慟哭今何及詩句能傳已可哀颯颯銘旌隨世事寥寥泉壤論人才騎雲欲款天難問入夢相呼子
儻來自有心光長不滅未須傍佛說輪迴

驚聞絜先死纔數日不見耳

人生三十後交友苦不深於子乃獨異覲面成知音相知三載餘心折非虛欽以子豁達懷撥我瞋恚心

有時互唱和我詩子能吟騎驢西山暮譚鬼花塢陰誰知握手間終古城分襟瞬息殊苑枯感觸非獨今
萬物瞬息殊苑枯見不及此無乃羸君贈余句也君書墨未乾便已嗟人琴生果如懸疣決之吾所歆豈若方內游鬱鬱樊中禽
祇恐死亦愁昏月低青林

讀香山集

廿年作詩苦未得作詩歡卽無臥呻吟亦頗雕心肝功微螢照山力倦魚上竿在前鏡明明跂赴窮窺鑽
大哉香山翁予我九轉丹掃胸失渣滓意行隨詰盤自古有文字綴之成萬端今人非古人古語糟粕殘
我心寫我詩要在方寸安昌黎愛東野廬陵推都官稜聳孟骨寒咀嚼梅味酸不如白老詩不厭千回看
其詞無不達其論皆不刊才大故不矜養厚故不殫天真入神化乃見詩界寬我願學葛清刺體字字鏗
又願繼樂地更名黃居難以此忻慕情還作對治觀再拜詩父前讚歎復讚歎

湯山行宮次癭公韻

零落甘泉舊苑垣我來白日聽蟲喧池荷當夏猶能盛水氣連雲欲上屯早歲收身窮不死平時緘口醉
還言儻然浴罷松根下坐看新秧綠到門

七月十二日書事

礮聲遽動事莫測潢池弄兵成自焚宿衛何人留外騎中書幾日坐將軍六州鑄鐵情終悔九局觀棋勢
已分同處覆巢誰得免區區成敗不須聞

朗溪約遊南苑農莊留一日而歸

濃陰高柳繞村家，雞犬迎門寂不譁。
逃熱共尋閒日月，食貧能過淡生涯。
荷香鄰曲撐游艇，雨足溝塍臥水車。
兵後猶堪追樂事，劇談飽飯聽私蛙。

海浴歌

北戴河作

漁翁坐羨樓觀奇，吾儕愛水乃類之。
刺船打槳已謂樂，矧與齊汨堪娛嬉。
短衫赤脚還着屨，生恐貝甲傷我皮。
迴縈倒影聚儔侶，連臂接踵矜相持。
蓋頭大波逐人至，閉睫反走號羣兒。
來波推岸猛無害，去波吸引防漂隨。
漩渦忽陷懼腕足，水激沙活步步移。
前時涉坦方覺易，俄頃再過還傾欹。
從來覆車在平地，以此觀海知非危。
蟹行讓浪熟取勢，低昂蕩漾波及頤。
水心却煖水面冷，苟非入水誰能知。
五明可捐裘鎗，退更復安用湯沐。
爲十年塵土困京國，來此雖暫遊忘疲。
乘桴欲從孰爲聖，掉頭巢父容吾師。

寄題子熙兄萱幃授經圖

啞啞對林鳥，慈恩得報無從編。
母教錄忍展孝經圖，風木嗟同感。
松楸隔遠塗，不堪相比擬。
早歲併羈孤，新居前除草花盛。
開曉起爲賦二十字

小院一叢花，朝朝看幾回。
秋光共寂寞，蜂蝶不曾來。

初食葡萄口號

每記嘗新日，初秋愛早涼。
今年秋雨足，漿飽十分香。
不用思丹荔，吾鄉熱最長。

庸生過譚南半截寓旋同游法源寺大雨初過陰翳奇涼悄然久立因留長句

亦知喧寂不關身境逐心移豈便真石徑苔鬆初過雨花畦水活未生塵沈沈樹色天垂暮杳杳鐘聲佛
是鄰失却遠庸無處覓可談難得第三人

白露後數日已涼復熱

炙背牆東看日曛祇宜早晚望秋分柳絲無恙槐陰在忽憶蟬聲已不聞

由團城歸經海子橋一首

徐行獨數石闌干幕地風來欲駐難荷蓋翻銀成折勢一時便當白蓮看

湖中花已盡

焚香獨坐

掃除一室非無策且作當前自在身窗下焚香簾外坐透簾香氣最宜人

湯雨生梅花畫冊爲子賢題

愛花不愛梅定非別花人愛梅不畫梅花落多嗟辛粥翁留此卷故爲梅寫真遂令數點心長見天地春
有意無意間自得梅精神只此一尺筆詎食煙火身昔題琴趣圖繞窗花如銀

費曉樓爲董夫人作梅窗琴趣圖昔曾爲公孫佛蓮

之題又讀畫梅集點綴玉樹新柳暉多藝能諸妙靡不臻妻兒迭染翰樂事歸天倫當翁退居日猶是承平

民舉家若神仙知樂不知貧白門見烽鋌城火無全鱗宛宛琴隱園零落餘深榛每聞佛逋譚三嘆一再

鑿用誠
齋句

羅惇晏

惇晏字敷菴廣東順德人官司法部

臥佛寺

勞歌百輩終成妄取適庸過自在禪投足未堪供起倒曲肱無礙轉安便極知大覺何須瞑此意西來恐不傳稍拭塵容參茗椀耳根猶帶響山泉

送諸貞壯南歸

拄笏看山秋更清此懷無奈以詩鳴治平世有論茲事巧拙心知耐短檠借酒醅顏今日意拂衣長嘯大江橫林泉京洛都非戀賸對幽花念友生

晦聞出明紙烏絲闌屬書蘇齋蘭亭訂穎攷試筆不成以詩謝之

刻藤蜀紙界烏絲強我蠶眠筆弄姿腕放近緣常作草書來贏得數相追負人諾責初非願漸老心情懶固宜自信本無懷壁罪深杯倘罰亦奚辭

簡始中丞遺墨爲景蘇題

窮塞相從百可思豈惟悵觸致予悲江干一臥歲華晚別恨千名今後知獨忍衆生成病瘵恐因有託故

耽詩傳家亦擬鳴蟬賦應興歐陽事並期

人日卽事

有家聊減故園思漸老逢辰倍展眉儘擬貪娛寬晷刻翻令從事到文移瓶花滿意因人勝
腕茗滷腸與我宜獨坐微吟還念遠扣門應有草堂詩

春雪

戰暖催花苗先爲六出萌風斜著樹媚絮軟漬衣輕滿意欺前臘去冬少見雪搖光誤驟晴攤書興不淺對汝當長檠

鄭子梅仙惠茶索書用山谷松扇韻酬之

鄭侯索書出繭紙投我春芽雙井似來日大難唇舌乾相响江湖賴吳子燕臺八月朝氣寒風生腋底挹西山秋堂蒼鼎破午睡合真經卷煙鐘間

晦聞囑題廣雅圖

嶺學先侁思抱冰諸生自昔及飛騰大瓢無用寧容掎繇繇吾徒愧弗勝搖落虛堂千里夢低徊寒雨十年燈畫圖入手春風在猶覺藏山意緒增

法源寺留春圖爲道階上人兼呈湘綺先生

端居開士今龍象危坐高人稱鳳麟勝日著忙元不負幽花閱世始相親稍迴與物推移意賸欲裁詩報

答春深幸同時非悵望晚風歸轡草如茵

同內子遊崇效寺看牡丹

趨人巧勝住長安佳日携持得小歡著語花間忘漸老追春蘭若故相干當門未減芳菲意坐對眞同者
舊看閒裏不妨歸轡緩騁懷獨蹋六街寬

呈伯嚴丈

散原品節匡山峻老主詩盟一世宗天宇冥鴻避繒繳遽廬萬象入牢籠欲同無已尊雙井每過斜川問
長公會酌西江微辨味伐毛從與乞玄功

招次公飲不至因寄

坐曹日接席終年歎相趨癡兒了公事所味因道腴偶作文字飲寧苦形骸拘可人曾茶山折簡費招呼
不見倒接讎使我空踞觚子固向人懶而我實腐儒宵深撥書臥雪光照庭隅預恐投新詩詰朝勤追逋
乙卯上巳集十刹海分韻拈服字

性癖耽散誕起倒不供俗勝日偏著忙疲脚爲游目不愁春路坭去覓河橋曲得水如得寶渺然在濠濮
矧茲水可師自潔而納濁相攜就風濤寧用兼竹肉隔年煩穢迹祓除苦不速一嬉捐百憂臨流岸巾幅
驗候鳴禽變視景隙駒促日昏可微寒及此未春服

會祭陳后山集法源寺

心香一瓣屬彭城行集朝朝徹案橫每惜盡情寒到暝祇今懷往事如生人窮未必詩能累官小何因晚始成尙有餓夫謝文節隔隣吾欲薦蔬羹

黃節

節字晦聞廣東順德人有兼葭樓詩

石遺室詩話余與晦聞相知久而相見疏其爲詩著意骨格筆必拗折語必悽惋句如原草漸黃人亦悴霜花曾雨晚猶存意摧百感終橫決天壓重寒似亂原

南歸至滬寄京邸舊游

遠道江皋計早紆經行淞曲又旬餘無多懷抱將銷歇已換寒溫問起居聽曲再來當暮雨題詩還寄及春初遲歸別有沈縣意難爲臨風一一書

殘梅

今朝寂寂懷江國獨爲題詩亦意闌一雪助花消朔氣似人倚竹立天寒餘枝偃塞充瓶活數樹支持抵臘看何與空山林際鶴自捎零羽斷飛翰

十二月二十九日與栽父登江亭憶去年此日爲後山逝日設祭法源寺與會者惟貞壯南歸今

此事亦不再矣因爲詩寄之

二客江亭話去年今朝吟祭後山篇更無一事能經歲可歎前人有獨賢憶子夢回湖上路迨春冰解直沽船懷歸未遂吾何與當視南書在臘先

春晚示栽父

上京相見詎無賢深語能憂更待宜坐審亂時逾十稔一爲遷客遂三年下臍此氣今猶冒納手仍寒事可憐春晚江南君所憶定知蒲柳已含煙

上巳清朗同日瘦公敷庵約集壩河脩禊

僂焉禊事過清明同日東風候已更北客共忘家在亂壩河初見水漫生壓堤草樹遼遼長列坐羣賢惘惘情節物尚能分別看乍回春燒又聞鶯

秋霖寄貞壯

北地秋霖不待零連朝浹夜勢無餘沒蹄草淖深逾尺當院槐陰落數株坐託衆多如雨歎雨無正詩序曰衆多如雨而非所以爲政也竊聞星有好風殊眼前此意誰能喻遠爲栽詩寄大諸

白菊花

重語當年事已難相逢籬落歎無端欲持舊句題新意終惜殘英減夕餐霜晚尙容秋後見歲暄寧抵客中寒惘然爲汝低徊久斜日枝頭細細看

自題秋孃曲後并簡櫻公

萬慮櫻心強自持別尋歌哭恣吾思他年恐似秦淮海博得微雲一抹詞
君亦無端賦秀蘭爲渠蕪蕪淚闌干明知別有榴花恨只作錢唐老倅看
預卜他時更斷腸此懷欲遣竟無方寄詩容有丁香結已負方回柳色黃

崇效寺對牡丹作

四年北客及花時不負春明賴有詩獨往也隨傾國後正開寧歎折枝遲匆匆著意終何寄忽忽爲驢亦
自知遺世未能吾似汝蝶闌華晚更猶疑

春盡日園坐成吟

獨來亭榭晚蒼蒼漸見游人歸逕忙林鳥靜能窺客座野花長欲過春桑天時物態真何極世事身謀早
已詳閒裏一詩收拾盡自澆茶椀更平章

濱虹爲貞壯寫楊華圖予題一律

且從湖上說宣南別後能爲數日譚汝已楊華傷逝水我纔秋夢了優曇兩人結習今俱盡一世沉冥孰
更堪閒却夏來勞倦意坐看山翠作浮嵐

答秋湄書意

負手花前意自深晚秋蟬吹久銷沈端知人事如流水竟爲來書一動心怫鬱與愁誰可辨愛癡爲職豈

能任壯懷待盡中年後此語憑君作報音

九日臥病時甫自津沽歸道遇故人南來

倦客無家病失依孤齋九日正添衣登高坐廢江亭約訪舊纔從沽上歸秋後風懷人比菊夢中鄉事柳成圍何嫌藥裹非良餌自惜閒身晝掩扉

歲暮懷劉栽父

與子歲闌語蕭瑟江亭題詩更何日淞江送子我泛湖一別音塵遂相失聞子鍵關不殊昔我亦沈冥求自逸方今逐利遍士夫拜金豪率爲之奴世事人才不足問憂在風俗誰能扶如子狷介吾狂孤乃獨揮金尋麗殊城南酒壚日再過珠江燈艇今何如吾儕所志豈燕雀寧沒蓬蒿死溝壑天下大義卽在茲子能不愧吾不作旁人笑謂腐且迂獨與佳人共清酌酒酣憶子夢見之往往悲來歎飄泊瘦妻癡女不復懷飢寒知已嚮珥釵子有所聞弗爲異西南大計當安排春明客思祇如此寒梅昨夜開高齋

予欲編后山年譜久而未就敷廠書來見促賦此答之

功名須老大四十未爲晚后山有是言所志故甚遠何期凍死日五十且不滿寒華萎高枝良材老溝斷恥同世俛仰一任歲脩短嗟哉生平詩詎視位業損我讀后山集親本授魏衍元城王子飛當日拾遺版迢迢此一編學者各深淺誦詩不知人懼與古人舛因是念后山辱沒以詩顯繫年爲作譜竊願事幽闈經春久不就子謂我可緩第思同時賢所與共遠返柯山淮海儔別集待搜散乃能從事茲否或病太簡

行崎適忤俗塵絕歎不反無已天下士竟未挂世眼吾意豈爲詩高才恥恆鮮

閉門

閉門聊就熨爐溫朝報看餘一一燔不雪冬暘知有厲未燈樓望及初昏意摧百感將橫決天壓重寒似
亂原愁把老妻函卒讀破家誰爲訟貧冤

送貞壯南歸

我尙栖遲在此邦蕭然來與話西窗寒秋昨夜初過雨歸夢從君共泝江瞠目絕塵知不反舉頭當世未
終降冥鴻自遠非無意不爲分攜淚滿腔

曾念聖

念聖字次公號風持福建閩縣人官大理院推事

長至大雪獨酌江亭

斯亭疑爲雪所閉璀璨光中我能至驅車聊愛避繁喧玉戲還教入吾袂作亭者誰遽覲此招手江郎可
能致翻疑用意薄蘆漪儻藉襲風發奇思西山藏頭正深睡挂眼却憐雲脚闊但令含意撩鬢邊何惜迴
光入窗際老僧今年大解事煎雪烹茶饋酒餌濃斟惘惘入枯腸冷跡荒墮孤寄歸來歸來非夢寐筓

吹背城亦小異冰輪試碾月昏黃入室梅花看嫵媚

同放舅過法源寺看栝其一枯矣遂作歌

去年但逢淨髮僧今年忽覩顧甌客

寺寮居人殆滿

頗疑入寺似入廚便欲過門恣大嚼長廊齋磬棄不用白日

藿鹽苦相覓火雲墜瓦變鬱蒸此事遂令栝不臘撐空恍疑菩薩臂擎露猶訝仙人擘可能逃世踵唐桑

却遣同龕笑彌勒亦有溪山足舒歎亦有園林足敷席世兒孟浪百不求賃廡荒寮豈長策獨憐此栝懼

羶穢著糞佛頭恐見厄孤飛遼鶴去不歸矯首玉龍遂長墊豈復粧樓記瓊島豈復國花語極樂西來插

閣幾丁香小榭藤花墮吟鉢棗東槐西那足數碩果慈仁振雙鬢陂塘新柳補秋陰

翁覃谿題萬柳堂句云廉相陂塘新柳色

己公茅屋舊書聲阮文達嘗約朱野雲布衣補植柳株見關隴輿中偶憶編

韻事先名最能說祇今故物百何有到眼差同朱幻碧昌黎昔爲

芍藥歌杜陵廟前吟老柏古人用意各有取何待銅駝換荆棘

過津門春晚有感

柁樓春晚浪聲斜南望烏雲不是家此去帝城三百里滄江日夕見飛花

花朝後一日石遺師招集小秀野草堂

狂生舉世棄夫子意徒然樹禿人偏集街斜月自圓微官增感喟氣類足雕鑄爲問陳無已誰如國寶賢

寄心與

不見詩人何水部秋來爲句定如何孤絃豈待成三歎出手還應敵萬夫小札伶俜隨雁去空山寂寞憶

吾無西風仔細塵相污莫遣黃花負酒罇

秋後十日登陶然亭因題二絕句錄一

題壁江亭得幾回平肩草樹欲劔灰詩人別有登高眼不在尋常庾賦哀

十三夜坐月

皓月不易觀流雲空夕陰居人黯無寐下榻赴相尋觸足蝶爭奮傷高雁恐暗幽憂誰解似還與夜沈沈

丁香花下作

白白垂垂幾樹長晚風簾幙太清狂空憐好月無殊色只合隨他滿院香

林 榮

榮字肖頊福建閩縣人官湖北高等審判廳長

焦山松寥閣夜話呈石遺老人

積雨夏成秋入秋苦枯槁言謀遒秋暑渡江向別島曲曲多僧房迢迢惟鳥道回環三四里已足恣幽討
栖止得松寥長廊共藉草平視大江流冷風盪懷抱先生始高談名理胥深造有時雜談諧雋語堪絕倒
坐久月騰空萬里淨如掃夜闌遠鐘沉猶恨歸眠早濤聲拍枕喧不寐聽更好且勿念前游徒驚韶華老

前度來游忽
忽十一年矣

小秦淮泛舟至平山堂

出郭騎聯翩還欣一舸便岸隨紅蓼遠村擁綠楊妍祓禊詞人去馨香太守賢虛堂清話罷歸路足流連

壬戌十月望日擬重爲赤壁之遊倉猝覓舟未得不果因約同人宴於抱冰堂有作

孟冬欲寒猶未寒再遊赤壁當今夕坡翁天人去不返尙許江山訪陳迹黃州一葦空欲濟急覓舟楫無
由獲及此良辰忍蹉跎招邀還躡尋山屐城東高觀亦名區抱冰堂下容岸幘眼前風物足留連千百寒
花解迎客升階瞻拜心肅然霜髯管公渾似昔當年江漢苦經營此地故應戀魂魄堂堂氣節同坡翁緒
餘乃擅文章伯數語留題實不磨公撰有二賦堂楹聯豈獨銀鉤與鐵畫風流今古共銷歇懷想情深入肝膈酒酣
日落一徘徊天際茫茫水雲白

王樹榮

樹榮字仁山號戟髯□□□人官湖北高等檢察廳長

重遊西湖雜詩

一別西湖二十年樓臺林木勝從前雷峰古塔渾依舊倍覺濃粧夕照邊

隔林澗響壑雷鳴峰勢飛來削不成人自趨炎泉自冷出山肯改在山清

湖光山色望中迎抱樸廬中秋氣清更上初陽臺頂立天風吹送步虛聲

佳處菴留松嶺南千章古木列香楠幽巖法雨流泉瀉香散天花月影潭理安寺有法雨泉終日涓滴不絕潭中植秋海棠盛開

大周國寶歌爲陶君伯明作

君不見女媧皇鍊五色石情天補就渾無迹洪爐鼓鑄億萬年顆粒留遺盡璣璧又不見王母當年招漢

武使傳青鳥蓬瀛度戴勝閒居少廣山茗華刻玉游元圃金輪感孕動帝閭黑龍潭指臨清門名勝記古利州廢城

在今保寧府廣元縣縣之臨清門川主廟即唐之皇澤寺縣之南有黑龍潭蓋后母感溉龍而孕也雌蜺仄聲當天創奇局拜倒蛾眉朝至尊闈珍徽號耀魄

寶春秋文耀鉤皇天大帝號耀魄寶筮卦歸藏應首坤得雌陳寶僅稱霸秦璽畢竟輸唐魂君富收藏嘗得葉國重定庵碑原拓榜所居曰唐魂

昔藏婕妤印樓築寶燕珍瑀瑤趙家禍水怨妃子漢宮燼火哀王孫何如一夢感鸚鵡復起二子唐祚存

稱帝聊復自娛耳是非一任千秋論小印精鑄篆奇古龜紐龍紋跌似虎金相七寶舊封泥玉質一瓊新

出土當年有客感龍蔡今日無人羞燕脯紅褪蓮花別殿風綠雕蕙葉空城雨此時燕脯無人寄雨滿空城蕙葉離見玉溪生利州

江潭天教瑰寶屬陶家北溟什襲珍逾琥輟耕箸錄湖南村至元間改造歷代玉璽獨武氏一璽獲存見輟耕錄家珍數典寧忘祖

干霄紫氣射龍光斗牛丙夜騰寒芒鳥鳴毫社開謔出六丁雷電下取將絳雲一炬赤燦怒圖書灰燼悲

秦坑阿誰慧眼識至寶靈飛小妹形蒼黃真誥北元中玄道太保玉郎李靈飛之小妹冒火突入攬印出雲錦囊開盛玉章雲

七籤登命九天司命侍仙玉即開紫陽玉笈雲錦之靈出九天生神玉章希珍不墮昆池劫解事功高如意娘君所居不戒於火圖書半歸灰燼此即由小婢如意攜出得免

潘叔君德之貯諸金屋武后朝亦有如
意娘名字不期而會奇事亦韻事也

姚德鳳

德鳳字威伯號舟齋江蘇崑山人官湖北法官

今歲爲東坡游赤壁後十四度壬戌林王兩廳長適同官鄂中七月既望偕法曹羣掾泛舟赤壁
企古雅集余以後至未獲預遊追賦二律

元豐兩度黃州賦玉局風流天下聞懷古來遊既望月泛舟好譜渡江雲於今孤鶴歸何處空使潛蛟泣
暮曛別有嘉魚磯嶄絕懶將陳迹論三分

往年吳下追吟席此日來聽鄂渚潮薄宦有緣隨檣戟勝游無分廁羣僚黃泥赤坂相望近明月清風結
想超爲約霜高木落後買魚攜酒更招邀

抱膝亭

在奧略樓東爲
端旬齋所建

何處不堪容抱膝偏從塵海狎驚濤南條自古滔天險東向凌虛托地高漢水無情雲變幻蜀江有恨浪
空淘危樓一角斜陽外愁向西風酌濁醪

陳延韓

延韓字移孫江蘇揚州人

新晴

拋擲流光付曉鴛又摩雙眼看新晴春風浩浩移今古綠樹陰陰到長成往事追尋疑病酒曲廊愁倚更
聞箏人生哀樂如春草一著情田總怒生

美人篇已酉四月初六日作

滿堂多美人一國爭春風美人色殊異各自顏花紅風從四方起吹送著雲中香車流蘇幃寶馬浮雲馳
漢皇坐待久正啓甘泉宮詔使美人入美人爭自容不知美者誰但見高鬢寶髻花瓏瓏六宮虛席亦已
久遲爾雲髮常祁僮微聞長門人買賦千金工又聞昭陽后善妬自矜崇子夫小家女趙后邯鄲中一朝
被選擇身似青天驂六龍人生快意貴旦夕寧論辭輦當驚熊漢皇重色有如此美人身世榮華矣丹鳳
朝銜一紙書貫魚已見如雲起坐使南朝碧玉家鏡中夢笑窗間喜我聞若耶溪邊春浣紗穿花映竹美
人家依稀綽約真是耶苦辭萬金聘不上七香車美人之美如朝花美人之遠如高霞可憐塵世金條脫
無限天仙夢綠華

後美人篇

梧桐愛孤生，芙蓉守紅死。佳人姿玉雪，十載香閨裏。香閨高絕，連雲空。俛向人世看春風，馬如星，電車如龍。年年香字冷，熏籠坐窺寶鏡。愁春紅玉顏，窈窕矜不嫁。臨風愛惜香羅帕，東家老女過三十。玫瑰著春春入骨，一朝陌上簫鼓迎。狗走雞飛去，亦得箱中金縷衣。本出鴛鴦機，鴛鴦不獨宿。何爲戩翼羞雙飛，盛年常惜卽須惜。况是露桃已發，河冰稀苦耽翠袖。倚脩竹，不知漢主離宮三十六。珠簾碧瓦，悄無人夜夜宮娥守金屋。我願美人能自珍，不願美人難可親。若教神女終無夢，多恐無聊笑殺人。

感逝五首錄三

茫然一掬淚，中有六載情。反恨六載長，恩義日已盈。昔日一笑言，今日一涕零。涕零亦有限，豈能酬合併。貴憑此漣漣，寄之遠冥冥。亦知泉下人，見此爲不寧。居恆恐我傷，有戚必隱聲。今誰強笑慰，使我哀心平。我哀如可平，人死亦可生。

死心已成灰，病骨猶臥席。就我陳決絕，復畏我悽惻。相哀兩相諱，聊言病匪革。慎汝金石軀，努力強飲食。心知是永別，各各內霑臆。譬彼將離魚，洶沫且起溼。焉知此比目，一拆不復匹。反悔臨訣時，百語未及一。死生孰云闊，其間不容息。昨者不肯言，今者歎何益。

夢跡煙縹渺，淚痕雨淋浪。荒忽如尙存，送子還故鄉。故鄉千里餘，又阻以太行。將子無羽翼，何以度川梁。念欲執子手，決去忽若翔。子神如雲水，杳漫之八荒。我形猶土木，塊處空一方。以子覺悟身，入我夢幻場。

此夢或非夢譬若水月光形影兩皆寓焉能辨存亡青天高蕩蕩我愁鬱茫茫

中秋對月

我欲停杯問月明悲歡應只是虛盈若當愁處光偏滿何怪人閒事不平皓魄顧余如有語紅塵久戀太
癡生乘風儻有歸來意萬里今宵一樣晴

劉詒慎

詒慎字龍慧安徽貴池縣人官江蘇候補知府

登北極閣

樓觀依然接絳霄殘鐘徙倚殿生蒿曾依龍虎開雄府倏化蟲沙逐怒濤戀闕餘魂歸愛寵櫻城初志壓
賓曹當時捲甲能東下飲馬金閭醉寶刀
得失分明喻楚弓天亡鼎祚汝何功人才似數洪楊盛地勢虛傳武漢雄終古河流限南北亂塵車轍自
西東興衰五十年中事淚盡危闌萬柳風

秋蟬

獨岸危冠借一枝人間榆柳漫成帷身看穢壤推丸出鬢冷高陰抱葉支乘夜屢鳴風露警沸天如告市

朝嬉舉家共汝何須飽自寫斜陽欲盡時

題王千秋詩集

白首支離將相中酒杯袖手看成功草堂花木成孤喻芒屨山川送老窮擬古稍嫌多氣力一時從學在
牢籠蒼茫獨寫平生意唐宋溝分未敢同

寄題周梅泉巢園

秋色佳在遠林亭野趣新窗虛納邱壑樓迥出波塵但結爲園侶何妨賃廡貧相期勤看竹冰雪迫寒辰
知君爲靜者人海得安巢觀世憑棋局看花有絮袍秋堂涼貯月暝壑暗飛濤一別成南北徒令夢想勞

洲局早起

殘月蠅聲動窗紙開門野綠溼難乾人間初氣今方覺物外冥踪曉更寒城闌蜉蝣猶在夢沙洲鶴鶴已
搏翰楞嚴繙罷鄰雞午已覺流光一指彈

范罕

罕字彥殊當世子有浪遊集病除草

石遺室詩話范伯子畢生苦吟無以擬之擬之東野后山實不足以盡之也令子彥殊作倔強

瑰異別具手眼以爲嗣音世人望而却走矣

丁酉初到上海漫興

芳草由來辭楚客落花到處有秦黎彈冠坐遯天山去斗柄從今不指西

大明湖和吳辟疆

昨宵煙雨在湖亭有酒如澗不用醒春草忽成平地綠名山猶是古來青偶聞冀北徠天馬爲卜河陽駐
客星此日登臨動鄉思邊雲遙接海風腥

湖光山色伴生涯芳草萋萋盡日華春煖無痕鴛自語詩魂長住酒爲家但將弱翰酬知己未有閒情傲
落花萬事銷磨祇如此鳴泉百道好烹茶

自濟南歸登琅山

旅夢剛回鵲華東出郊十里意匆匆孤岑拔地迎朝旭二水交流湧梵宮吳楚分明來筆底香花盈爛護
中峯此身已落家山外欲種茲山一萬松

十里坊馬氏山居贈馬遂良

足跡東西遍倦遊山堂小酌忽驚秋沾衣細露催詩急照眼長河帶月流韓渥論書宜問水
韓渥草書屏書詩若敦臨

水畔字字恐成龍
遂良亦善草書

仲宣無友亦登樓天長地迥吾能憶十里坊頭一繫舟

漫題

歷遍滄桑懶卜居，
鰕生無缺不求魚。
朝隨正則窮天問，
夕向相如說子虛。
如此湖山堪倚馬，
是誰駟僮盡稱儒。
驟來一雨當頭注，
且自彈冠且著書。

長圩沙夜步

江干夜氣接沙平，
晚稻登場宿草生。
峯影插空危可怖，
星光墜地悄無聲。
經霜老鴈眠蘆長，
就煖微蟲入牖鳴。
忽覺秋風滿林薄，
不堪明日是長征。

師曾寄我詩箋數紙因錄近作三首答之夜坐相憶續寄一律

詩入微茫一字無，
鐙前寒雨正蕭疎。
抽毫忽覺身如繭，
倚枕翻疑夢有爐。
深深童就煖，
霜風蕭蕭鴈迷途。
原來簾外天涯闊，
爲索名箋再寄書。

病後試步歸餐

出門日在庭，
歸來月當戶。
俯仰有清輝，
跬步已今古。
來者不可即，
去者邈何處。
萬物往不返，
孰云身可住。
鐙前野菜肥，
廚中魚足數。
佳餐不自謀，
一身爲賓主。
稍知壯心非，
未信桑榆補病夫。
萬里捐獨數，
虛庭步晚訪陳道人。

市杪萬鐙雜星漢，
高天踞地一扶筇。
行人決向東西路，
我亦忻然謁遠公。

李 佳

佳字瘦生江蘇丹徒人諸生有獨誦堂遺集

石遺室詩話瘦生多秀句如亂山分月夜小閣聚江聲江淮亂後半新樹吳楚南來多好山燕子一家新有主落花三月不成泥無錢無鶴住揚州小隱塵寰汜可休

雨後

風吹紅雪落無聲
落絮汀萍亦有情
雲影畫天低水岸
山光隨雨入春城
鰕魚已上蘆芽滿
燕子纔飛杏葉生
正是江南三月煥
袷衣布帽看春耕

梁公約相文朗在江寧閔葆之在安慶張彥雲吳董卿在杭州愴然有憶不能無詩

蟹熟蘆黃不得歸
秋來事事總相違
天涯幾日無書至
故國今年有雁飛
短夢依稀江汜闊
西風蕩漾稻梁肥
酒徒三五狂猶昔
遲爾經過啓竹扉

秦淮竹枝詞

郎家近住東關頭
妾住秦淮河上舟
何當一夜東流水
流到郎家更不流
桃葉渡頭有酒沽
飲之不醉盡千壺
阿儂只愛秦淮水
有人恰譽莫愁湖

郭楚生自武昌來江寧喜遇賦贈

君家一管生花筆借與文通更索還自遇頻伽老詞伯長留光怪在人間

與閔葆之吳董卿方地山澤山薄憩湖上

十里雷塘快晚晴相邀勝侶聽蟬聲平湖一曲綠於酒老樹百年高過城且喜尊前消宿疾儻來山下事躬耕故人去住渾無著何似今宵共月明

己庚之閒新樂府

括財使

九重之天高漫漫妖星夜落牛斗閒怪鴟大叫鬼聚語相公輶車入境土口含天憲恣尊貴疆吏承迎降心氣借問相公何事來別有調劑非鹽梅司農仰屋莫愁歎相公妙才思過半多取於民不爲虐官之所科誰敢畔小民忠厚蒙天恩不惜盡室獻至尊流血成淵骨成嶽相公觀之色不作再拜出境送相公公之勳業無比隆相公色喜回青驄江南萬戶成哀鴻

吾技神

亂民干紀何紛紛齊魯之閒多如雲吞刀吐火望不見賊乃自謂吾技神黃天當立蒼天死邪黨惑民有故智僞託秦人敵愾忠實思張角乘時起小官皇駭飛羽書大官鎮定神豫如謂此勁卒信可用以挺撻敵今有餘良金美帛內府出不賞吾民賞亂賊賊徒得寵勢益驕輦轂縱橫制不得烏庠宰相須用讀書

人此輩何堪要津霍光不學詎足惜可憐齊州化作塵

殺朝官

太平之世賊畏官捕獲斬殺刑無寬亂離之世官畏賊露刃相仇避不得巍巍侍郎呵殿來賊徒反眼相嫌猜并刀一揮脰斷絕霎時灑血隨黃埃卿寺小官更不計屠之有若牛羊易朝堂漸晨星稀名在直班尸在地借問賊膽何敢然有主此者天潢賢可憐相公手握禁兵尙千萬鉅亂不啻冰沃炭爲貪祿位習模稜坐視神京日糜爛

金天羽

天羽字松岑原名天翻江蘇吳江人光緒末薦舉經濟特科有天放樓詩集

石遺室詩話松岑詩才調縱橫在畫家爲能品近代中與龔定菴頗相似茲錄其較有意境者

村居

積水陂塘浴鷺鮮牧童斜渡日烏犍柳陰巧曬漁家網花港長停過客船忙裏招朋閑裏醉饑來煮飯倦來眠村村麥秀櫻桃熟愛煞江南四月天

懺愁吟贈內

涼月照空庭影弄紗窗竹春風窺我簾藥煙相對綠貧病是我鄰愁苦乃卿族語卿勿復愁爲卿寫衷曲
我家門前水瀼洄抱清淑高吟偕隱詩二水三分屋牽蘿小生涯藝花真眷屬而我曝詩書而卿潔水菽
而我宅尊彝而卿安匳畫青山朝畫眉碧泉秋洗目小字紉薺蘭年命祝金菊如此四十年雖貧亦已足
卿病何不起起來共商榷

玲瓏曲

花玲瓏媚晚粧月玲瓏照洞房曲玲瓏譜宮商心玲瓏爲文章千絲織錦巢雙鳳天上梨雲壓春夢生來
福薄是多情相思一夜銀河凍

妾薄命

詩爲屯村龐氏女作也女嫁凌氏結褵三日而所天亡故作是詩以悲之

二月白杏開有花照粉牆明月出花間媚於新嫁娘朝見新嫁娘暮見新嫁娘一夕罡風摧圓靈化嫋嫋
女生非高門門前種綠楊十四能哺蠶十五行採桑十六工繅絲絲成織流黃出門道上行觀者比姬姜
皆云好女兒應嫁誰家郎女年二十餘阿母大奔忙春風理刀尺稱身裁衣裳問女嫁阿誰燕燕飛蒲塘
蒲塘東去路高樓臨道旁簫鼓何闐闐庭中宰豬羊賓客盛衣冠來上主人堂皆云女福命嫁得東家郎
香車入門來濟濟多嬾嬾紅羅頭上巾有冠如鳳凰霞佩曳瓊琚明珠墜耳瑤璧人天作合玉質而金相
青廬撒帳夕觀者舉若狂是夕鷓鴣鳴鳴聲高引吭紅燭大如椽蠟淚傾汪汪郎病忽作疴體寒如中芒

三日不得汗巫醫紛蝟蟻窮佛不靈竟乏不死方歌者方在門哭者已在房雖哭亦何知魂歸泰山旁
矢誓不獨生與郎同存亡幽都閉寒門日月光摧藏鬼伯角鬚鬢縱目多豺狼郎魂倘問關妾行如康莊
姑嫜來相視語苦尤斷腸我家門祚單一兒傳蒸嘗又不生女兒有婦勝女強以婦當女看爲我理羹湯
以婦當兒看爲我司倉箱婦今舍我去何以慰尊嫜婦亦有慈母日暮風燭光培女一朝殉催之上北邙
兒魂亦不寧願婦稍徊徨此語感親戚羅拜如祈禳哀哀作羈雌戚戚成寒螿悲風入夜來素幃忽飄颻
心知郎來歸驚喜撫空牀精靈不可接剜心如中創嫁郎初嬌羞得郎問寒涼三日入郎門繾綣未能長
憶妾許郎家行止媚吉祥鮮鮮角枕邊蓮花雙鴛鴦蓮花開幾時雄雞中天殤憶妾許郎家愛學時世粧
雙鬢堆鴉雛釵燦成行拔釵換著簪麻衣如雪霜昨來雙飛燕飛飛繞畫梁晴雨話呢喃襟翅帶花香
嗟我素心人修夜獨不暘搥心無與言舉首問穹蒼穹蒼不能答怨極淚溷滂怨也亦何益妾命自不臧

秋感卽贈治民時治民館予天放樓

抱書午夢一伸脚醒及高梧已送秋起拭東南滄海淚遠懷西北美人愁蒼兼路阻波橫臆黃葉山空天
放眸賴有故人同作達萬千牢落醉還休

佩忍餉酒以詩報之效其體

高陽酒徒今不作嗚呼吾意真寥落酒腸無酒詩不流澀盡宮徵商羽角
朱梁西以工尺上四化推得五音順序當爲宮徵商羽角其言
創而 霜風昨夜吹老林臥聽高樓戰鳴鐸朝來欲煮苦茗啜婢奴入門聲嗶嗶阮家兄弟不速來踞坐對

我氣磅礴陳君愛人善體貼道我至性甘淡泊腹萬卷書手一樽醉鄉無由起城郭年來更抱消渴愁不
過屠門噉脾臙一朝撥甕勸百壺肺肝槎枿生劍槩盤登老芋魁一尺佐以鹽齏勝海錯是午微陽偶逗
暄鄰叟開門掃秋籜黃梅花放低著牆苦硬繫清句難琢濃磨斷墨秃吮筆高喚平頭縛兩屨期君見詩
發榮齒起爾狂言功不薄明當更棹酒船來痛飲爲君煎餈

無題

酒乾杯淺望蓬萊寸恨天長索剪裁雙鬢茶煙慵杜牧一庭梅雨咒方回鴛鴦鸞鳥思迎宓願作鴛鴦別
姓崔倚枕思量情誤我護花心重畏輕雷

雜感

百家各有用豈謂儒獨尊黃老尙柔退爲古英雄人孔老不異宗學易探天根孫吳纂易祕立術較不純
至竟古干將殺人爲人珍非攻而善守墨翟尤魁倫翟也道不傳般爾海外行至今疆場上金火兩不情
萬魂一慘怛上蒼亦久聞大亂大才出相需會有因五行各代謝一尅復一生終常肅雷電長嘯開蒙屯
海闊天遼遼歐亞文明交花葉相當對雅頌笙管調作者成吉斯首赴拿翁招今茲華盛頓前來訪帝堯
我疑哥倫波前身騫與超梭柏逢孔孟班荆相諧嘲虛梭毒世人不崇黃餘姚峨峨伊符塔祥雲捧高標
嗶嗶自由鐘滄溟震寒濤風日太平洋歐亞文明交我執情不化魔難生羣妖微妙而圓通斯人其寂寥
我欲隨穆滿崑崙崑朝仙靈我欲逐老子化胡流沙行我欲問張騫乘槎稱客星我欲詞徐福樓船去蓬瀛

磨牛踏陳迹，鯤鵬圖南溟。蟻穴封侯王，安能了一生。終當棄儒冠，出關請長纓。無爲連齋壁，旦夕徒營營。

金閩行

高高吳王城，六門平旦開。金閩縮馳道，車轂鳴春雷。楓橋水濺濺，細柳夾道裁。軍中聞凱歌，云自固鎮回。梨園奏新腔，絲管清且哀。此地非軍中，何用長銜枚。失意廣座間，刀光迎面來。連營一呼嘯，勢若風雨催。是時金閩城，燈火照樓臺。狎客正飛觴，座有金釵陪。忽聞嘶騎鳴，角聲吹遺簪。復墮履，涕笑如嬰孩。城門下金鎖，欲遁難。罄坏列肆，何煌煌。善賈倚多財，亦有海外商。百物儲珍瑰，踴戶如催租。囊寶盈其懷，搜索到蓬門。不問捲與杯，嗚嗚角復鳴。負戴行大達，官鼓打嚴更。曠曠見朝暉，趨者飽颺去。黠者行潛歸。明朝大將臨，建鼓揚旌麾。下馬氣如虹，擐甲看子懸。我士聽無譁，告汝軍中規。亂者縲首刑，我法不可違。幸逃軍吏誅，去矣無從追。反側各自安，無爲搜根莖。芟賞善而罰淫金，錢犒纍纍。此意誠難知，公然獎盜魁。可憐金閩民，竄突寒無灰。捐貲贖北征，荆棘緣自栽。跳身願從軍，良民不可爲。

聞冬木老人隱居包山八十有六，擅鄭虔三絕，神明不衰。今之少微靈光，投贈一詩以爲先容，且冀得老人之墨瀋也。

峭帆帶雨雲冥冥，胥口風利船不停。浪花怒打船折行，對面失卻包山青。包山丈人存古型，方瞳滿碧涵明星。消夏灣頭結草亭，清詩妙畫見性靈。詩吟左司畫，右丞山澤之臞壽者徵。我今冒雨訪洞庭，願得墨妙圖真形。

石公山

湖天三面石瓏玲寺裏登峯踏上層脚底濤聲吞禹穴眼中山色辨吳興聯雲嶂險看雲疊來鶴亭空喚
鶴響一事難忘花石史萬千回首下高陵

寄懷毛仲可何泰安

岱宗青來塞戶牖主人留客觴重九山左黃花取次開銀槎一醉桑落酒酒罷客行月在樹徒御張燈送
車右別來百日三寄書開緘令我重回首投轄已感交誼真贈碑具見相知厚清琴泛響聲在耳楸枰落
子談用手遊山行廚供張備騶徒廟祝知名久先公領此百里郡道路爭稱賢太守卽我假館僅三宿一
門詩禮敦孝友江介花開春意動問君肯上吳船否不材誼作東道主韞矢前驅屬車後蹇驢扶醉訪獅
林畫舫載花經虎阜可惜江山平遠不驚人比較齊大非吾耦

徐州登黃樓

亂山開處見彭門十丈黃樓迥出雲聽說羽衣人去後笛聲猶繞大河濱

嵩山高

碧叢叢高極天吹笙王子冠列仙騰龍跼鶴嵩高巔下觀塵世三千年白水真人地下眠黃袍不上太尉
肩嵩高王氣今肅然上不生高光下亦不生曹與袁鴻名神器一闢于漸臺之水淪爲澗西陵歌吹送老
瞞妓衣空向高臺懸分香賣履燒紙錢會有瓦硯銅爵傳銅爵之臺臨漳起卽今亦作當塗視蓋棺未到

難論定晚節竟被千人指千人指一朝死南面王東流水五嶽峻極嵩當中願天不生帝子生英雄

黃山歌

軒轅皇帝天爲徒手提大化還洪鑪乾坤六子試胚胎滄峙飛走呈形模丹成榔鉢上仙去元精夜出千
斗樞遊戲人間作狡獪化身百億朝天都爲雲爲松爲瀑布瀑作長虬松矮奴爲鸞爲龍爲師子龍翔獅
蹲鸞尾舒爲仙爲佛爲魔怪仙行佛坐魔軒渠散花天女雲作裾觀音大士蓮承趺三參童子膜拜立鸞
鵝飛空銜數珠達摩渡江來折蘆琴高飛昇跨鯉魚金盤承露堆果實筆峰上卓生花鬚抱膝者隱繙經
儒聽琴者僧載寶胡隱囊紗帽觀棋局喚作丞相堪胡廬山精木客莊諧俱宅天子障爲奧區精魄原是
舐鼎餘軒轅龍去適鼎湖西天佛子求歸墟清涼讚佛詩南膜諦視蓮花說真如是谷是潭皆鉢孟是藥
是草皆芙蕖是峰是石皆淨居是雲是海皆天衢是道是釋皆文殊三十六峯中天都其外百千萬乃爲
天都鄂東來雲門三肅客湯泉澡身忘故吾青龍潭瀑洗碧砮紫雲峯珊瑚痾僂丈人體籟籊凌雲
仰見跳仙颺人坎出井梯橋紆玉屏風見斜陽徂夜夢扶搖入太虛軒轅皇帝開行廚銀河爲漿北斗斟
青蓮花瓣甘露濡華嚴大法齊華胥仙釋二帝丹同咀我登黃山力未補有茶可採藥可鋤有雲可宿海
可鋪有石可繪松可摹彼松不作偉丈夫筋張鬚縮百怪儲綠岡迸石如狝狙山之靈秘彼所胙一松迎
客恭而迂如儻如介當門闕一松送客低厥株如卑如幼循牆趨一松接引艱危須如手如臂峯尖扶一
松蒲團瓦上敷如針如線如氈氍一松聚音風來梳如吟如嘯如笙竽更有擾龍之松肩臂巖松蟠石膝

龍在箴龍蛻上天生龍雛帝松之謚錫古初是松是龍不可呼千山鱗甲皆龍孥山中一雨水被塗九龍
瀑布匡廬無君不見他山苦肥黃山臞飢來三日精黃茹天都蓮花兩角孤雲孤庵逢擲鉢吾歸歟松圓
逝矣海上濱虹逋歸來賦詩倩寫黃山圖

黃濱虹名
實歙縣人

天都峰

良位在東南立地苦不尊我觀天都峯氣若無崑崙軒轅擁二仙學道探天根丹光作明月劍氣生白雲
劍備上清都冕旒朝羣真茲峯絕依傍龍駕所遊巡三障列侯服一柱標帝宸至今削壁上未許猿猱捫
泰山亦云高躋巔瞰朝曦華嶽更嶄絕玉女闕頭盆天都四無鄰舉首驚威神衆峯不敢仰戢戢如兒孫
夜半奏廣樂帝將觴羣臣天地爲鐘鼓六合聞韶鈞佛從西方來丈六顯金身抗雄起蓮花分席如帝賓
一闌華嚴法互締香火因仙佛本合種山川通苾芴靈爽日來遊荒度非普門我行名山多忽作天都民
醉來上天都一臥三千春天上桃花實東海看揚塵

羅星洲爲吾鄉勝景長夏苦熱念之成詠

柳禿花欹鳥一螺鷗馴鷺熟喜相過鐘魚響處湖雲靜樓閣明時浦靄拖碧漲水高行酒舫紅晞日出灑
魚簑遠離江國思消夏支枕風湍對芰荷

贈高吹萬燮

吹萬與余爲游侶者三度令子君介主從余學與芳雄交善戊午夏吹
萬病幾殆余於乙丙間亦染心臟病然則吾兩人之所不同者殆希矣

沈疴不死氣如虎兩足猶能踏萬山黃嶽褰裳穿雨過青春閉戶著書閑妻工嗚噓談莊老兒有心思訂

馬班一事輸君成別業邱園吾已長榛菅

顧燮光

燮光字鼎梅浙江會稽人官部曹有非儒非俠齋詩

題王鄒閣藏西漢遲元宗等祖冢刻石

西京石刻如星鳳環寶人間尙有之降命猶存殘字百神光十丈照臨池
不須片石語韓陵我亦天涯行脚僧碧落碑奇三日讀千秋猶憶李陽冰

題漢崔公殘石拓本後

漢石渺難尋隻字珍拱璧姓氏記崔公壬子留遺跡郡守歷多年遺愛刊貞石斷碑等吉光字泐石刑碧
事實攷證難摩挲費晨夕漢輔好古士與蒙有同癖千里貽書來拓本彌珍惜鴻都憶中郎遺墨何能獲
得此足怡悅爲之賢博奕我從大行歸磨折游山屐倦游眼亦勞展讀情何適題字付郵筒長嘯杯浮白

陳止

止字孝起江蘇儀徵人有戊丁詩存戊戌詩存

輓未雅

並世論同異何止有三四哀哀命同辰年亦四十二君子賢而高豈在名與位鳳兮德何衰棲止在平地
狂狷不可得知君求其次天地自古今落落見文字學諂日折腰誰曰骨不媚餬口日賣文誰曰心不愧
識君我獨遲因遲見道義貧亦何可長迺有療貧意謁人走近畿臨行共我醉意謂整與別風流忽已墜
張琴讀古籍撫摩舊陶器歸來時閉門果爲病所累自慚新締交未敢相問遣還從無意中竊聞它人議
求生其實難求死尤不易去年君有須須長得奇致如何松柏姿經時自枯萎三界火宅中有身都能寄
吾曾不畏怖顛倒著游戲柳惠黔婁康有妻定私諡已矣爲君悼言之我所忌溝水不界心唯死或可避
人世有弔唁僕僕非吾事願告同心人且收哭君淚搽求所遺文用副傳世志君廚身後名庶幾不終闕

日本伊藤博文在哈爾濱爲韓人擊死

東征十萬化沙蟲成汝平生一寸功喜有會稽封少伯恨無妲己賜周公殉身誰爲歌黃鳥貫日今偏見
白虹流血伏屍休論值殷奴遺胤亦英雄

生日

月明集客帝城南坐閱春秋四十三王導尙書唯幸妾盧全報國有丁男能開始覺年光好肯醉應教睡
夢酣星者謂予當百歲悠悠來日復何堪

無聊

臘尾春頭大雪中無聊日日醉東風
癡兒頗得酒人趣笑說齊肩一甕空

和叔瑛

雪後梁園見柳絲蕭條寒食禁煙時
棲烏待哺鳴聲苦歸雁離羣息影遲
賞雨三春愁黯黯懷人兩地老
垂垂尺書中有傷心語不勸加餐勸忍飢

簡味之

蕭齋故人一紙書勝於照乘徑寸珠
其實中無可喜事一讀再讀增長吁
雪溪先生我老友去年八月忽已殂
身後寂寞同伯道遺有老婢其姓朱
生前求爲夫子妾人言此是秦羅敷
年老無歸誓守冢聞者不信空軒渠
今日一死非明節要使行路矜其愚
它日我過橋西墅不因雪翁還式閩
伯梁老矣固未耄書來謂渠殊模倻
倚樓近益少傳句謀食縮卻詩工夫
陳夔小兒易與耳身如斷梗隨所如
君家有弟善讀律得錢僅可畜其孥
更聞佳兒得佳婦善事堂上翁與姑
翁心乃在侍青閣閣中之人應更耀
有腰不折胡爲痛想因搵索詩腸枯
君才長我一歲耳我踐君年原須臾
爾我漸與伯梁近伯梁漸與雪溪俱
感此恨君不解事胡爲累月音訊疏

觀鎮兵成列

乃有兩萬人名曰禁衛軍南苑日訓練
授旂逢茲辰馬步礮工輜使人耳目
新樂歌東西音載道生風雲

中國遂無字數以西字分自頂以至踵色色取諸隣直假日本服裹此滿洲身學羿能殺羿小耻何足云
夷身夏其心誓死以報君君王所授旂仍用滿漢文親貴擁此衆如龍久當馴從此虎耽耽誰敢窺國門

羊角哀

世有羊角哀可以遊夜臺世有左伯桃可以輕綈袍二子生西羌欲干楚元王道出梁山前大雪飛漫天
忍凍抱同病兩人共一命不論爾與我死者不妨裸天忽啓牖人兩衣併一身角哀不及止伯桃解衣死
國士遇國士輕死直如此以此方戎齊奚啻雲與泥角哀且入楚爲王陳其苦王聞之歔歔爵爲中大夫
拜官益悵悵請爲左營葬誰知葬左處乃鄰荆軻墓軻不修秦仇空借於期頭無顏見燕丹歲久骨不寒
敢欺左鬼新不容與爲鄰左示羊夢中冀得安其宮草人手執械焚之益大敗軻黨高漸離相助出其尸
羊見之大憤拔劍立自刎鄉老方掩埋風雨雷電來戰鬪聲慘烈數十里不絕伏伺至明日荆軻白骨出
關中流寓記泚筆載其事有客醉未醒鄙其說不經生友與死友此理豈烏有今人善翻覆交態不堪目
若此兩奇鬼人間更有幾寄言關中客拜墓日當百

慰臂詞

近譯一書日作字五千忽覺臂酸詩以慰之

笑汝年來亦太嬌忘思投筆有班超要知九折非吾惜成就平生未折腰
骨節何堪曲作酸夜來使我枕難安作詩慰汝申前約它日酬勳一釣竿

沈吟

老宿希馮道新人慕華歆賣書作歸計日暮幾沈吟

哭孝元

婦人醉酒江居士不信餘生握手難玩世戲施牛馬拜著書焚給鬼神看七賢懶過嵇中散三友才於管
幼安白首如新唯我在臨風空有涕洟瀾

客串

躍馬沙場意氣殊將軍到此亦銜鬢居然再世周寧武來演前朝鐵冠圖
紅氍毹上舊衣冠一種聲容正耐看爭怪當時李天下拋將心力狎伶官
檀板清樽自按歌登場粉墨意如何建安公子饒才技持比卿家未足多
友人書來閱予所遭詩以謝之

城南雙樹老夫家坐擁圖書十五車元九空夸州宅美門前問字欠侯芭
盞菜依然作孟嘗計東兩妾並糟糠將車執杖他年事已有元方與季方

陳衡恪

衡恪字師曾江西義寧人三立子

法源寺看花

我心不能春春色忽到眼兀立禪堂下猶帶淚痕潛森森出牆枝弄晴殊瑟憫留此娛須臾但愁風力剗

梨花

嬌雲無力倚牆東正好低枝可避風與汝隔窗斜對面一春開落忒關儂

月下寫懷

叢竹綠到地月明影斑斑不照死者心空照生人顏

春綺卒後百日往哭殯所感成三首錄二

我居西城闔君殯東郭門迢迢白楊道萋萋荒草原來此盡一哭淚洗兩眼昏既不簾窳設又無酒一尊
焚香啓素幄四壁慘不温念我棺中人欲呼聲已吞形影永乖隔目渺平生魂我何不在夢時時聞笑言
條忽已三月卒哭禮所敦我哭有已時我悲鬱難宣藕斷絲不絕况此綢繆恩苦挽已殘月留照心上痕
故人九原土新人三寸棺相繼前後水一往不復還我何當此成淚眼送奔瀾生時入我門綠髮承珠冠
死別卽塵路靈輻載鳴鑾忽忽十年事真作百歲觀念此常惻愴凋我少壯顏少壯能幾何厭浥朝露團
會當同歸盡萬事空漫漫

題春綺遺像

人亡有此忽驚喜兀兀對之呼不起嗟余隻影繫人閒如何同生不同死焉能兩相見一雙白骨荒山裏及我生時懸我睛朝朝伴我摩書史漆棺幽閔是何物心藏形貌差堪擬去年歡笑已成塵今日夢魂生淚泚

題蕭屋泉山水畫

此畫如人冷似僧殘山澹水有傳鐙須知是熟仍非熟每到無能却未能洪谷房山存夢想一峰梅壑許攀登童時見慣蕭郎筆年老一分境亦增

同湯定之雪後至江亭

晚寒踏雪到江亭蹀躞明沙細可聽欲問野僧迷熟徑兀如雙鷺立空汀倚城薄霧開新霽出屋疎林失舊青天與片時營書稿柴門坐我未宜局

讀大人攜家集河舫詩感賦

幽居藹暮春懷歸念彌切昏夜夢到家白日腸百結高軒眺空翠小几坐籛暖雨開昭晴初花美可攜出門臨大路障而塵滿壁奔騰咫尺地萬事一飄瞥昨者弟書至函中父詩出全家健游衍江南佳氣節雲光漾簪裾逸興動城闕秦淮數篙水恍與蓬瀛接嗟我滯東海定省久隔絕羸澀片幅紙捧讀若造膝曠哉望波濤怒焉生愴悵所求已微茫荏苒送歲月長懷擁殘卷短景羨飛翮乾坤未寇亂骨肉竟闊別妻孥置天外弟妹渺難集人生信隨化聖蹟亦溷跡漂泊無東西甘苦喻魂魄何以慰親歡頑健強加食

過映庵夜話

近市人稀罷酒盃，夜寒還爲蹋門來。
新詩數讀餘今日，舊夢重溫半死灰。
未信惡因親手種，相憐同命白頭哀。
風吹柳折逢春發，幾許深情誓不回。

陳后山逝日會祭賦詩

志士何所貴，溫飽無慚顏。
凜此耿介節，誰不爲後山。
我讀後山詩，冷徹毛髮間。
沈思無他奇，投老終一寒。
荒茫八百載，絕壑空躋攀。
衣食誠細故，義在非苟安。
推其惡惡心，塗炭汗衣冠。
奉身若珪璧，况肯蟻附羶。
僧寮設齋供，公其來盤桓。
殘年作癡事，或與同鹹酸。
我惜未赴約，追懷成永歎。

貞長書來言與王天木丁桂樵泛舟西湖樂甚屬作西湖寒泛圖圖成附以詩寄之

別後相望遠，寄書爲言野艇是安居。
粼粼一水寒如此，落落三人樂有餘。
竟日勝游穿竹石，出塵清聽到鐘魚。
吟詩更覺西湖好。
文與可詩云北客若來休
問事西湖雖好莫吟詩 歲晚煙波忽起予

畫山水便面

莽莽蒼蒼范華原，千林頑石記苔痕。
辟人莫使尋山去，却怕空林虎豹蹲。
畫擬范中立
梵宇莊嚴瞰大江，風帆落影霧爲窗。
靈山香火宗風在，應有天龍禮法幢。
畫甘露寺

初春書懷

車馬門前曉日明，桃符初換覺春生。
却嗟雪後寒仍峭，叵耐風多耳易驚。
往事喜談知漸老，有書不讀歎

無成年年攬鏡身何似浩蕩中流一舸橫

感懷一首

將就婚漢陽感念
前室愴然於懷

閒居心不怡徘徊眇遙岡層籬盪空冥修林日摧黃萋草蔓廣陌寒潦澹方塘尋跡非故塵卽景旣餘芳
昔權如未徂沈思安能詳代謝豈自然古今互參商披軒復攬涕翹首送微陽淒彼節物移何以盡杯觴
悠悠歲暮懷毋令松菊荒

別婦詩一首

別漢陽將
之日本

方舟激流波皎日送春暝冉冉草木榮行行衣帶緩孤征情自悽乍別意彌黯與君結絲羅萬里一相見
芳訊續墜懼藻幄共清讌如何舍之去去路忽修遠離離昨日景今日猶在眼回首隔浮雲臨風託微款
金石願毋違嘉辰儻能撰

觀朝雨詩一首

煙林秀遠色晨雨縱橫來輕寒散平麓飛翠上層臺春膏極海隅萬里淨氛埃山居藹葱蒨小窗相對開
餘閑契玄朗曠覽意悠哉喬枝棲宿羽迴溪漾潛鰓微生幸有託浮雲尙徘徊聊同戰勝者散髮游蓬萊
汪氏兄弟招飲焦山松寥閣作此酬之

窮居罕清曠勞役闕盤遊經過上下江曾不陟崇丘焦君鬱義義髮鬢闕靈幽嘉我二三子招邀攬芳洲
揚舲送長風開軒玩洪流豁達坐修椽一解煩暑憂茂木藹蒼翠激石戛琳璆異人闔金膏焉能事冥搜

覽此山川壯翳如日月浮愜賞理不遺懷古跡空留松醕庶可酌良意媿難酬

畫梅歌

千年不見華光老但聞華光畫梅好碎撒瓊瑤爛作花神遊雪地冰天皎入室弟子楊補之枝枝瘦鍊細如絲元明諸家有述作塗脂點墨師其師我今畫梅無所本意未經營手先冷攢空野棘兩三條又似枯藤掛寒嶺乃園繁株不可摹晨光閣上春糝糊乃園在武昌泉署晨光閣在日本溪橋驛路偶然見飄泊之大森平生賞梅勝境惟此二處東西風景殊鄧尉孤山未經眼衝煙欲棹滄波遠層玉峩峩寫不工轉憐絕色埋蒼蘚畫梅一幅墨如金種梅十畝望成林何當醉臥梅花下夢醒空山飛翠禽

同映庵遊積水潭遂次其韻

北來何事與登臨照影荒寒一水深陂柳已看新燕盡寺門不礙舊苔侵殘英入座供閑味列嶂圍城接野陰却似江南風物好有人結屋動孤吟

憶石湖舊遊

已去盟鷗不可呼此心如水冷菰蒲扁舟無力迴天地雨打風吹過石湖

秦山南天門題壁

連磴步步上山高天亦高到此數點雨下視皆雲濤

石遺先生之夫人所居曰蕭閒堂夫人卒後八年先生命刻蕭閒堂印并爲圖因題

閱盡人間世，獨有蕭閒堂。至情深刻骨，萬事莫與償。山含夕陽古，葉落空階涼。抱此垂垂老，哀歌天地荒。

吳仲成再婚感而有贈

新婚人所歡，再婚人所歎。不識新人意，常憶故人顏。耿此懷舊情，賢愚非所關。丈夫愛後婦，斯義未足安。躡新忘舊履，新者心亦寒。世有同心人，新舊豈異觀。譬彼改弦琴，更張再揮彈。賞音在希微，味之和鳴鸞。誠知今可喜，悲昔固其端。咄咄致深感，君其諒我頑。

與棣生晚飲歸來庵

登車看山巔，到寺看雲脚。雨從雲中來，點滴地上落。昏林密無縫，負我登臨屨。寂寂歸來庵，冷翠專一壑。人亡九鼎換，翰墨煥如昨。端旬齋罷，官後於靈光寺構歸來庵，題額猶存。空懷出岫心，騰笑投林鶴。坐對枯荷花，低回共清酌。我不及醉，晤言勝六博。安得秉燭遊，一盡人生樂。

自歎三絕

賺得長年送死人，眼中亦復見新春。寒門燦闕將何耐，惟有昂然槁木身。

兀兀毋爲後世嗤，朝茵坐送百年遲。箠瓢短命無長樂，回也如愚不自知。

一日蹉跎一日吁，撫膺不敢問今吾。江頭濁浪無朝夕，抱柱尾生真丈夫。

畫溪居感舊圖

高柳蕭疎水繞廬，小窗遙對一峯孤。旁人指我雙栖處，知有傷心在畫圖。

張棟生於其所居之東葺堂一椽以居我堂前有槐一株因名之曰槐堂賦此遺懷

老槐相對淨秋光坐歎張侯用意長着我斯堂元不負因人成事竟何妨
栖遲孤枕三年夢蕭瑟西風八月涼有客打門來問訊餘畦贏得種花忙

作畫遺林宰平

作畫時宰平爲予牽紙驟然落筆大爲驚愕既成乃知爲石也座客旁觀亦頗稱快

吾腕豈有鬼林子慎勿驚
素然筆落紙若刀解牛聲石本無定形初非刻意成
不用嚴矩矱何須寬作程
急風掃宿腐幻此山崢嶸
秋花肥且美一一傍石生
揖讓爲賓主微物解人情
造適不及笑尺地勝專城
我石不辭堅我花不辟榮
持去挂粉壁聊爲洗朝醒

題姚重光之長女變臨薛素蘭花卷子

玉鴛畫妙託高寒

洪青娥嘉興人善詩畫有玉鴛閣集

不數金陵駭綺蘭想見南遊詩格在

薛素素有南遊草

棗花風致耐人看

居曰棗花軒

過詩廬賦贈

長安車馬熱騰騰曲巷深藏有一鏡
依約定巢留社燕橫斜題壁點秋蠅
吟詩作賦名心在問舍求田老境增
聞說山居新料理擬從苔徑整行滕

陳方恪

方恪字彥通江西義甯人

無題

端是天人玉儼臨酒懷蘭語蕩靈襟閒詞獨服焦延壽字字幽馨出易林
王母旌旗鎮上宮黃河天瀉玉琤琮中原靈氣今朝盡輸與雙成住碧峰
平生風雨不言愁一度尊前意却休仍是惠休多慧業三年平白夢揚州

梁溪曲

自前清末年京師南妓最盛皇室貴胄無不惑溺遂以苞苴女謁亡國而梁溪亦成北來南去
之李師師云

曲罷真能服善才十年海上幾深杯不知一曲梁溪水多少桃花照影來
休言滅國仗鬚眉女禍強於十萬師早把東南金粉氣移來北地奪胭脂
鐙痕紅似小紅樓似水簾櫳似水秋豈但柔情柔似水吳音還似水般柔

胡朝梁

朝梁字子方號詩廬江西鉛山人官部曹

夏日卽事

人生快意是會合盡日好風來東南芳塘半畝水清淺茅屋一間人兩三
看水看山殊未厭栽桑栽竹粗已諳青雲可致不須致我願食貧如薺甘

對南山

自來骨肉關至性行矣關山良獨難囊筆還家尋一笑傾囊市脯勸加餐
南山有雲欲招我清夜聞雨能洗肝明日鄰園乞新竹呼僮斬取釣魚竿

江上寄懷友人繭公

驚人雄辯雜談諧偏是中年意興佳得酒便思呼等輩除詩略不置余懷
有時脈脈簾垂地一任青青草滿階美矣江山看不足何年卜築在江淮

除夕發書四弟

一歲向燈盡萬哀竟夕生衰宗存弱弟遺墨撫吾兄閱世多深語隔書有
哭聲故園人不寐應共此時情

奉太夷先生謝書近作

大化無宿留人事紛成虧誰則無一營而惰其四支孔孟走踈踈所志扶危巢許圖自安逃世絕攀追
夫子澹泊人繕節能自持頗笑腐儒拙欲雪名士譏龍州握兵符留得邊人思拂衣謝簪組袞裳脫絆羈
天下匹夫責敢以無位辭欲躋斯民康似急其所私不惜手足勞願世無溺饑近聞海藏樓高築東海湄
卅年飽憂患一枕尋軒義甯欲自茲往閉門與時違東山信可樂蒼生願恐非染翰公餘事薄植非敢窺
尺幅寫新詩千里肯見遺詩中誇蠖叟蠖叟我所師安得十年勤侍公學臨池別來再秋風睽懷天人姿
寫義甯師詩竟輒書所觸以呈

題溫叟勺湖款春圖

大塊噫氣幻萬千上飛下走日月旋詩人能事通造化驅使萬物歸新篇吾師讀書善養氣胸次浩蕩收
百川作詩不須故作勢却自凌厲橫無前

吳子坐我室東隅殷勤眎我款春圖人間何處春可款門外已報花無餘東風吹絮作雪舞鋪階入硯紛
模糊豈知春意忽然盡恨不秉燭恣遊娛

人日立春餞別師曾彥通兄弟

負手欲何爲高吟到人日眼前春始歸明日君又別

贈陳師曾時師曾自日本歸

陳家兄弟文章伯佳句流傳江海間已嘗讀之爲傾折亦復強和忘愚頑歸來道氣照人眼可有奇方起
我孱風暖日長關底事荒城月上抱書還

夏居漫興

雙塘之水明如鏡一帶垂楊青可攀得意醉而非醉候遊身材與不材閒有時嘆喏仰天語消得尋常負
手閒幸是中年健腰脚短衣匹馬好還山

述懷

年年作計隨人後短髮長歌祇自疑來日萬端付之酒江南片月爲吾私非關早歲思齊物合有寒儒瘦
到詩我已窮于孟東野高天厚地更何之

次韻師曾見贈

幽居正好學逃世窮巷何人來款關物外謳歌消白日尊前哀樂易芳顏偶然臨水一垂釣早晚開門飽
看山與子同生山水窟卽今飄泊未能還

題姚叔節所藏沈石田山水長卷

我家山水閒生就山水眼看山情無厭臨水意未滿廿年苦奔迫井閭日以遠擊楫浮大川驅車登峻阪
豈無歷覽娛亦嘆雲物善默持擬故鄉得其似者鮮長卷石田筆姚氏所藏本斂手百遍看旣收還復展
問我胡爲然願一吐悃悃罔巒秀如此溪流恣蜿蜒彷彿石塘河兩三橫緘扁崖下村人居蓬門疑可款

又如夢中情宛然束身返平居思爛熟及時老絕嘯益切歸田心可待春作伴姚髻工爲文如山無平衍
常言浮山勝要爲天下選視此遠過之子盍從游宴人情愛鄉土溢美或不免塵事會有終盛約誓當踐
各自滯天涯相期在歲晚

上巳日羅復璽招飲歸旋病減食三日矣告復璽

去年癸丑今何歲又過暮春修禊時五六日來寒至此一千年後我何之明知結習難除舊兀對春朝望
起衰定是寒儒慣窮餓肥魚飽飯總無宜

清明前一日柬石遺翁

猶餘寒裏萬花在不信春能三日晴白日霾雲可無恙東風刮地總難平逢人亂後仍詩酒憶舊燈前半
死生爲問城東石遺叟明朝何以過清明

積陰見月欣然成詠

春陰十日雨綿綿燈火千街欲化烟如此清宵如此月祇應爛醉不應眠一廬舊寄雙塘上
意還追千載前自脫江湖入京路百無聊賴甚當年

余舊居金寸
陵雙塘巷

秋日集何氏園亭

霜寒木落雁橫天風物依稀似去年枯竹鳴廊如有訴晚山當戶自生妍窮途作吏敢求飽乘興題詩何
必傳願我支離親吏老背人偷眼白雲邊

遊西園

暮色蒼然掩夕暉，園丁旁睨欲扃扉。祇緣詩思澀，無似猶自攢眉不省歸。

石遺先生將歸修閩志因獻長句

平生散原吾師事，亂後歲書奉起居。晚交老蒼得陳馬

謂通伯翁

風義師友今所無，近作頗邀散原許。多出兩

翁論定餘石翁論詩貴，自廣盛國百里毋乃疎。又言詩澀味固好，鑿幽終須出坦途。奚囊滿挂俊人句，一釐剔如耙梳欲得千金付。刮刻常使流傳在江湖，詩事所關吾道細。譬之蟲鳴聊自娛，然亦正賴有傳者。如翁好事尤過吾翁，今又歸領書局。眼前寧惜吾黨孤，世事翻復那可料。豈必來者今不如，但須記取別時面。我初白鬢君白須，東風吹寒入鬚鬢。柳條欲拂行者車，行過江南聞鷓鴣。還家猶及三月初。

春夜不成寐得二絕句錄一

尋常客歸留不得，欲挽春光可是難。賸有新詩清似水，却緣耐得一春寒。

題臧圃秋校史圖

嘗聞六一譏世士，盡心文字爲可悲。又言攻文樂無厭，窮老舍此百不思。政如退之哀書蠹，仍自爛漫多文辭。兩翁作語皆自違，吁嗟後生誰與歸。毋亦人各有嗜，欲酸醎甘苦殊。胃脾所好在此，莫能奪明知爲害。終不移孱軀瘦小，關秉賦家人苦說由吟詩。答以不吟亦且老，何如歌詠情可怡。爲約月祇三四首，往往枕上偷呻呶。下相臧侯於文藝，勤篤過我忘渴飢。平生斐然盛述作，句法直欲龍門師。問爲徐公任校

史丹鉛萬紙樂不疲，畏廬老人究史義。嘉侯功苦爲圖之，徧示朋好有題記。以我耽句宜無辭，念侯久病今新愈。溯病初起類風痺，醫云病由伏案久。根源或在讎校時，第一節勞習舒散幸。毋兀兀攻苦爲此言，不止爲侯發。正可取爲吾箴，規安得拋業從君嬉。免教世俗嘲書癡。

秋晴

直道秋晴不減春，薄綿暖稱病餘身。癡蠅屋底頻攢紙，倦蝶花間亂趁人。不用狂歌驚世俗，猶堪短髮傍風塵。苦思佳日難酬對，露坐看雲過北鄰。

謝鶴柴改詩

有人攻吾詩，喜如病獲醫。鶴柴於律細，吟成輒商之一字。稍未安，不厭百攢眉。別去有所見，猶復寄我辭。頗傷結愛晚，得此于人稀。尤望攻吾短，言行期無虧。平生友直諒，意不在於斯。養指遺肩背，孟軻之所譏。寡過吾未能，慕義情庶幾。

周越然喪女賢珉以英吉利文書事見寄詩以唁之

昔別君未婚，相念逾一紀。忽寄哀女書，蚯蚓紛滿紙。假彼佞盧文，說從墮地始。女生不好啼，舉室誇靜美。周晬巧言笑，婉孌益可喜。三歲解娛親，膝前舞佻佻。乞母裁文葆，戒兄污書史。日暮傳廚炊，報母爺歸矣。凌晨摩兩眼，低喚爺起起。母懷應有弟，吾行獨眠耳。我亦自愛弟，非關母愛弛。及春一弟生，果如女所揣。孰知春未盡，女病至於死。死死骨，肉情莫能究。所以自吾喪，珉二女連歲舉三子，舉子高堂歡私衷。傷

厥姊珉亦有兄弟君哀不可止賦此塞君哀閣筆淚如水

送曉愚之官四川嘉陵道

喜君來作閒曹長憐我猶趨末吏班回首舊游渾似夢江南一角妙兒山

江南陸師學堂在妙兒山側水師學堂在其北相距里許

單騎之官萬里西霜天十倍惜分携嘉陵棧道君須記可似黃亭到紫谿

放翁紫谿驛詩嘉陵棧道吾能說略似黃亭到紫谿自注云驛

在信州鉛山縣蓋距余家十五里也

李廣封侯慳骨相文翁化俗重師儒憑君問訊灑西老

謂堯生侍御

一簡三年遞到無

題周養庵篝燈紡讀圖

機聲軋軋鏡光寒書聲琅琅夜向闌夜闌鏡寒兒讀苦舉頭見母不見父孰爲兒父孰兒師母乃一身而兼之責兒望兒成立耳撫孤豈容有驕子此語微婉含酸辛正如當日斷機人斷機不斷心上緒百轉千回繞兒身兒今成名母不見何如有母長貧賤世上貧賤母更慈呼天泣血無母兒

侯毅

毅字疑始號雪農江蘇無錫人

別意次劉瓠丈暱公韻

近代詩鈔 胡朝梁 侯毅

疏蓮麗水自菲菲寂寂芳陂事已非誰倩青禽傳錦字難牽素縷上春機
酒邊密意空相約夢裏前言忍更違願著晨風千里翼也隨歸雁向南飛

絕句答友人

王石畫蘇書溫李詩桐城文派夢窗詞咸同以後成風尚吾意難同肯詭隨

說理雜詩四十首錄二

腦府孕奇靈動盪構思意積浪傳八方萬物供驅制觸類成感應離電同其致
至誠開金石前賢豈吾戲心浪或凝鬱歷久未易散推移流大宇託物時隱見
塵心駭非常萬象况能幻鬼神六合外聖人存不論

春興

柳綠因風透窗虛映日明象牀尋夢蝶鴛枕聽流鶯舊曲杜紅譜新茶燮素烹
此生何所望合老碧霞城 牽題石遺先生蕭閒堂詩後

蕭閒堂者石遺先生配蕭夫人取真誥語以名其讀書之堂也夫人秉德懿燾博綜圖史及沒
石遺賦蕭閒堂詩五言排律三百韻悼之抒哀述往託以長言多矣哉古未嘗有也毅旣獲讀
其詩石遺俾題其後乃爲此遺之

才福不兩全由來有偏缺賢哉陳君妻恂恂被儒術不徒著靜好智蘊周萬物宋元稱李管詞曲與畫筆
斯人擅雜文浩汗富作述須眉謝精詣論議徵遠識伏女曹家後千載應寡匹堂堂陳夫子聲華炳日月

嗜古陋湖州論藝草松雪唱誦諸比肩鸞鳳鳴一室才福信無雙髮壽宜可必豈期霜菊枝歲寒遽凋歇
可憐五十翁垂老傷折翼哀逝無窮期長吟動泉穴嬋媛三千言鉅製真獨絕世增伉儷重詩擬波瀾闊
萬古蕭閒堂情文同不滅

題王氏姑母小照

少聞吾父言早歲王母卒汝姑時未字撫我任母職織絲衣我衣買餅食我食世亂遭流離相携竄荆棘
卵翼十餘年恩深復何極比年病侵尋吾身不可測恐終負若姑旦夕心感感行將遣汝姉姑事爨吾缺
他年汝成人此恩牢記憶吾父語吾時吾年纔滿七稚子性癡頑未解語嗚咽無幾父竟亡母亦相繼沒
藐藐三尺孤煢煢將安適姑隔千里遙馳書備憐恤姑夫官京畿召我來冀北亦復衣我衣亦復食我食
亦復遭亂離亦復蒙卵翼父恩尙未酬又荷生存德吾生乃遲暮吾姑又外出吾姑少時容吾實未一覲
始吾見姑年姑年已五一明聰目炯炯清健神奕奕室懸携女圖圖時未四十將圖比當時弗減舊顏色
迄今又十年雙鬢猶半黑舉案慶鴻光繞膝皆荀懿彼蒼鑒吾衷爲吾護松柏好待際風雲徐圖報恩澤

汪國垣

國垣字辟疆江西彭澤人

寄贈胡詩廬用魯直均

詩道有坦途脫略謝時輩苟能宏遠抱雋發已不逮同光二三子差與古澹會骨重神乃寒意匠與俗背
妙語徹中邊游行大自在吾子吐佳句意與古賢配理弦三五彈泠泠非俗愛又如振霜鐘清響度林外
手格白題歸賈勇力猶倍吾鄉散原翁吐語多姿態排慕出恢詭瑰麗遂無對豈其苗裔耶賢者宜識大

送聚廣歸永新

石潭正落琴亭水疑帶蘆溝鳴咽聲潑墨遠天人獨往凝寒小閣醉初成名場角逐知難值意氣相高恐
不情去去巴陵江上路灘頭徒倚看潮生

時取道
湖南

睇笑一首次天素韻

睇笑中原淚未收江波日夕祇洞流豈無危論劉中壘亦有悲歌高蜀州纔說冠裳通鞅鞅微聞烏鵲噪
延秋亡何日飲吾曹事未信逢人始欲愁

后山詩去國猶能
別逢人始欲愁

阻雨生鐵舖次晨雨霽至羅山

行行糴稌看初濕鴨綠平堤著眼明輪與吾鄉老山谷亟搜奇句報新晴

江古懷

古懷字伯修號却疇福建侯官人官翰林院編修

謙宣以牡丹盛開招飲中隱齋有詩見贈奉和四絕錄二

爲愛新年強自歡連朝春酒慰春寒小園共有蘭成賦一著輸君有牡丹
此花新自嶺南來花色嬌紅照酒杯似念舊時賢邑宰移根欣向草堂開

清明日西園以詩約社人飲治亭賦此奉和

臨池猶憶舊遊時課讀餘閒弄碧漪隔院書聲還不斷千年劍氣定何之林花亭角春方半尊酒燈前夜
正遲難得良辰兼盛會豈徒勝地繫人思

春盡日石遺師集說詩社同人飲四園賦呈四首

曉起自窺雙荔園小亭默坐黯銷魂落花滿地無人管啼鳥何知盡日喧已覺林泉非獨樂回思笑語有
餘溫宿醒雖醒心猶醉隱几燒香晝掩門

八月十六日集沁園

荔支樹下池水清虛堂照水光晶瑩涼風颯颯起天際斗覺屋外皆秋聲昔年此地不可問過者唯聽寒
蛙鳴豈知本富荔與水園舊名荔水莊已數易主爲今名主人築屋不數楹置酒其上天日晴滿堂賓客十有二
一老說詩最可聽酒酣耳熱夜繼日月色更比前宵贏月臨池上色逾好風平水定羣魚行羣魚若解說
詩意魚我之樂庶其平

周達

達字梅泉一字美權安徽建德人有今覺靈詩存

石遺室詩話蘇堪亟稱梅泉詩相見於海藏樓因稍讀其近作與言詩極服膺石齋可謂能取法乎上矣句如女唇甘逾飴人鮮賤於醬朝聞逐留後夜報殺州將江空岸樹微森漫有海意孤筇入鴻陣儼立諸天頂天意不欲春寫象入淒楚涵濡待自瘳非天亦非鬼閱世真堪怒生癭勝天猶可擲成虛晚雨何心催日去孤樓得勢與天爭意筆多近海藏他如修竹欲到天午日不到地桃源疑可到雞犬在人世春茲寂寞濱高軒肯相顧闐然排闥來翻疑纈眼誤傷春目爲高樓斷望遠心隨去鳥遲斷峽截天通一線亂山戴日入無邊閒宵隱几燈初穗薄暝鉤簾月未弦臨水假山有真態欹斜老樹出新根讀陳子言詩云胥山青入遊吳屐隴水寒於出塞詩贈衆異云世議輕於吹劍首危邦險似浙矛頭張維已失南山烏飲酒何關北府兵皆

工

早春巢園卽事

庭院愔愔釀晚寒
隔花泥徑雨初乾
殘梅未褪辛夷坼
小立東欄當雪看

游理安寺憩九溪橋上

幽禽隔竹已先聞，衆綠遮天一徑分。
泉亂知流昨夜雨，僧閑長掩半菴雲。
過溪未必關禪理，聽水真能了世紛。
早識住山須本色，參寥儻許結同羣。

自留下鎮還經花塢憩僧舍

花塢略無花一徑，入寒竹不知篠簞。
深漸覺襟袖綠，雨餘嵐翠活。
林寂鳥聲肅，流泉不出山。
縈繞湖之曲，道人真面壁。
結屋在巖腹，一龕臥白頭。
罷磬對寒玉，我行困燕趙。
窘若獸在梏，息肩向雲壑。
暫領意已足，寒山憺世慮。
返景翳喬木，送客一聲鐘。
窅然出深谷。

寒夜過拔可觀槿園夜話

冬晴連日乾泥淖，寒樹蒼蒼宜晚眺。
李侯有園號觀槿，定知習靜甘孤蹈。
履霜踏月一相過，不厭衝寒側葺帽。
轉巷已辨燈閃星，到門不見畏臯豹。
鄰檐寂寂戶半墜，街柝沉沉夜逾峭。
主人開軒笑相迓，淪茗張燈煎沸洮。
啓滕出示縑軸古遺迹，龍騰矜墨妙。
是夕觀宋元畫多幅我亦珊瑚勤網羅，對此真慙比螢爝。
君言盡日

溷園闔天改，難脫直可弔。
簿書遮眼窮鉤稽，丹鉛束閣廢吟嘯。
持籌已自恥王戎，快句何年攜謝朓。
我言大隱在朝市，亂世清貧那可效。
送窮莫被昌黎罵，求田豈恤元龍誚。
身閒更冀金復多，一壑能專五侯傲。
君聞此語口欲哆，未過屠門先咀噍。
宵闌燭跋不言別，藝海縱談喜同調。
虛廊步履衣欲冰，暖室移根花已窖。
佇愁清景不可追，歸途冷月仍相照。

冬日漫興賦呈蘇堪先生

入樓暝色隨鷓鴣，翻墮枝殘葉猶打。門中有人呼不出，苦吟兀坐忘朝晷。西甌脫一片土閒，塵草樹如江村。且從避兵匿藕孔，奚勞遯世藏邱樊。紛紛幾輩蠻鬪觸，碌碌餘子蝨處揮。我非達俗俗違我，異趨不啻王孫猿。飛揚閱世意久倦，一壑聊此棲心魂。傍家林館日可涉，有山如垤池如盆。濠梁得趣不在遠，魚鳥豈必皆鵬鯤。唐花出窰蛇吐毒，晚菘入饌甘連根。偶然近局集朋舊，亦有兼味羅雞豚。吾曹天許得閑放，胡爲桎梏勞骸筋。海藏一樓望衡宇，能哀寥寂時相存。韓康入市漸無識，從知機泯馴鷗羣。獨憐羯鼓解穢傾，聽往往移西曛。我雖習懶尙健步，猶堪追逐奔農廬。頗聞生事勝芋栗，妙墨能換千絲緡。文藝於公已餘事，看取志節凌霄雲。過秦有論託奇慨，丈欲作廣過秦論論近日興什迭更之理肯留穢筆儕美新。乾坤清氣屬遺子，道德已足祛黃巾。晴皋風日麗且暄，儻來共載尋嘉辰。橋頭聞鶴語，淒絕坐待冰雪迴陽春。

乘摩托車馳騁郊外詩以紀之

蟄居意苦違簿書，因委瑣駕言寫我憂。適野庶其可，追鋒詡奇製。歡欲飈輪火，載客恰兩三。踟躕駢膝蹀，遠樹隨低昂。宛泛波心舸，不聞鸞應和。卻訝箭筈當，前失空闊蹴。踏起沙堞翻，羨奇肱奇凌。虛步貼安奔，車古所戒一。矚測誠叵何，如尻爲與萬物備。於我騫騰雖，夙志垂老意已惰。聊與適莽蒼，倚軫豁憂癉。

買薤露園墓地成賦二十四韻紀之

乾坤方板蕩，吾窮將安歸。生同弱草輕，死共蟲沙微。乘化洪流中，委脫知何時。永懷荷鍤志，已絕首邱思。

悽悽雍露園鬱鬱虹橋西賢愚同一邱列塚如耘畦我志在速朽封崇焉敢希願言得片壤於此魂魄棲
縱弗歸先塋差勝委狐狸園葬况古制尙儉意可師延陵瘞羸博伯鸞傍要離形骸反其根魂氣無不之
憶窆婦殯時霜露更十稔旣耐不改卜同穴悲無期焚焚念兩殤孤墳邗水湄要令依吾傍毋俾強彪欺
重門鎖葳蕤野花開棠梨吾生與愁俱亦與愁同埋天道不可論收束宜自爲無爲付兒曹龍穴爭撼疑
矧余憂患身遲速視已齊鵬告苟未來餘年且娛嬉玄文方屬草名山待攀躋緩我以須臾遺我以老衰
初春奇燠與小坡念祖仲衡遊半淞園

驅車穿隘衢曲折盤脩蛇入門得夷曠林水無蔽遮城南一角地亭榭依江涯微惜意匠凡未足稱清華
爲山侈疊石礫礮徒杈枒種樹失疏密列仗如排衙我來及初暄園卉殊未芽乘輿在探梅百覓無一花
稍喜挹江光遠渚明菱葭廣堂闕晝靜列席聯吳娃春服脫茸裘始欲被紈紗勺流引漕渠百錢舟可拏
得趣卽濠濮豈必窮幽遐虛亭攬蒼莽茗坐送日斜

與蘇堪先生龍華看桃花立花下聯句同遊者莊呂塵

日斜花更好樹密雲與低野田久徘徊無言自成蹊鄭矧茲新雨餘吐豔無空枝入叢迷所向踴地皆粉
脂周晚霞忽變色欲去翻見園鄭遊騎紛駛春賺取蜂蝶隨周

春夜雨止不寐有作

雨過月復明飛雲如奔馬夜風盪積鬱露立得瀟灑更闌檐溜歇餘滴猶在瓦微馨出花氣涼意不可假

空庭流衍藻天繪，孰爲寫春月。勝秋月灑灑，生澹冶，神清無睡情，靜理契者寡。翻愁朝日出，人事復牽惹。過眼戀清景，徒倚風廊下。鄰樹翳深燈，知有未眠者。

冒雨遊莫愁湖憩江天小閣

市盡畦涂荒一水，彌其缺背江界微。阜遙堞露環，玦我來值微雨涼。意襲襟褐變，碯蔚蔭蔭蔭。蔭蔭蔭蔭蔭，蔭蔭蔭蔭蔭。當年勝棋處，際會誕英傑。吾曹非人豪，小坐亦可悅。家居孰所壞，締造愧前烈。一枰獨亂局，安用計巧拙。運移功罪惑，定論視斷碣。廿年三過此，照鬢喜未雪。傷心樓下水，曾見驚鴻警。春波增感逝，往事嗟灰滅。誰與話滄桑，惟應梁燕說。

江華舟中遇霧時鳴汽笛以警來船徹宵爲之不寐

輕舟犯霧行，繁角警宵夢。孤燈煮遙夜，客意不得縱。重衾寒可戀，櫺隙覺霜重。隨身伴詩卷，短榻聊與共。維時旁死魄，波路黑無縫。葦灣辨漁火，炯炯透層霧。平生此江水，來去幾迎送。所遇無故漚，遊景若飛鞚。壯心到海盡，遠思經秋動。臍欲歌鳴鳴，流聲答吟諷。

冒雨泛舟山塘遂登虎邱憩冷香閣憶壬寅歲偕張大劍虹遊此已二十年劍虹墓木拱矣

霜橘勻丹柳，慘黃做將秋色。罨金閭雨寒，重幙垂官閣。水曲孤帆出，女牆永憶迴。燈聽吳語竟，成留眼閱。滄桑尋常便有傷，高意減盡風懷未減狂。

遊翠微山歷八大處憩秘魔崖作

西山拱京師肅立如排衙翠微據其腹巖壑尤清嘉盧師卓錫處洞戶森豁斜風嘯饑虎澗澗盤脩蛇
奇石鬼面皺枯樹猿臂叉霜紅隱叢綠奪眼疑春葩縈迴三百曲直上凌烟霞渾河落眼底一綫穿寒沙
茲山起太行支脈流荒遐蜿蜒落畿甸餘勢猶騰拏爾來六百載佛宇窮高奢世移龍性改代謝如空花
貴人身豈閒亭榭徒增華可憐清淨域車騎盈顛涯帝鄉不可見霧堞棲昏鴉傷高歌五噫弔古聞秋笳
遊香山靜宜園

虛谷天露根木落山坦腹雲林知幾重嵐翠不可撲梯巖構臺榭佳處各爲屋長廊行不盡流水與之曲
川原攝吟眺烟鳥沒寒綠微風塔鈴語幽籟若爲續衣塵感行役暫憩意已足逕欲擔蒲團來就經樓宿
峰迴境忽異蔽路松栝長西崦背斜日未夕氣已蒼燕郊例早寒葉赤知雨霜微泉織磴道碎礫明溪牀
山僧解世法逐客開竹房當年布金地選佛餘空場烟鐘沉晚韻冷卉留孤芳不辭踏葉深漸覺秋衣涼
秋意不可寫寫之以寒泉秋聲不可尋尋之在樹間聽泉復倚樹我來心悠然諸天梵唄寂微度清磬圓
聲聞一時斷相對忘靜喧安心契微旨奚必逃枯禪亂峰掩頽綠假蹇趨窮邊長風遠寒來澹日愁孤懸
春日讀書漫興

寒勒初花意尙慳暫憑丈室乞安般虛廊風掠涼生雨壞壁落封遠當山舉世不爲成獨往無人可詣是
眞閒雄文漫薦相如似未必玄經愧鬢斑

登鼉頭渚望太湖作

我昔訪梅入鄧尉還元閣迴寒猶淒漁洋西塞落眼底鏡籛媚嬾呈蛾眉今來泛牒過管社撇波上下如
鳥驚平湖灑灑不受唾微風碾出青玻璃涵虛入渾萬古色吐納夕月浴朝暉烟中縹緲辨浮嶼蒲帆去
與鷗俱遲坡陀倒浸石齒齒一半已付崩雲種摩崖鑿削見山骨插天積鐵無成虧具區古稱匯衆水包
吳孕越曾何疑渚上有摩崖包孕吳越四字甚巨東尋欲盡日所曬風生濤湧將安歸伊余萬事坐磨蝸惟有濟勝天所
貽巖花洞草若舊識武陵有路寧終迷橫雲小築盛遊屐我來暫止忘疲饑綠簑青籜若可假浮家更欲
隨天隨

題陳叔通所藏江弢叔手書詩卷

江詩苦澀愛者誰觀僅齋頭始見之海藏揚挹極齒頰漸令舉世驚瑰奇詩人遭亂例窮蹇善作苦語悽
心脾中興開山幾鉅手巢經秋螻胥偷魁伏敵幽潛晚始曝異軍突起張偏師並時熊盛亦健者斂手籍
湜推昌黎憶從約堂乞殘帙欲覓全豹無由窺冷攤三卷落吾手疑有詩魄陰扶持流傳餘事到翰墨研
牋短幅書春詞陳侯裝襲視球璧鄭叟題字翔鸞螭亦如東坡贊和靖比附東野兼西臺稍嫌偏硬骨勝
肉猶喜逸氣行間馳文人一藝有不朽苦希三絕寧非癡我生于書略無得執筆十指嗟沈椎心畫
悟一理固哉妄別妍與媸

緘札

緘札親將密語攜銷魂只在桂堂西秦娥已分身隨風徐甲終教骨作泥百劫難迴如覆水多生不泯是

靈犀銀牀一夢無拘檢又聽花冠翠羽啼

雜憶

一飲雲漿便是仙又隨青女鬪嬋娟何因不畏吳剛斧獨抱高寒自在眠
珠娘曲罷卸殘妝卅六鴛鴦已斷行錯道孫恩是兵解有人供作水仙王
已謝年芳更畫眉雲屏一夢至今疑平生未讀金樓子枉效徐妃半面窺
忍寒寒莽宿中洲離合無端怨塞修說與蕭郎渾落漠梨花謝盡不知愁

盧溝橋

桑乾源自溱洧發曲折雲中瀉沙出

桑乾發源于代北馬邑水經注之溱洧也

湯湯遠挾寒愁來流入盧溝更嗚咽盧溝近接

春明路終古黃塵簇京闕馱鈴已自苦淒涼更送行人踏曉月曉月銜山幾度明人間已見滄塵滅石闌
步步昔遊處皺面重尋意悽切風輪一轉倏成世辛苦黃雞催白髮余年十二從先慈愼回看家國積
公遊此今三十二年矣
千恨未死傷心向誰說橋頭戍鼓亂津渡橋外蒼山峙環玦詩人不治江南秋卻走渾河看落日隻猴孤
亭一片愁蕭蕭飲馬傍寒流豈知中有興亡淚注海經天浩不收

自居庸關南口穿入達嶺止青龍橋登長城作

疊翠無盡藏客行忘顛疲奔車銜尾升一綫盤天梯長城攢劍戟遠脈來安西高瞻若建瓴亘古摩撐犁
緬昔閉關代於此封丸泥設險界蕃漢行旅嚴征譏邇來關孔道日夕飈輪馳窺透絕胡馬萬里清秋淒

從知蕭牆憂不在羌與夷操戈構同室遠略安所施書生鬱懷抱弔古臨邊陲渾忘出塞愁苦覓荒寒詩
置身入泱莽沙鏃欲刺衣礪樓據嶢削偏步窮攀躋日車墜懸巖低與天根齊君看積柳旁澹月如秦時

呈陳散原丈

恂恂元季盡儒脩與廣平生見太邱早羨拂衣除世網真成袖手看神州丈於戊戌政變後嘗自號神州袖手人甘陵鉤黨

餘殘籍寶祐登科屬俊流亂世重名誰得似直將詩筆作春秋用海藏詩序中語

呈陳石遺先生

皆山聽水兩嶙峋左海而還說二陳談藝茗溪風未遠避兵藉孔刼猶新官閑客載侯芭酒詩好奴安穎
士貧老去不煩祠祿乞洛中書局自隨身

壬戌十月之望東坡後遊赤壁時也寒月皎然信步野外有作

後公第十四壬戌十月之望涼蟾圓冷齋無客復無酒夢想赤壁江聲喧垞東聞畝足散策意行不借分
宵眠竿燈街樹入寒望人影在地月在天樓閣隱約峙斷岸屋山複疊橫巖巖微聞巷犬吠獰豹了無露
鶴翔飛仙維公畢世困遷謫欲家陽羨愁無田宦蹤遊跡略可攷居黃三載多名篇雪堂來去亦偶爾卻
成兩賦資流傳摹圖綴詠播異代文人好事誰能捐我生於坡百不似獨與磨蝸相爲緣歸山誓水負夙
諾晚營一壑聊可專百年今夕落吾手况有皓魄同清妍佳辰七月坐放失留待霜夜成追歡平生勝情
乏勝具幽憂簡出恆窮年尋常十事九敗興英遊矧復天所慳江山文藻後遜先但餘哀樂過前賢苦搜

陳迹供俯仰多情一笑看華顛

葛雲生師自丙申別後不相見者二十六年壬戌十一月遇于蔣蘇庵許追話前塵涕笑并集賦

此以呈

拊頭少日愧童烏逝影騰騰不可呼偶話舊朋同點鬼苦搜往事似追逋聲吞家國千憂積意盡江山一句無憶共橋燈淮浦夕碎冰流月過珠湖

偶成二絕呈蘇堪先生、

清談馬矜並風流三載籌邊始欲愁誰喚詩人作重九南疆早識鄭龍州先生詩筆至龍州而一變功業亦以邊陲爲盛時人但知鄭重

九而不云鄭龍州何也

射虎屠鯨願已乖一樓天與巧安排何緣占得南洋路千載爭墩到簡齋陳簡齋集奇父先至湘陰書來戒由祿唐路而僕以它故由南

洋路來夾道皆松如行青羅步障中今海藏樓亦在南洋路馳道交陸春夏之交亦如行步障中古今巧合如此

壑雷亭晚坐

老樹抽陰覆四圍虛亭倚眺豁煙霏巖泉嚙石聲原細林雨沾衣溼亦微面壁佛應經劫老刺天峯欲拔羣飛樓鐘打破塵勞夢未著袈裟已息機

辛酉元旦作

罩霧初陽薄爭林野雀喧微霜明瓦際瘦雪擁籬根道豈庚申守詩惟甲子存牆東在人境底用覓邱樊

海日蒸朝爽樓窗掩宿霏斗依新歷轉寒入早春微皺面愁觀水全天在息機未須諱言老種樹看成圍
正月二十九日雷雨繼以風雪呂塵過語因賦

風緊樓闌更一凭池波猶澀水生棧凍雷挾雨還成雪小閣凝寒漸上鐙堆案楞伽聊可讀多生福慧
難憑餘年已分閒中老漫羨南窗打睡僧

積雨初晴子實招同蕘農頤龍華園讌集賞桃紅芳已盡落矣根觸影事悵然賦此

春衫漫惜酒痕稠出郭顛風似冷秋一雨洗紅成黯澹千林罨碧儘芳柔竟隨流水匆匆去卻對吳天脈
脈愁多謝殷勤雙燕子銜泥還傍舊時樓

墨芬招同雨東鑄秋遊靈谷寺

連岡鬱周遭煙際辨叢樹黃茅深沒髀樵徑劣可步透迤四五里到寺日已暮堂虛僧語細龕壞佛胛露
客來忘世法茗坐卻供具林花疑遠近醜馥息微度意行撥蒙密藤蔓冒衣屨天光燭幽闇苔氣蒸砌戶
荒寒懷久淹閑寂適小住矧茲秋望美楓荻絢丹素殘陽分雁背魚貫趨歸路笳吹起清哀亂山莽迴顧
蘇堪先生饋武彝水仙小種茶賦詩誌謝

密雲團月出官焙古法已失誰可證爾來滇洱漸樵製揉碾塗膏飾肌瑩武彝所產獨殊絕露蘂雲芽天
所孕陸經裴述漏品第晚出還推建谿勝叢菱喬幹各異質八等強分論難定迴甘不畏寬饒猛消渴能
蘇茂陵病草茶亦自誇逸品顧渚雖佳難與競政如論書判雅俗婀娜終當輸瘦硬入春病膈苦中滿塞

具堆盤憎餽釘滌煩導爽待疏淪得此何殊甘露贈水仙小種發珍襲乍覩佳名訝幽靚開緘見面知磊
落和介猶存君子性故鄉野苾供久缺夢想松蘿滿山徑

吾邑產茶歲直鉅萬松蘿毛尖銀針皆佳品也

夷風別嗜酥酪點亦類

寶鹽味乖正老妻解事慎封裹佳客留煎佐清詠不須隨俗鬪旗槍

鼎爭看乳花迸
閩茶多細碎入湯不見旗槍

次韻奉和蘇堪先生見答謝饋武彝茶之作

宛陵論茶區七品詞豐趣博誰與京紛紛圖譜亂人意侈夸色味崇浮名豈知尤物不可議一握已敵千
瑰瓊從來真味出枯澹詎以魚炙輕太羹佳人佳茗喻奇確魏徵嫵媚吾能評便當攜銚入深竹斟酌盡
意搜詩情籠官陳乞笑癡絕相哀舉贈非要盟幽人耽吟已苦瘦無取久服求身輕聊將佐讀澆舌本夜
堂破睡書聲清

亂後重登江亭同鑄秋小坡作

劫後誰尋浩浩愁殘陽惜我不多留壞牆山湧滄溟色敗葦風掀麥浪秋寂寞一龕同茗話銷沈百輩閱
詞流人間回首成憂患翻羨枯僧早白頭

歲不盡二日過靜安寺酒肆有懷亡友貴念祖用東坡殘臘獨出韻

十年幾同遊愛此面野市黃墟卽桑海擎淚對蕭寺至人澈生死謂譬得美睡我老尙津梁未了一大事
來牛憐去馬辛苦方寸地萬感入孤顰驚鴉亂寒吹

共鑄秋夜話

驗候微聞雁北翔不關愁處也
佷偃夜澄草露能迴影月黑池波自受光
世味奚如茶味醞書燈更比佛
燈涼春寒縮手吟邊好祇惜宵譚與睡妨

移拆日本茶屋以贈海藏樓詩以紀之

遮頭一把茅竹窗冒以紙客來脫屣登敷座各憑几自我此屋成漸喜識茶理
夜燈耿相依聽雨若篷底
今年花竹長蒙密上階祀南巖塞戶牖屏蔽失其美豈謂山可移將毋室可徙
久奧忽得曠引目一失喜
稍稍平瓦礫續續引清泚雨足鼃魚生樂此水中止華嚴無實相起滅現彈指
妄念雜愛憎幻覺吾亦恥
空桑豈無情緣盡去便休楚弓泯得失但願佳處留浮生孰根蒂住屋如牽舟
云何負而趨夜半驚力逾
藏壑慮不固藏海計或周階前託盈尺豈曰徇道謀落落數株松鬱鬱百尺樓
茲屋蝨其間蟻垤儕山邱
使君昔有居門對江漢流舊燕移巢痕楚尾今吳頭蘧廬雖云隘萬象資冥搜
還君浩蕩心來此盟輕鷗

海藏榜此屋曰盟鷗
樹用漢上舊居名也

曉雨初霽偕葉德之桂鑄秋家息庵循丁家山西壩入法相寺憩樟亭欲登南高峯不果

晴湖明豔雨湖奇我意尤覺輕陰宜涼雲漠漠覆春曉兼塘行盡逢花溪綠疇無水麥自潤微惜草徑滲
新泥笠屨耕野已叱犢人家隔庵猶聞雞南山路入漸窈曲連林墮翠寒生衣笥輿軋若鳴鶻巢禽隔
樹時驚颺濃青堆面徑疑絕斗轉石級開嶽崎樟亭更立修竹杪俯瞰殿脊如承欵神物千歲猶日暮我
來讚歎真蠶窺靈山標幟賴有汝元氣不死凝霜皮斧斤所赦豈無意留與造物稱支離同遊但愛枝葉

好煮茗坐對忘朝餓我生樗散定何用材不材際奚從違經聲未得淨世慮翻從寂寞生清悲頗聞佳處
在絕頂中峯峻極懸天梯衰慵初地亦自足崇高仰矚愁顛危

月下自西園泛舟越裏湖穿西泠橋歸新新旅館有作

林樹樓臺淡無縫霧月溶溶壓波重空明一舸泝流光我與湖山都入夢平生不識月湖奇直疑世界成
玻璃水禽驚起誤天曉衝煙飛上蘇公堤穿堤波冷浸山足山民愛結水邊屋疏燈零落挂魚罾知有湖
莊人未宿二更涼蛤鳴菰叢露脚吹散因微風舟行不繫若有繫恰與流月同西東三更欲盡四更轉登
岸打門村吠犬幽人但解水明樓忘卻水輪銜缺巘

奚侗

侗字无識號度青安徽當塗人官江蘇江浦縣知事

石遺室文集奚无識詩序无識所爲詩面目頗近散原蓋宦學建業有年與散原較稔也然作
宰江浦有民社之責關心民瘼時時無意流露非能稱其境地以發揮其性情歟

五鳳磚硯歌爲丹徒葉中冷作

葉子得硯五鳳磚摹圖要我歌長篇夸言硯膩且發墨寶之不啻千瑚璉心范外物異觀感君方狂喜吾

哀憐此磚託始一土田素質胎孕鴻濛先人窮智力奪天巧烏曹匠作模型全當時尙質尠華飾容易舛
斷銷雲煙澆淳散樸暴秦後搏埴陶旗工彫鑄販賣名聲紀姓氏貪饕世壽書歲年道在瓦甃無一有謬
欲不朽齊坤乾日以心鬪迺造化山木自寇膏自煎君看殘磚五鳳二考古不遠才漢宣林表觀鐙靈光
石二千年後同流傳規度材用製作硯百鍊千鍛供磨研山邱華屋屢遷變古物甯少義皇前渾淪樸素
世莫識一錢不值空棄捐不材幸免役於物多文曷足全其天硯得知己宜快意與君文字長周旋憂時
微嘆鳳兮鳳守黑更造玄之玄筆耕墨耨隨所便子孫千億傳茲田

題柳亞子分湖舊隱圖

圓澈心精裏十方空塵隨處足迴翔抽刀不斷滔滔水誰解松陵與魏唐
湖面數十里南屬魏唐北屬
松陵中分兩界故名分湖
名字非真象亦假隨緣停憩攝心塵畫身書業畫煩惱爲欠分湖管領人

九日登北極閣

叢林翳翳掩城阿延賞寒空又一過野氣蒼涼秋日瘦山靈顛頓劫灰多五年抗跡欺雲壑何處高翔避
厨羅照景分明後湖水心池猶恐有風波

鷄鳴寺

宿昔好遊覽丘壑結神契茲山極幽勝廿載繫夢寐峯衣凌高梯側足軫一蹶履險心能夷追奇意轉銳
絕頂招提境布席許流憩朔風寒瀟瀟白日變昏曠陰雲翳遠岑若挾飛雨勢天意戚無悰不許展遙睇

峨樓壓城闌湖水照清麗長懷南皮公坐此豁蒙蔽
寺後有樓張文襄題曰豁蒙取杜詩憂來豁蒙蔽句意時會有述邇俄頃見興
替誌公昔來此說法舌欲敝癡哉凡夫心學佛昧真諦所以六道中乃有餓死帝空林流梵潮澹靜得禪
慧望古審物情何用惜淫滯

高淞荃先生爲余叙莊子補注賦呈一首

尋常愛讀蒙莊論鍵戶人叢理放紛世且囂然疑此意誰相知者定吾文最殘緒說寧充食溝斷餘生更
念羣展卷低徊矜片語微才真愧負山蚊

雪浪石詩用東坡韻

石白脈黑質約三尺上刻東坡詩字並有吳榮光郭尙先胡承珙題跋舊存直隸定州蘇公祠
嘉慶中流轉入閩光緒末季閩人某觀察由閩攜至金陵將以餽端忠愍適忠愍去任此石乃
棄擲荒園中亂時爲劉姓所有而劉旋逝丹徒于君遂以二百金購得之

萬物原始皆阿屯初無巧拙卑與尊和合蛻嬗異形色一一分別心眼昏咄此三尺雪浪石歷劫流轉蠻
方村貧夫裹致意有待千搖萬兀歸海門愛力相續壽乃久中有百代詩人魂諦視文理極奇詭如瞿唐
峽灩澦根天吳飛鶴出復沒雷電擺蕩波濤痕不事彫畫蘊光采真賞寥絕將誰論物聚所好有天幸明
年定見芙蓉盆窮通離合信時變凝然真性存吾存

審言臥病滬上有書來賦寄一首

李先發藻儒林者分手遲迴七歲年不信箸書天雨粟長愁窺戶海成田故人消息能窮餓絕學商量見
愛憐累讀一緘忘不得白頭病肺滬江邊

師山春望

此日良堪惜吾生信有涯重煩春媚我失喜杏交花風物新題詠園池起歎嗟閒閒專一壑未覺鬢能華
春郊卽事

岸草叢青接亂蛙吟鞦無恙趁溪斜春風滿地難收束一尺天桃已着花

再詠西園海棠

金屋莊嚴願未捐羣芳妖豔汝神仙簿書叢裏回鄉夢貪看春姿又一年
江孝留出素篋索書近作因賦二絕歸之

二年重見海東陲捉臂長談念所悲蚤蝨蝸蟲天不管爲誰槁項鬢如絲
九州新語漸紛綸嗜好酸鹹子最親祇恐陸沈到文字高歌寫與過江人

蛇陀寄示西園散步詩賦答二首錄一

隱几微吟鬧亂蛙一時肝肺鬱槎牙西園作意妨歸計餉我雙塘白藕花

閨中元夕作中秋于西園賦進同席諸君

中秋借向閨中元布席西園與避喧今夕何年天不語故人無恙酒初溫壯懷漸惜叢殘歲情話能娛竊

窈魂哀樂乘除頭易白貪留明月淨塵根

趙繪沈繡之樓觀所藏觀音像

樓在南通狼山

阿耶婆婁吉低輸梵文聲誼中土無菩薩名號不可說以意翻譯言其粗云何偈彼觀自在智慧徧照窮
空虛云何偈彼觀世音度脫苦厄超三塗應身寂滅幾何歲誰其知者能規摹宋元明清迄近代繪者繡
者繁有徒一人一心一相心生差別相亦殊或則靜如閨房姝或則怪如山澤耀威容或若師子王枯
槁或若窮乞奴八十種好無是處三十二相亦齷齪譬生盲人說象體杵臼箕帚相獻歛焉知菩薩方便
力隨緣顯見黃金軀名字假有况形色根塵執著寧非恐正象法盡末法初天魔夜叉面模糊金鐔刮我
雙眼膜不如乞取牟尼珠

上巳雨

簿書局促客愁新凍雨連空負令辰觴詠難忘修禊事江湖何限不祥人勾當春色憐遲莫徙倚花枝換
笑顰衆綠迷茫客閉戶莫驚絃管鬧比隣

響鈴寺

入山不見寺入寺不見僧寺僻人所奇僧懶佛亦憎江國多淨域茲以幽奧稱選勝及政暇讚歎得未曾
林木信地力繇密連岡陵樵采足酒肉醉飽衰氣乘苔覽久狼籍龕室疑寒冰心知住持人經律無一能
暫假如來衣安問雲與仍獨有慈悲泉出山潤田塍涓涓日不息永使年穀登濟生乃佛理此義誰參承

長歌雜譏評吾亦愧斗升

辛酉守歲作

酸風飄雨漏聲殘宿雪連階燭影寒尙覺啼呼滿郊野寧容歡喜對杯盤壯懷漸惡仍今夕淺醉初消又萬端占歲明朝要晴旭東窗揩眼幾回看

芳久寄示種茂園詩草並贈所書屏障以洋河酒酬之

作吏厭塵濁見翁鍼引芥款語平生事積悶得一快翁學萬人敵橫劍九州隘宦久貧愈奇所至病孤介

江南災患餘民生正凋瘵煩翁嚴隄防搜粟剔秕稗

翁方任米禁事

寄我種茂草元氣走沆瀣爲我書屏障伸紙

發光怪此邦富山水尙負新詩債莫詠思歸引健筆起頽憊世事如博奕眨眼數成敗各持金剛杵坐見

國土壞信去寄一額翁且破酒戒

翁來書有惡溼貶酒語

竹峯寺

竹峯繫夢寐經歲到眼初游心不可羈快若清宿逋仲秋氣猶暄萬綠明襟裾細路石犖确夾植槐柏榆

緣陂入幽邃步步天然圖盡處稍開展廢寺劫火餘法像四五尊瓔珞垂網蛛自逢種樹人堂空香火無

寺改公有林辦事處無僧住持

誰云佛力強不能庇浮屠巖根一團桂蔭可半畝蘿含芳若有待對撫空踟躕山人敬遠

客頗能具盤孟烹雞飯脫粟一飽賓從俱窮高逞腰脚下瞰村落疏池塘小杯杓不雨禾自枯減賦能幾

何所念倉廩虛滿聽四山風若雜飢人呼物理無貴賤微命寄耨鋤爽然雲壑心掉頭成歎吁

十二月初七日見雪

久晴冬向盡一雪四郊驚共說麥根長
諺云臘雪長麥根春雪爛麥根初教詩思清深杯閒自媚虛室黯能明米賤來年
事飢烏常滿城

程 康

康字穆菴湖南寧鄉人

近於津門刻成塞向翁詩題四韻以貽知翁者

平生師友死難忘俛仰津門去日長
斷手南豐詩一卷傷心東野淚千行
夢中相見寧能語醉裏言歸未
是鄉題寄杜陵諸故舊浮雲江海日淒涼

沈君硯農爲余作嶽雲間笛詩卷序甫脫稿遽歸道山邕威何君爲補書上并許助勘印師遺稿
長句志感

經年積慘應銷骨師友倉皇賦大招漫約精魂訪圓澤還將生死問參寥
山陽聞笛人何往蜀道啼鶻恨未消
獨有王雲知魏衍后山詩許助編雕

謝無量

無量字無量四川樂至人

宿玉皇頂

盡日攜筇入亂松，獨尋幽徑到層峯。
流泉直度峻嶒石，虛閣頻交遠近風。
夢繞諸天千佛上，手探明月衆星中。
上方一夜耽禪悅，已覺塵勞轉眼空。

山寺夜坐命酌示祥上人

禪關縱酒尋常事，大道無名不肯成。
醉眼直疑天動轉，病容扶起夜游行。
徑風窺竹流螢散，嶺月穿松宿鳥驚。
坐久上方鐘磬響，可知無事媿平生。

碧雲寺塔

孤塔峻嶒俯萬松，諸天環抱擁千峯。
曼陀宮殿經時雨，薜荔垣牆盡日風。
短夢流年生死外，微塵國土有無中。
憑高騁望愁難斷，祇憶飛鴻在碧空。

寄一浮杭州

曙陰高柳綺樓直，遠道春天望日車。
久許下牀師季智，遙應載酒憶侯芭。
東峰夜夢吞丹篆，北海窮歸隔

絳紗湖上漫傳長笛賦江南空發小園花
龍漢新披薜荔裳休過路室感柔桑小山春盡誰招隱西狩書成自閉房竹箭玄猿啼大越叢蘭白驥弔
三湘年年江海相思意併入東風長綠芳

馬 浮

浮字一浮浙江會稽縣人

多士

蒲車束帛數經過滄海明珠費網羅陶市金夫追范蠡漢廷法吏擅蕭何鸚鵡夜掠青燐道駿馬春嘶白
玉珂見說蛾眉工自媚承恩近御六宮多

程炎震

炎震字篤原號頓遲安徽歙縣人

題向仲堅柳溪詞稿

嗚咽雙江變徵聲少年氣象自崢嶸酒邊贏得家風在枯木葩華識此情胡致堂序向籍林酒邊詞曰以枯木之心幻出葩華

病篤二字人多謂不祥改署頓遲繫之以詩索諸公和冀祓除焉

病篤從今號頓遲馬行尙爾況於詩何來大樂起廢疾安得快車乘小兒沙礫欲甘洮汰後松筠須看雪
霜時宋庠劉向皆先例社錄他年莫漫疑

說文篤馬行頓遲

答退舟再徵諸公和

拙速何能勝巧遲知公妙語爲催詩雲山韶濩思贅叟初日芙蓉羨客兒古錦嘔心徒自苦金丹換骨料無時病翁從此長稱病木癭犀通更不疑

題簣公千巖萬壑圖

山人本自不厭山誰令塵土凋朱顏先生胸中幾雲夢怪底腕下皆荆關孰知此境絕非幻有不得去當忘還題名片石許分我共汝長留天地間

我家只在浙江上茅屋秋風問無恙雲閒便作九疑青雪吼渾如三峽浪一重一掩忽當眼某丘某水坐惆悵安得黃山音樂鳥喚起歸人著青嶂

題郎世寧聚瑞圖

清宮寶宋匄赫如六尊彝古物知在亡圖畫猶見之長頸瞞其腹抱珥如重規九秋風露好雨過天青時夫渠旣豔發嘉穀亦離披駢華復同穎蓮葯珠纍纍問誰能爲此海西老畫師奪胎疑柴哥沒骨非徐熙

今此挂屋壁昔亦參書帷孰者爲得所詠歌重嗟咨庭前五石甕晶瑩去聲黃琉璃魚游便千里渺有江湖
思相映足佳趣佛日生涼颺半居園壽成寺且啜蒙頂茶何必定武夷

周貞亮

貞亮字子幹號退舟湖北漢陽人

題賀簣公千巖萬壑長卷

世外桃源別有天人間何處此林泉乞湖若準君家例來覓溪邊二頃田

一棹涪陵紀壯游飽看山色聽猿愁披圖恍入當年夢三峽江聲萬里舟僕早歲曾爲蜀游

仙山濯髮圖爲路金坡題

西臺慟哭謝臯羽南渡淒涼汪水雲一曲滄桑人已換湖山晞髮又逢君

病篤改號頓遲有詩索和戲爲俳體

走筆由來最忌遲病翁此號未宜詩果然李嶠真才子何必楊脩不小兒大藥間逢醫國手朽株亦有困
人時請君細究乘除理意外災祥漫自疑

前和頓遲改號詩頓遲復次前韻索諸公和再依韻奉答一首

頓合超騰漸乃非，幾曾佛諦異于詩。卻題醉墨楊風子，又試新歌李雪兒。易號已過更代日，乞名剛值早春時。白詩新年逢吉日，月滿乞名時。星雲咳唾尋常事，莫更金門賦抵疑。

賀良樸

良樸字履之，號簣公，湖北蒲圻人。

嶽蒼湘碧圖爲陳翼牟題

東南天柱崇宛委，七十二峯排雲起。九向九背勢廻環，影落湘江一帶水。湘水澄澄涵遠天，望衡九面愁風烟。猿啼鳳去竹迸淚，水妃淒怨鳴商絃。昔年我走長沙道，芷葉蘭花入懷抱。嶽雲湘雨爭逢迎，如此江山行處好。而今景物知何如，原野川澤看模糊。豺虎揚塵爪牙利，蛟鯨跋浪鱗甲麤。十年湧洞天胡醉霧，鎖南荒日陰翳。武陵無復問津人，洞庭不是張樂地。我呼元夷叩九閭，一洗氛瘴淨乾坤。嶽自蒼蒼湘自碧，樵歌漁唱天爲春。知君此圖寄遐想，故鄉巖壑供俛仰。何時把臂共君遊，一棹扁舟恣來往。

向廸琮

迪琮字仲堅四川雙流人

題箕公千巖萬壑圖

苦向溪山認故吾，壑幽巖曲望中殊。
何當更乞雲林筆，爲寫聽猿泝峽圖。
故國尊鱸負舊盟，十年辛苦寄王城。
若爲乞得孤峯住，聽水聽風過一生。

張朝墉

朝墉字白翔號半園四川奉節人

壬戌人日集成君澹堪寓齋卽用其哈爾濱寄都門吟侶韻

燕郊車馬日西徂，塵滿征袍雪滿鬚。
蝴蝶南華漆園吏，胭脂北地酒家胡。
逢木葉思邊戍，人對梅花憶老逋。
我自飮牛君牧馬，天涯一樣客星孤。

青天蜀道杜鵑哀，老不還山燕雀猜。
蝸角功名成糞土，雞林名士幾詩才。
高齋讀畫鯨燈出，古寺敲棋鶴夢回。
垂老無聞甘速朽，休從爨下覓琴材。

成多祿

多祿號澹堪

題孫訥夫先生畫冊並佛雲石圖

個中三昧近迂癡，偶仿山樵或過之。自有元人衣鉢在，不須崇拜麓台師。
太守畫法逼近元四大家，或以爲師法麓臺誤矣。

投袂從戎筆已枯，窮邊土室困忠軀。猶留幾片青山影，傳自烽煙戰伐餘。

黃維翰

維翰字申甫，號稼溪，江西崇仁人。

題仙山濯髮圖爲路金坡

洗耳當枕流，礪齒當漱石。何處有仙山，濯此髮千尺。予髮亦種種，苦爲塵俗漬。愧彼衝冠雄，奈此飛蓬客。展卷心悠然，萬感忽冰釋。願從物外游，重尋夢中迹。

陳樵

樵字友漁號笑士福建莆田人官福州推事

桑溪紀游

未晴曾訪塔江寺將雨又尋桑溪水天公似有意弄人游興不酣必中止遷迴村路未見溪恍有溪聲隨杖履兩山屈曲夾溪流溪流如腸石如齒小石圓潤雜沙堆大石縱橫臥水淡茶甌酒榼任安排長者可席短可几剜苔剔蘚見題字文人好事石爲紙寒泉遙自鼓嶺來出山十里清如此止水照天明鏡開短瀑無風雪花起雲犁水碓本尋常點染溪山分外美吾鄉風景亦殊佳門前日對楓溪泚溪口有橋鎖名山九華紫霄相對峙祇爲兒時常釣游怪石深潭等閒視昨宵有夢見鄉關今日之游當歸里桑溪久作蘭亭看實自閩王觴詠始相約明年暮春來欲脩禊事先洗耳

小除夕石遺師招飲直園賦謝

梅花香入著書室松筠似灑如椽筆大河長江健游還舊學雄渾更邃密自編食譜授庖人間與後生講詩律客來一醉多嵇阮地拓三弓樂衡泌昔曾法源祭后山屈指今年又此日將春桃李滿門花淺白淡紅色非一階前尺地容山樗春風扇物毋意必

題濤園集後

同光閩才森詩豪公格如松韻如濤烏石山頭天風號左氏爲海蘇爲潮詞源浩浩流滔滔却塵起污穢
錦袍閩集義熙繼屈騷鳴其不平調乃高黔中佳什世外逃騷壇將略失豹韜西南流落不可說天公意
者爲澄淘公有名園集俊髦常假濤園爲社集公有良友教我曹常聽石遺師說詩問公集後學揮毫小舟滄海撐短篙

蘇南

南字幹寶號安民福建南安人官陸軍上校

石遺師招集匹園餞春賦呈

天地造萬物四序迭相從春氣始萌動百卉舒青紅繁華如轉燭二十四番風或愁春盡日今年春已終
不知造物意春固無終窮不使浮英落安得綠陰濃偉哉迦陵叟筆參造化工海嶠開沙社說詩屈羣雄
偶借餞春酒持示奧窈衷初學尙詞藻敢言風雅崇隨時悟運用詩教可貫通我作餞春詩悲感悉掃空
舉杯頌春德四時春長融衆芳各挺秀千叢復萬叢冉冉遍天涯疊疊結實豐採擷薦明神明神不言功

梅峯鐵庵招集龔氏環碧池館次梅峯韻

故家邸第多名園龔氏園林著城北梅峯鐵庵兩詩人雅集移樽借環碧凌雲松竹散青映水簪裾浮

大白含真早達擁旌旄仍向名山爭片席雙瞻園與芙蓉島文采嘯歌頗自適當時勝概擬平泉身後詩名傳烏石童年驚謂天上人此日始爲園中客嗟余薄宦任升沉萬事輸人合守黑南華一卷深掩門爲聽說詩深動色多生結習笑難除又逐羣賢弄翰墨佳晨勝地與招邀笠屐追隨不須逼酒酣莊諧雜次生笑樂陶陶期永夕尙期挈榼入雙瞻名山到處留吟迹

社人假于山城南塘祠爲石遺師補作生日

人間何者堪爲壽立功立言均不朽著述等身石遺叟江海歸來已白首隨身書局筆在手同佛生日與佛偶諸生趨祝何敢苟平遠臺高出林藪戚公祠宇隣其右同人借獻先生酒醉石留真復奉卣戚公當年殲倭醜功庇七閩民父母策勳飲至于山阜倚醉摩崖泐蚪蚪立言立功何分割正傳戚公以傳後先生戚公合爲友型範諸生得兼受他日各抒胸所有

仲純得教育建築彩獎讌客戲呈

詩人命窮困我初謂不然天地育萬類豈偏厄豪賢吳航董夫子斗酒詩百篇我才必有用不問囊無錢天公助豪興巧使多腰纏紫標與黃榜爭彩人駢填夫子歷萬衆獨握金兩千一笑招儔侶勝地設瓊筵烹羊何肥膾炙鯉何生鮮般勤數行酒不醉毋言還起爲夫子祝送窮開其先從此我輩人賦命咸變遷飲酒而食肉哦詩到華顛咄彼六一翁持論毋乃偏

社集沁園分韻得南字

尋幽攬勝意共舫一丘一壑窮躋探沁園僻在烏山麓古荔百樹籠湫潭我來八月十六日西風颯颯波
拍滄米倉粟廩對偏側琳宮紺宇旁錯參鳥峯倚空闕蒼翠奇并遠徑飄飄穉風流林李去未遠遺蹟猶
著城西南移尊近水日向夕舉觴待月瞻煙嵐須臾樹表條一白玉盤冉冉浮蔚藍寒光瀉天露欲墜明
河浸水星倒涵數聲嘹唳新雁過草際百蟄皆齧齧悵然停盃起長嘯此身久自逃狂慙伊呂管樂匹夫
耳學不濟世非奇男林李生逢盛平世觴詠山水留美談百年園林付榛莽至今鋤刈勞鐘鐔禪居官靡
互侵占幾無餘地存詩龕文章傳我有難恃武功輸人甯所甘狼煙滿地孰爲掃驚心華髮垂垂絃絃於戲
華髮垂絃絃如此歲月余何堪

讀友漁助夫來詩奉答并柬西園

莆陽林子風雅徒餉我荔子與荔奴介我友漁與助夫荔子荔奴天下無友漁助夫德不孤西風棘院桂
兩株繁花盈樹金屑敷飄香馥郁襲杯甌友漁對客燃吟鬚涼月皎皎墜西湖湖亭雅集簪履趨喻情扞
景各操觚助夫探驪得頷珠庾清鮑俊誠非諛荔子荔奴爭鮮腴使我一讀三嗟吁

桑溪

未知溪流處先聽溪流聲山迴忽見溪奔湍何澗澗溪石列嵯峨洶湧如吐瓊褰裳俯溪流眺詠適我情

林敏楨

敏楨字肖輪福建侯官人江蘇嘉定縣知事有北征感秋等集

石遺室詩話肖輪爲文忠公會孫少喜爲詩饒有才感秋一集皆悼亡之作尤見悽厲他如宿塚莊云嗟彼閨人鼻息喧生與驢馬爲朝昏車中云饑驅得饑饑復驅語特名雋

悼亡十首

託根等動閨結髮爲世親當年踵歐蘇海內名婚姻

余兩姑咸歸金匱鄒壯節公少子和之太守卽外舅也壯節與先文忠義兼師友道光二十九年兩家大

人於江右百花洲袖出聘柬

踵歐蘇故事約卅爲婚媾吁嗟兩孤雛接翼良苦辛平生高司徒絕代溫太真功名旣已隘佳俠何能

貧昔爲窮林鳥今逝活水鱗憶語不可述遺挂胡爲繫餘年縱荒佚未必傷吾神

孤鴻聲徹天寒月浩烟水下有窮居人婦亡弟復死

婦亡匝月得五弟閩中噩耗

夫婦中表親兄弟各孤子譬彼同根

枝枝已如此世人作哀劇一慟行可已如何痛定時餘酸匝肌髓

閉房一念哀蓋棺百憂釋並無塊肉遺寬此馬牛役冥心事齋奠觸響疑魂魄衆僧蠅蚋聲居土龍象力行當掀却波通彼人天驛虛堂飯僧罷焚楮日將夕

薰鑪寒灰久琴筑承塵多依然此室中夜氣慘不和朝來自檢理盈箱分綺羅安得去年春典衣供瘦蛾

病中厭操作細事真煩苛艱難及身知影事隨人過寶此篋中香歲歲當摩挲

佳人或再得智婦不可求勝人常在深制外利用柔屢空能起予相對忘百憂遂令龍性馴未覺雞口羞

南中二三載轉徙無時休巧炊既不易困學何所謀燕生夙歲肆業務本女塾吁嗟盡瘁身一瞑當自由

忽忽一陽至悠悠秋士悲形形既不接物物咸可思當窗破脂盞壞榻舊履綦枕函斷釵在繡棚半線垂

開奩見枯管發篋如亂絲蚓畫不成字鵲啼微有詩婦初嫁已能小詩遺稿無多附刊先慈陳太淑人聞妙香室中百態皆天微千粧

無俗姿信如琉璃脆護持乃至茲曇花更何劫生世空相期

高明合沈潛剛健含婀娜信哉趙管言女中常有我見心豈無間曲意或相左從知怨卽恩未覺因成果

少年不更事天情猛於火中欲罷不能千絲自纏裹近來信斷緣慰藉無一可忡忡本善懷慊慊但深坐

枯蘭早凋謝死福而生禍哀茲趙州僧曳鼻復作麼

簌簌園中花未開已愁落悼彼如花人既哀還復樂貧家有豔妻信乃不祥物坐令百鍊腸宛轉爲渠屈

平生不自愛訣去棄余獨死者良不仁皇天爾何速

鳥孤思舊巢花落厭芳陌故鄉可哀地所念惟江宅船官昔借居魚鳥分一席雲鬢帶山春玉臂圍江色

長年粧鏡中萬事酒杯側竭來事升斗方寸日勞役迎門有歎聲四壁空交謫佳時與清景稍縱不可得

小山叢桂華孤影忍歸息

憶曾擁髻論生死纔共看花道盛衰惘惘但如秋燕去寥寥彌覺夜燈哀往如可諫吾何憾心不能傷祇自灰睡起嗒然成獨歎影堂斜日入幃來

虛室

虛室鳴鐘慰客孤將家爲旅夢纔蘇殘秋雨挾新寒至遙夜心如落葉枯魂魄不來應有怨鷗波已誤更何圖平生縱有山僧癖能聽哀蟬一曲無

市橋晚步

局門開鼓觸殘悲惻惻寒鴉欲暮時橋影淡隨雙槳去湖光閒與一人期霜前風貌丹楓老秋後情懷弱燕知便欲酒鑪埋骨去楊枝檀板更淒其

桐湖卽目

木落天低霜滿湖晚鴉商略掠平蕪行人踏槳歌雙板老子持竿領百鳧

虎邱晚眺

羣鴉穿塔戲斜陽列竹成陰界水光獨立荒臺人不識山花和雪作天香

戊申歲暮

分明臘鼓數聲哀惆悵江梅一夜開老女傷春偏自諱才人向佛總難灰人間萬里回風至門外當年好月來獨有蛛絲能作祟等閒塵網舊妝臺

雪中登羅星洲小樓

傍晚湖樓擁雪杯，寥天墨墨起爐灰。恨人到處常孤立，野鳥離羣獨自來。阡陌撒鹽分上下，帆檣飛絮共徘徊。眼中饒有高寒意，欲向橫波誦七哀。

十三夜月

荒村誰抱夜珠來，斷井頽垣照一堆。能入世間千種意，始知明月是天才。

道出桃源就拔可衙齋餞歲有懷吳中

家居卅五年，天涯一除夕。向來持客觀，所往卽安宅。桃源有故人，蹙蹙前驛幕。從風雪來，酒面洗寒色。居停信殷摯，倒屣出迎客。坐看縛於菟，談笑理繁劇。平生補天手，遲暮稍可惜。惟堪就君床，鼾臥定魂魄。堂椒發古香，庭爆起霹靂。歲華倏然落，百感祛一積。驅車望河嶽，萬象在咫尺。不歸對妻孥，夜夢尙交譎。五窮真吾師，如願會有擇。寄語南中人，春寒好將息。

雲谷泉

老龍抉石髓，破壁爲孤泉。持禪問初祖，意在明鏡前。胡爲守一壑，衆蘚猶相緣。淨綠豈不媚，人悅非天全。佳哉吾中冷，蛻去三千年。傷哉惠山子，湯火徒憂煎。願泉返虛寂，無留照嬋娟。誰能薦秋菊，爲爾彈水仙。

乙卯上巳十刹海修禊分韻得不字

昭明累人作寒乞，莽莽繁愁無可祓。高旻未厭過口才，杯酒青雲盛文物。當年抱冰愛國死，老柳彌天曾

鬱鬱只今涕淚向誰好馬耳春風自披拂樓臯酒罷看淨湖湖上朱門斜日曉何人送老解結茅惟見談空多學佛豎儒秀句久已無但到幽燕稍奇崛平生自有永和天隨例作詩吾欲不

章廷華

廷華字黻雲江蘇江陰人官南安縣知事

九溪雜詠

鳥道羊腸外天然水一方族居千百戶犄角十三鄉地比雄關險人依土著強詳稽開始者頽白亦迷茫
近感呈荔靈

花縣沈沈水不波簿書高共筆嗟峨民從寇退鳴官少邑爲兵驕設備多部勒虎胥難似將剔除苛政苦於魔從知瘴雨蠻煙地未合吾儕捧檄過

小園晚眺

小園春到否挈僕當呼朋試綆逢枯井栽花障薄冰寒生歸樹鳥雲護在山僧驀地鄉愁起詩來也有棧

謝鼎鎔

鼎鎔字冶齋江蘇江陰人

題匹園

開來亭館足秋聲聽雨看山句又成半畝小園工結構一春池水待量評移花已慰栽培意疊石應鶴弟
子名如此閒居良不惡匹夫端合傲公卿

自作園記有匹夫匹婦云云

黃履思

履思字曉浦江西南城人諸生官福建推事署平潭縣知事

月夜湖上雜吟

往來人趁月中行月向遊人稀處明白鷺一行依水宿有誰知爾此時情
水際歌聲分外嬌畫船爭上臥虹橋何人暗送殘鐘至驚破小紅月下簾

讀五代史

君臣一體許新磨國計何妨問八哥若論伶人供奉始不堪回首百年歌
內府空頡鬣羈卮是兒未易受虛糜登場自號李天下却在朱梁未滅時

秋眺遣懷

五載天涯困抱關秋來獨羨片雲閒生逢叔世才宜斂人到窮時語可刪
林木不嫌霜後色山光大似醉
中顏憑欄莫問東溪路烟水茫茫夕照殷

中秋湖上懷滄粟冶盦

雲山西望路迢遙雁影翻空淡欲銷湖上論詩曾幾日天涯踏月又今宵
似聞黃蝶愁無逸誰遣烏衣惱
孝標歷歷鄉風應未改可能輕舸傍高橋
南昌士女喜于今夕
撫高橋石柱爲戲

龔乾義

乾義字惕菴福建閩縣人

題石遺室小池

鳴禽習林樂遊憺愛水深宴坐觀化者眇眇洞此性方庭不可樹一勾聊寓興
欲從古井瀾視彼潛鱗定
春銛戒經營廉隅好端正卦數占縱橫
池縱橫八尺古度準分寸
尺準周度形取玉水方止兼仁山靜永謝跋鼈入

亮無青蛙聖見小論增減源長足溫潤一滴海可味尺渾德愈瑩是知物無小意得境斯勝主人障川手袖中藏溟滓如何老歸來坳堂理清漢出緒自作賦粲發交輝暎偉詞餘千言修綆貫九仞山桂緬劉安園菜吟庾信未讀先已快懸知走不脛先生賦小池餘千言要以詩成見示鄰魚何足求饋生聞尚斬有琴可無絃有臺何必鏡但得之濠上儘看星涵泳

悅明齋夜坐試宋樹茶

窗壁冷洽燈照暝飮我清言首屢肯更呼鑪火沸芳泉細淪甌盜試精茗入口初然似平淡竄趣疏香未教領元氣輪困徐有覺卽漸純深耐循省蠲煩達滯非峻利渴已甘回彌雋永籠加世上徒紛紛饒與斲材論躑猛傳云此樹火宋遺霧露封滋老巖頂山僧闕惜不輕出一片欲抵金一餅文雖無微理倘信尋常故乏此殊稟胸腸塵土久堆置湔祓致足愜幽屏年時漳海記行役載道秋陽渴生癭彎環數里見山家葦箔松棚輒造請鑪銚往往具精意斟酌區區限豪飲驥奔鯨吸未渠快却漫誇賞觀頻引此時靜坐得徐啜細論功夫儘題品桃笙葵扇貴所適卽事回思真一哂何夫子少日相於今老矣汲古閱世養虛盃著眼千秋辭愈美道腴韻勝味不盡比似茗柯有神理更點漸動微雨散久妨供課亟當起街泥濡滑步何輕餘爽開心導肢體

壬戌七月十六夕石遺三丈同梅生損過山齋遂至夜分奉呈二首

巖處百不適非詩自人窮唯日鑿山色復次月與風羌無俗士駕乃奉高賢踪七月夜既望亦有佳客從

江上不泛舟訪寂關蒿蓬媿乏斗酒儲倉卒無一供又不擻長笛吹徹雲重重雨聲遠疑潮隨颿度寥空
燭滅語方縱精理開凡蒙刺船渺烟海鑿幽壑芳藂十年味空馨道腴茲涵胸壬戌屈指幾勝遊追元豐
赤壁渾不似承天將毋同借非屏居賦此樂烏由逢

山館幾清秋人間乃今夕兩賢一不肖各有癖來迹松竹半枯瘵去日那容惜衰盛理固然但怪景特急
聽公溯家常昆友夜促膝抵掌上下古樂事嘆莫匹夢楹感哲人悔痛中心臆殺身不可從啣碑終罔極
石泉岩屏間石泉岩屏先師園居詩語也羹牆見一一瓜果會不嗣卅稔駒逝隙歲丙戌先師居雙驂園值七夕先師父就園爲瓜果會命子弟卽事
賦七言律一首而甲乙之爲首選時猶未及門也今三十六年矣天開伊川門夜雪幸與立晚學古有之志道倘終及雨餘山意
涼石磴苔髮溼歸篋度林樾燈影見虛碧闌檻四更初獨悵清輝溢

朱聯沅

聯沅字芷青浙江海鹽人官學部小京官早卒

花朝後一日石遺師招同鬯威仲毅次公秋岳集小秀野草堂限各賦五言律

樹閣花朝雨杯分秀野春詩圖翻主客茶夢破天人數子淇冥意高齋清淨因乾嘉舊風味一往動心塵

和石遺師韻

槐街一片月人海照清尊閱世東京錄排愁北夢言鬢絲憐杜牧斗酒狎齊髡夫子風光主郎潛漫共論
秋盡

人生隨分見滄桑萬態相驅入老蒼孤枕愁來天浩浩短筇秋遠日堂堂香殘撥鼎憐灰燼酒熱停杯惜
肺腸賸向春明題夢錄十年千劫百思量

園夜

剗地風埃夕夢沈彌天哀樂一鐙深華年已負峻嶒骨皓月微窺玉雪心了餘生拚幾屐茫茫塵劫纍
千尋元知憂國非吾事忍淚還搜漆室吟

春夜辛亥作

獨持一種蕭寥意強與人間旖旎春轉劫鶯花飛過眼環鐙啼笑總傷神鈞天夢裏匆匆醉石火光中事
事新可惜風流渾不似鬢絲愁對月如銀

臘月二十三日獨游斜街花市感賦

爲愛斜街特地來暫憑馨逸洗空埃殘年雪意連髡柳小市風光入綺梅劫後重游殊自憫花前萬念不
如灰草堂舊句吾能記夢裏春明總可哀

廣慧寺視亡女祥琳遺構感賦

而翁入世百不可宿業遷延到汝身汝死儻歸清淨土而翁猶是亂離人一棺觸我彌天恨萬事從渠過

眼塵廣慧寺前斜日裏惘然家國入孤嬰

病起示文農

病起真如隔世人
竭來重與世緣親
火風已歷三禪劫
露電仍留一粟身
瞎馬深池行更怯
浮雲蒼狗幻彌新
江湖煙水連宵夢
何日從君理釣綸

同宰平衆異游種植園次衆異韻

世事元非我輩勝
陳說俊游復此愧賢能
騰騰坐送千春盡
汎汎還同二客乘
流水棲鴉如夢寐
斜陽煙柳自衰興
桑麻把酒平生意
可奈谿山買未曾

一嘆

一歎推書重惘惘
牽腸哀樂兩難申
浮生頗惜須臾我
古意空憐絕代人
如此夜光花獨秀
未來春夢月同新
元知世法堪消遣
底奈觀心隔幾塵

夜遊公園凭闌得句寫質宰平衆異哲維諸君

風埜橫飛夜向沈
池臺孤賞意難任
華年已負峻嶒骨
皓月微闕玉雪心
了了餘生秋一舸
茫茫來日却千尋
元知憂國非吾事
却望中原忍淚吟

中秋和哲維均

心情零亂不成絲
勝絕風光爲解眉
閱世夢空難駐影
閉門秋好只吟詩
清尊兀兀成何事
大月茫茫接

所悲銷盡人間兒女意十年今夕負芳時

呻吟

呻吟求病獨何腸散髮孤行亦太狂世法祇宜同草草天心空欲向茫茫捐書自喜聰明減無夢粗憐體
氣強一室掃除無事了疎尊閒酌晚花黃

正陽門站候汽車不至默坐有作

風埃逐逐羌無故暫倚胡床數去程冥想遙隨車轂轉曉寒纔稱袷衣輕孤行却曲吾知過萬態低昂各
有情袖手微吟還根觸榴花時節負春明

游二閘

放棹行行雨乍殘臨流濯髮覺衣單少年裙屐成孤往斜日箏琶稱獨彈此意定隨秋水遠微塵併入暮
雲寒呼魚漫斬商杯酒物外偷歡最是難

睡起

稍從寂寞養天真睡起怡然一欠伸祕笈偶箋清異錄頭銜自署太平民微吟淺醉能中聖澹月疎筠最
可人照影池波索雙笑此懷惟有白鷗親

贈穆恣

述揚先德通家早流轉京塵識面遲執袂悵然千種意傾囊各誦十年詩風波入夢今何世冰雪論心得

所師生死天涯傷氣類爲君神王一軒眉

感舊

小謫華鬢幾折磨十年流恨滿吳波津橋又見青春柳風絮彌天奈汝何
鏡煊樓畔月如塵絮語滄桑各愴神莫唱念家山一曲尊前同是夢中人

端陽後一日小集法喜龕寫上韞芬

北秀南能證妙因棲禪法喜是天親一龕花雨光明地着我修羅歷劫人
捉鼻微吟意惘然紅樓燈燠晚涼天覆杯粗說揚州夢已換滄桑到酒邊

沈復

復字墨藻福建侯官人官揚州鹽大使有養碧齋詩

石遺室詩話墨藻詩久覓不得近忽得之句如山鐘流韻遙穿樹簷露吹香暗濕衣天好似催

燈上市人歡休更酒論錢

元日

政簡定饒官舍樂累深多恐俸錢虧

紀南二兄之官喜寄

名山有約知難踐

寒雨如潮尙恣傾四野峯尖雲漸縮千家屋頂氣如蒸佳禽籠濕思高矚健馬泥鬆好遠乘

曉晴衆妙天教幽者領一時情向箇中忘細看面瘦身仍健爲慰途遙意未慵常有景光憑意至

不妨世事與心乖皆有思致

宿橫濱六橋樓

一水潺潺旅館前水聲隔枕只驚眠
晴明門外聞行屐絕似家山夜雨天

望月有懷狷生因寄

太息槐黃信又更今年會合定無成
身非形影原多別交入肝腸自有情
愛我何妨書屢寄思君常覺夢相縈
小樓風月真堪賞不遣同牀坐到明

復生二十有五月先君見背音容莫憶矧在遺文稍長多方檢求終不可得歲辛丑七月石遺舅

氏避暑舊濤園復偶以先君軼事爲問舅舉先君病妻得林字絕句云一病纏綿直到今十年
琴瑟感知音憐他鶴子殷勤守悄對藥爐月在林傾聽之餘喜極轉悲灑涕依韻賦此誌哀

先集堙淪不自今外家猶繫廣陵音誰知一入孤兒耳只覺悲風夜滿林

自金陵歸揚州小江輪樓上坐月至曉

風帆擘潮流海夜晴亦雨平生狎駭聽微心終無取長江莽空闊勢亦無涯潏視海將毋同洄洑終媚嫵
天秋氣始高圓月復亭午我舟渺如葉飛檝快一鼓桅煙迸萬星散作龍蛇舞岸明樹更低江寬天欲俯
瞥然有所見浩波過迅羽可憐同舟人既多難爲伍獨月遠相隨孤客差少苦明日維揚城散愁酒須酤

三月十三夜望月感懷

營鼓催升白玉盤，愁人更在客中看。
松蘿舊夢辜猿鶴，星斗遙天映肺肝。
五處弟兄共吟望，卅年身世盡艱難。
誰知今夜揚州月，風露欄干耐細寒。

木庵舅氏以詩贈行賦此奉答

外家恩意餘，諸舅榆景偏。
憐失哺甥客，舶鳩茲談舊。
夢草堂灑水，老詩情飄髯。
霜雪看長健，過眼新陳聽。
屢更賸有海雲瞻，望意寒潮愁絕雨中聲。

揚州寓齋卽事

雨氣迷漫作夕涼，居然秋意滿書堂。
蟲聲勁甚窓難障，苔色肥多徑不荒。
紅蓼看人頻欲笑，白雲比我似還忙。
鑪香甌茗渾無語，細讀南華倚石牀。

漫成

一間草屋如斗大，中有卑卑傲骨官。
薄祿那干偏米貴，敝裘纔典又春寒。
劇憐癡子還尋樂，多感仁妻解自寬。
尙有花時樽酒在，管他世味甚辛酸。

園居

名山非復舊時清，賸繫吾園數畝情。
徑草靜能生野色，嶺松喧欲壓江聲。
樹昏深院鳥爭沸，風倦虛階花落輕。
良友二三時自至，相逢一笑過橋迎。

讀孟雅姊影前設奠春夜感懷諸詩題後

雁楚猿哀笳吹寒風淒雨苦燭燒殘無聲不淚聲吞絕有血皆詩血灑乾夜靜高歌魑魅泣情深卒讀肺腸酸隱憂已痛周髻語更與沈湘怨楚蘭

晨陰遂雨枯坐無聊登樓觀東南諸峯俱沒於白雲中吟此遣悶

晨陰如幕閣玻璃樓外驚看萬象迷遠樹界天判黑白羣山避面失東西悶懷方與雲俱積遊興還隨雨向低賸賦新詩聊自遣待晴尋取寺牆題

柬未僧

一兩山中花落多殘紅亦自助幽哦明朝獨立蒼茫裏賸與桓伊喚奈何

己酉閏花朝同人集舊濤園

隴頭白雪錦江霞併作山樓一榻花香裏聚吟消綺麗酒邊題字倚橫斜閒雲天際開旋闔好鳥枝頭靜復譁誰爲主人勤戀客五分春色在吾家

春日園居雜興

書窓生怕暑光烘移得南山拱把桐他日陰成相對坐多應省却碧簾櫳

復臺坐月

捲盡纖雲天更青高臺中夜思冥冥飄霜過葉明寒玉驚鳥排林落病翎孤坐偏憐山寂寞不風彌覺氣

清冷遠邨星火猶堪望欲下茅堂却少停

雨中登天光雲影亭

翠竹低垂煙更合，晚窗叵耐闌如蒙。因從巖石高邊坐，漸覺胸懷遠處空。壁雨烏明雙翅雪，剪江船負一帆風。奔泉不爲松根阻，時有寒光出樹中。

廣州舟中寄酬鄭天放璆

出門惘惘信何因，雲水蒼茫一粟身。猶是十年前去路，却成百折過來人。飛濤捲海明殘夜，惡侶喧舟倦客神。明日應逢陳仲子，惜君不共嶺梅春。

遊光孝寺

龍象荒涼異盛時，禪門興廢事難知。夕陽猶得如人意，爲送餘紅照薜碑。菩提一樹蠹天青，曾護高人此講經。落葉隨風猜梵唄，滿階寒吹索人聽。

寒夜坐月有懷心與却寄

寒風利刀劍，白月亦稜稜。閉窗了無礙，月透玻璃激。靜對恍有得，百足欠良朋。良朋在何許，海山阻層層。由來清景共孤賞，翻成憎問君。此遙夜亦念行子曾。

不問

不問謀生拙與工，如花開落任東風。熱人可近翻爲避，貧壁猶存用自雄。隔水頻呼春草綠，倚窗常送夕陽紅。有時野客來相訪，小酒還從話歲豐。

春陰

軒窗白日若爲遮，坐覺人間歲月賒。
書已頻拋猶想睡，事無一可賸與嗟。
鳥行苔徑生朝靜，風入松灣落暮譁。
不待綠章勞乞護，小園取次看繁花。

別梅

種到能花喜可知，這回當喜却翻悲。
能花得不容人折，識得折花人是誰。

九月初三夜和生舟中見月有懷先伯兄開學公

十六年前鶴首東，天風海色此時同。
倚舷吟誦成前事，悽絕初三月似弓。

光緒己亥與先伯兄同舟游東灘，兄每誦白詩可憐九月初三

夜之句

養碧齋落成詩以紀之並呈心與天放

先人有祠堂，突兀兀山之陽。豈但林壑美，樓榭中相望。
憶昔居東樓，登降日苦忙。僉曰：池南屋平曠，遷之良我意。
豈異人勞逸，曾較量。頻年走關塞，魂夢思故鄉。浩然賦歸來，手植欣未荒。
室邇人則遠，宿願頓一償。失喜謂匠氏，改絃須更張。爲室僅三楹，無乃狹迴翔。
西則居妻孥，東以置縹緗。中間規作堂，客至樂徜徉。庀材如所指，不日成短牆。
短牆不覺短，中外恃以障。壓簷森衆綠，千竿羅修篁。當炎不知暑，靡風亦生涼。
由是開軒窗，玻璃輝日光。草衣理巉地，藤幔緣修廊。夏晡山雨至，摘荔常盈筐。
檜楫健作對，中間栽垂楊。梅肥足勝雪，桂榮甯防霜。雜花不記名，駢羅爲芬芳。
花有未開時，萬葉相低昂。花開卽爛熳，葉蟠亦青蒼。

賞花之日暫看葉之日長平生喜田野彷彿園新秧觸目惟一碧上下逮四旁清陰引幽意且昔當書牀
名之曰養碧宜養母毀傷毋傷且滋養吾碧將愈昌浮光潤琴書鮮色殷衣裳不山如遵巖不水如循塘
幽禽但聞聲萬辨鷺與鷓春秋逢佳日一飲三百觴卽或風雨夕燈花光作芒談諸兼誦讀不礙聲琅琅
時卽戢干戈心初灰騰驥將此終吾生硯田容逢穰索居懈之胎涉思輒徬徨開徑望益友安得來求羊
作詩持示君君勿謬稱揚借肯從吾游浮念不煩攘

思母篇

季蘭三姊錄先繼妣遺詩十首詞二首復藏之二十餘年屢欲付梓輒以太少而輟茲於篋中
又檢得詩十六首詞一首文一首喜甚而悲敬系長句以誌哀思

嗟予何辜痛至此爲有父兒祇三載皇天降禍酷未休意若母存猶有恃七齡奪母何太急較奪父時差
強耳就中在襁亦父旁不知不識過童駭避兵窮谷更遠離馬江之役母寄復於儲媪大膝下時光纔有

幾悠悠母去卅三年母聲如聞猶在耳庭前花草常葳蕤案頭筆研惟精美入門人詫室無塵事事誰知

母躬理曉日芸窗傍淨几短榻橫鋪備困倚一日阿舅仲常二舅視母來母樂坐兒於懷裏謂兒近來學稍勤

毛詩能誦將仲子勝心受獎聲琅琅舅稱甥敏母色喜孩提至竟不自惜往往藉愛終慚始放頑逃學煩

母憂母顏雖怒無笞捶短髮如繩繫座旁笑防兒逸並去履元宵走馬赴外家燭火無情焚逼體余五歲時元夕

游外家外祖母繫走馬燈於余腰驚號湯地母急前一髮千鈞膚未毀歡和之日吁何短母病常與日俱
燭跋燈焚余兩手護面衣服俱燬

累阿兄憂母知禱神我愧盲從祇拜跪母病劇雁南三兄挈余禱於城隍神朝晡藥紙拾滿牀母病久裏藥紙逾尺酣嬉摺疊千羊豕

余皆拾之摺疊筐笥鳥豕諸物爲玩自憐髻稚那溫清時亦隱憂非有啓辨色登牀慰母呻抑搔無術心如燬痛絕申年臘

月底阿母彌留遂不起諸兄諸姊黑壓牀兒亦驚號繞牀趾衆中母忽目兒前反覆枕邊凝睇視愛兒欲言聲已瘖雙淚亦乾手頻指此時此景何可思當日身之替然爾卅年前後倘堪移兒心作痛應何似祇今求痛已不得此痛之痛胡窮止年來痛母益思母母有遺文何處是冥搜未已神若通夜夜篋中生光彩檢取焚香讀百回眼前恍惚母猶在諸兄零落或四方有仲在家商付梓梓詩亦復尋常事母意僅存母未死

黃濬

濬字哲維號秋岳福建侯官人官財政部參事

石遺室詩話秋岳年幼劬學爲駢體文出語驚其長老從余治說文時有心得世亂家貧舍去治官文書與同學梁衆異朱芷青最稱莫逆相率爲五七言詩徧與一時名下唱和惜久居都門不能多得江山助也

花朝後一日小秀野草堂雅集賦呈石遺夫子

羣植斂春陰，簷牙夜氣沈。花晨餘小雨，酒病雜疏吟。刻燭成何促，扶輪愧未任。詩盟甯敢後，雅意想遙岑。
六月八日游農事試驗場歸拈今韻十一陌總一百六十八字依次作詩以紀茲勝

羣居忽不樂，驅車適西陌。連闌蔽浮氛，戴轍礙亂石。園林赴望眼，重趼息遊客。雲樓生遙青，朝暉消野白。
坐令城市氣，恍惚變山澤。昔年帝子居，甲第逾侯伯。陵谷殊蕭森，慷慨追往迹。道旁田舍翁，折柳拄荒宅。
當壚犢鼻揮，甌盃羅几席。雙驂旣戾止，徒御舍鞭策。入門初縱眺，松枌浴新碧。廊腰抱複閣，疑探小西籍。
紆路漸左轉，鹿眼見籬格。芳草不礙人，修葺資園役。垣衣曳紺翠，爛縵若繡帛。斜趨幽塘路，恠石竦攢戟。
或蹲如怒猊，或拱如瑕璧。逶迤各殊狀，彷彿及水驛。隔塘多稻田，好風吹燕麥。林開露晴旭，樹盡出山額。
盪舟牽湖菱，解纜陟岸柏。叩舷問漁具，穿蓮覓詩魄。但知菡萏香，豈識菰蒲積。蜻蜓似解語，點點水故脉脉。
鬧紅此一舸，頓憶水國夕。鼓枻比滄浪，同舟疑太液。安得倪黃曹，渲染入圖冊。榜人發吳謳，刺篙深兩尺。
葦多港益狹，狹客舟纔一隙。微風動魚鱗，水勢每洄逆。回頭望荷塘，卽此成疆畫。小鱗如穿梭，戢戢倍數百。
卵育曾幾時，隨港爲開闢。浮萍無根株，掩映浪花赤。逐波便團聚，投槳暫辟易。魚鳥忘天機，曠觀怡骸革。
沿溪游旣倦，金碧見簷脊。維舟傍石磴，喜色動臧獲。譬如樊籠鳥，奮迅快梳翮。暢觀樓下路，草色恣游屐。
茶軒分細乳，樂事隨吾適。微吟或撫樹，狂歌徑脫幘。朱炎方張怒，亭午暑更劇。不辭王仲祖，七椀甘水厄。
臨牕矚飛棧，一水淨錦磧。水中竦銅鳧，項脊芰荷隔。茗薜已清冽，瓜果更請益。行經百步廊，環樓樹墜柵。
規模非不宏，所歎意境窄。賣籌以斂資，有吏司稽核。得金至非微，胡爲窮刻覈。致富豈無方，徵斂及遊鳥。

衙官小設施動以千金擲私橐日纍纍彈劾執尸責措施盡顛倒乾坤宜裂坼么醜奚足悲吾爲賢豪情
西邦有公園取法甯偏僻乃爲買櫝計而有嗜痂癖弛弦當更張黜陟自羣辟匪惟戒獨樂實用遠使辟
長歌遂登樓鉅麗擬鳳掖鏡檻承珊瑚光輝照肘腋器寶欽弗名梗概待申釋西琛貢新玉來自橫海舶
南內傳舊珍金管紅牙拍或繪耕織圖至理合探索或陳甄膏燈寶異難備擇或列宣德盜古澤生波磔
或屏觀稼畫牽牛服短輓電燈垂蓮房的似堪摘針神好身手仙子繡姑射天衣無微縫線絡那討釋
色相紛相乘心顏皆悅懌層層絢丹青森羅最廣斥其餘諸儲侍神采亦俊奕雕微異鬼工運思倖巧奔
昔年翠華床猶留五雲帟樓頭繪師子雪爪恍相迫綴鈴駭怒睛可以辟鬼疫國家全盛時此物貢殊譯
風雲忽慘淡欵歎話今昔追想頤和游阿監甚衰瘠流涕道當年威勢何赫赫垂簾女堯舜名聲足薰炙
別苑初興修直士遭譴謫纏頭三百萬不數朝天號昆明湖水深民力頗枯腊沈沈樂壽堂象棧及玉簪
幾餘聘游睇盛德日充碩大官營茲場布設窮輿賸六飛曾一臨慈顏渥且奩何期口腹累竟受疾疢螫
玉魚罷清涼金盃堆狼藉長陵追高皇嗚谷崩簡翟徒餘金棺存無復黃裳嬖青娥老阿房淚滿更號噓
一朝宣仁后寂寞安窰窰八表方曹騰電驅兼霆毒猶憑社稷靈賴以甯廟祔暢觀嗟峨樓千秋嗟只亦
逝宜隱魚鹽韜用學膠鬲下樓餘驚嗟捧心刺撫辮繞途觀獸苑進步頗踧躅攀援走狻猊檻真藏豺獍
鶴步嗤跚跚虎尾駭慙慙斑金麗豹皮扶籬奮兕觥翔雕失鵬程寶馬露龍幣函蛇頭兩昂墊驥足八隻
隴蜀進鸚鵡涓沱貢鱖鯽重局閉鶴鷺靈根涵虎魄時見羊寢訛亦看鹿吐齕物趣本天授生理豈外借

歸途經籬落爽氣豁肝膈疏花伴斜曛草際蟲唧嘖辛夷與葳蕤入手香滿搯屨聲驚蛙蟻趨起驟跳躑
綠枝望桃園紫蔓綠瓜場慎防蹈棘荆射影虞虺蜴衣香被華原笑聞巾幗花枝偏低亞壓鬻手屢搨
聲確路轉危微步恒踟躕翩影若游龍洛女賦媿孀行行入林薄好鳥聲嘯嘯山風吹我襟涼楸爲蕭撼
槐柳連栝榆翁鬱互屬嶧萬態斂郊垆靜觀知無戮炎蒸洗浩蕩風涼怯纖絺錦石暮蒼苔列坐等茵席
不圖越剡景一旦見北貊歸來爾風堂甘荔指自擘南邦輸佳果沁口騰冰蘖松邊聳石拳望裏肖仙蹊
殘宵儻迷離醉眼定鞭撻可憐松外樹髡枯類剪馘瑋琮墜飛泉噴薄石所阨引水溉池荷時亦有暮汐
茲場名農事首宜辨腴瘠其次飾池宇雕琢及礎礪經營需萬夫斤斧想割劃規渠決玉泉導流激瀾濤
游觀并園藝兩事勿相攖狂生初試眼仰天笑啞啞慚非班揚才援筆賦五柞序詞貴不紊徵實異摺摭
昔聞顏延之曲水流觴醴右軍宴蘭亭追舌徒啞啞欲憑山水氣塵垢謝露霽詩心味更長橄欖耐斷齧
興來聊暢欣興盡罷喧咋國事蝸觸爭生計鳴鳶嚇紫緋號五鹿旄車專八郤恒流半飛騰豪傑惜屈躄
陳詩宜小恙譜詞合促刺眇懷連篋志踊躍勵三百鴉首已賜秦民黎何能莫王畿古幽并厥土本鹹濕
培壅命遂人質味翼超蔦吾身羨老農把鋤着下袂補屋牽茅茨築垣假甌甌蠶蛸網虛戶安用糊赤欄
春夏勤省耕布種土宜覩機聲出低牖軋軋亂鳴蠟麥飯煮畦蔬大布作襦禪翻嗟市井夫馳逐如松鼯
寄言民生本所貴在耕藉詩成句苦澀險韻獨餘厝歸鞭指天際雲隙月生魄九衢燈正繁奔車驚迅露

默園姨丈索近作賦此奉呈用山谷新涼韻

蠟煙如麝幽窗碧秋光破碎燈無色新詩寫就呈高堂咀微含商勞爨織知君展卷定一咲笑我蛩螢亦
啾唧可憐澆盡春衫酒此意蒼騰誰共白神州日夕且顛坼孤注何堪容屢擲君今姓字滿京華幾見賈
生虛前席唯聞匡山好詩卷洗脫鉛華不能識風流壇坫恐消歇故與騷人生羽翼相逢握手重鄭重長
句槎枒茲請益癡頑賤子百不諳入抱詩篇如拱璧

柬芷青

小立能生憶思君鬢影孤霜鐘催葉瘦病骨入秋蘇身在心終熱時難學愈恐儒冠殊懵懂自喜尙姝姝
九日陪石遺先生天甯寺登高

秋士困俗暄佳節亦憂惱言尋招提境望遠散襟抱放車出煙郭塵堞沒馳道平林生高風墉陰日色縞
浮圖蟲雲外峭拔俯蘭橈寺僧衣破緘蕪碧勤芟掃紺屋雖彫殘猶獲駐麾葆是日有達官蒞寺荒臺匿樹罅乘

興恣探討連山豁西北瘦嶂天所造幽燕入搔首市聲來浩浩今年寒事晚衆綠尙娟好毋乃京雒春平
分及秋草嚴霜日夕隕一例就萎稿坐愁節序急朱顏苦難保蘭臺有詩人携酒登臨早趙堯生侍御適先至吾慚
秦少章竟伴後山老安得紅葉莢插頭向晴昊

元旦雪益大醉中作歌再倒疊滄趣樓韻

傾尊臘酒難爲甘振衣看雪南牕南空腸詩思欲透骨此味兀兀逾醇醪春光九十已去一鏡裏愁見鬢
毛毳都門除夕久無雪僕嫗僕指能備談長安今日忽三尺蕩去災沴天所戡頻年遼海恣鯨鯢邊戶流

徒窮披襤吾曹煖飽已倖得况有佳釀過斗擔茲辰不飲自決棄沈陸難待歲稔三獻春登盤富魚裁何以佐飲唯雉鷓酒酣肝肺芒角出箕踞抵几吟聲籟兒童拍手道我醉凍面仰作桃花醅歡場酒夢冽泡電倦眼真欲枯禪參舉頭西山沒天表但見馬耳沈千巖觚棱佳氣快一泄遂使青女來龍潭飛雲凍雨遠莫辨空際變幻同優曇堂堂春夢背人去此旨唯賸辨蘇語

晨過正陽門觀鷹隼翔於其顛意矯然也感占一絕

風急雲高鷲鳥翔可憐樓堞尙堂堂金臺不少呼鷹處却抱遺編賦辨亡

題東野集

石遺先生向我道學詩韓孟可深造海藏稱詩主清貧東野宛陵置懷抱吾聞歐九譽都官真味橄欖久逾好孟詩豈徒耐咀嚼精氣陸離射蒼昊貧孟非貧詩自傳新意默默來無邊世兒鹵莽誚寒瘦冷落仙機織鳳篇

春日雜詩

晨簷集鳴雀啁啾亦相親傷哉叔末夫友生同路人古人篤事賢攬結苦不周今人獨嫉媚相厄不相謀所以平生交但念馬少游

燕趙多豪士慷慨能悲歌氣質雖獷粗其心要無它南人號柔媚讒害伏姁姁噫蜀道艱何如江南路鄭公萬人傑微鬚目如電征袍挾遼雪襪襪踏京甸壯懷鬱不試春盡洛陽殿吾師昨邂逅鞭轡駐高宴

平生識荆意侍坐遂一見詩名特餘事健思金百鍊行書如臥虎跳盪老更擅

吾憐趙閱道犯顏勇批鱗朝彈兼圻吏莫劾椒房親不聞天聽迴長受黃門噴塵封蘭臺勅陳陳徒輪囷
春風翩然來的歷天桃紅斜街招飲啖花氣如煤烘坐中胡侍御磊落欽古風所見或固偏臣心實至忠
勇哉收身歸江水春濛濛

杯罍醉餘春郊原日漸赭艱難惜懽讌節序逐輪輟虛堂發深省毫禿燭復炷讀書本致用末學但擗墻
不如作小詩百髮賴寬假堂堂潮陽筆兀傲拜東野

四月八日與梁衆異陪石遺先生崇效寺看牡丹

庭除醉餘春郊原見初夏吾師湖海豪老意崛難下縱轡排風埃提携造蘭若繁花尙蓓蕾顏色閉嬌姸
唯欣雙虬臂蒼癭立楸檟摩三歎息貞心汝能寫迴車成小讌鬚髮照杯罍相從得伯鸞談吐故淡雅
京曹俗漸競此樂衆所舍且持一尊酒起祝長壽嘏

是日爲
師生日

古風二首上弢庵先生用山谷上子瞻韻

渥洼產神駒矯矯傳食場籟雲自西極追影生青光迴顧天閑侶芻秣皆清香金馬爾何如怒鬣躡巖廊
昂嘶向蒼昊何日充乘黃涼州供苜蓿千斛甯見嘗道逢九方歎騰躍東郊旁果能空翼羣鞭弭庸足傷
孤松當烈風萬壑含濤聲交柯蟠龍鳳盤根結茯苓千歲化江珠餌之能引齡金石乃烈藥燥發戕厥生
茯苓雖草實所貴在根蒂儒生重淵源豈爲標榜計東坡與山谷氣味自相似

暑雨初成蜀葵乍落循簷得句書寄芷青

焚香消受涼簷雨此夢深微汝儻同夢裏繁喧驚蟋蟀鏡中清影惜梧桐天心難待烏頭白世事都成馬耳風聞說維摩初示病應憐花雨映階紅

寄題江叔海觀察新建白亭

殘花何軒軒白亭開新落江侯吾鄉彥民氣愈瘵瘼盛傳惠聲洽隼旟蒞河洛出遊實行水勝事寄巖嶸截流見伊闕嵯嶮所鑿奔厓赴八灘灘聲尤巉惡石樓聳孤標羅壁買天笈昔年白居易生計此移託沈沈香山寺世網解纏縛因開一藏經香花秋漠漠千晨閒宿地遺響繫攢鐸咄彼朝士闕黨怨正互搏青山獨往心處世似孤鶴笠簑邀僧侶雪艇列杯勺灘聲併月色萬象納淡泊茲亭翼然起檐宇寺相還影堂邇尺只封埴雜松柞足知公英爽精稿百不鑠益思建亭人襟宇寥哉廓

送陳石遺先生歸里

驕兵墮名城衆志悉潰渙養癰累百載積毒快一旦哀時老詞客歸淚迸珠彈翩然別秀野秋卉若含惋神州果瓦碎淨土孰可道聊復臥故山陶江森以漫平生思鄉意不共征雁斷山來騷人厄八九丁離亂等身積詩卷千載足自捍徒令問字人跋踵俱嗟嘆

九日

九年京國作重九此度逢秋祇嗚悲戡亂頗聞黃素詔瀚冤先仆黨人碑帝言罪已寧非調民聽惟天敢

謂卑三戶亡秦殷鑒在羣公何以弼清時

九月十一日書事

江漢哀聲輦轂驚讒夫灌灌足傾城初聞鐵豹傳新檄又見盧龍勒變兵就邸倉皇憐濟北託孤涕淚特
東平老臣那有橋山痛緩急相須作阿衡

重過小秀野堂有感

悲烽一夕徧江關垂老詩人掉臂還客已憐江令宅壞垣能見翠微山懸知吠畝終吾事頗恐塵沙未放
閒南望戰雲初不極更移歸夢入刀環

感事一百十韻

天女威靈替黃神統緒彰過秦餘賈誼興漢待張良薄雪消寒會殘燈獨夜房孤吟勞躑躅長句著興亡
勢轉擒胡月歌成破虜章握乾臨夏宇出震溯東方女直山長白曼珠氣內黃申胥初拯楚回紇竟侵唐
讖應三宮柱城屠十日揚魯唐膏斧鑕闕獻笑蝸蟪編籍龍區種遷藩虎鬣偃雷霆嚴禁網雲日護靈囊
南關三苗地西降兩面羌但誇清海岱幾見棄河湟青海徠回部金川躡健牂耀功七德舞橫海十花檣
猛鷲威如鬢沈猜疾比狼崢嶸文字獄拖沓狒猩裝四庫盈細帙長渠浚竹塘羅名千叟宴鞠膾八旬觴
自信施長策常期永耿光積威弦上箭鉅痛檻中羊欹器盈斯溢淫刑法已涼撫衷矜帶礪迴念歛滄桑
妖孽延川陝潛兵犯殿牆曾無戡亂意能慰輟耕望粵海輸鷺菜舟山覆雀航逋臣增國恥幻夢侈天釀

兵燹圓明劫乘興避暑莊驟驚龍駕迴竟罹豹房殃五嶺烽煙急三江羽檄忙艱難憐左李慷慨歎洪楊
已見傾全局居然復舊疆神符猶在握天弩自收芒元結中興頌盧循續命湯梯航通遠譯風會貫重洋
臥榻容軒睡陰謀搯項吭一人忘顧禔羣辟任披猖宮掖成相厄巖廊乃不覆舳艫歸日本藩屬失狼隲
感悟迴明睿憂虞飭紀綱層陰方訛訛邗治遏泱泱變法爭譏鞅懷忠竟殺長賊疑藥瞑眩綿惛疾膏肓
滅膳堯衰顛垂簾嬖假裳斂財侷地媼事鬼惑天潢槐簡巫徊儻紅燈呪渺茫戈船橫渤海車駕蒞咸陽
和局元臣殉軍需歲幣償肉縣人鼎俎魚累大池隍迴馭哀方切端居志已荒虎神千壘燼龍劫兩宮喪
太極臨軒穆東平攝政蒼小侯兼宿衛大吏炫賕賊集苑多烏烏踰垣比寇攘桐珪分管蔡貂珥列金張
京兆雙瓊博邯鄲大道倡上書刀斷指下詔肉醫瘡社鬼東鄰哭靈星北戶禳爾曹傾一旦先帝淚千行
敵俗銷清議名流溷濁漳休徵箕掃井躁擾蟹將糖新檄馳巴郡嚴兵墮武昌退朝憂咄吒毀室恨徬徨
傳箭初蒐乘投籤遽拊床貔貅臨漢口旗旆據秦倉破竹原無敵乘流固莫當揭竿咸禡纛裂土各珪璋
山左薨吳漢江州拒史祥張巡誠勇決高克任翺翔設險紅衣礮崩雷突火槍歆盟書相服失火棄餘皇
露布收安陸降旛出建康南封征鹵將北築翦吳堂霸楚推黃歇征川殺魏印車書新軌畫檠戟動參商
父老三章約風波一葦杭北軍除呂產季漢倚袁滂大寶知難秘同舟力共臥威弧張殺伐義旅迓壺漿
富弼專和議蕭何窘轉糧郡王愁北地帝子泣芒碭輓粟難爲繼團沙孰與量枉令懷蓋綬唯解鑄金箱
叔寶心肝盡淮南肺腑傷輸縉招卜式竊國議田常兵諫非云譎人謀惜不減豆其休暗泣斤斧鎮相戕

江轉新林浦雲屯石子岡弭兵辭向戌縱敵諫文鴛必死千夫指難迴百鍊剛楚弓同得失漢幟視飛颺
不逝烏騅馬還驚赤尾魴六師風振籜羣命草彫霜棋局知誰負干戈且未央羣龍無首吉鬪虎股創妨
跼躄憂天步嵯峨拜國殤詞華悲庚信身世感黃香顧惜三縑字蕭閒萬里駒玉壺澄素志畫省學潛郎
入抱蛟龍筆蟠胸鐵石腸棲遲青瑣闥惆悵綠榕坊舊友懷蕭艾深憂爲稻梁熒熒窺太白渺渺望沅湘
絲染知難免歧多涕正長貞元原剝復厄閭慎扶將霜露仍南國松楸想北邙擣菹劉毅癖麴蘖畢郎狂
愍切恒沙劫飯思廣利王笑人言寂寂投筆淚浪浪他日編唐歷誰當擬柳芳

寄石遺先生

先生安穩賦郊居種竹調琴興不虛北斗闌干南斗換新交寥落舊交疏酒腸別後都函淚詩病秋深稍
讀書安得移家就江水飽嘗朱橘降霜初

十二月二十五日作

熒惑入南斗天子下殿走古謠良不誣日午月建丑皇帝詔辭政宗廟獨奉守上言公天下民命恐踐蹂
下言制共和名襲周召後或悲九鼎遷或喜羣智牖或云操莽篡或頌舜禹受衆暄孰中肯公理試一剖
曼珠主華夏延祀二百久晚政尤恣睢孤寡落人手盛名託禪讓優禮亦渥厚豈伊一姓興萬系必不朽
假令南軍至虛位復安有風雲護籌策士卒供干楨桓桓邗鄉侯威績世少偶小儒議竊國斯論騰衆口
吾意時代殊舊說勿固狃民生貴羣治五族化畛畝萬幾責一肇艱鉅誰克負所期奠磐石何必戀冕黻

但當問措施，遑計心臧否。宗親自毀室，詎曰他人咎。當年追桂王，血濺蠻越數。今茲上尊稱，相較合忸怩。吾非戴九靈，亦匪陶五柳。編詩署徂年，以此答我后。

姚一鄂華屬題秋草圖

秦毒中蒼生，累世困桎梏。千鈞積弩勢，勝國適爲鵠。八月鸚鵡洲，衆目屬漢蘧。遂令健兒血，灑遍秋草綠。姚君恫輿廢，圖咏不遂遂。想當芳春繁，蕪碧粲以縟。旻秋忽代謝，千里淨品旭。悽愴望平楚，霸氣不忍觸。程生落拓人，圖爲康熙間程松門作作畫致脫俗。寧知二百年，桑海感相屬。芊芊傷春心，腸斷臺城曲。披圖來西風，怨鳥呼金粟。

夏夜述懷

經句不作詩，詩思頗苦澀。簾廡納暮雨，弱竹裊珠寔。微曦露雲背，霞氣散復戢。稍疑近漏天，修雷響雲鬢。皇穹愍憔悴，洊雷起羣熱。幽除夜一覩，叢篠螢熠熠。宵分風撼樹，灑沫累思溼。孤衾迴薄寒，墜夢去難挹。緬思遭合奇，因歎憂患急。何年日月昭，橫議尙滄溟。威嚴徒狐假，禮義見鼠立。南山有岡雨，霧氣歎且欲。摻袂執短鉞，騏驎受羈馭。誰能奮紀綱，夸毗已成習。明朝喻井渫，心惻念用汲。孰圖苞桑謀，而爲練絲泣。遙夜發永歎，沈吟意惜悒。寒帷風雨闌，冰簟轉潤浥。披襟書籐紙，晨色熹微入。

寄陳簡齋先生

涼雨空堂初病酒，到眼新書驚卻走。陳侯千里東廔庵，寫我畸名訊誰某。十年怙悵長安陌，短衣挾策何

人識忍淚訶時作罪言歸舟已負滄江白劫後河山百事哀漫勞邊帥念詩才龍川應有中興論莫遣憂時屬草萊

往東城視兩弟讀書塾中歸途憮然成詠

小車輾轉轉東阡斜巷寒檐地已偏有弟能爲同硯讀看雲猶喜對床眠背城草綠宜娛目近野風嚴重着棉衰世吾生艱一飽負薪何日共求田

寄呈任公先生

早憐盲俗須人紀手挽頽流作世師此意震奇天所忌江山搖落悵歸遲終身吾欲韓公望盛德深慚叔度知一歎推書重惘念斗杓默默夜何其

清明日與衆異芷青陪石遺先生登江亭話別

暫從檐柳認佳晨又共離人踢陌塵坐惜芳時春已爛近憐詩病意全貧逃虛合羨歸田樂閱世眞愁累卵身徙倚危闌任腸斷游心難忘是江春

時余思爲江南之遊

又占一絕

天桃奪眼難爲冶拱柳依煙未放晴天爲詩人生別恨斷雲薄暝釀清明

上巳修禊賦呈任公先生分韻得茂字

青春受謝誰能守花霧冥冥弄春晝梁侯失喜得芳辰便借流觴集佳構長安棋局今幾變水濱風物嗟

如舊臨流樓閣參差見，豁眼西山走蒼虬。列坐能追典午賢，銜栢欲盡東南秀。座中主人三嘆息，盛會良時故難俟。少年光陰憶蠶市，東京初政思元祐。豈無南湖共秉蘭，風埃侵髻唯荒囿。一從去國墮蠻荒，目斷江春令人瘦。歸來舊巷認烏衣，重向西臺感朱味。今年歲星又相屬，細柳新蒲禁煙後。開尊一洗滄桑恨，對山絃管殷勤侑。我時聞言但兀兀，屏脫千悲對清耐。先生奇才天所縱，世兒孟浪方騰話。有春不賞復待紛紛蟻穴從，牛門媿隅蠻語聊自娛。詩敵堂堂不余宥，推栢忽驚天地窄。撫時便覺幽憂遘，流風兩管渺不異。陸沈戮力猶當救，興亡俯仰賸人豪。黨鋼聲名王叔茂。

哭亡友朱芷青

入門失慟聲，先結此士影。殘忍問天隔，宿豈期成死。別歎書終以，天天世間緣。法君能了去，日朋尊倍可憐。一諾九原吾敢負，強揮哀淚校詩篇。

君小疾自夢不起遂作書訣親友以詩稿屬衆異及余保存

雨中視芷青殮歸復爲詩以哭之

餘春逗寒雨，苦潦恨礙轍。驅車展橫舍，入戶氣已噎。芷青竟長往，天道那可說。平生冰雪姿，萬彙供一挈。吾生嗟望塵，載肇幸相結。寧知牖下燈，盡汝升斗血。聰明復何補，干莫實自折。京塵十餘載，才命兩磨涅。年來託傳經，學子仰綿蕤。丹鉛詎停晷，甄錄署以警。

芷青所爲筆記恆署曰警錄

浮生本電謝，讖語歎隱切。今春盛招邀，筵餞故屢設。名園共修禊，江亭憶話別。傷哉兩短詩，生死筆永絕。相看青鬢盈，疾痛固所蔑。匡床小握

手，何意及危懼。早知會面難，悔不罄唇舌。翻疑身在夢，褰幌日未昃。造物汝何仇，奄忽萎此哲。頗聞夢瓊

瑰毅豹理洞澈心光長爛爛浩氣百不滅所悲高堂親老淚濺清醲星奔有孤嫠馮棺缺一訣爲君勃餘
哀梁月照嗚咽

疊前韻寄抱存

漠漠丁香春嚮闌推尊世念覺全寒酸辛文字中宵迸生死親朋入夢殘不信讀書能損福偶因行腳問
加餐江湖知有歸來集畫燭紗幮取次看

海上晤太夷先生賦贈

斯人一別淪江海猿臂真成歎數奇猶有光芒天所妬固應肝膽世難窺淋漓元氣供神筆檢點年華送
短詩我道先生須憫世危樓摩眼夕陽時

東夏映菴

連春無好懷風靈鬱餘橫閉門數瘦竹愁對妻子病寸心復何期詩詣謂可聖官纊才亦退內餒卒難競
平生夏映厂四海熟名姓神親交甚淡論簡味殊正於詩拓大國出語極雋竇西江有真源佳處豈獷硬
君獨曠其裁掃滌天宇淨過存贈詞卷珂雪瑩相映騰騰塵土中藤崖此高詠微花耿清明街柳綠初盛
聯游幸未晚世事付青鏡投篇貢所疾引領待良諍終恐摩堅城曳兵喪權勁

癭公若海約遊西山期而未往癭有詩見及賦此謝之并書所聞

日趨官府避青山漸負招邀百態頑翻被高人嘲偃蹇蒼厓惆悵寫詩還
癭詩云最憐蹇步黃夫子恨望蒼厓失此行

上巳清明揆東勇齋衆異招同壩河禊集賦呈叟老並示同游諸子

歲歲長安覓水濱今年禊日最愁人狎鼻輕舸波仍淺駐馬荒墳迹已陳名德獨存同此集

謂叟詩翁歸

去及殘春

陳石遺師以是日南行

如山憂患真當戒迴礙流觴恐未倫

春盡日寄映厂海上兼懷石遺師

長安黃塵漸汚人朝士爭爲斷轂走送君昨過未央街索火扣門來已後平生映厂真解事歸趁青青江南柳九衢日夕春亦盡鬱濯晴光定何有歸逢禊日一臨河上巳清明遇殊偶梁羅選勝能彊歡念子佳詩不容口頗聞聖湖見劫灰兵火歸裝石遺叟春申林際詩翁聚往復詩篇幾盈手陸沈甯卹儒冠俄日飲無何但濡首作詩相寄幸置旁他日終窮念君友

冬夜讀書

觀棋徹日意難平夜對陳編境始清藥几漸疎債病債茶筌解事學吟聲因知開卷常有益未悔作詩太瘦生此意時人疇省得蟹糖躁擾事功名

夜雪愈甚偶念晚華昨日新歸遂成小詩乞天琴老人填詞

梅花快雪恰相期綴玉俄看換萬枝明日鳳城同浩浩今宵鼙鼓最遲遲故應春腳回蘭袂似有雲鬢迸桂旗端是歸來主紅萼翠尊先爲乞新詞

丁巳感春用昌黎東都遇春韻

層城沸哀笳嚴鼓鬱難競絲楊挂兵氣積照廳相映殘花解人事晚服謝間靚惡風嘔春華八表遂同病
可憐傷春筆疲腕不能橫終晨厭家食緣恨畏明鏡已甘疎簡編豈曰敢譏評大闔循無窮焉究衰與盛
獨憂心聲變雉厲不可聽正宮既永絕明莖罷照暝脩途遂如漆孤嘯未遭省吾生勤俯仰斗室歎懸磬
籠虛那勞障席破不遑正愀然對哀匏矍爾避語寗延之昔好咏望古託龍性北朝信多亂此士蹙靡騁
未能遏橫流復用思潛泳濁漳亦可涉裳佩要鮮淨世間多織兒乘杼不布經機鉗始交觸毒矢積一逆
素鞵成前驅黨屬互吞併嗚呼士大夫貴賤係趙孟爾曹致足僂天王復明聖陸梁望淮蔡滄景亦剽勁
奈何相損之羣帥詎受令政當略煩苛先務百僚敬補苴定何謂刻意頌休慶明夷且未融瑣尾活餘命
春輪終奔催已矣無究竟

新秋雜詩

瓊華何意閱朝暉但見游兵枕殿扉輸我肯來携兩客漪瀾堂底看紅衣
樓公振飛同游北海
承光松栝鬱蒼蒼玉甕臨階佛負牆借與溫公呼獨樂可憐洛蜀費平章
圍城爲雙濤先生所居
何限微雲滓太清難爲九月獨長生玉繩轉盡流年換漫夜歌殘望啓明

雨夜再寄衆異

潑墨春陰勒峭寒傷高長是怯凭闌難逢尺札風前讀不奈珠燈雨裏看小別劇勝千日憶此游應抵十年
歡春江佳句勞頻拾乘醉吾思借羽翰

楊毓瓚

毓瓚字瑟君安徽州人譯學館生廷試舉人官淮北副運使

石遺室詩話瑟君年少美才詩學玉溪但不多見

和衆異三月二十七日作

已盡餘香待燕迴春愁曾未逐花開意消始作纏綿語病起逾妨漱灑杯堪歎元瑜成異物時劉蓮六更先生方逝
邀明遠賦寒灰夢邊吟外今何世不激清商一寫哀

和哲維丁香詩

重城鶯曉見啼妝萬雪誰教綠樹香簾外舊陰三月半鏡中新瘦一春強微溫甲煎同薰被始落辛夷獨
舉觴寶帳流蘇愁百結明星難替蝶顛狂

西湖卽事

吳綾半臂越羅裳萬頃湖光接曙光獨立不辭風露冷自疑身是水仙王

淮北官舍卽事

論筴持籌心事遠海濱遠處或忘機每愁向晚蚊雷起不道經秋雁信稀久雨愧無防水策乍涼難覓可

身衣位卑亦有妨賢感他日隋堤一棹歸

贈衆異

秋滿山川不暇悲憐君羅網翼差池一燈入夢重城隔萬淚當前細字知未必世人皆欲殺可能圓蓋便無私浮生亦說閒非易他日朱顏好護持

春日再贈

春訴雲天不自由殘魂無計遣離憂去年燈月傷花市昨夜星辰憶畫樓君寄新詩餘涕淚我尋歸夢在松楸遂初招隱成虛願與魅爭光尙未休

湖上

艇子搖雙槳中流四望時好春如欲語佳境轉無詩日暖安棋局風微理釣絲何當菡萏發後約共心期

李宣儔

宣儔字釋戡宗言子官陸軍中將

八月十四日南海舟中

禁樹煙籠殿閣重風微何處出疏鐘敗荷搖落空流水太息舟人說德宗

自題天女散花雜劇

偶譜新聲付教坊敢云一劇壓千場

羅纓公題詩云云

半生牢落成何事可是當年李八郎

輓張華飛

緩帶輕裘世所無難將文采庇頭顱十年同席悲吾黨萬里高堂泣此孤未及撫尸慙後死幸憑一瞑諷
全驅石家莊畔荒荒月忍淚招魂下夜烏

壬戌七月既望泛舟二閘同遊多有詩奉和

兩行垂柳漾明漪可似黃州萬頃陂幽事本難量近遠吾生也算舛時宜漸成夢憶搏沙聚多感朋儕束
筍詩聊擬梁公修禊事十年前值永和期

八月晦攜兩兒坐來今雨軒北窗下負暄淪茗意甚適也宗孟適至與縱談輒成一絕
絕愛松陰護碧紗宮鴉童語共啞啞人生難得秋陽曝企脚胡牀待煮茶

初三謠

此本事詩也白太傅云可憐九月初三夜露似真珠月似弓二語可爲斷章之取矣

九月初三夜可憐彎彎月子吐輕煙懷人憶事心頭熱躑躅虛廊不忍眠

九月二十四夜作有寄

日日思君十二時今宵酒熟倍相思書長那盡低回意夢遠難尋微妙姿一鳳已騰千仞翼百蠻解誦老

天詞歸舟秋晚波濤闊應有蛟龍與護持

王倬

倬字雲五江蘇武進人官交通部主事

送濤松南行並示指嚴

菱荷香裏我來時窗外寒梅又幾枝只合雲濤論身世相看不覺鬢成絲
霜天一影去征鴻嘹唳聲含塞上風揀盡寒枝棲未得搶榆猶羨羽毛豐
日下文章未易才將花與酒強安排閒情訴盡琵琶語淪落青衫溼幾回

張同書

同書字玉裁直隸雄縣人

晚眺

夕陽莫惜近黃昏一片孤城古薊門貪看秋光忘坐久殘紅莽蒼接中原

夜坐

荒亭一雨洗纖塵劫後看花涕淚新日暮更無修竹倚半鈞涼月上吟身
泣月寒蟄抱葉蟬秋來事事感華年小窗畏讀秋聲賦且檢南華秋水篇

上石遺師

不承警欬又經年每讀高文意爽然三載排除無事擾八閩山水以詩傳放翁索句衰遲健子美携家久
客便知有萬人聽說法一燈炯炯月孤懸

李景莖

景莖字次貢福建侯官人光緒□□副舉人官審計院僉事

辛酉春仲同門諸友公譙滄趣夫子於釣魚臺賦呈

洛陽變盛衰園囿倏興廢海淀幾第宅占據論權勢遺茲一邱壑彷彿鏡湖賜此園佳在水葦踞菱荷地
更滋百尺蔓添與松柏累蔓非不可圖葦詎免刪薙凡茲羣穢清益見佳木媚前遊猶去秋瞬又春和至
及門謀風詠濟濟百卅二鼇峯老諸生烏石舊氣類依依師弟情天涯同一醉一事獨慰懷從遊五兄弟
贈柯芷溍參軍之遼東

寧從搏擊鷹不作啄蟻鳥寧爲附驥蠅不作腐肉蛆儒生不合老牖下便當投筆從鞍馬我識吾子才我爲天下讀書哀我識吾子志要爲儒生一吐氣不然將軍幕下集千賓那有儒生立足地君圖得當報知己我於古人竊有比杜陵昔送高書記饑鷹未飽方側翅邊城餘力可休師請問焉用窮荒爲杜陵又送顧八分辛苦遠適洪吉州崩騰縱恣戎馬際請其勸勉東諸侯賦詩斷章有當不

卓定謀

定謀字君庸福建閩縣人官□□有自青社詩稿

石遺室詩話君庸有句云一鳥句殘誰敢補驚鸞鋒勁不教臨頗切蓋謂宰平贈詩口述於李資訓而不寫寄資訓忘其大半也

別李四資訓

西湖風景天下無洞庭湖大於西湖湖邊斑竹啼鷓鴣黃陵廟前雨模糊我泛西湖君常共我往洞庭君遠送他年扇舟倘就吾兩湖山色較何如

至岳陽後有懷宰平兼寄策六石芝

林子今世僞儻士氣節豪邁真吾師當年同學扶桑國寢食比屋日追隨款門更有方與李慷慨論古復

憂時會吾病歸別蹙蹙不見顏色攢雙眉吳頭越角更楚尾三千里外紛奔馳巴陵古之雲夢藪洞庭長江帶左右君山作屏天作邊岳陽樓峙大江口羣峯槎牙樹鬱森幽谷何從詠求友昔嗟歸南君留東今嗟西行望極北安得危坡矮屋中同賞富士山頭之雪色

宰平曾寓東京駿河臺旅館
臺臨坡上開門望見富士山

飛樓雪後得宰平詩卽次元韵

北書來時雪滿天高吟衝凍疑謫仙山林皓白渾不辨飛樓縹緲凌蒼烟洞庭西望江東去琉璃世界粧新年今宵無月好看雪長安故人眠未眠

梨花行

春風夜來人不識朝時梨花透消息月未溶溶雲冉冉滿院滿枝搖雪色昔年居京華劇愛丁香花南來那復得視此梨花瀟灑略相似西墻桃花紅欲然東園一樹白於雪紅白相間窺簾櫳花自爭春趁時節春光如此將奈何花下有酒不須多狂吟細酌無客過嬌兒聊亦傍我歌兒歌詎解花開好但祝桃梨結果早

朱 奇

奇字大可浙江嘉興人

上海藏先生

少聞海藏名輒疑古人是長讀海藏詩今人那有此我生雖云晚識公殊自喜公年六十餘裁如四十幾
腰脚尙未衰徒步堪百里於詩參造化並世知誰比江西陳伯嚴旗鼓差相抵公居海藏樓花木扶疏裏
春來櫻花盛秋日黃花美公座無雜賓周梅泉李拔之數子廬江陳子言間亦步玉趾公有平生歡顧侯子朋
長已矣賦詩每稱工作序良有以公有少壯遊垂老念未已濠堂與鷗榭合眼在尺咫公談尤豪健醞醞
經與史自言十二三背書瓶瀉水有時說兵間龍州守孤壘解甲賦歸來大亂迄不止我謀適不用食肉
真堪鄙餘事作詩人宮商黯變徵置之蘇黃間世論徒云爾賤子少不達竊附張籍與李翱作詩獻我公
粲然定啓齒吾黨有莊生呂塵濠上識微旨詩成姑寄與和予側理紙

沈寐叟太世丈輓詞

樵李三百年文藻何紛披竹垞獨先登礫石復繼之公出雖稍晚絕學誰能窺吾宗老侍郎古微姻丈謁公每
我攜茶釀花事繁醞醞聽說詩顏鮑堪比肩二謝詎等差陶潛與杜甫貌異神不離退之彈古調東野和
哀絲一唱再三歎咸非近世爲不見纔幾日驚聞歷羣醫趨視遘寢疾我來嗟已遲莊周說至人寐覺情
無移陳詞寓一哀聊以哭我私

上石遺先生

海藏橫絕散原奇鼎足還推老石遺無已頭銜惟教授去非風義故恢奇斜街花木垂垂晚上已杯盤細

細追我亦宜南坊畔客黃塵拂面恨來遲

先生詩語每道京華
鶴詠之盛讀之神往

壬戌九日遊半淞園

海堦爲客近秋殘節序催人祇寡歡暫假林皋供薄醉况無風雨逼危欄霜天雁陣驚寒早滿地黃花過
露溥終是詩翁能作健墨痕題壁未全乾

姚勁秋丈數醉於此
壁間題字墨痕猶新

贈婦

君應久熟桑麻話我亦曾研耒耜經安得承平好時世南湖歸去課樵青

壬戌長至後八日偶作

茶鐺未沸硯池冰初九嚴寒已不勝斟酌新詩誰第一紅梅布政白梅僧

樊山
寄禪

莊 羲

羲字呂塵江蘇奉賢人

將歸示尊瓠翁尊季社兄

窮冬寒威厲春氣殊未回淹忽迫歲暮生理默已隕佳人恣婉孌贈我千瓊瑰歌聲出金石醒醉倚樽壘
忘形互保愛常恐日月催曰歸我自喜風霜撲征騾吾母定念我鏡下髮皚皚庭空衆芳歇寒梅惜未栽

想茲叢菊花銜凍依牆隈故鄉誠可戀世難終孕胎飢寒汝何物賊我如禍災呼酒獨斟酌一醉屏諸哀
出門向南望欲發心終孩

季爰病中出示胡小石所書便面一詩甚好歸後雜書所觸寄之

酸儒日無事飯飽難一施逢辰強遊散步隨熙攘馳季爰眼中人落落各弗欺所居在窮巷到門疏車騎
蹉然我竟來執手心旋悲子非昔人耶容顏驚孱疲魂定話酸苦綢繆了不疑繩牀臥歎息百憂併一歎
平生篤文字病中還商之示我胡先作絕似后山詩神理蘊自足風骨高逾奇近賢宗兩宋語瘦初弗肥
鄭陳海藏石遺
二先生尤傑出高調誰能追我更服散原談麗矜餘姿西江溯宗派此老胡可辭吾詩亦何有學
宋襲其皮語硬意則直貌似神終遠欲回刻意手盡與造化期終嫌傷性靈才盡功力微詩庸人可想

語搜我思定庵詩詩漸
凡庸人可想

寒食後六日約堂先生招飲觀樅齋用昌黎寒食日出遊韻

經春閉置懶非病忍看新粧照眼盛李侯園館地稍偏密樹疎花互相暎嘉招卓午一一來共惜流光與
春競人生坦蕩本無私直指幽尋接觴詠浮陽靄靄開晴暉樹影參差雜斜正濃李天桃雖有情盛極就
衰好難更辛夷顛顛獨含嗟似訴別離怨薄命鸞飄鳳泊可奈何天假神權專其柄故知物生各有時倚
伏廢興絕弔慶傷春杜牧已覺痴行樂歐公殊可敬東坡詩醉翁行樂
處草木皆可敬向來欲論意苦多剩有詩懷幽且

負便當一飲任酩酊吐棄糟醜已非聖座中鄭老獨掉頭捨酒忘餐語笑併李侯周先儒雅魁論道說詩

見情性金先溫婉復多能越世高談氣逾橫陳翁掀髯口欲吐會意時時取幽逆齷生晚矣瞻前修特許
優遊資借鏡言愁已是鄙張衡說憤終須戮秦政相逢且莫問春遊戶外輕寒晚風勁追歡取醉泯賢愚
爲謝桃源舊縣令

題先大父恕一公遺稿

我祖平生澹蕩人衰年縱酒更忘身綢繆婚嫁那能了卓犖歌呼孰與親自寫詩篇傍蘇陸獨留文字照
風塵向來書畫稱三絕故老猶傳墊角巾

清明日郊行感賦

隨意尋春不厭遲晴鳩相對語空枝穿隄車騎思前度入夢松楸照獨悲新家幾家聞野哭離人終古園
孤兒年年濁酒何曾奠枉說飄零未有期

贈梅泉先生

學宋王梅好宗唐韓杜深萬端那可說七字鎮相尋雕鏤妨肝腎歌呼壓枕衾雄辭今罕見繪出古人心

朱羲冑

羲冑字悟園湖北潛江布衣有悟園詩草

晝眠

晝眠輒閉門客來問病未羊裘昔典去天寒擁破被不足道外人此中有至味

陳鳴則

鳴則字澤觀號虛谷閩縣人

社人讌集鏡湖亭兼約勳夫友漁

不解爲雲去逐龍同州異縣始相逢從知客是登樓粲頗訝師如倒屣豈夾影湖光開一鑑犁眉月色滿
千峰如何中酒催歸去時勳夫友漁病酒先去未聽山門夜午鐘

開化寺社集呈石遺師

此卽儒星不二門政宜洗耳覓聞根掃空文字身焉立託向擗菴道豈存安得各攜吾學錄少須勤講古
詩源縱非大事黃梅問師利無言也有言

鄭 璆

璆字棕船號天放福建閩縣人

風雨後庭竹盡折感作

疾風驅雲若排山鳴條噉竅夜益頑沛然甚雨更助虐漏床穿屋如懸湍庭前叢竹正娟綠一夕摧殺無
完竿秋來正望搖明月臥看疏影篩金屑豈意狼狽乃至此嗟汝太剛那不折收拾枯朽天黑色坐念飢
鳳來無食

石遺室前小池

至人嬉以天遨心在物表鯤溟與躡溘得意遺大小先生息踵徒聞道早如儼世亂矢挂冠歸山謝塵擾
居有廬一區人力更爲沼造洫合匠制種竹俯寒瀏倚欄餌游鯿意睨傲蒙叟月明吾能來鑑止所獲厚

天遺以敏生招飲西湖詩見示和韻

天遺無俗姿襟蘊邁諸子閉門却冠帶胸臆在山水興來恣探索湖蓄無留美雲哦逸天馨水噉破峯紫
昨歸抵我詩病我爲之起真氣鍛字句潔極不受泚吾生宿寡嗜何物足令喜今茲讀君什同好乃在此
便當買扁舟墜權招共理良夜復樂郊云徂惜胡底所以古龐公不肯向城市

林宗澤

宗澤字雪舟號平冶福建侯官人官浙江候補知縣

西園仲純招集宛在堂西園有詩見示次韻

雨裏斜陽畫不成坐看一月出高城清光一片真佳絕惜欠煙中打槳聲
此景分明合有詩可能不睡向風漪人間何處無鐙火不是今宵對酒時

同社諸子招集荔水莊舊址

西園三百載二老最風流鹿原榕園金石成新錄圖書認舊樓
可堪文藻地空贖草堂秋太息成西水銷沈到

白鷗

題謙宜息園

林侯人中豪性本愛泉石作園如作詩亦但取其適有詩兼有園此樂真何極煙塵正塞天可息且須息
笑彼襤褸士徒自苦形役視此文字林奚似仙凡隔巡檐花窺人拂席竹請客安得傍酒廚地名酒庫街日醉
步兵宅

林葆忻

葆忻字謙宜號息園福建閩縣人官廣東湖南審判廳長

牡丹盛開陪石遺師飲齋中卽席賦呈並示西園梅峰幹寶仲純伯修秀淵冠生雪舟鐵庵肖潔
三黜何嫌樵舍官官閒彌覺酒杯寬好傾佳釀聽春雨爲索新題賞牡丹坐客未銷人日醉人日石遺師
招飲匹園
園蔬麤具草堂餐明朝好句誰先到捧向花前取次看

清明日西園招飲治亭

花朝寒食清明節難得佳晨三日連結社招陪名輩飲來詩喜展故人箋西園先有
詩見招 昨宵小雨危前約侵

曉新晴續勝緣春水一池談往迹後期梵宇更參禪秀淵肖潔約後
會在開化寺

春盡日石遺師約說詩社諸子飲匹園

人日纔親北海尊匹園酒又餞春溫落花水面文章在桃李新陰正滿門

尙留婪尾壓闌紅九十春光過眼空春盡匹園春不盡我來常覺坐春風

海藏滄趣隔遙天只有皆山在眼前嶽嶽三樓成鼎足一時海內俯羣賢

余中秋赴東冲社人約以展重陽日爲社集及期歸則已於九月朔日集開化寺矣次日石遺師

招飲直園之虛堂西園告以分韻得寫字遂補成之並寄助夫友漁

匹園老人主風雅書局隨身開廣廈虛堂負郭纔落成爰招及門治杯罍人與此堂共千秋從之遊者歸

陶冶酒酣老人莞爾笑願與言詩盡賜也坐中莆田林西園爲言一昨飲蘭若吾儕天性在山林每逢社

事恆適野不速二客惠然來謂助夫
友漁 氣類相感盡瀟灑奈何歸棹竟愆期豈無車公歡遂寡匪我愆期君

負約未展重陽杯先把我生貪飲懶作詩既不我飲詩難寫爲請二客定讞書罰依金谷不寬假鑑湖往
事已難追息園新構不苟且余新拓一園名之曰息三徑菊事猶未荒來與諸君重結社

讀沈敬裕公濤園集卽步敬裕送先伯父文直公遊泰山原韻

濤園才名四海馳邈想丰采徒相思梁園節廋侍文直公來急遞文字奇公時屏藩方落職如臣伯貶守
滇池吏民咨嗟氣類惜不知何罪相驚疑玉局僮耳春婆夢升沉不驚往可師公書談諧雜談笑文直讀
之爲解頤黔藩再起旋開府世臣報國敢言疲丙辰舟中始謁公行裝杜左與蘇詩公言讀書破萬卷惟
左與蘇心所期公官粵日我未至我官粵日公去時動如參商不相見見時又有黍離悲切齒本初懷不
軌假飾禪讓將欺誰烏石卽是首陽地言採薇蕨根與皮誰識公心痛至骨祝宗祈死遂就衰我讀公詩
想風節髮髯船窗對麕眉

小除夕石遺師招飲直園賦呈

老梅時有暗香通餞臘風光一歲終門外雪花三尺白堂中獸炭一爐紅說詩匡鼎良如願得酒盈尊已
送窮聞道烽煙都撤警定看小隊到元戎

浴佛日題李北海書唐少林寺戒壇銘後

嵩高維嶽吾曾過少林寺在山之阿柏坂盡處乃見寺寺門前夾道古柏皆爲柏坂殘碑斷碣窮摩挲就中秦王

告寺教玄宗隸額風霜磨唐太宗居秦邸時所製告少林寺主教碑乃薛稷所書而世民二字則太宗親押也碑武德四年立至玄宗時加御書隸額今額已亡矣碑在寺東廊鐘樓前

裴書剝蝕纔可辨鐘樓樓下何嵯峨書在寺鐘樓下開元十六年立唐刻林立不知數如柏谷塢莊碑勅

運禪師功德塔銘若拂塵剔蘇停足哦奈何戒壇銘不見嗟予眼福猶蹉跎即今辭官了無事碑塔銘志還神王師子記

勤搜羅忽獲此本同至寶如入少室樂如何壇銘一篇三百字字剛健含嫵媚我佛呵護完且堅無一闕字

快雪蘭亭差無二他碑殘本纔數行鑑賞爭署名人記鐵束可搗礎已殘雲塵秦燕分兩地北海書雲塵碑有二一為

李思訓碑在陝西蒲城雖殘尚可搗正德中劉御史遠夫以鐵束之一為李秀碑在順麓山東林筋骨強

天良鄉僅存三百許字本六礎今祇有兩礎移置京師文相國祠內海上顧氏有全本麓山東林筋骨強

麓山寺碑在衡山岳麓書院東書院東中追魂真怪事葉有道先生碑乃北海夢靄巖娑樹盧君碑靄巖寺碑

林寺碑在九江府廬山皆區區書院東中追魂真怪事葉有道先生碑乃北海夢靄巖娑樹盧君碑靄巖寺碑

盧君神道碑皆北海筆完全不及少林寺此銘斷定邕手鐫語出虛舟非無自虛舟改戒壇銘云刻字稱况為變體

最小者同人擊賞驚神祕貞珉筆劃無瑕疵諸家題跋多疑詞考據年月與官職司馬刺史何兩歧虛舟題跋

云戒壇銘始於長安四年建於開元三年舊史邕貶括州司馬在開元三年以後十三年以前其為括州刺史在配流嶺南後新史云開元二十三年起為括州刺史而此銘立於開元三年已稱括州刺史豈史

誤不知三年正月望少林建壇之日期邕書在廿三年後適持括州刺史廳建壇在前書在後官稱刺史歟

無可疑年月日下繫以建可知書銘非同時余謂此銘云開元三年正月十五日請與他碑相發引年月建者此為建壇之期非書銘之期

官職多參差不信試徵追魂搗僅隔戒壇兩年遲追魂碑開元五年所書此時邕尚在斯時邕職惟司馬括州司馬而書銜亦作括州刺史也

亦以刺史稱官司娑羅樹碑還可考陳州誤作海州涓娑羅樹碑作於開元十一年以邕傳考之孔廟碑涓

稱渝州守史無此官尤可奇邕撰孔子廟碑文開元七年作戒壇為邕矜意筆岳麓雲塵彷彿之許靈長

戒壇銘云余見北海書數十種用筆各異銜稱渝州刺史史不載此官也同是真本落人世胡不疑彼而疑茲秘書文章勵氣節武宗時贈邕秘

書監則天時

司戶丞尉凡三黜

邑累貶雷州司戶崖州

生平任俠無私藏蜚語中傷乃杖殺

舊唐書天寶五載左

驍衛兵曹參軍柳勣有罪下獄

邑嘗遣勣馬吉溫使引邑

嘗以休咎相語陰路遺宰杖殺之

我撫此本重淒涼如

見運腕方下筆况此戒銘勒少林傳燈錄出唐名利直同西竺貝葉經傳觀佳辰逢浴佛怡山長慶照禪

師

是日兆照和尚適在西禪長慶寺傳戒招余往觀阻雨不果

傳戒傳衣紫金鉢邀我聽講祇樹園那知一雨隔丈室寄言稍待荔支

紅到寺來受師棒喝願將此搨鎮山門聊當嵌垣新碑碣

陳忻侯

忻侯字肖潔號烏托閩縣人官福州推事

石遺室詩話肖潔學詩甚力句如歲暮重感云天心漸露陽和象人意同深歲始思野燒根新

還望澤寒山雪霽若生姿東坡生日云但見催科登上考不聞論事貶窮州半野軒云暝痕曲

折環山合月意模糊隔樹看皆佳

謙宣息園落成

富人築園窮丹青詩人築園先正名不待園成名曰息可信詩人非干榮吾身息偃亦云久吾園未辦空復情俛仰茲園一動色眼中樓閣何崢嶸憶昔與君同游宦意氣有如黃河傾聞人歸休輒齒冷私謂天

下不足平吾今久病且成廢君縱多才難畢呈有園無園同一息此中奚復論重輕

近學作詩雖輒得師友之益而賦質魯鈍了無長進作此志愧

自是凡胎已著埃百回辜負道場開蚤知佛法無邊大敢向山門喫棒來
夢裏陽臺若有情醒來雲雨一天清美人僅隔盈盈水止許相思未目成
東風着意護羣芳穠杏夭桃鬪一場惟有海棠沈睡處闌干寂寞總無香

陳元璋

元璋字翼才號悔峰福建莆田人諸生官福州巡警區官

春盡日石遺師招飲匹園

惜春珍重餞春行春與詩人獨有情尊酒不隨花去住高樓最愛竹縱橫故園魚鳥忘機久秘室琳琅信
手評屈指逢辰看浴佛香山席上序門生

四月初八
爲師生日

小集湖上宛在堂夜歸怯冷臥病三日讀石遺室詩集口占一律

追隨杖履集湖堂月上鐘鳴夜未央三日離羣難刮目一詩逐瘡勝良方故園報道黃梅熟近市微聞白
酒香藥裹牙籤尙拉雜妻孥真笑病中忙

偕西園師友漁幹寶仲純秀淵冒雨飲洪江酒樓既晴遂遊小金山限肴韻

朔風蕭颯鳥鳴巢野人乘屋剛分茅吾儕僕僕爲何事來覓野店餐山肴酒酣耳熱停杯起歌聲時與湖

聲滔天公作美收齒脚攝衣共訪洪塘坳行行遙指塔江寺寺門惟許舟人敲寺在江中江流環繞若束帶塔

頂高聳如懸匏有時水石相盪激恍惚大澤騰龍蛟有時松篁發清籟塔頂小松塔傍叢竹恍惚天半鳴笙窺雲岑

三面沙一角閒鷗幽鳥時嘲啁寺僧頗訝何處去舟人爲我語曉曉今年洪水沒亭榭坐令勝地成瘠磽

佛龕神座竟雜置但見饑鼠相攫抓我聞更觸懷古感翁張不作山嶸嶸翁文簡張襄愨石倉園池餘松栝曹能始爲

園 慕田丞相荒巖嶽李忠定公榮在寺對面葛岐山擔憂爲古定何補有酒不飲真堪嘲

說詩社二週宵潔有詩紀盛云第三週一集擬假西禪寺爲終日之飲賦二十四韻奉答

一飲尋常耳文字飲堪憶旗亭唱涼州蓮社招彭澤南塘紀少陵北山傳蘇軾韻事隔千年令人想陳迹

故知風雅身精神貫金石吾輩後古人懷古歎晨夕並世有后山石遺師百年足矜式列坐聽談詩唱酬十

二客元方兄弟行有潔澤觀和靖師友則西園師謙道玄畫品尊哲庵休文韻譜闢冠生豈無燕許才秀淵鑑保更有江

郎筆伯修董生感慨多甯計通與厄仲純賤子媿不文齊竽亦列席何處借吟壇半野與環碧云將遍名區到

處留翰墨社集始春初寒暑已漸易一週花正紅二週荷可摘三週蟹初肥四週雪應白萬物有新陳吾

社無間隔欲作斷金占無取搏沙惜詩教存亡間此志繫一息萬一黃河清庶歌許契稷他日耆年圖妙

覺寺中覓人各賦一詩勝勝燕然勒

劉朝敍

朝敍字蘅莊安徽合肥人壯肅公銘傳孫

讀唐元素師遺詩感賦

短檠影幢幢寒月懸帷幕照眼涉江詩幽吟事如昨激昂八變歌慷慨飲酒作持論混唐宋不爲門戶縛
顧此乃餘事嶽嶽惟名節三卻安車徵窮老甘藜藿辟地吳江濱坐悲網維絕曰使吾有軍殄彼張天伐
放言駭廣坐中或汗而作嘗憂私學橫懼此大道裂思衛道以文啓社占麗澤多士走其門羣奉爲矩矱
健者張沂志與劉泗之葉元何晉齋咸不弱敍也蝨其間私幸獲親炙詔我君子儒大義日月揭傷哉晚縱酒隕
生實杯杓一老不憊遺天道何窮剝嗟嗟人間世百年驚一刹先生去人遠高邱愴猿鶴感歎平生歡掩
卷深於邑

過周梅泉巢園賦贈

梅泉詩學韓駸駸入於古五言尤奧衍幾欲鄭叟伍謂蘇堪師始於約堂坐一見傾肺腑有園在滬西寥閭絕

塵土危樓何嶢嶢古木如弼輔石罅瀉疏泉奇峰拱廊廡嬌櫻初著花娟娟帶春雨間之榆與桃錯綜益
媚嫵主人高世懷樂此足印頰况與海藏樓相望不數武冰雪聞造門諧談夜過午茲遊同後山

陳子言先生

小憩飲深語何當踏月來攜詩聽談麈請運郢風斤敢布雷門鼓

看桃花過龍華寺

愁霖尼我看花期謀野偏過上巳時暖鞞蹴脂六七里落霞散綺兩三枝劇憐春去開宜早無那風寒放
又遲古刹劫餘重盛處人間興廢幾堪悲

贈李萼季

萼季學涪翁生拗誰與抗陰陽馳施閉心胸羅萬象長公尙苦淡風骨亦適上謂哲兄 吾欲追二賢默作
未能當

江菊圃屬題其室繆止蘭手繪焦山圖

合眼憶前遊漾滂一峰聳披圖驚叫絕筆底風濤涌千帆與萬木一一皆生動疑挹石氣寒恍聽春禽啾
夫婿詩中豪筆花逞吟諷緬懷山林趣頗厭塵埃閑借隱期他年福慧幾生種鹿車探巖深香琴臨月弄
更寫鼓琴圖與茲帙并重君家藏一琴鼓之有異音

贈松月上人卽送之雁蕩

往讀寄禪詩清腴似摩詰語不著纖塵空腸嚼冰雪上人步武來風懷同落落峻潔尤過之新詞如玉屑
寧摩蘇韓壘優入風人室東坡昔論詩一反昌黎說其妙在空靜持爲不二訣言靜猶有動談空徒內滅
如何兩置之心光隨地做避世將何之獨往山水窟雁蕩天下雄奇峰雲際插晶瀑萬仞飛佳處茆可結

他年脫塵鞅我欲從師學豈曰絕世囂聊以安吾拙

次韻寄松上人

離懷鬱秋悲冥坐憶光霽雲濤傳素書魚龍雜吐涕道人水鏡清胸中絕塵蕪妙相匪言宣謳吟亦小慧
希聲聽聾俗敬安誠魯衛疊幃懸茅茨靈蹤蕩紛翳淡然與化遊萬古一臨濟

哭徹教師

兼旬神不怡刺促如有失書來非已書驚啟言有疾中復告小瘳勿藥仰空祝天乎有茲事彈指登鬼錄
震悸疑夢寐拭眼瞰殘燭方寸迸千哀瞠目翻忘哭十年師弟義情親逾骨肉微命苦相依奪我亦何速
火宅安足留矧爲貧病楛有生亦贅耳莫叱蒼蒼酷

十月壬子歸相送至舟次船舷尺咫間終古死別地幽憂託苦吟更迭詩筒寄暫歸非久別見汝待明季
師寄詩有見汝待明季之句如何宛轉問捨我邊長寐上下天地中魂兮安可致渺渺閻浮提重見更何冀案頭儼遺

相悽惻空相視摩挲手澤新一讀一揮涕形骸雖永隔精靈耿天際文字不可磨壽之千萬世

松月上人自雁宕山寄書并近作詩數章

咀嚼精靈氣噴天作法音山空邀魅語書到已秋深坐了千經偈冥探萬劫心毘邪原一默道豈在哦吟

賴 籌

籌字瀟侯江西南康人官陸軍

呈陶谷丈寄懷石遺師

元祐詩人落葉分年來警效斷知聞閉門何處陳無已試問成都揚子雲

趙尊嶽

尊嶽字叔雍江蘇陽湖人有惜陰堂詩

無題

非霧非煙半揜門絮飛花落淡無痕西廂夜語燒紅燭未到尊前已斷魂

孟庸生先生挽詩

海嶽清標一敝裘白雲何地哭松楸壯懷未償屯田業學士常殷報國憂北漠塵沙餘悵惘南朝人物歇
風流從今萬里寒山鶴不爲滄桑更少留

安之山水立軸

秋風一宿催黃葉蓮社風流舊笠登斜日寒川昨夜夢不須歸去問山僧

春谷幽居

春谷雲煙鎖疏櫺鶯燕飛青蘿捫白石嶺瀑濯巖扉采藥人何在披襟髮自晞焚香聊寫意鼓瑟送遙暉

林景行

景行字亮奇號寒碧福建侯官人

監輿長行茹里草逕裏湖卉篔入岫

出郭趨十里迴湖俄已晴午陰鬱無噴蒸日時漏明峯出朝竊散泉迷暗香生草徑往無際監輿疑未行
緋花淫滴滴翠篠垂盈盈意會異探討耳目殊經營惜余病微質未足當炎兵稍觸暄燠氣便苦拘墟情
強振釋形勸靜趺培神經還思早春候徐接羣芳清

鑄夫味三雨樵諸君子招讌圖書館樓背山面湖極卉樹之盛

枕櫂赴嘉招對樓資小凭層峯俯深眇宏宇羅青冥結構豈造就逍遙自始媯朝雲凝不散夏羽矯還輕
連漪揚清颺嘉樹當列屏玫瑰溢芳氣素馨送微醒儼坐藹清吐駢筵借列星雖無肌鬢香亦動篔絲情
按序已逾屆宿意還當醒

畏暑入湖得行嚴京國書却寄

夜氣猶荒曙未明枕樓無際待風生病中千態君能寫湖外雙眸我最清漫喜較量篔與舸乍應問訊雨

還晴濕雲不散鷗先倦何取烟波狎此盟

次答默菴十五疊山韻示篇並呈貞長

愛看荷光浸綠山竹籬花舸恣飛還一懽儘覺朋儕盛羣往寧知嘯傲閒
會有詩篇供汗漫可曾酒袂記清斑相逢不悔今來別好語秋從桂樹
嬾是夕余將去杭貞長留飯齋中與默庵同有秋來探桂澗谿之約

上北高峰下瞰竹徑諸方

水遊已盡愛山遊得得監與午未休來冒雲光銷短氣去隨嵐翠雜清流
儲糧坐使羣猜釋告策寧知獨返謀更向北風凌絕頂俯窺層竹眇千籌

湖泛口占示貞長

晚風翼翼浪吹衣涼水鱗鱗翠入微借與詩人隨一舸枕流看樹憺忘歸

檢舊篋忽得苴芩兄所書絹筆把玩久之題此爲寄並示釋堪上有論書長句

古書書法絕深嚴筆後意先羅衆有近人下筆主流動一往行間每自負詎窺
意態出澹定可遺規模去宏厚當年石室信有傳勿信人間非受授疾風橫
雨出臨川近代更有海藏叟兄亦躡步渺追蹤合向都門看墨帝書家變
法微可玩豈必區區範徐柳近聞閉戶殊整暇木石山中盡黑否兄書標置
早成體比似安西歎高手飄飄奇字薄軒轅漠漠閒文寄峒嶼吾書晚作乏
功用自詭生天永謝後每從遲鈍抑性情偶得參差試評剖兩年日力送無
盡一事從容難以苟強持此意來作詩枉近墨池一迴首

四月十二日薄曉出泛湖憩北亭凝感有紀

凌晨泝團流展棹覓清異連坡徑蜿蜒蔽築林羅織遙峰隱凝思滑磴阻洊至澗曲越潛響橋迴滿空翠
須臾光景開彌覺山水膩宿霧破參差新日映明媚涼煦雖倏遷升沈豈異企傲情總在墳麗想媿入寺
暝如苔蘚光靜得鐘梵氣仙藏不可通悠然假夢寐

從北高峰下韜光庵外憩石橋倚欄看竹

陰峯千轉此凭欄萬竹參天俯一寒絕憶扶持噤無語當時猶作畫中看

崇效寺牡丹和衆異

難追獼猴性微聞佛鏡花光翠半分細葉徧看驚繭栗長波漉記惜殘雲
丁未春與瀟芙柘魚探花
獨襯亭軒艷調護應添幃幙薰不是約齋舊游客迴車也動思氤氳

五月十一夜聞歌觸賦

一笑誰家好酒邊韶陰如水坐年年月光燈氣奇離夜髻影衣香淡宕天欲買胭脂供絕豔難拊絲管壓
繁妍座中儂亦江南客怕聽瀟瀟暮雨前

林學衡

學衡字衆難福建閩縣人有舟車集

石遺室詩話衆難早慧逸才十餘歲卽奔走國事與亮奇同句如小別已成來日感相親猶是
往時心泥崩幕燕終同盡雨定池蛙各自喧吾儕未死終能健八表同昏孰可非重塞深淺渾
難料一瞥陰晴最可哀拂面柳風收暑意吹裾荷雨念春寒劫後中原成戰國眼前人物幾殘
唐愛憎至竟關緣法清濁何曾與毀誹竹陰雲影自縈帶柳色湖光相淡濃抗手時賢均無愧
色韜光云望湖良自佳見海苦不足詩人喜鋪張往往非實錄煙霞洞云奇峯湖上不知數獨
茲嶺石天所付蟠空有洞名煙霞直攬錢江與吞吐又善於模山範水者

羅街樓望

抱樓嵐翠鬱崔嵬雨了平蕪返照纔禽語谿聲時斷續橋波樹影自縈迴蠻荒春好關何事潭水情深感
獨來知汝故園無恙否遠書珍重及時裁

河口車中

南荒正月已春深雜樹連雲綠滿林此地故人曾發難當時英氣竟銷沈論才今昔渾難料歷劫蟲沙孰
敢任世變山光同一闕獨攜殘醉向城陰

水月軒雨後

小樓臨水與憑欄一雨能生十日寒紅紫滿園春自媚好花祇惜後時看

病中答指令

宵來被風邪寒熱殊未止體中故燥濕南土詎所喜今年早置夏暑氣宜風靡積邪必內攻國病亦如此
却病但閉門孰能喻此旨微聞京保間兵禍行尺咫吾曹寧避世不甘一邱耳蕭君稱英傑譚吐每撫髀
誰令曠代才坐與樗散比運會有推移人材當輩起更看奮鵬翼一擊滄溟水

閩海舟次阻風驀有所感

要憑定力勝羣兒駕海排山極險巖去去不愁風浪惡心光長似在家時

湖樓感懷

一年三度走杭州每對湖山意易柔世變方新寧縮手秋光自好獨登樓漫教懷抱聞歌惡差愛襟期向
晚幽年少與人家國事區區成敗亦何尤

南園樓望感懷近事似精衛

珠江冬暖亦如春柳外煙波着意新幾墜名城資寇盜徒勞大長諷皇仁佳兵比歲民終困厝火當時事
已陳獨倚南樓窮八表艱危屬望定何人

庭前長春半已就萎中一朵幽豔獨絕感賦

一卉亭亭表好春淺深紅白自相勻飄搖雪後猶驚豔冷落風前獨出塵絕色東華成夢憶移根南土見
精神早開晚謝從珍惜能駐暄和已解人

讀史寄聽水師傳

早專遼瀋失戎機，斷送青宮晚更非。
煽亂許龍偏首鼠，置身新莽有依違。
忘恩負義君何恤，暮楚朝秦世已稀。
誤國憐渠遺臭在，當時山簡倘知幾。
袁氏卜相時，文與豫老曾論某公之不可用。

靈隱寺

攔輿山勢自飛蟠，石嶂松濤恣壯觀。
千佛仰空纔近寺，一泓入定不生湍。
劫灰幾換僧成塔，香火長留俗未闌。
三載雲堂還午飯，却尋泥爪亦彫殘。
余以戊午春飯此。

煙霞洞與舜華慧兒留名而去

奇峰湖上不知數，獨茲巖石天所付。
蟠空有洞名煙霞，直攬錢江與吞吐。
佛身壁立空森嚴，石面雕鐫自碁布。
拾級憑高興未窮，故人天末感春樹。
舊時遊侶今逋亡，亭柱留題尙朝暮。
謂東題名聊與證鴻泥，異

日看雲容小住

理安寺飯後以次遊三天竺途中書所得示舜華

巖歷南山南，又上北山北。
遊程不就序，所愛餐山色。
輿行萬壑中，御風如過翼。
四面松濤喧，千盤石磴直。
峯軒忽見湖煙波，宛在側透迤入梅塢。
林密徑益仄，石罅聞鳴泉。
苔痕嚼叢棘，漸漸見人家。
行行出岩

五月廿七作

打屋翻簷勢未休，雨中夕照忽當樓。
黃梅天氣連初伏，白練衣裳似早秋。
北望烽煙喧左輔，南來風鶴警杭州。
神州運數關興廢，八月看梟新莽頭。

雨窗感興示挺生指令

倦向屏山竟廢餐，忽驚樓角電光盤。
乍秋客枕知寒早，破夢鄉書急起看。
晚雨連宵妨美睡，阿兄失計戀麤官。
飛騰自信猶能健，取次中原一據鞍。

長至日病起偶題

當時愛好倘前因，一諾何曾惜此身。
言誓等閒成覆水，猜疑多事苦飄茵。
故知迹往情難盡，可信形疎意轉真。
病起思量渾隔世，來生肺腑漫相親。

元日試筆

略憑花事點新春，還共春光念舊人。
風定盆梅香壓几，雨餘庭草綠成茵。
閒情一往詩能說，好景相催意易塵。
問訊阿喬無恙否，江鄉誰與寄書頻。

南河沿

夜半人語喧，汽車雜奔馬。
奪門爾何爲，震驚徧朝野。
孺子故昏憤，神器宜可假。
由來竊人國，往往利孤寡。
朱溫與董卓，擁立本苟且。
豈真忠故君，謬欲支大厦。
所嗟南河沿，一夕覆千瓦。

遣懷

歷歷風華在眼前，憑渠梅柳各爭妍。道人會得閒居味，盡取春光付醉眠。

書憶

香火今生夢已塵，來生竹馬早相親。背人能會通辭意，隔海難醫善病身。向日呢譚終覺淺，好春孤負只緣貧。尋常試茗橫琴地，留取樓陰一段嬰。

郭則壽

則壽字舜卿福建侯官人

石遺室詩話舜卿句如久坐能令千歲至，開門頓覺萬聲來。能於肌理求顏色，若爲春秋駐景

光南田老人畫

路人如我蕭閒否，高柳臨春窈窕然。昨夜珮環來洛浦，一時車馬滿長安。崇效寺牡丹 皆

有思致

奉題匹園皆山樓

慰意還增感，池成更作樓。左司芳樹綠，開府小園幽。選勝山環侍，延賓月四浮。詩篇皆漫與，白髮照清

秋

涼秋

疏雨瀟瀟送薄寒，鄉園欲啖共平安。人生歡意原無幾，要向歡時一盡歡。

郊行

遠岫籠雲碧未齊，舟輕無礙板橋低。朝朝似有新詩思，觸處江山可製題。
絕無佳想答芳時，偶惜餘閒對晚曦。却喜東風教識面，碧欄干外白辛夷。

寄拔可荔支並索示近作

炎蒸一日十二時，山雲欲雨風斷之。籃輿城郭苦朝暮，浮瓜折藕誰家池。仙人來從藐姑射，明霞爲貌冰
爲肌。不遷鄉士真可貴，遠方欲致勞懷思。宵來故枝辭宛轉，扁舟水遞江之湄。波濤咫尺不受喝，爲君香
色勤護持。歎收今歲正苦旱，懸林不慰吾人饑。小槽真珠對夜熱，紅妝無夢來談詩。知君新居宜道暑，客
至佳句時紛披。更望海上示瓊玖，爲滌煩溽清襟期。

遊黑龍潭遂及普照寺寄秋岳

送君東去泛明湖，獨到龍潭日已晡。怪石擎空成絕險，飛泉經旱未全枯。偶聞鐘語重巒隔，似斷人踪一
壑孤。更向前山尋古刹，六朝松頂噪歸鳥。普照寺有六朝松

曾以舊作呈質梅生社丈昨承贈詩並惠太姥山綠芽佳茗賦此奉謝

平生喜孤賞，得句每乘興。持質丈人前，正義欲修證。養成自然丈人早，戰勝殷勤爲指揭。明蟾破秋暝，
情摯心所欽。辭謙未敢聽，詩篇荷寵寄。百轉出丹甌，堅我守寂意。真境在常定，拜賜亦已多。况復有佳贈。

旗槍展新綠益令心神醒
岿岿太姥峯靜遠與君稱
讀詩更啜茗神往秋窗凭
尋詩更山游吾願隨鞭鐙

鄭乃奇

乃奇字口口福建閩縣人

奉題石遺先生匹園用畏廬韻

萬卷編摩意自閒
小園幾欲冠三山
遠招風月樓臺上
平列峯巒几案間
恨我無緣親雪立
想公白眼看雲還
江山縱好多搖落
太息斯人早閉關

王我臧

我臧字俶田福建侯官人

石遺室詩話俶田蘭生子句如鄉味關心婪尾筵
家書頻戒雨前茶
落花中酒去年病啼鳥勸人三月歸極似乃父得意語又曉起同冀伯隨石遺丈黃鶴樓看雪云千山萬嶺飛鳥絕一老兩生樓上頭九日寄公荆云不是登高無處所登高何事可開懷清健可誦

過姚園

姚家園裏無多麗，頗有海棠百十枝花下。主人子培子殘，衫破帽坐論詩。

初至杭州

展轉復展轉，小舟殊迫窄。昨夜江南人，今日湖西客。

冷泉亭

山外方亭午，亭中疑已暝。山祿能醉人，使我久不醒。

陳聲暨

聲暨字公荆，福建侯官人。官交通部主事。

石遺室詩話大兒聲暨詩學木庵先生，頗爲攷菴濤園所賞。甲寅重至都門，余始偶課之，有作命使代筆，今所存各首是也。

小池一首，視小西湖同遊諸君

晴牕蔭脩竹，詩思上臺穎。初夏添數筍，對之塵慮屏。竹旁小方池，日光射耿耿。金魚數十尾，頂水弄竹影。似疑是蓮葉，遊戲東西逞。又似疑萍藻，唼喋弄愔愔。我昨游湖西，數人共舴艋。愛其水令姿，有如泛清潁。

王子戲撐篙失足幾沒頂莫言水性儒狎玩要深省所以快剪刀剪取湖中景生我池水色雲影天光併
縱橫各八尺一仞量短綆三面繚闌干步履皆坦境時時此俯仰方寸暇而整風來簷竹動觀天笑坐井
風吹竹葉墜竹網撈斷梗愛看魚上水餌之以光餅聞聲悠然逝濡首尾見丙莫聽青草生紛紛鬧蛙黽

上巳日花下憶都門舊遊長句二十韻寄呈家大人

六年隨宦居宜南斜街老屋團詩龕老泉冷官守寂寞文酒風味常醺醺我時廢讀范滂傳堂北無復棧
宜男忘憂乏術意頽喪長公才識深懷慚學書學劍百不就讀書讀律聊相參江關烽火達北極如梟東
徙紛負擔求田問舍且種菜湖海豪氣消何堪看花對酒悵不御上心往事兼酸甘都門車馬厭塵土惟
有花事吾猶諳法源丁香香雪海崇效寺裏春沈酣天寧花之漸減色國香極樂猶二三萬荷葦灣與十
刹蘆荻積水澄清潭歸來草堂秀而野入門穿徑香醞醞舊遊如夢去不遠而此屈蟄同僵蠹亦知風光
過眼耳當春發思誰能戡嚴君倦遊復乘興文史講席經還談著書多暇樹繞屋葡萄滿架藤爲盞壓牆
百竿竹嫋嫋拂簷千絲柳毵毵華前念遠更感逝地僻門外稀停驂會當負笈補晚學四始六義趨庭探
病中書事一首謝星孫枉過並視永澄

積句在方寸理臺就床上冒雨視我病拉雜說病狀子去臺復理句法有或忘此雨非重陽敗興胡悵悵
春麥行登場惴惴江水漲雨詩寄子看兼寫病中况病中鬱寂寥思子引領望亦有謬好我非我所祈嚮
因之呼門者某某許過訪餘則道我睡並道病無恙吾宗昨命介餅餌以爲餉門者詰遣誰愕眙矚目相

大門誤讓使按劍儼相向吾宗色然怒馳函來責讓我僕固鹵莽子介未明亮行當備蔬肴杯酒釋怏怏
作詩謝吾宗並請和此唱

病中視孟玉

春事去堂堂當春病據床瓶華分旖旎盆竹挹清涼遍聽巡更柝微聞煮藥香貪寬妻另榻病理與商量
同星孫小西湖泛月君時將赴粵

頽雲鬱東嶺月出碾破碎散爲淋漓雨此色誰能繪雨止星漸明中天斂鸞鏡流碧漲湖面夜色船滿載
喜從月湖中領此雨湖態蛙聲出水草豈亦慊以慨人生似飛鴻良會何時再撫景千念集水宿暫相對
縱令隔形骸所特有肝肺滿此水月胸時時與濯漑

郊行看菜花

中層深碧上層黃撲鼻平分春酒香我與蜜蜂魂共斷花前詩思不嫌長

村居雜詠七首之一

四野寂然曠蟲聲放以肆肆中帶靜意好遣深夜睡

棗花寺看花憶仁先舊遊家大人命代作

牡丹依舊艷陽粧惆悵玉溪天一方惘惘已經千日酒悠悠誰識百迴腸結廬人境喧能寂采菊東籬意
自長悔不春申典半宅江頭林際對蒼茫

藤架傾斜葡萄委地未架作

簇簇生新壓架斜纍纍結實望猶餘滿庭花氣烘人煖半牖朝曦盼汝遮樹柵植援皆託庇帶羅被荔足
矜夸吾生樽散兼蓬轉只合桑陰自種瓜

法源寺燕集丁香之盛不如往年有懷堯生家大人命代賦

老眼看花不計回去年春盡乍銜杯皚皚忽減三分白濟濟還增幾輩來就寂趨喧天所命傷離念遠意
難灰江頭五詠偏根觸獨有文通是賦才

堯生寄詩十數首既答以五言意有未盡再報一首家大人命代作

真詩直遺千回讀補盡書中不盡詞已共林花驚聚散各憑尊酒自維持篇篇急就翁差放字字艱辛子
獨知五夜一燈萬里路互招魂魄續交期

十刹海禊集家大人命代賦

今年節序晚三日春氣王柳綠華亦紅新水鴨頭漲主人誠好事選勝費供張主十客則百百種采時望
熙熙疑啖名矯矯類高尚平生樂遊意魚鳥且相忘酒杯偶借人詩筆吾自放詩成人得之人得我何喪
臨水復須臾天際雨雲釀

得俶田日本書却寄

開函有淚難終讀我亦悲歌感不禁只爲羊皮書晚學難隨雞口粒追尋趨炎鬼慕高明室畏亂人吞激

楚音果有安巢棲息地敢嫌林密與山深

同師葛叔玉夜話時余將同習靜入都

坐看月出到垂殘斗柄橫斜睡尙難別後多將書寄我定無所語寫平安

除夕過畏廬年丈寓齋留飲賦長句二十韻卽呈誨正

歲闌獨客孰好我出門乞食非饑驅畏廬丈是我父執喜我突至掀其須下階相將入畫室示我東絹方染濡興酣須臾能事畢怒罵餘子兼擲揄就中座客盡闔產落寞彈缺知無魚我丈和煖陽春懷廣廈何以顏歡渠求田問舍力不毅稻粱自笑爭雁餘三椽矮屋似僧舍家家寄居城東隅季鷹秋風思鱸膾東坡臘日懷妻孥修蛇赴壑又歲盡顧影能免悲桑榆長官聽直任陞楯有司出納逢侏儒侏儒棄甲歌復來陞楯脫巾空譟呼開源節流兩無策中夜起坐千躊躇燕巢幕上定非計菟枯枉用歌烏烏衆人待我我自省儒無席上珍誰沾我丈閉門能造車譯書賣畫勤蓄畚貨財筋力兩爲禮舉火功德癒浮屠我今從丈飲屠蘇燔柴風味疑鄉閭性不能飲識酒趣看人百榼還千壺歸來惘惘自兀坐鄉心但覺紛起予

書事寄賞素永澄玉孫竹脩齡孫諸君

我豈不曉事而來長安居偶然發詩歌山林氣難除要知田野閒相見皆耕漁世味偶與嘗焉能味厥初或言詩窮人未工應免諸勿嗟臣朔飢誰令不侏儒宋朝美不如祝鮫佞讓渠猶得粗飽暖彼蒼待不虛噫我之高曾家無擔石儲殺賊繫金印未嘗擁麾旛器不陳清廟自然非璠璵惟士立世間一飯賴名譽

所恃只恆心硯田收菑畲辛勤至我父厝有田與廬卅年老教授軒冕視土苴學子待撞鐘急遞千里呼
自言無所能惟此差識途二年四命駕敢憚辛與劬今年我趨庭三月別里閭看花陪杖履重來舊玄都
千樹桃亂栽我自同散樗營營求顆粒飛躍隨烏魚無端盛夏病撫念紛轆轡有婦隔家山欲告重躊躇
稍問書千言詳道病已舒斷無奄奄人能作長篇書旁及念友詩詩成兼鈔胥諸君書數來無恙祝吾軀
第恐漸星散稻梁兌江湖嫁衣日替人音問漸以疏吾宗昨寄書扶桑行云徂我欲從之遊顧影驚已瞶
喜子日方東學成張吾徒學成張吾徒行矣莫踟躕嚮者在鄉里相依如駟驢橋邊有酒樓匪日不與釀
恣談忘爾汝斷斷相齟齬所辯在事理所爭非私圖明辨一以析依然兩歡娛吁嗟此情事匪我孰追摹
病中放言寄賞素竹脩永澄齡孫玉孫福州

餘疴氣未清人意終愉快向來苦病熱清涼散調養今年異曩昔一病寒莽蒼血氣豈就衰陰陽互消長
人方祝雨師我獨畏雨響半牕綠愔愔對之生怏怏移將牕前樹外院植三兩公園咫尺地一夏懶未往
亦頗畏月明涼色侵帷幌閉戶偶課詩雌伏欠豁朗詩成乏綺語亦匪慨以慷徵音宜戒絕讜語來吾黨
鬱鬱暫與居袞袞匪所仰趨家安吾素冷澹誤僦儻一案積如山卷帙翻擾攘一床堆裳衣顛倒乏職掌
對茲室如斗何名以題榜縱云中不旋焉能鳥在網百年姑平分五十此中長將堂合作室紙閣糊明昶
室小可溝通室矮難軒敞完全事實難滿志付一想卷簾納朝陽皜皜秋色爽

月色華如此余懷自不榮
白衣看世事滄海動離情有酒艱
言醉何詩可紀行只餘齊不寐百計話天明
澹人內采招飲書長句二十韻以爲笑談

我生健啖不飲酒汝今有喜傾三杯
祝我得子如杯數耳熱君聽髡諧談
使我有女當內采使我有男當通媒
平頭四十未有子一身輕矣心能孩
民胞物與本一視烏用戚戚求高祿
三撻何勞觀橋梓十等何苦留輿臺
卽論大宗不可斬兄弟之子可栽培
大姪識字聞穎悟堂構或免委蒿萊
世亂公卿有何好災難能免亦庸才
先零蒲箭我如此春光來者追難回
何當趨庭劬舊學白華潔養循南陔
君言旋歸於我館請樂杖履共追陪
文學詩學本一貫法度嚴謹氣宏恢
況君能事無聲詩言詩告往當知來
祇恐行將主中饋日計月計功垂灰
浮圖合尖不可忽爲山九仞毋徘徊
持躬涉世忌察察匿怨最易生嫌猜
番風爲數二十四轉眼灼灼桃花開
月圓華好催粧日瓊筵飛觴來潑醅

不寐

不寐從多憶如何夢始便聰明知月
上人曉在天前

得婦書令人不怡寫長句一首寄之

嘔血無端怯不禁臥而見客軼規箴
夢中孰導還鄉路枕上平添念婦心
惻惻早窮生別理悽悽寄與告存吟
藥方吾友精葢桂待取傷寒論細尋

同澹人晚峯法源寺棗花寺看華約次日爲公園之遊因雨而止

飽看丁香與牡丹，王城春末尚深寒。追歡莫悵吾生寡，造物都如人意難。已覺風前花簌簌，況聽簾外雨潺潺。扶牕草樹欣新沐，可似中年強自寬。

早起視鐵庵

我病宜來朽木譏，我今早起先朝暉。一庭不厭如環轉，衆木能生靜者機。短樹枝乾宜剪薙，長春花小自芳菲。先生還在華胥裏，獨看簷前鳥雀飛。

連宵赴澹人所忽以嘔血中止病中憶所言書視澹人

瘦生原不苦吟宜，翻說離愁賴此醫。長吉何曾真嘔血，聖俞猶謂果工詩。無端鞅掌隨人役，有味書燈感歲馳。談藝連宵吾忽病，不從君語劇堪嗤。

孟玉書來詳訊病狀却寄

獨客滯長安，書來稍自寬。形如槁木易，心欲死灰難。華已萸萸發，風還剪剪寒。定將詩斷絕，何以佐清歡。血至罷爲詩，詩停百念滋。友朋明月影，親舍白雲思。獨樂悲絲竹，輕航喜水湄。晨興庭院寂，只自賞花枝。柳綠草垂蕤，臨風感鬢絲。中年行役苦，未老婦人宜。死我甯稱夭，看君不到齋。加餐待相見，聊以夏爲期。久不得賞素玉孫書，書至狂喜，率成一首寄之。

病語尙能春，因君寫我真。書疏彌鄭重，句短要精神。櫟樹安閑散，時余告假養病林花悟溷茵。百竿牕外竹，憔悴

最相親

病起徘徊花下懷蒲齋主人

榆錢向我擲棠梨，粲齒啓胡爲。撫春光悵悵，坐華底和風起。天末吾意思，君子蒲齋富。花竹蒼翠目，欲眯去年花。下飲杯酒京塵洗，精庖擅烹魚。

君精調醬魚味極腴美

別筵更設醴，我本躬耕人。出遊偶索米，可笑黠鼠技。

窺測憑管蠡，談笑橫逆消。自反我有禮，事過不留影。片心照清泚，有花勤入眼。有詩急郵遞，恨無驚人句。負此華光美。

崇效寺看牡丹

芳姿百本耐春寒，春思如環未有端。獨對花前成悵悵，來時已計去時難。

贈亮超澹人賢伉儷

雨後輕塵軌不驚，園林砥道待君行。一雙裙屐矜瀟灑，三五蟾蜍恰滿盈。但願唱隨歌馘佩，無爭聰穎誤公卿。吾生樸樹差堪比，懶以榮枯換性情。

答澹人

君家姊妹多相稔，翰墨惟君振。有聲不必署，稱詩弟子卽。論夫黨已先生。

值日到部不見一人對菊理舊作題詩一絕句而去

官衙家官書少且續殘，詩當辦公入座秋。光高士韻辦公室列霜菊十數盆起予鄉思到籬東。

蒲齋寄書備道清貧狀況爲作惡累日寫長句兩首寄之

開函作惡報章遲款段京華不可騎猿鶴呼飢懷舊侶烏鳥集苑乏高枝枯槁俯仰吾何取南北分馳路
審歧準擬翩隨去雁匹園園裏下書帷

每念蒲齋鬱寂寥孤行似我朽難彫客居起早噴僮僕子職中年曠夕朝隴畔何曾輕燕雀枝頭可笑共
鷓鴣不材到底成樗櫟眼看原田莠正驕

除夕雜詩

殘年剩得幾勞歌三兩相將廠甸過書價不廉佳本少且從我友醉顏酡
人心應爾無須怨天道微茫未足尤但使羽毛能愛惜布衣端不藉公侯
貂裘不作胭脂走旅館寒燈畏見他喜汝先期能約我今年除夕不輕過
何曾撲滿都傾倒等是糝糠判後前我輩不材天所有無災無難過殘年
再書事兩首由電話約逸雲新年天津一行

昏昏嗜睡吾將病兀兀西鄰醉淥醺目想斯人如一出更闌炳燭劇清醒
斯人去矣春無色黯黯王城鬱暮雲室遠崇朝會可至與吾同調厥惟君

病酒吟

應弦豈曰有遺聲惡酒如何得病醒聽說詩人都解飲連宵強酒誤貪名

雜言一首視逸雲

日日呼儔倒酒卮，東方囊粟恐難支。須知近市囂塵地，住與貧兒總不宜。

會館梨花已含蕊，屈指花發余亦回閩矣。

客子光陰花事裏，當春別理上心來。梨花似欲留人住，故意遲遲不肯開。

同永澄遊中央公園，日斜歸寓，視永澄叔楮並寄俶田福州。

王城有公園，老柏蔽蒼蒼。柏下此傾談，共享好晴光。太清着片雲，我心潔秋陽。柏影漸覺移，日影到衣裳。亦有水一泓，臨流非濛梁。羌無山一邏，望秋共徜徉。我家小西湖，未讓西子粧。環湖面皆山，湖水頗汪汪。照水好看山，直欲老是鄉。京華冬歷春，夏五促歸裝。叵耐天氣惡，毒蚊肆披猖。白日伏紗櫺，未敢穎出囊。湖上夜稅駕，信風漾輕航。科頭臥船上，觀象數心房。有月湖自佳，無月湖亦良。此心如嬾雲，只合長卷藏。此身如倦鳥，未堪遠翱翔。祇因重然諾，長安復啓行。長安仍弈棋，飲熱藥病狂。覷面認鬼魅，聒耳沸螭螳。強聒而與語，蹙頰如探湯。作詩洗煩熱，服散差清涼。

世間

世間何物非光影，色色空空去不停。豈白涅磨緇磷否，須知敢醉在能醒。

菊花盛開約次公叔楮寓中小飲已未

賞心樂事寧須遠，客舍秋光逐日新。有酒盈尊宜酩酊，無詩對菊欠精神。驕人貧賤狂兼狷，總角交情老更親。不與林花同墜瀾，祇緣性不慕飄茵。

題長安街新居己未

庭除寬廣如吾意，好把諸花密密栽。密裏能呈疏達氣，安排要仗出羣才。

艾軒贈詩索和次韻

頗有東菑黍可炊，出遊原不爲調飢。侏儒臣朔差無幾，且作長安居易詩。

擔民將回閩酌之酒樓索詩贈行越二日始成

別酒不爲歡吟詩，更覺難莫誇長九尺。守分飽三餐，索句吾無已。填詞子易安，君工詞學飛鴻留指爪。離思任

闌珊

十二月二十三日獨上江亭看雪寄孟玉丁巳

涼涼踽踽此登臨，不盡酸寒獨客心。八表同雲凝不散，更教暮雪助清吟。

幾僧掃雪開蹊逕，迎笑詩人有好題。七載江亭泥上迹，披簑戴笠悵東西。

月夕花晨例作詩，詩成滿紙寄離思。滄浪又對西山雪，老矣先生換鬢絲。

元旦試筆戊午

無人舉手起沈疴，鶴唳風聲慣聽佗。除却吟詩忙底事，酒家近市飲朋多。

寄婦

捉將官裏到而今，世故茫茫總未深。柳帶遙知隨意結，花叢已減少年心。依然明月思千里，先把家書斷

萬金歸思濃於春釀酒爲君炳燭寫勞吟

無端又嘔血數口率成一律

息偃又於牀心焉數故鄉骨酸思婦撫詩就乏朋商索米同方朔清齋學太常寒宵悽不寐冷澹畏燈光
寄故山友人

寒宵愀不寐披衣有所思牕外月亭午斗杓漸漸移莽蒼天甚醉清虛心則夷惡聲來啼雞似愧我伏雌
亦思陳所願嘔嚙拙言詞亦思學奔競趨起脚力疲捷足拔蝥弧誰令爾來遲積薪居廡下各自暱其私
以我廁其間散材誰則知

散材夫如何我拙姑善藏世人訾我知短處卽我長人惟不自愛奢願求畢償始貪邪無道四維弛不張
甘謂魚爲龍甘爲虎作倂豈知願未償顛趾身已僵卽使願苟償及身罹天殃何如但操鋸亦得粟一囊
燕雀賀大厦鴻鵠不應召高飛避羅網免爲蟻蝨弔惟人有十等等自相肖臺與僕隸質墜地不可療
碌碌因人者倚勢發呼嘯譬彼牛馬走銜策惟所詔豈知蹇數夫命宮宜屢醮老熊寒貉子鶩鷓嚇南鷄
可笑羣胡孫愕胎噤張跼蕪穢田必治枯木魅畢照北風旦夕起一炬看野燒

除夕書事寄永澄

歲闌多病念鄉井駸駸體氣吾就衰細君連日書疊至啓行就我春爲期書中刺刺言不盡丁寧獨客非
所宜答言沈沈天昏黑爛柯誰復看圍棋危邦不居逝去汝不爾亦合孫言詞腹誹偶語犯例禁義形於

色招嫌疑籩條戚施爲上客媵媵脂韋主幄帷由來婦女貴從一不祥人孰如汝鬻先夫雖當果無害的
盧妨主安可騎試思神器已破碎縱有大奸難伺窺墨明狸蒼寧能久酒酸狗猛將害誰高墉伏寇已在
室蕭牆禍起防邊陲

京華是我舊遊地茲行豈爲飢所驅名爲宦途類巧者看遍小人盜穿窬虎頭燕領相何有羊胃狗尾紛
塞途豈知廟食出僞命虎已無威何有狐秦庭申胥空碎首不臘神不歆爾虞巖巖下民具爾瞻汎汎我
是水中鳧行將歸去求我友億中貨殖窮錙銖

同賞素永澄步月南公園作丙辰

卸裝未煖席疾書招我友惠然遂塵至洗我塵以酒城南有公園夾道扶官柳官柳未成陰官道砥可走
園亭不知名佇月離立久爲歡能幾何白駒隙過牖一官隨雁鶩稻梁飽何有陶江有敝廬陂池接田畝
卽此足徜徉何不老株守多爲數首詩亦可博不朽國事禁治絲善射未勝耦朝爲施衿女暮爲下堂婦
築室聚羣昏立苗不勝莠乾元當再造萬牛幾回首時事不可談談之血上口只許談風月不談杯在手

人日鄉思殊濃對花有作寄師葛福州

瓶花稍殘宜遣去漫將憔悴亂生意憶昔故鄉購骨董各樣蠶瓶案頭置四時花草瓶中供一朵心花抑
恣肆頻年人日客他鄉豈徒雁後惱人思花發已覺百不權花殘更重兀兀醉遣去殘花收却瓶澄清念
慮瞑目試那知念慮不可平自是不歸將誰對

焦山看月至旦

下弦月出遲約略夜將半松寥閣下坐待月拚待旦月隨潮汐生水本江海貫長風萬里來水月一色亂
明月滿天下觀止此興歎江輪至海上江火疏兩岸始防倦思生繼喜睡魔竄忽忽竟月午行見東方粲

沈觀冕

觀冕字冠生福建侯官人京師大學畢業生官禮部主事

石遺室前新鑿小池詩以落之用東坡獨樂園韵

雨聲來庭間泉聲來屋下池上有溝雨時環舍溜悉池旁盛花竹不數小秀野秀野京寓小吳興有彌

甥時來侍杯罍聽泉得幽趣看竹忘長夏主人老吟詠賓客多風雅詩事久荒寒招邀偶結社里中諸社

請為憶自十年前几杖從長者雖媿朱芷梁衆黃秋岳岳索句亦不寡法源松栝蒼崇效牡丹冶城南花事新

主盟遊讌喧車馬歸來罕文酒結習久割捨偶然呈近詩獎借面深赭觀冕呈近作還期藉風力一振寒蟬啞

石遺舅祖命題匹園皆山樓

武昌歸借園樓住庚子舅祖自武昌避亂歸借舅祖母蕭夫人今日樓成願稍遠舅祖母嘗言願築樓數

翫月興高容老子樓成舅祖自撰楹聯有戴花影在閉空幃舅祖母額所居曰戴花小池題詠前遊乍秀

野林亭舊夢非比似環滁山色好望中文筆翠依微

舅祖母新阡在西郊文筆山

聞湖上桃花盛開

先生石遺舅祖昨日泛湖回湖上新桃枕水開喜說春寒未微熱無人解爲看花來

是日湖上遊人甚少

螺洲道中

青山和雨入微茫老樹經冬更鬱蒼記取江鄉好風景橘香過後菜花香

西園招飲冶亭秀淵肖潔招飲宛在堂均因事未赴賦謝並呈石遺舅祖

月泉社事已成塵正始風流要有人一老海濱憂殖落座中掌故關清新湖堂池館留連日酒榼詩笈浩

蕩春辭病相如吾未敢夕陽蕭寺淚酸辛

兩次之約余均在西林寺爲先室營齋

春盡日石遺舅祖召飲賦謝

園林暖日散纖塵爛漫風光入座新五字曾酬前度句

去年春盡日舅祖曾作五絕十首

草堂忍憶舊時人舅祖京寓小秀野草堂每

於春盡日召門人宴飲今芷青墓木拱矣梧桐葉響疑聞雨池館燈明又送春剩著一詩留勝事年華眼底是庚申

秋日吳氏草堂

滿池蓮葉露珠盤葉面蓮花似牡丹

牡丹心無房大如牡丹奇種也

頗喜園林蕭瑟裏平分秋色作春寒

禿柳枝疎墜綠煙萍中山影水中天草堂可似江南好欲問春申老鄭虔

蘇戡丈有江南吳氏草堂絕句

吳鐸

鐸字鐵庵號師晦福建侯官人官學部主事

半野軒社集

柴門雖設却常關花竹蕭疎相對閑城市山林原一樣綠陰深處卽深山
林深不斷四時花荔子紅邊是我家讀罷黃庭無一事戲將爐鼎煉丹砂

冬日招社人飲半野軒

盤殮閉戶差兼味老圃池塘足取資未免豚蹄抱奢望詩人一飽可無詩

張宗楊

宗楊號楞岩福建侯官人有鄰岩書屋詩

石遺室詩話宗楊隨余二十年山水之遊無役不從能爲胡釘鉸詩海內詩老鄭海藏梁節庵
夏劍丞諸公皆譽之如揭曼碩之有鄰福也余亦用竹垞明詩綜例錄其近雅者

九日登江亭憶山中弟妹

白酒香時菊又黃，重陽佳節倍思鄉。
隨人作計數千里，獨客登高一十霜。
應候朔南輸去雁，由來風雨阻聯床。
孤雲已斷時已猶蓬轉，空上金臺望太行。

病起呈醫隱廬老人

醫隱先生天下無，留我醫病住其廬。
兼旬臥病只數藥，手到而我病魔除。
病起尋詩林下行，一廬春物樂于子。
牡丹芍藥大于椀，石榴玫瑰紫與朱。
桃花杏花蚤飄謝，葡萄結子纍纍珠。
榆錢滿地春已去，惜春好鳥空相呼。
花中有亭可列坐，最宜挈榼兼提壺。
汲井終日轉轆轤，微雨之後宜揮鋤。
數畦藥圃一灣蘆，恨我病後詩腸枯。

畏廬老人贈畫竹長句爲謝

畏廬老人推善畫，錫我一幅碧琅玕。
供我臥遊，獨我疾清風，恍覺生夏寒。
我家此物生亂山，別後未卜能平安。
家弟不愛竹常伐而鑿之安得有此畫，中樓煮茶聽雨來凭欄。

九日和主人天甯寺登高之作次韻

蕭瑟秋忽晚，景物俱變衰。
客中何寂寥，畸人思東歸。
重陽好天氣，晴暉風力微。
迢遞望故鄉，鄉情總牽羈。
居守不出遊，閉門獨詠詩。
喬木脫將盡，矮菊尙未開。
昨夜微霜落，淒淒壓蒿萊。
西山當此時，紅葉正美哉。
故園弟與妹，尺書絕不來。
天寒賴有酒，日日醉霞杯。
愁我多疾病，顛顛鬢髮摧。
舊人半銷磨，舊事徒傷懷。

往年登高處，蟲蠹隣霄臺。太息屢爲客，渡海還幾回。

冒雨隨主人小雄山觀瀑夜宿聽水第二齋

出遊每遇雨，雨甚瀑乃雄。晨興出南城，一江雨微濛。百里入南港，雨勢尤洶洶。冒雨緣谿行，草木何蒙茸。路盡繼以砮，數厲路乃通。暝色不見磴，但見飛白龍。秉炬上山樓，更衣付熨烘。當時王山人，鑿崖潭之東。潭上有一凹，削古崖寬可數。檀乃王友石，山人居此所鑿。於今六百年，顏色變古銅。襍被臥其下，夏寒如季冬。飛瀑入龍潭，其聲若洪鐘。亂山何所有，毛竹無終窮。

五月七日遊方廣巖夜宿巖下古寺作

昨日遊小雄，今日遊方廣。昨日雨潺潺，今日天晴昶。買舟過瀨下，赤壁足瞻仰。喚輿度葛嶺，石磴緣澗上。舍輿捫壁行，山路最窄處輿不得過旁勿怯宜勇往。石隙入蒼崖，林密如績紡。寒泉作珠簾，縣流幾十丈。崖底深而闊，岩頂高且敞。其中嵌古寺，層閣人意爽。夜氣山風清，林表新月朗。多事來山僧，一一指佛像。鋪席佛殿臥，靜聽珠簾響。

主人臥室前新鑿一小池成詩一百十字呈主人

室前一方庭，鑿之得新泉。其底本古井，並掘兩古甃。見池不見庭，四廊爲之堦。爲溝匯檐溜，於簷前爲溝待雨時匯諸檐溜迸瀉入池，池若瀑布然雨時一瀑。縣中夜，猛雨來臥聽。疑開先，舊在開先觀瀑池上竹。夏寒照泉尤，娟娟主人喜。觀水眠食此，留連主人喜。拭竹時拭求，青妍編詩坐池上。揮毫臨池前，繞池三面闌。照水雙月圓，臨池有一小室門爲月式尙當

築高臺登臨尤快然

病中寄醫隱廬老人兼憶鵝房山莊舊遊疊去年呈老人韻

病來氣力幾欲無未能寄詩醫隱廬主人寄書乞方去妙方一到病漸除

老人賜寄藥方數紙

秋光忽憶去年時鵝

房之遊樂于于蘆花千頃白翻雪霜林百里黃赭朱秋收處處盡豐稔穀米無復愁似珠築廬獨居水邨

老人於鵝房新築一廬常獨往居之

柴門剝啄誰相呼寒梅叢菊栽滿地肥鷄尺蟹宜提壺萬事不如田園樂老人健且

能荷鋤我家亦有田與蘆可憐不耕聽荒枯

周愈子詩人贈山水畫扇以詩報之

縣厓削壁何磊砢題詩見貽不鄙我山中寂寂無一人古木蒼蒼想合抱潺湲高澗支短橋一道飛泉出

林杪似曾身到畫圖中少日山居記草草今已倦游思臥游安得嘉陵寫蜀道

次韻和主人小西湖雨中詩社之作因憶聖湖舊游卽呈社中諸詩人

故山多詩人各有斲輪手湖濱作詩社例賦詩一首詩題乃卽景煙雨湖天黜我亦冒雨來俯仰尋詩久

主人好賓客

是日詩社東道乃鄭國奪先生

醉我香醪有詩龜在何許所剩但培塿連夕寒吹厲敗葉盡紅薄感此憶舊

游舊侍主人冒雨遊杭州西湖亦十月時也

寒噤心上陡今年盛詩社明歲依然否聞將築宛在

時宛在堂將興工矣

吟嘯驚戶牖

正月十三日侍主人廊前看雪主人命作

曉起開門何所見失喜瓊瑤作庭院千林萬樹總一色不辨槐榆椿棗棟山礬丁香開蚤春楊李梨花飄

入硯主人老健不畏寒
共立廊前看白戰
皚皚靜院竟日飛
恨不如掌落片片
昨日暘和今日凍
人世滄桑如此變

一架

一架朱藤滿架花
寓齋春色頗繁華
最宜小作飛英會
點點當栢落紫霞

病中遣懷一首

繞屋扶疏入夏初
鳥聲無數似山居
年來客裏還多病
斗室繩床臥看書

得棣生先生書因病久未答客詩奉懷

故鄉別來又一年
捧讀先生書三四
豈知別後日臥病
問候起居無一字
蹉跎荏苒過一春
飛盡繁花飛盡絮
而今病起春久歸
繞屋千林已蒼翠
故鄉忽憶去年秋
結社湖西雨中寺
我覓籃輿迓主人
予我酒肉比焚噲
青鞵布襪陷泥滓
貪看雨湖忘趨避
先生詩句寫雨景
彷彿兩峯插雲氣
比聞高齋花盛開

海棠盛開

恨不得侍先生醉
醉中月夜橫琴彈
能彈流水高山意
誰云日近長安遠
主人日望先生至

書

送寒碧樓詩人東歸

薊門相送東歸客
一夕飛車千里隔
飛車軋渡黃河看
盡千山萬山碧
春申林際放歸舟
浩蕩海鷗翻健翮
故鄉自有寒碧樓
高樹過簷百餘尺
樓中靜坐新歸人
夏日炎炎不知赤
主人亦正憶故山
叢竹小池足岸幘

竹

由來北地得君難，牆角居然挺百竿。映我紗窗侵筆硯，只差三面碧欄干。

戲題詩廬

西城夏木環扶疏，西江詩人中有廬。以詩名廬聊自娛，破牕斗室紙所糊。壁間磊砢集衆作，坐上詩伯無時無。城東城西隔咫尺，經句不見詩何如。

雨後雜書一首呈主人

朔方當盛夏，一雨堪重棉。此雨已經旬，如彼客留連。今日雨方止，洗出新月圓。葡萄積綠蔭，深竹浮翠煙。隔牆新柳垂短架，古藤綠樹底點螢。火樹頂鳴夜蟬，蝸牛滿欄檻。古篆何蜿蜒，因思大通河水漲，宜放船。因思十刹海，雨過當開蓮。主人好出游，我意殊亦然。昨欲游葦灣，所阻雨牽纏。此時我陶江，丹荔將新鮮。此時我李垞，桃李不論錢。但聞亦久雨，積潦淹稻田。

秋日懷無辯先生故山兼訊小西湖

無辯先生顏貌奇，頂若受戒稀鬚眉。日抱書卷爲人師，暇卽意行覓新詩。故山風景吟殆徧，欲向何處更吟之。先生往者結詩社，側聞談詩開我脾。一日張飲集湖上，秋陰如墨雨絲絲。我今入秋生萬憶，人散事往歸無期。先生一生無疾病，行吟眠食樂熙熙。湖西風物今更美，新種綠柳垂湖陂。瓜棚匝地水荳淨，一湖如鏡生涼颺。日斜飯飽定常往，如驀投金瀨之湄。

答疑始詩人

詩人候疑始贈我詩一篇愧我久未報日以塵事牽且久不作詩詩腸澀而堅搜索不成句屢屢廢宵眠
髣髴有詩魂繞裊青煙卽之仍無象不肯鳴其天我本山人識字祇眼前一字欲求安枯腸轉萬千

丙辰春暮海藏樓看櫻花兼乞詩字卽呈樓中老人

南歸此息裝春中之林際主人杭州遊客舍我獨睡聞說海藏樓櫻花開正媚來看已莫春花氣薰人醉
落英不忍掃妍與衆芳異江南獨此樓春景美無二樓中臥一老輕世而肆志偶逢乞字人問今果何世
我本漁樵者極知山水味故山隔咫尺風鶴阻歸轡主人若有樓眠食分餘地春去花雖殘閉門玩詩字

戊午展重陽寄題瑄江青芝山社卽視社中詩人兼呈天放先生

天放先生昨過我爲言青芝足探討荒蕪百洞已爬搔紅葉滿山秋色老山中此時最可遊遊人麇至瑄
江道瑄江有社集詩人石上題詩苔却掃屬我爲詩寄刻石不付江流去浩浩吾生本在山水間翫水看
山暮還早瑄江咫尺未得遊縣揣作詩豈能好

次韻答徐仲可先生枉贈之作

野人何敢附詩人幸識詩中老斲輪方麩偶書樵爨手錦囊常侍苦吟身屢邀名下紆投贈
先不棄民間有賤貧回首酒痕襟上在自嗟株守困南園

四月晦日和主人匹園觀瀑之作

夏劍丞胡詩
虛候疑始諸

徑作開先雙瀑看臥聞猛雨落檐端莫言城裏無邱壑只恐山中得也難

五月二十夜作

靜聽人家夜念經雨餘失喜見疏星滅燈坐待三更月風送飛螢入小庭

哭宗鎮弟

弟於四月六日赴興化楓亭就權局事十四日至廿日臥病廿四日逝痛哉

人生孰無死汝死太迅速別我纔旬餘一往竟不復回憶去年冬我園方卜築汝時正賦閑結構煩汝督

度地商諸匠移花更移竹我時局事繁

時余在通志局司會計

對床偶過宿輒話謀生難何時穩啜粥山中貧且寒

數間但破屋田園蚤典盡實難於立足隨人去作計只圖得果腹孰知癘瘴惡奪去吾骨肉魂兮早歸來

栖我烏山麓

汝年方壯盛汝體乃多疾頻年客困關亂世無安逸一昨往涵江臥病纔四日柴桂皆無功犀角誤醫術

病時先服柴桂後服犀角而命亡

書言端陽歸豈料忽然卒逝矣不首邱悔恨那堪述

行滕出南城道中雨溼溼扁舟抵涵江騎馬入楓亭亂山瘴氣多染之病不醒可憐死便埋一棺委郊垆

其東人爲葬於楓亭

